

# ЎЗБЕК СОВЕТ АДАБИЙ ТАНҚИДИ ТАРИХИ

ЎЗБЕҚИСТОН ССР  
ФАНЛАР АКАДЕМИЯСИ

ЎЗБЕК  
СОВЕТ  
АДАБИЙ  
ТАНҚИДИ  
ТАРИХИ



ИККИ ТОМЛИК

*ЎзССР Фанлар академияси  
мұхбір аттоси И. СУЛТОНОВ  
тахрири остида*

ЎЗБЕҚИСТОН ССР  
«ФАН» НАШРИЁТИ

А. С. ПУШКИН НОМИДАГИ  
ТИЛ ВА АДАБИЕТ  
ИНСТИТУТИ

ЎЗБЕК  
СОВЕТ  
АДАБИЙ  
ТАНҚИДИ  
ТАРИХИ



БИРИНЧИ ТОМ

ТОШКЕНТ — 1987

Ушбу томда Узбекистонда 1917—1956 йилларда марксча-ленинча адабий танқиднинг туғилиши ва ривожи жараёни тадқиқ этилади. Унда ўзбек адабий танқидининг манбалари, унинг ривожидаги асосий босқичлар, уни шакллантирувчи асосий омиллар, ағабиётга марксча-ленинча таълимотнинг татбиқ этилиши, социалистик реализм танқидий эстетикасини ҳар тарафлама ўзлаштиришнинг йўллари таҳлил этилган.

Асар адабиётшуносларга, аспирантларга, шунингдек, олий ўқув юртлари филология факультетининг ўқитувчи ва студентлари мўлжалланган.

Тақризчилар:  
филология фанлари доктори С. МАМАЖОНОВ,  
профессор О. ШАРАФИДДИНОВ

У 4603010202—3584  
М355(04 )—87 179—87

©Узбекистон ССР «Фан» нашриёти, 1987 й.

## ИНСТИТУТДАН

1987 йил — совет халқи учун жуда муҳим сана. Бу йилнинг ноябрида Улуф Октябрь социалистик революциясига етмиш йил тўлади.

«Бу ... кўп миллатли социалистик давлатимиз халқларининг тақдири учун бурилиш аҳамиятига эга бўлган умумий тарихимизнинг катта воқеасидир. Бу — XX асрнинг бутун жаҳон жараёнига жуда катта таъсир ўтказган энг буюк воқеасидир.

Мамлакатларимиз халқлари ўз курашини якунлар экан, дунёга айта оладиган гаплари бор, таъкидлай оладиган, фахрлана оладиган, тарих тарозусига қўя оладиган ишлари бор, бу — аввало ҳаммамизнинг муштарак құдратли замонавий давлатимиз, социалистик йўлни танлаб олиб, эришган сиёсий, иқтисодий, социал ва маданий ютуқларимиздир»<sup>1</sup>.

Шубҳасизки, СССРнинг биродар халқлари иттифоқида яшаётган ва ривож топаётган ўзбек халқининг совет даврида эришган улуф маданий ютуқларидан бири — ўзбек социалистик реализм адабиёти ва марксча-ленинча адабий танқиддир.

Шу вақтгача ўзбек совет адабиётининг тараққиёт йўлларини ва унинг оламшумул ютуқларини ёритувчи бир қанча илмий тадқиқотлар яратилгани совет жамоатчилигига яхши маълум. Тўрт томдан иборат «Ўзбек совет адабиёти тарихи» шулар жумласидандир.

Аммо адабий-тарихий жараённинг ажралмас бир қисми бўлган адабий танқиднинг туғилиши, ривожи тарихи ва якунларига бағишланган яхлит асар ҳануз яратилмаган эди.

Ушбу икки томлик «Ўзбек адабий танқиди тарихи» маданий ҳаётимиздаги шу камчиликка барҳам бериш

<sup>1</sup> Латвия ССР партия, совет ва хўжалик активлари билан учрашувда М. С. Горбачев нутқи//Совет Ўзбекистони. 1987. 21 февраль.

йўлидаги биринчи қадамдир. Асар Ўзбекистон ССР Фанлар академияси қошидаги А. С. Пушкин номли Тил ва адабиёт институтининг адабиёт назарияси ва адабий танқид бўлими илмий ходимлари томонидан ёзилди.

Янги ва масъулиятли вазифани адо этиш йўлидаги биринчи қадамнинг баъзи камчиликлардан холи бўл-маслиги табиийдир. Шу билан бирга, юртимизнинг муборак юбилейи йилида ўтмиш самараали тарихий йўлнинг энг муҳим якунларини ясаш ҳам катта аҳамиятга эга. Бу якунларнинг бири — Ўзбекистонда марксча-ленинча адабий танқиднинг энди мавжудлигидир. Бу асарнинг мақсади — ана шу жуда муҳим маданий ҳодисанинг энг муҳим қирраларини ёритиб беришдир. Буни эса совет жамоатчилиги, айниқса ўрта ва олий мактаб ходимлари интизорлик билан кутмоқда.

Институт ушбу «Ўзбек совет адабий танқиди тарихи»ни кенг жамоатчилик муҳокамасига қўйиб, танқидий мулоҳазаларни ҳисобга олиш йўли билан яна ҳам мукаммаллаштириш ниятида чоп этади.

ЎЗБЕК  
СОВЕТ  
АДАБИЙ  
ТАНҚИДИНИНГ  
ТУҒИЛИШИ  
ВА  
ШАКЛЛАНИШИ





# КИРИШ

## АДАБИЙ ТАНҚИД ТАРИХИНИ УРГАНИШНИНГ МЕТОДОЛОГИЯСИ ВА МЕТОДИКАСИ МАСАЛАЛАРИ

Адабий танқид тарихини ўрганишнинг методологиясига доир. Совет жамиятининг тарихида янги даврни очган КПСС XXVII съездидан бундан кейин тез ривожимизда ижтимоий фанларнинг, санъат ва адабиётнинг катта роль ўйнаши лозимлигиги ни уқтириб ўтди. Совет Иттифоқи Коммунистик партиясиning Программасида қайд қилинишича, «Партия мамлакатни социал-иқтисодий ривожлантиришни жадаллаштириш учун маркса-ленинча идеологиянинг ўзгартирувчи кучидан тўла-тўқис фойдаланиш, совет кишиларини гоявий-сиёсий, меҳнат билан ва ахлоқий тарбиялаш, ўзида маънавий бойликни, ахлоқий покликни ва жисмоний муқаммалликни мужассамлаштирган, ҳар томонлама камол топган, ижтимоий жиҳатдан фаол шахсни шакллантириш йўлида событқадам иш олиб бориш учун барча зарур чораларни кўради»<sup>1</sup>.

Совет жамиятининг ҳаракатини жадаллаштириш учун ишчанлик айниқса зарур эканини қайта-қайта уқтирган XXVII съезд ижтимоий фанлар олдига ҳам конкрет амалий вазифалар қўйди. XXVII съезднинг КПСС Марказий Комитетининг Сиёсий доклади юзасидан революциясида айтилишича, жамиятшунослик соҳасидаги тадқиқотларнинг марказига жамиятимиз тараққиётини тезлаштиришдан, уни сифат жиҳатидан янги ҳолатга эриштиришдан иборат туб вазифалар қўйилиши зарур. Ҳаётнинг талабларига ижтимоий фанларнинг дарҳол жавоб бериши, практика учун асослаб берилган прогнозлар ва конструктив тавсиялар ишлаб чиқиш таъминланиши керак.

Ўз-ўзидан маълумки, бундай муҳим вазифалар совет маданияти, фани, адабиёти ва санъати тарихини тубли

<sup>1</sup> Совет Иттифоқи Коммунистик партиясиning Программаси (Янги таҳрир). Тошкент. 1986. 60-бет.

ўрганиш, ундан бугунги кун учун амалий аҳамиятли ху-  
лосалар чиқара билиш асосидагина тўла муваффақият-  
ли бажарилиши мумкин. Совет даври адабий танқиди  
тарихини ўрганиш ҳам, шубҳасиз, бу вазифанинг тўла  
адосига хизмат этади.

Ҳамма ижтимоий фанлардек, адабий танқид тариҳи  
ҳам (агар у ҳақиқий фан бўлишни истаса), марксизм-  
ленинизмнинг инсоният жамияти, унинг ривожланиш  
қонуниятлари ҳақидаги, шу жумладан, жамият ҳаётида  
инсон онги ва унинг бадиий ижоди маҳсулотлари роли  
ҳақидаги таълимотига асосланиши керак.

Бу ўмумий қоидани адабиётшунослик илмининг аж-  
ралмас бир қисми бўлган адабий танқидга, унинг та-  
рихига татбиқ этиш пайтида қўйидаги жуда муҳим мо-  
ментларга алоҳида эътибор бериш лозим.

Бадиий адабиёт жамиятнинг конкрет тарихий ша-  
роитда ривожи маҳсулоти сифатида туғилади. Бу ша-  
роитлар орасида моддий ишлаб чиқариш усули ҳал  
этувчи роль ўйнайди. «Моддий ҳаётни ишлаб чиқариш  
усули умуман ижтимоий, сиёсий ва маънавий ҳаётни  
белгилайди. Кишиларнинг онги уларнинг борлигини  
белгиламайди, балки, аксинча, уларнинг ижтимоий  
борлифи уларнинг онгини белгилайди»<sup>2</sup>. Бу фикрни,  
демак, ҳамма нарсани жамиятнинг моддий бойликларни  
ишлаб чиқариш усули ҳал этар экан, деган маъ-  
нода тушуниш хатодир. Бундай тушуниш—вульгарлаш-  
тириш, бачканалаштириш, саёз фикрлаш натижаси бў-  
либ, аслида марксизм-ленинизмга тамоман зиддир.  
«... Тарихни материалистик тушунишга мувофиқ, ҳақи-  
қий тарихий процесс (жараён)да ҳал қилувчи момент  
оқибат натижасида ҳаётни ишлаб чиқариш ва такрор  
ишлаб чиқаришдир,— деб ёзган эди Ф. Энгельс.— На  
мен, на Маркс ҳеч қачон бундан ортиқ фикрни айтгани-  
миз йўқ. Агар бирор киши бу фикрни гўё иқтисодий  
момент — бирдан-бир ҳал этувчи моментдир, деган маъ-  
нода бузиб тушунтиурса, у вақтда бу фикр ҳеч қандай  
нарсани англатмайдиган, абстракт, маъносиз иборага  
айланаб қолади»<sup>3</sup>.

Марксизмнинг бу қоидаси адабий танқид ва унинг  
тарихчиси зинмасига бадиий ижоднинг ҳамма масала-  
ларини жамиятнинг ҳаёти, унинг моддий ва маънавий  
бойликларни яратиш йўлидаги кураши билан боғлаб

<sup>2</sup> К. Маркс ва Ф. Энгельс санъат тўғрисида. Иккى томлик. Тош-  
кент, 1975. 1-том. 85-бет.

<sup>3</sup> Ўша асар, ўша том. 93-бет.

ўрганиш ва тушунтириш вазифасини юклайди. Бино-барин, ўзбек совет адабий танқиди СССР халқари-нинг коммунизм учун кураши жараёнида, коммунистик меҳнатнинг ғалабаси жараёнида эришилган ютуқлар билан узвий алоқада, уларнинг оқибат натижасида ту-филган ва ривож топган катта маданий ҳодиса сифатида таҳлил этилиши лозим.

Марксизмнинг бу қоидаси адабий танқид ва унинг тарихчиси зиммасига маданий ҳодисаларни вульгарлаштиришдан қочиш, жамиятнинг иқтисодий аҳволи билан унинг маънавий бойликлари орасида бевосита алоқа ахтаришдек хатога йўл қўймаслик вазифасини ҳам юклайди. Марксизм асосчиларининг фикрича, жамият ҳаётидаги моддий базис билан унинг маънавий устқурмалари орасидаги алоқа бевосита эмас, балки жамиятдаги синфий қураш жараёни орқали, билвосита намоён бўлади: «Иқтисодий аҳвол — базисдир, лекин устқурманинг турли моментлари, яъни синфий қурашнинг сиёсий формалари ва бу қурашнинг натижалари... тарихий қурашнинг боришига таъсир қиласи ва кўпинча бу қурашнинг формасини асосан белгилаб беради. Ана шу моментлар ҳаммаси бир-бирига таъсир этади»<sup>4</sup>.

Демак, адабий танқид тарихи ҳам жамият тараққиётининг турли босқичларида бадий адабиётнинг ва адабий танқиднинг синфлар қурашида, идеологик соҳада қандай роль ўйнаганига алоҳида эътибор бериши керак.

Бадий адабиётнинг жамият ҳаётида актив роль ўйнаши ҳақидаги маркеча-ленинча таълимот адабий танқид тарихини ўрганишининг энг муҳим дастуриламалларидан биридир. К. Маркс ва Ф. Энгельс бадий ижоднинг жамият тараққиётida катта роль ўйнашини доимо уқтириб боргандар. Бадий ижоднинг ижтимоний роли айниқса ижодкорларнинг жамият ҳаётида ўйнаган ролида жуда яққол намоён бўлади. К. Маркс ва Ф. Энгельс бу ҳодисани, Европада Ўйғониш даврида етишган буюк сиймолар мисолида жуда яққол кўрсатиб берган эдилар. Бу буюк сиймолар фаолияти ўз даврининг маҳсулоти бўлибина қолмасдан, шу даврда жамият тараққиётida жуда катта ўрин тутади. «.... Улар учун энг характерли нарса шуки, уларнинг деярли ҳаммалари ўз замонларининг фиж-фиж манфаатлари орасида ҳаёт кечирадилар, амалий қурашда қизғин иштирок қиласидилар, у ёки бу партия томонига ўтиб, бири сўз ва

<sup>4</sup> Уша жойда.

қалам билан, бири бўлса ҳам қалам, ҳам қилич билан кураш олиб боради»<sup>5</sup>. В. И. Ленин Лев Толстойнинг асарларини «Рус революциясининг кўзгуси»<sup>6</sup> деб аташ билан бадиий ижоднинг инсоният ҳаётида ўйнаган ролни жуда ҳам аниқ ва мукаммал таърифлаб берган эди. Адабий танқид тарихи фақат адабиётнинггина эмас, адабий танқиднинг ҳам жамият ҳаётининг ҳар босқичида қандай роль ўйнаганига эътибор беради. Бунда ҳар бир танқидчида гражданлик бурчи ҳисси қай даражада эканини аниқлаш ва унинг адабий жараёнда иштирок даражасига баҳо бериш ҳам жуда муҳимдир. Шуни ҳам эсда тутиш керакки, жамият ҳаётида актив роль ўйнаш ёзувчи ва танқидчининг адабиёт тараққиётига қўшган ҳиссасини тайин этибина қолмасдан, балки ёзувчи ва танқидчини ўз соҳасининг баркамол вакили қилиб етиштиради. Ахир, Уйғониш даври чамояндадарининг жамият ҳаётига «ҳам қилич билан, ҳам қалам билан» аралашуви уларнинг маданий арбоблар сифатида шаклланишини таъмин этган эмасми? «Уларни баркамол кишилар даражасига етказган характер етуклиги ва кучи шундан иборат».

Бадиий адабиётнинг (демак, адабий танқиднинг ҳам) чијтимоий ҳаётда жуда катта роль ўйнашини тан олиш ва янги, революцион воқеаликнинг актив иштирокчилигига буни тушунтириш зарурлиги В. И. Ленин томонидан «Партия ташкилоти ва партия адабиёти» каби гениал асарнинг ёзилишига сабаб бўлди. Октябрь социалистик революциясидан анча илгари ёзилган бу асарда В. И. Ленин социализм ва коммунизмнинг ғалабаси учун кураш даврида яратилиши лозим бўлган адабиётнинг хусусиятлари ва вазифаларини гениал равишда олдиндан тайинлаб берди.

Аслини олганда, кўп миллатли совет миллий адабиётларининг ва унинг ажралмас қисми бўлган адабий танқиднинг тарихи — совет ижодкорлари фаолиятида маркса-ленинча принципларнинг шаклланиши ва ғалабаси тарихи демакдир. Шунинг учун ҳам совет даврининг адабий танқиди тарихи адабиёт тўғрисидаги маркса-ленинча таълимотнинг ва бу таълимот асосида КПСС томонидан ўзлаштирилиши даражасига қараб, адабиётнинг ва адабий танқиднинг ютуқларига ва камчиликларига баҳо беради. Бундай баҳолаш жараёнида маркс-

<sup>5</sup> Уша асар. 129-бет.

<sup>6</sup> Ленин В. И. Тўла асарлар тўплами. 17-том. 235-бет.

ча-ленинча таълимотнинг бадий ижодкорлар олдига қўйган вазифалари доимо мезон тарзида кўз ўнгидаги тутилади. Бу вазифалар айниқса В. И. Лениннинг «Партия ташкилоти ва партия адабиёти» (1905) асарида ва КПСС нинг идеологик масалалар ҳамда бадий ижодга оид ҳужжатларида жуда аниқ ифода этиб берилган.

«Адабиёт партиявиий бўлиши керак,— деб ёзган эди В. И. Ленин.— Буржуа ахлоқига қарши, буржуазиянинг таъмагир, сотқин матбуотига қарши, адабиётда буржуа шуҳратпарамастларига ва шахсиятпарамастликка қарши, социалистик пролетариат адабиёт партиявиийдир деган принципни олға суриши, бу принципни кенгайтириши ва уни мумкин қадар тўла ҳамда яхлит формада амалга ошириши керак.

Партиявиий адабиётнинг бу принципи нимадан иборат? Шундан иборатки, адабиёт иши социалистик пролетариат қўлида айрим шахс ва группаларнинг бойиши учун қурол бўлолмаслигидан ташқари, умуман адабиёт иши умумпролетар ишига боғлиқ бўлмаган хусусий иш бўлиши мумкин эмас. Битсин партиясиз адабиётчилар! Битсин ўзини кишилардан юқори тутган адабиётчилар! Адабиёт иши — умумпролетар ишининг бир қисми бўлиши керак...»<sup>7</sup>.

В. И. Ленин бадий адабиётни яратувчиларнинг фаолиятини халқ ҳаёти билан, унинг коммунизм учун кураши билан чамбарчас боғлаш зарурлигини тушунтириди. Унинг фикрича, янги даврда — коммунизм учун кураш даврида адабиёт ва санъат халқ оммасининг коммунизм тантанаси учун курашнинг ойнаси бўлиб қолиши ва бу курашга мадад берувчи зўр куч бўлиб хизмат этиши керак. «Бу адабиёт бутун инсониятнинг революцион фикрининг энг сўнгги ижодини социалистик пролетариат тажрибаси ва жонли иши билан бойитиб, унга ҳаёт бахш этадиган, ўтмиш тажрибаси (ибтидой, ҳаёлий формадаги социализмини охирига етказган илмий социализм) билан ҳозирги замон тажрибаси (ишичи ўртоқларнинг ҳозирги курашлари) ни доим бир-бирига боғлайдиган адабиёт бўлади»<sup>8</sup>.

Бу янги давр адабиёти (бизнинг кунлардаги терминология билан айтганда, социалистик реализм адабиёти) фақат мазмунни жиҳатидангина эмас, балки руҳи, пафоси, шакли билан ҳам меҳнаткаш халқقا яқин, унга

<sup>7</sup> Ленин В. И. Тўла асарлар тўплами. 12-том. 107—108-бетлар.

<sup>8</sup> Ўша асар, 112-бет.

тушунарли бўлиши керак. В. И. Ленин фикрича, «Санъат халқники. Санъат кенг меҳнаткашлар оммаси ичидаги чуқур илдиз отиши керак. Санъат шу оммага тушунарли бўлиши ва шу омма томонидан севилиши лозим. У омманинг туйғусини, фикрини ва иродасини бирлаштириши, оммани кўтариши керак»<sup>9</sup>.

Адабиёт ва санъат ривожининг бутун мамлакат ва давлат миқёсидаги ишга айлантирилиши бу ишга Коммунистик партия раҳбарлигини зарурий шарт қилиб қўяди. В. И. Ленин бадиий ижоднинг мураккаб жараёнини кўзда тутиб туриб, деган эди: «Равшанки, бизлар — коммунистлармиз. Биз қўлни қовуштириб туриб, чалкашликтининг хоҳлаганча авж олиб кетишига йўл қўймаслигимиз керак. Биз бу процессга батамом планли суратда раҳбарлик қилишимиз ва унинг натижаларини тартибга солиб боришимиз керак»<sup>10</sup>.

Бу ленинча кўрсатмаларни тарихимизнинг турли босқичларида бадиий ижод ва адабий танқид соҳасида қандай амалга оширила борганини ўрганувчи тарихчи шуни эсда тутиши керакки, В. И. Ленин адабиёт ишини социализм ва коммунизм учун кураш ишининг ажralmas бир қисми деб эълон этиш билан бирга, доимо унинг спецификаси (ўзига хослиги)ни эсда тутишга, уни сиёsatнинг бошқа соҳалари билан аралаштириб юбормаслиқка чақирди, ижодкорнинг эркини чегаралаш мумкин эмаслигини доим уқдириб борди: «Ҳеч шак-шубҳа йўқки, адабиётни шунчаки бир андозага, бир қолипга солиб бараварлаш, унда озчиликни кўпчиликка бўйсундириш ҳаммадан қийин. Бу ишда шахсий ташаббусга, шахсий қобилиятга, фикр ва хаёлга, форма ва мазмунга кенг майдон очиб бериш мутлақо лозимлигига ҳам шак-шубҳа йўқ»<sup>11</sup>.

Бадиий адабиётни яратувчиларга баланд баҳо бериш, уларни эъзозлаш ленинча таълимотнинг энг муҳим хусусиятларидан биридир. «Талантни қўллаб-қўлтиқламоқ керак» деб<sup>12</sup> қайта-қайта уқтирас эди Ленин. КПСС ҳужжатларида ижодкорнинг таланти — халқ мулки деб эълон этилди.

Талантнинг қадри у эришган ғоявий-эстетик чўққиляр билан тайин этилади. Ғоявийлик ва бадиийлик соҳасида адабиёт олдига энг баланд талаблар қўйиши — ленинча таълимотнинг характерли хусусияти ва КПСС

<sup>9</sup> Ленин маданият ва санъат тўғрисида. Тошкент. 1962. 577-бет.  
<sup>10</sup> Уша жойда.

<sup>11</sup> Ленин В. И. Тўла асарлар тўплами. 12-том. 108-бет.  
<sup>12</sup> Ленин В. И. Уша асар, уша том. 375-бет.

маданий сиёсатининг марказий масалаларидан биридир. Маълумки, В. И. Ленин, масалан, Лев Толстой каби буюқ ёзувчининг ижодини инсониятнинг бадиий ривожида олға томон босилган бир қадам тариқасида тавсифлар экан, буюқ ёзувчи ижодининг бир-биридан ажралмас икки фазилатига — замонанинг энг буюқ социал проблемаларини энг баланд бадиий савияда акс эттиришга — ургу қиласди. КПСС ўзининг назарий хужжатларида ва практик фаолиятида совет адабиётини юксак ғоявий-бадиий савияга кўтаришга алоҳида аҳамият беради. Масалан, КПСС нинг Янги Программасида дейилади: «Адабиёт ва санъат ҳалқ манфаатларига, коммунизм ишига хизмат қилиши, миллионлаб қишилар учун қувонч, илҳом манбаи бўлиши, уларнинг иродаси, туйғуси ва ўй-фикрини ифодалаши, уларнинг ғоявий баркамол бўлиши ва маънавий тарбияланишига актив ёрдам бериши зарур.

Ҳалқ ҳаёти билан алоқани мустаҳкамлаш, социалистик воқеликни ҳаққоний ва юксак бадиий савияда акс эттириш, янги, илғор нарсаларни жўшқинлик билан ёрқин очиб бериш ва жамиятнинг олға қараб ҳаракат қилишига халақит берастган барча нарсаларни эҳтирос билан фош қилиш — адабиёт ва санъатни ривожлантиришдаги бош йўналишдир»<sup>13</sup>.

Маданий ва адабий меросга муносабат масаласи — совет адабиёти ва совет танқидчилиги тарихида катта ўрин тутган жуда муҳим масалалардан биридир. Адабий танқид тарихчиси бу борада ўтилган тарихий йўлни кўздан кечирав экан, бу йўлдаги ютуқларга, камчилик ва хатоларга марксча-ленинча таълимот нуқтаи назаридан баҳо бериши керак. Бу таълимотнинг мағзини В. И. Лениннинг қўйилаги фикри тугал ифода этади: «Революцион пролетариатнинг идеологияси бўлган марксизм ўзининг оламшумул-тарихий аҳамиятини шу билан қозондики, марксизм буржуа даврининг энг қимматли ютуқларини асло улоқтириб ташламади, балки, аксинча, инсон тафаккури ва маданиятининг икки минг йилдан ортиқроқ вақт мобайнида ривожланиши натижасида вужудга келган қимматли нарсаларнинг ҳаммасини ўзлаштириди ва қайтадан ишлади. Фақат шу асосда ва шу йўлда олиб борилаётган ва пролетариатнинг ҳар қандай эксплуатацияга қарши сўнги курашидан иборат бўлган пролетариат диктатурасининг амалий

<sup>13</sup> Совет Иттифоқи Коммунистик партияси XXVII съездининг материаллари. Тошкент. 1986. 191-бет.

тажрибаси билан камолотга етказиладиган ишнигина чинакам пролетариат маданиятининг ривожи деб билиш мумкин»<sup>14</sup>. Тарихий ўтмиш, унинг маданияти ва адабиёти совет адабиёти учун энг камида икки жиҳатдан катта қимматга эга бўлади: ўтмишнинг энг яхши, илфор анъана (традиция)лари (ғоявийлик, ҳалқчиллик, юқори бадиий савия) янги, социалистик реализм адабиётининг ғоявий-эстетик арсеналини бойитади. Ҳалқ ҳаётининг энг ёрқин саҳифалари эса социалистик реализм адабиёти асарларида ҳаққоний акс эттирилганда катта тарбиявий аҳамият касб этадилар, тарихий воқелик коммунистик тарбиянинг қудратли воситаси бўлиб қолади.

Юқорида айтилганидек, адабий танқид тарихини ўрганишга аҳд этган ҳар бир тадқиқотчи бадиий адабиёт ва адабий танқид томонидан ўтилган тарихий йўлни кўздан кечирар экан, ана шу муҳим илмий ҳақиқатларга изчил равишда суюниб, иш кўриши керак.

Юқорида айтилганлардан адабий танқиднинг тарихий-адабий жараёнда тутган ўрни масаласи ҳам анча аён бўлади, аммо бу масаланинг «Ўзбек совет адабий танқиди тарихи»да марказий ўрин тутишини эътиборга олиб, адабий танқидчиликнинг ўрганилишига доир баъзи масалаларга алоҳида тўхтаб ўтиш зарурияти бор.

**Адабий танқид тарихини яратишнинг актуаллиги.** Марксистик адабиётшуносликтининг бир отряди сифатида ўзбек совет адабиётшунослигининг туғилиши ва балоғатга етиши — ўзбек ҳалқининг буюк Октябрь революцияси туфайли эришган тарихий ютуқларидан биридир. ўзбек совет адабиётшунослигининг туғилиши ва балоғату билан бирга ривожланиб келган ўзбек адабиётшунослиги, айниқса, сўнгги чорак аср давомида ўзининг юксак савиасини намойиш этадиган асарлар яратади. Аввал икки томлик «Ўзбек совет адабиёти тарихи очеркининг босилиб чиқиши (1961—1962), кейин Москва-да М. Горький номли Жаҳон адабиёти институти билан ҳамкорликда рус тилида «Ўзбек совет адабиёти тарихи»нинг (1967) эълон этилиши, 1968—1972 йиллар давомида уч томлик «Ўзбек совет адабиёти тарихи» ва сўнгги йилларда беш томлик «Ўзбек адабиёти тарихи» (Қадимги даврлардан Улуғ Октябрь социалистик революциясигача)нинг яратилиши, шунингдек классик ва совет адабиёти тарихининг турли даврларига, уларнинг энг йирик вакилларининг ижодига ҳамда адабиётшуносликтининг айрим назарий масалаларига бағишлиланган

<sup>14</sup> Ленин В. И. Тўла асарлар тўплами. 41-том. 376-бет.

кўпгина монографияларнинг ўқувчилар оммасига ҳадя этилиши ўзбек адабиётшунослигининг ютуқлариdir. Ниҳоят, икки томлик академик «Адабиёт назарияси»нинг яратилиши (1978—1979 йиллар) ҳамда республикамиз ўрта ва олий мактабларининг адабиёт тарихи ва назариясидан ёзилган маҳсус дарслклари билан таъмин этилганлиги — ўзбек адабиётшунослиги фанининг янги парвозидан гувоҳлик беради, унинг назарий изланишларини якунлади.

Ўзбек адабиётшунослигидаги бу ютуқларнинг ва кўтирилган баланд савиянинг яна бир аҳамияти шундаки, бу ютуқлар капиталистик мамлакатлардаги ғоявий оппонентларимизнинг ўзбек маданиятининг буғунги янги, юқори савиясини кўролмай тарқатаётган бўхтонларини чиппакка чиқаради. Бизнинг буғун ўз ўтмишимиздаги маданиятимизни ва шу жумладан миллий адабиётимизнинг Буюк Октябрь революциясидан аввалги тараққиёт йўлларини ўрганишга қодирлигимизга, унинг ютуқларининг қадрига ета олишимизга ва миллий адабиётимизнинг совет даврида эришган оламшумул ютуқларини баҳолай олишимизга боис шуки, ўзбек халқи коммунизм учун кураш даврида иқтисодий жиҳатдангина эмас, балки маданий жиҳатдан ҳам аввал кўрилмаган даражага кўтарилиб, дунёдаги энг маданий халқларнинг бири бўлиб қолди.

Совет жамоатчилиги томонидан кўп мартаба қайд этилганидек, маданиятимиз тарихини ўрганишдаги баъзи камчиликлардан бири — ҳануз адабий танқид тарихи мавжуд эмаслигидир. Ваҳдолонки, ўзбек совет адабий танқидининг бой ва самарали тарихий йўли — бундай тарихнинг яратилишига тўла асос беради. Адабий танқид тарихини ўрганиш юзасидан шу вақтгача қилинган баъзи илмий ишлар бу соҳада олға босилган дадил қадамлар бўлди ва адабий танқид тарихининг тўлиқ манзарасини яратишга буғун маълум даражада тиргак бўла оладилар<sup>15</sup>. Аммо танқид тарихидан ҳозиргача ёзилган илмий ишлар ҳали адабий танқид тарихи манзарасини бутунлигича яратишни ўз олдига вазифа қилиб қўйган эмас. Ушбу «Ўзбек совет адабий танқиди тарихи» ана

<sup>15</sup> Биз бу ерда биринчи навбатда X. Ёқубовнинг «Танқид ва адабиётшунослик тарихига бир назар» (Адабиётимизнинг ярим асри. Тўплам. 1-китоб. Тошкент. 1967), Б. Назаровнинг «Ўзбек адабий танқидчилиги. Ғоявийлик, метод, қаҳрамон» (Тошкент. 1979), Х. Умурновнинг «Ўзбек адабий танқидида маҳорат проблемаси» мавзундаги кандидатлик диссертацияси (1970) каби илмий ишларни кўзда тутамиз.

шу камчиликка барҳам беришни ўз олдига вазифа қилиб қўяди. Бу китоб танқидчилигимизнинг ривожланиш йўлларига ва айрим проблемаларига бағишиланган асарларнинг ютуқларини ҳисобга олиш билан бирга, биринчи марта ўзбек совет адабий танқидчилигининг тараққиёт йўлларини мумкин қадар тўла ёритишни ва ундан бугунги адабий ривожимиз учун зарур бўлган назарий хуносаларни чиқаришни кўзда тутади.

Бу вазифани қаноатланарли даражада бажариш учун даставвал қўйидаги масалаларни аниқлаб олиш лозим: адабий-тариҳий жараёнда адабий танқиднинг ўрни; адабий танқид предмети ва спецификаси; адабий танқид тарихини ўрганишнинг вазифалари; адабий танқидни ўрганиш методикаси; адабий танқид тарихига бағишиланган асарнинг структураси.

**Адабий-тариҳий жараёнда танқиднинг ўрни.** «Адабиёт ва санъат танқид билан қўл ушлашиб боради ва бир-бирига ўзаро таъсир кўрсатади»<sup>16</sup>,— деб ёзган эди В. Г. Белинский. Дарҳақиқат, ҳеч бир халқ ва ҳеч бир даврнинг адабий-тариҳий процесси (жараёни)ни адабий танқиднинг иштирокисиз тасаввур этиш мумкин эмас. Ҳатто айрим халқларда айрим тарихий даврларда адабий танқиднинг ютуқлари адабиёт ва санъатнинг ютуқларидан аввал майдонга келади, адабиёт ва санъатнинг ютуқлари учун назарий замин ҳозирлайди. Масалан, В. Г. Белинский фикрича (бу фикр унинг машхур «Танқид ҳақида нутқ» мақоласида айтилган), XVIII—XIX аср немис адабиётида танқидий фикрнинг ривожи кўп жиҳатдан бадиий адабиёт ва санъатнинг тараққиёт йўлларини аввалдан тайёрлаб берган. И. С. Тургенев жуда тўғри эътироф этишича, XIX аср рус адабиёти тараққиётида танқидчи В. Г. Белинский шу адабиётнинг энг кўзга кўринган вакиллари қаторида катта роль ўйнади.

Социалистик реализм адабиётининг тарихи ҳам буюк мутафаккирнинг ана шу ажойиб фикрини тасдиқ этади. К. Маркс, Ф. Энгельс ва В. И. Лениннинг адабиёт ва санъатнинг жуда муҳим масалаларига бағишиланган ва аслида адабий танқиднинг олий намуналари бўлган асарлари жаҳон танқидий реализмининг энг тўғри, мукаммал тавсифини бериш билан бирга, санъат ва адабиётнинг янги тарихий шароитдаги тараққиёт йўлларини олдиндан тайинлаб қўйдилар ва социалистик реализм адабиёти ва санъатининг туғилиши ва ривожла-

<sup>16</sup> Белинский В. Г. Танланган асарлар. Тошкент. 1954. 143—144-бетлар.

нишини кўп жиҳатдан олдиндан аниқлаб, ҳозирлаб бердилар; жаҳон адабий-тарихий процессини тўғри тушунишда ва янги, социалистик давр адабиётининг туғилишида Россиянинг илк марксистик олими Г. В. Плехановнинг асарлари ҳам катта роль ўйнади.

Шуни қайд этиш мумкинки, адабий танқиднинг узоқ ва яқин ўтмиш ижтимоий ҳаёти ва адабий-тарихий жараёнида катта ижобий ролини тушуниш ҳозирги замон ўзбек адабий танқидчилигининг муҳим хусусиятларидан биридир. «Ижтимоий ҳаёт ва адабий жараённинг шаклланишида адабий танқид тутадиган мавқеи — унинг гражданлик позицияси барқарор хусусиятларидан ҳисобланади. Танқид муҳокамалари, холосалари ижтимоий онгга, адабий тараққиётга муайян шаклда, муайян йўналишда ҳамиша таъсир ўtkазади. Бунга энг қадимги ва энг янги тарихдан, ўтмишдан ва бугундан истаганча мисоллар келтириш мумкин. Башарти, тарихда бир қатор бадиий ёдгорликлар танқид туфайли адабий яшаб қолди, десак, муболага бўлмайди»<sup>17</sup>. Бу фикрнинг тасдиқи учун муаллиф томонидан келтирилган мисоллар шунчалик ёрқинки, уларни бу ерда албатта келтириб ўтиш жоиздир. Масалан, Алишер Навоийнинг «Мажолисун-нафоис» деган ажойиб асари бор. Улуғ санъаткор унда замонасининг шоирлари, ўз устодлари ва издошлири тўғрисида ҳикоя қиласи... Навоий бу асарда ҳар бир шоирга алоҳида тўхталади, унинг ижодий ўзига хослиги ҳақида сўзлайди. Ушбу шоирлар асарларининг муайян бадиий нуқсонлари хусусидаги ўз танқидий мулоҳазаларини айтади, бир сўз билан айтганда, уларнинг ҳаёти ва ижоди тўғрисида қомусий маълумот беради. Бу асарнинг яратилганига беш аср тўлди, лекин у ўзбек классик адабиётининг у ёки бу даврини тадқиқ этиш, у ёки бу шоирнинг ижодини ўрганишда ягона манба бўлиб хизмат қиласи. Муаллиф Ҳамза Ҳакимзоданинг бизгача етиб келмаган асари «Қаҳрамон Ўғуз» драмаси ҳақида 1922 йилда «Қизил байроқ» газетасида пайдо бўлган қисқа тақризнинг ёки Машраб ижоди атрофида қизғин мунозаралар бораётган пайтдаFaфур Ғуломнинг «Совет Ўзбекистони»да пайдо бўлган мақоласининг катта ижобий роли ҳақида гапириб келиб, жуда тўғри холосага келади: «Шундай, вақтида айтилган битта сўз қалин илмий китобларга қараганда кўпроқ иш қила

<sup>17</sup> Қаюмов Л. Адабий танқид ва ижодий жараён//Шарқ юлдизи. 1972. № 3. 149-бет.

олади»<sup>18</sup>. Бунга қўшимча қилиб айтиш мумкинки, Ҳамза, Айний, Абдулла Қодирий, Ойбек, Гафур Гулом, Ҳамид Олимжон ва улар қаторидаги кўпгина ёзувчиларимизнинг ижоди ҳақида асримизнинг 20—30-йилларида танқидчилар (масалан, Отажон Ҳошим, Олим Шарафутдинов, Сотти Ҳусайн) томонидан у вақтда ҳали кўзга кўринмаган ёзувчиларнинг таланти ва ижодий хизматларига муносиб равишда, «вақтида айтилган сўз» бу ёзувчиларни адабиётимиз тарихида агадий сақлаб қолди. Етук адабий танқиднинг бу ижобий роли адабиёт тарихининг ҳар бир босқичи мисоллари билан қайта-қайта тасдиқ этилиши мумкин.

Адабий танқид бизнинг кунларимизда ҳам адабий-тарихий жараёнда катта роль ўйновчи факторлардан бири сифатида ўз аҳамиятини сақламоқда. КПСС Марказий Комитетининг XXIV съездга ҳисоботида совет кишиларининг коммунистик руҳда тарбияланишида совет бадиий адабиёти ва санъатининг катта ҳисса қўшганини таъкидлаш билан бирга, адабий-бадиий танқиднинг санъат ва адабиёт тараққиётида алоҳида роли борлиги уқтириб ўтилди. Бу докладда бундай дейилган эди: «Шубҳасизки, агар бизнинг адабий-бадиий танқидчилигимиз партиянинг линиясини яна ҳам активроқ амалга ошира борса эди, талабчанликни текта билан, бадиий бойликларни майдонга келтирувчиларга эҳтиёткорона муносабатда бўлиш билан қўшиб, яна ҳам ортиқроқ принципиаллик билан майдонга чиқса эди, совет адабиёти ва санъатининг ютуқлари яна ҳам ортиқроқ бўлар эди, камчиликлари эса яна ҳам тезроқ йўқола борар эди»<sup>19</sup>. Партия матбуоти доимо адабий танқиднинг ана шу катта ижобий роли ва вазифасини маданият ходимлари эсига солиб боради. Масалан, «Правда» ёзган эди: «Танқидчиликнинг бурчи ҳозирги замон бадиий жараёнидаги ҳодисаларни, тенденцияларни ва қонуниятларни чуқур таҳлил этиб беришдан, ленинча партиявийлик ва халқчиллик принципларининг мустаҳкамланишига ҳар тарафлама кўмаклашишдан, совет санъатининг юксак ғоявий-эстетик савиаси учун курашишдан, буржуа мафкурасига қарши изчиллик билан кураш олиб боришдан иборатdir.

Адабий-бадиий танқидчилик санъаткорнинг ғоявий фикр доирасини кенгайтиришга ва унинг маҳоратини

<sup>18</sup> Уша мақола. 150-бет.

<sup>19</sup> КПСС XXIV съезди материаллари. Тошкент. 1972. 78-бет.

такомиллашишига кўмаклашуви керак. Совет адабий-бадиий танқидчилиги марксча-ленинча эстетика анъана-наларини ривожлантириш билан бирга, ғоявий жиҳатдан бериладиган баҳоларнинг аниқ бўлишини, эстетик талабчанликни чуқур ижтимоий таҳлил билан, истеъ-додга нисбатан, унинг самарали изланишларига нис-батан эҳтиёткорона муносабатда бўлиш билан қўшиб олиб бориш керак»<sup>20</sup>.

Адабий танқид — адабиётнинг ўзи каби идеологик ҳодисадир. Идеологик ҳодисалар эса жамият тараққиётида катта ижобий ёки салбий роль ўйнайдилар. Бу қоида бизнинг кунларимизда ҳам ўз кучини сақлайди. Чунки, коммунизм ғалабаси учун курашда идеология иши кучли фактордир. Шу сабабли танқид тарихини ўрганиш фақат тарихий-маърифий аҳамиятгагина эга бўлмасдан, актуал аҳамиятга ҳам моликдир: адабий-бадиий танқид тарихи сабоқлари санъат ва адабиётнинг бугунги ва эртанги тараққиёти вазифалари ва йўлларини тайинлашга ёрдам беради. «Правда» қайд этганидек, совет адабий-бадиий танқидчилиги олдида марксча-ленинча эстетика анъана-ларини ривожлантириш вазифаси туради.

**Адабий танқиднинг спецификаси.** Маълумки, адабиётшунослик уч асосий қисмдан иборатdir: адабиёт тарихи, адабий танқид ва адабиёт назарияси (эстетиканинг бадиий адабиётга оид қисми).

Адабиёт тарихи — бадиий адабиётни ретроспективравища, яъни «орқага назар ташлаб туриб», ўтмишнинг бўлиб ўтган ҳодисаси сифатида текширади. Бошқача қилиб айтганда, адабиёт тарихи (уни кўпроқ қисқача «адабиётшунослик» деб ҳам атайдилар) бадиий ижоднинг тарихга мансуб бўлиб қолган ёки тарихга мансуб бўлиб қолаётган қисмини текширади.

Адабий танқид эса адабий ижод оқимининг боришига бевосита аралашади, унинг ҳамма ҳодисаларида иштирок этади, адабиётнинг асосий хусусиятлари шаклланишига таъсир этади.

Адабиёт назарияси ўтмиш ва бугунги кун адабий-тарихий жараёнидан назарий хulosалар чиқаради.

Шундай қилиб, адабиёт тарихи (ёки тор маънодаги адабиётшунослик), адабий танқид ва адабиёт назариясининг тадқиқот принциплари битта, аммо предмети бир-биридан фарқ қиласди. Адабий танқиднинг предмети — бугунги адабиёт, унинг конкрет намуналари ва

<sup>20</sup> Правда. 1972. 25 февраля.

кенгроқ маънода олганда — жорий адабий-тариҳий процессдир.

Танқид жорий адабий-тариҳий жараён ҳақида ва унинг конкрет маҳсулоти — адабий асар ҳақида ҳукм чиқарганда маълум даражада адабиёт тарихининг хуносаларига суюнади, ундан келиб чиқадиган хуносаларни, конкрет тарихий давр хусусиятларига қараб, адабий ҳодисаларга баҳо беради ва шу адабий-тариҳий жараённинг янги ижобий ҳодисалари асосида гўзаллик ҳақидаги тасаввурларимизни, эстетикани бойитиб боради. «Танқид нима?» — деб ёзган эди Белинский. — Бадий асарга фақат баҳо беришми, назарияни практикага (амалияга) жорий қилишми ёки маълум фактлардан назария яратишга уринишми? Баъзан униси ва баъзан буниси, кўпинча — иккаласи ҳам»<sup>21</sup>.

Шундай қилиб, танқид адабиёт тарихи билан адабиёт назарияси орасида кўприк рөлини ўйнайди, бу учала фан (адабиёт тарихи, танқид ва адабиёт назарияси) биргалашиб, бадий адабиёт ҳақидаги ягона фанни ташкил этади. Танқид (юқорида қайд этилганидек) айрим пайтларда ўз даври учун тамоман янги бўлган ҳақиқатларни кашф этиб, ўз даврининг санъат ва адабиёти ривожида янги даврнинг бошланишига асос солиши мумкин. Аммо бу ҳодиса, Белинский таъбири билан айтганда, «буюк ва нодир ҳодисадир»<sup>22</sup>. Танқид кўпинча «ўз замонасининг гўзаллик ҳақидаги ҳукмдор тушунчаларини аниқлаш ва оммалаштириш»<sup>23</sup>ни ўз олдига вазифа қилиб олади. «Ижоднинг асосий қонунлари энди топилиб бўлган бизнинг замонамиизда бу (яъни замонасининг гўзаллик ҳақидаги ҳукмдор илфор тушунчаларини аниқлаш ва оммалаштириш — И. С.) танқидчининг бирдан-бир мақсадидир, — деб ёзган эди Белинский. — Бу қонуниятларни назарий аниқлай бориш, уларнинг ҳаққоний эканини тасдиқлаб бориш, бу — танқиднинг бирдан-бир вазифасидир». Буюк адабиётшуноснинг бу фикри адабий танқид спецификаси масаласига яна ҳам кўпроқ аниқлик киритади. «Назария гўзаллик қонунларининг системали ва гармоник бирлигидир; аммо унинг бир кемтиқ томони бор — у маълум вақт доирасида қолиб кетади, танқид эса бетўхтов ҳаракат этади, олға бо-

<sup>21</sup> Белинский В. Г. Собрание сочинений. В девяти томах. Т. I. М., 1976. С. 258.

<sup>22</sup> Уша жойда.

<sup>23</sup> Уша жойда.

ради, фан учун янги материаллар, янги маълумотлар йиғади. Бу ҳаракатдаги эстетикадир...»<sup>24</sup>.

Танқиднинг яна бир хусусияти — унинг публицистика билан чамбарчас алоқасидир. Жорий адабий жараённинг ҳодисаларини ва бадиий ижоднинг айрим асарларини таҳлил этиб, уларнинг қимматини кенг оммага тушунтириб беришга ва бу омманинг эстетик дидини тарбиялашга мўлжалланган танқид ўз ўқувчишига матбуот — журнал ва газеталар орқали мурожаат этади. Бу айниқса халқ ва унинг адабиёти тарихида янги давр бошланаётган даврларга оидdir. XIX асрнинг биринчи ярмида Белинский: «Танқид аллақачон бизнинг публиканинг (ўқувчилар ва томошабинлар оммасининг — И. С.) эҳтиёжи бўлиб қолди. Ҳеч бир журнал ёки газета танқид ва библиография бўлимисиз яшай олмайди»<sup>25</sup>, — деб ёзган эди. Бу ҳол ҳамма маданий халқлар тарихи, шу жумладан, Улуғ Октябрь революцияси арафаси ва ундан кейинги даврдаги Ўрта Осиё тарихи фактлари билан ҳам тасдиқ этилади. Шуни ҳам эсда тутиш керакки, танқиднинг адабиётшуносликдан унинг мустақил қисми сифатида ажralиб чиқиши ҳамма халқлар тарихида ҳам XIX асрнинг иккинчи чораги ҳодисасидир. Масалан, Белинский замонида ва, шу жумладан, буюқ танқидчининг асарларида адабиётшунослик кўпинча бир бутун ҳодиса сифатида майдонга чиқсан: Белинскийнинг илфор журнallар (масалан, «Отечественные записки») саҳифаларида адабиётга оид босилган асарлари кўпинча рус адабиётининг ўтмишини анализ қилиш билан бошланар эди. Лекин ҳар қандай ҳолда ҳам публицистика билан чамбарчас алоқа адабий танқиднинг специфик хусусиятларидан бири бўлиб қолади. Совет Узбекистонида танқиднинг илк қадамлари ҳам маҳаллий матбуот билан боғлангандир.

Адабий танқиднинг моҳияти унга айниқса яқин бўлган соҳа — адабиётшунослик билан қиёсланганда, яққол кўзга ташланади. Чунончи: адабиётшунослик — илмий тафаккур майдони, адабий танқид — илмий ва бадиий тафаккурнинг қўшилиш майдони; адабиётшунослик ўтмиш адабий мерос устида сўзлайди, адабий танқид жонли адабий жараён устида сўз юритади; адабиётшунослик ўтмиш адабий жараёнга, адабий танқид эса конкрет асарга кўпроқ урғу беради; адабий танқид эса конкрет асарга кўпроқ урғу беради;

<sup>24</sup> Уша жойда.

<sup>25</sup> Белинский В. Г. Уша асар. 7-бет.

биётшунослик «яхши маънодаги академизм»га ва билвосита актуалликка таянади, адабий танқид оперативликка ва бевосита актуалликка суняди; адабиётшунослик асосан мутахассисларга қарата сўзлайди, адабий танқид оммага, ҳаммага қараб сўзлайди; адабиётшунослик эстетикани бойитади, адабий танқид адабиётшуносликни ва ҳоказо<sup>26</sup>.

**Танқид тарихини ўрганишнинг вазифалари.** Адабиёт ва санъат ривожининг танқид ривожи билан чамбарчас боғлиқлиги фанда ҳамма томонидан тан олинган фактдир. Адабиёт ҳам, танқид ҳам ҳаётдаги гўзалликни ифода этадилар, аммо улар бунинг учун фақат турлича шаклда истифода этадилар. Ҳукм чиқаришдан иборат бўлган танқиднинг мазмуни ҳукм қилинувчидан иборат бўлган адабиёт мазмунининг худди ўзидир; бутун фарқ шаклдадир. «Санъаткор ва адабиётчи ўзларининг санъат ва адабиёт ҳақидаги тушунчасини бевосита яратгац асарларининг ўзлари билан ифода этадилар; танқидчи эса ўзининг санъат ва адабиёт ҳақидаги тушунчасини фикр воситаси билан онгли равишда ифода этади. Бу ҳолда санъат ва адабиёт танқид билан қўлга қўл беришиб борадилар ва бирбирларига ўзаро таъсир этадилар»<sup>27</sup>. Буюк танқидчи томонидан қайта-қайта қайд этилган бу ҳодиса адабий танқид тарихи ўрганилмагунча бадиий адабиёт тарихининг ҳаққоний ва тўлиқ манзараси яратилиши мумкин эмаслигидан гувоҳлик беради. Бу ҳол эса танқид тарихини ўрганишни адабиёт ва санъат тарихини ўрганиш юзасидан анча ишлар қилингани ҳолда, ҳали ўзбек адабий танқид тарихининг ўрганилмаганлиги — фанимизнинг бугунги катта ва тез тугатилиши лозим бўлган камчиликларидан бири бўлиб қолади.

Танқид тарихи фақат ўтмиш адабиёти тарихининг тўла ва ҳаққоний манзарасини яратиш учунгина ўрганилмайди. «Ҳаракатдаги эстетика» бўлган танқид тарихи марксистик эстетика хазинасини бойитиш учун ҳам катта материал бериши мумкин ва лозим. Маълумки, предметнинг назариясиз унинг тарихи бўлмагани каби, предметнинг тарихисиз ҳам унинг назария-

<sup>26</sup> Қаранг: Современная литературная критика//Вопросы теории и методологии. М., 1977. С. 212—214.

<sup>27</sup> Белинский В. Г. Избранные сочинения. М., 1949. С. 383.

си бўлиши мумкин эмас. Шу вақтгача ўрганилмаган танқид тарихи эстетик назарияни бойитиш учун янги материал бериши мумкин.

Ҳар қандай танқид тарихининг биринчи вазифаси, албатта, танқиднинг ҳар бир конкрет тарихий шароитда ўйнаган ижтимоий ролини, унинг изланишлари ва топилмаларини баҳолаб беришdir. Шу билан бирга, танқид тарихини яратувчilar танқидга энди худди ўтмиш адабиётiga назар ташлагандек, ретроспектив равиша назар ташлайдилар, яъни танқид ҳодисалари уларнинг назаридан энди ўтмишнинг ҳодисаларига, тарихга мансуб фактлар тарзида ўтади. Бу ҳол танқид тарихчиларидан ҳар бир ҳодисага марксистик таълимотнинг жуда муҳим талабларидан бири бўлган историзм принципи асосида яқинлашишни талаб этади. Совет адабиётшунослигида чуқур ўрин олган қуйидаги қоида фақат танқидчигагина эмас, балки танқид тарихчисига ҳам тааллуқлидир: «Танқидчи Белинскийга мансуб бўлган историзм қобилиятига эга бўлиши лозим. Тафаккур историзмни — фақат талантнинг хусусиятигина эмас, балки фикр савиасининг сифат характеристикасидир. Танқидчининг партиявиyлиги унинг тафаккуридаги историзмнинг чуқурлигида ўз ифодасини топади. Танқидчи муҳокамасининг заковати фақат аниқ илмий пойdevоргагина асосланиши мумкин»<sup>28</sup>.

**Танқид тарихининг методикаси ва структураси.** Совет адабиётшунослиги, айниқса унинг энг илғор отряди бўлган рус адабиётшунослигида танқид тарихи юзасидан кўпгина асарлар яратилган бўлса ҳам, бу соҳада ҳамма адабиётлар учун маъқул ва манзур тушган бир методика ҳали майдонга келган эмас. Ҳозирча илмда ҳамма учун манзур тушган бирдан-бир қоида (бу қоида ҳақиқатан ҳам илмда ўзини оқлаган) танқид тарихини адабиёт тарихининг асосий босқичлари билан боғлаган ҳолда ўрганишdir. Бу қоиданинг илмийлиги шундаки, у адабий-тарихий жараёнда адабиёт ва санъатнинг танқид билан (юқорида қайд этилганидек) «қўлга қўл бериб ривожланиши» фактини доимо кўзда тутади. Шу билан бирга, танқид тарихи адабиёт тарихининг такори бўлиши керак эмас, албатта. Адабиёт ва санъат тарихида танқидга онд материал иккинчи ўрнида тургани каби, танқид тарихида ҳам адабиёт тарихининг материали фақат ёрдамчи ўринни

<sup>28</sup> Қаранг: Якименко Л. Г. Методологические проблемы современной литературной критики. М., 1975. С. 4.

эгаллаши мумкин. Адабий танқид тарихига бағишлиланған ҳар қандай илмий ишда бўлганидек, ушбу «Ўзбек совет адабий танқиди тарихи»да ҳам адабиёт тарихига оид асосий фактларнинг ўқувчига маълумлиги кўзда тутилади ва ҳар давр адабиётининг фақат энг умумий тавсифигина берилади.

Ушбу китобда танқид тарихининг бадиий адабиёт тарихи билан чамбарчас алоқаси ва танқид тарихининг нисбатан мустақиллиги, совет адабий танқидчилигининг ривожини тайин этувчи шароитнинг ўзига хос хусусияти ҳам эътиборга олинади. Бу ўзига хослик шундан иборатки, ўзбек совет адабий танқиди, Белинский сўзлари билан айтганда, санъат ва адабиёт тараққиётининг асосий қонунлари аллақачон кашф этилган даврда ривож топди. Бундай даврларда танқидчининг вазифаси ана шу кашф этилган қондаларни оммалаштириш ва адабий-тарихий жараёнда намоён бўлаётган янги ҳодисаларни умумлаштиришдир. Коммунистик жамиятни қуриш учун кураш даврида санъат ва адабиётнинг вазифалари ва тараққиёт йўллари марксизм-ленинизм асосчилари томонидан белгилаб берилган. Санъат ва адабиёт ҳақидаги марксчаленинча таълимот КПССнинг умуман идеологияга, қисман санъат ва адабиётга оид ҳужжатларида ривожлантира борилади. Коммунистик партиянинг санъат ва адабиёт соҳасидаги сиёсатининг амалга оширилишига эришиш (юқорида қайд этилганидек) — совет адабий танқидининг асосий вазифаси бўлиб қолади. «Ўзбек совет адабий танқиди тарихи»нинг бош вазифаси — танқиднинг ана шу ижтимоий бурчи ҳар даврда қай даражада адо этилганини аниқлаб боришdir.

Бу ерда шуни алоҳида қайд этиб ўтиш керакки, ўзбек совет адабий танқидчилиги санъат ва адабиёт тараққиётининг асосий қонунлари аллақачон кашф этилган даврда ривож топгани ҳақида гапирганда бу қонунларни кашф этишда жаҳон ва, биринчи навбатда, рус эстетикаси ютуқлари кўзда тутилади. Ўзбек совет танқидчилиги асримизнинг 20-йилларида шаклана бошлаган экан, у асосан жаҳон ва, биринчи навбатда, рус эстетикаси ва танқидчилиги тажрибасига асосланди. Чунки адабий танқид соҳасида ўзбек халқининг социалистик революциядан аввалги ютуқлари илмий асосда (айниқса, марксча-ленинча илмий асосда) янги, совет танқидчилигини яратишга ва ривожлантиришга замин бўлолмас эди. Ўзбек классик адабиётни адабий танқидчиликнинг фақат бир шаклини — тазкирани би-

лади. Тазкирада (масалан, Алишер Навоийнинг машхур «Мажолисун-нафонс» тазкирасида) муаллифнинг (танқидчининг) вазифаси — талантли шоир ва адиб ҳақида қисқа маълумотлар беришdir (бу жиҳатдан тазкира ҳозирги замон адабиётшунослигига антология номи билан юрувчи жанрга жуда яқинdir). Тазкира — танқидчиликнинг илк куртак шаклидир. Аммо ўзбек классик адабиёти даврида адабиётшунослик адабиётнинг ижтимоий роли, ёзувчи шахсининг адабий жараёнда ва жамиятнинг маънавий ҳаётида тутган ўрни, адабий асарда мазмун билан шакл муносабатлари каби жуда муҳим масалалар ҳақида кенг ва чуқур илмий таълимот яратиш даражасига кўтарилими; адабиётнинг энг буюк вакиллари асарларида (масалан, Алишер Навоийнинг «Хамса»сида) адабий ижоднинг муҳим масалалари юзасидан йўл-йўлакай жуда муҳим фикрлар айтилган бўлса ҳам, улар системали илмий таълимот шаклини олмаган эдилар.

Маълумки, тазкирачилик ўзбек адабиёти тарихида то XIX асргача давом этди, аммо унинг мазмунида жиддий ўзгаришлар юзага келмади. XIX асрнинг иккинчи ярмида Россияга қўшилишнинг прогрессив оқибати ўлароқ, Туркистонда маҳаллий матбуот пайдо бўлди. Бу матбуотда адабий асарлар ҳақида баъзи мақолаларнинг босилиши натижасида танқид публицистика билан боғланди. Публицистик руҳда ёзилган, адабиёт ва санъат масалаларига бағишлиланган мақолалар айниқса Улуг Октябрь социалистик революцияси арафасида (1914—1917 йилларда) аввалгига нисбатан кўпроқ пайдо бўлди. Аммо улар, биринчидан, жуда озсонлидир ва, иккинчидан, ўз олдиларига асосан маърифий вазифаларни қўйдилар (масалан, адабиётнинг нима эканини тушунтириш каби) ёки ўзбек адабиётида илк маротаба пайдо бўлган драматик асар — «Падаркуш» (Беҳбудий асари)нинг турли шаҳарларда саҳнага қўйилиши ҳақидаги оддий ахборотдан иборатdir<sup>29</sup>. Улар том маънода адабий-танқидий мақолалар деб

<sup>29</sup> Қаранг: Туркистонда биринчи миллий театр//Ойина. 1914. № 15; Акбар Мансурий. Кўқон театрусида//Ойина. 1914. № 21; Тошкентда миллий театр//Ойина. 1914. № 22; Бухорода миллий театр//Ойина. 1914. № 22.; Махмуд Беҳбудий. Театр надур??//Ойина. 1914. № 29.; Индамас «Театр хусусида мунозара»// Садойи Туркистон. 1914. № 2; Аҳудулло Хайрулло ўғли. Танқид//Садойи Туркистон. 1914. 19 ноябрь ва 3 декабрь; Чўлпон. Адабиёт надур??//Садойи Туркистон. 1914. № 15; Бизда миллий шоирлар//Садойи Туркистон. 1914. 22 ва 31 декабрь; Чўлпон. Муҳтарам ёзувчиларимизга//Садойи Туркистон. 1915. 6 февраль.

аталиши мумкин эмас, чунки уларда адабий асарлар таҳлил этилмайди, адабий-тарихий жараёнга алоқадор бирор муҳим масала ўртага қўйилмайди<sup>30</sup>. Фақат Туркистанда рус матбуотида босилган ва ерли халқлар адабиётига бағишланган баъзи мақолаларда<sup>31</sup> адабий-танқидий жанр талабларига яқинлашиш бор: уларда адабий асарга бир даража баҳо берилади, муаллиф фақат оддий ахборот билан чекланмайди. Мана шу фактларнинг ҳаммаси Улуг Октябрдан аввалги адабий-тарихий жараёнда адабий танқид фақат куртак ҳолда мавжуд эканини ва танқид адабиётшуносликнинг мустақил соҳаси сифатида шаклланмаганини айтишни тақозо этади.

Туркистандан ташқарида чиққан ва ўлканинг саводли аҳолиси орасида анча кенг тарқалган маҳаллий матбуотда (масалан, Оренбургда чиққан «Шўро» журналининг 1912 йил, 5, 11, 17-сонларида) адабиётшунослик ва адабий танқиднинг айrim масалалари баъзан ёритилиб турган бўлса ҳам, бу фактнинг Туркистанда адабий танқид ҳақидаги маълумотларнинг тарқалишида ижобий роль ўйнаганинигина қайд этиш мумкин; аммо уни ўлкада адабий танқиднинг туғилгани аломати деб баҳолашга асос йўқ, албатта. 1913 йилда чиқа бошлаган «Ойина» журналининг 32-сонида айтилган қўйидаги сўзлар Туркистанда Октябрь революцияси арафасида адабий танқиднинг аҳволи ҳақида тўғри гувоҳлик беради: «Ўқилган китобларни маънан тафтиш этиб, ундаги нуқсонларни баён этмак танқиддур, тааруз ва душманлик эмас. Бизни Туркистанда янги мактаблар анча бордур, янги рисолалар хийла босилиб турибдур, жаридаларда мақола ва ашъорлар ўқилиб турибдур, аммо ҳануз танқид даврига етушганимиз йўқ» («Танқид — сараламоқдур» мақоласи).

Куртак ҳолда мавжуд бу адабий танқиднинг Октябрдан аввалги ўзбек адабиёти тарихида ўзига яраша ижобий роль ўйнаганини тан олиш билан бирга, шуни таъкид этиш керакки, ривожланган илмий, етук

<sup>30</sup> Бу мақолалар орасида фақат Аҳудулло Хайрулло ўғли мақоласи Туркистан матбуотида илк маротаба «танқид» терминини қўйлаши ва танқиднинг вазифалари ҳақидаги тўғри фикрлар айтиши билан мороқлидир. Аммо муаллифнинг конкрет танқиди бадний адабиётга алоқаси йўқ асарга тааллуқлидир.

<sup>31</sup> Андреев В. Б. Бахтсиз кияв //Туркистанские ведомости. 1915. 23 сентябрь; Уша муаллиф. Новые течения в Бухаре (О книге Фитрата «Мунозара») //Туркистанские ведомости, 1916. 13, 15, 20 октября.

адабий танқид<sup>32</sup> Ўзбекистонда фақат Улуғ Октябрь революциясидан кейинги даврда, ўзбек халқи маданийатининг аввал сира кўрилмаган янги, юқори босқичга кўтарилигани самараси ва кўрсаткичи бўлиб майдонга келди; у маркесча-ленинча материалистик эстетиканинг мустаҳкам илмий заминида ривож топди.

Танқид тарихининг вазифалари ва структураси масаласига қайтайлик. Адабий танқид ривожланган сариунда тасдиқ топган эстетик принциплар хазинаси бойиб боради. Танқидчи ҳар даврда шу соҳада эришилган ижобий якунларга эътибор бериши лозим. Шу сабабларга биноан, бу «Тарих»да бутун танқидчилар колективи ишига урғу қилинди, айрим танқидчилар фаолиятига маҳсус боблар бағишлиланмади. Бу адабий-тарихий жараёнда кўзга кўринарли ижобий роль ўйнаган шахслар ўзбек совет адабий танқидчилиги тарихида учрамайди, деган сўз эмас, албатта. Бундай йирик ўзбек совет танқидчи ва адабиётшуносларининг хизматларини тавсифловчи маҳсус асарлар ҳам яратилиши лозим. Аммо адабий танқидчилигимиз тарихини ўрганишнинг ҳозирги босқичида айрим адабиётшунос ва танқидчиларнинг хизматига эмас, балки бутун адабиётшунослар ва танқидчилар коллективининг адабий-тарихий жараёндаги ролига урғу қилмоқ мақсадга мувофиқдир. Йирик ўзбек танқидчи ва адабиётшуносларининг ижодий портретларини яратиш ва уларда ҳар йирик арбоб фаолиятининг ўзига хослигини ҳам ёритиш бундан кейинги илмий тадқиқотларнинг вазифасидир.

Юқорида айтилган мулоҳазалар ушбу «Ўзбек совет адабий танқиди тарихи» структурасини тайин этдилар. Унда адабиётнинг асосий тараққиёт тенденцияларини ёритиш фонида адабий танқиднинг туғилиши ва ривожланниши жараёнига эътибор берилди, бу жараёнда принципиал масалаларни ўртага ташлаган ва озми-кўпми ҳал этиб берган мақола ва тақризлар қадрланди.

Адабий танқидчининг ҳар конкрет тарихий шароитда адабий-тарихий жараённинг қандай масалаларига

<sup>32</sup> Русча «критика» термини ўзбек тилида икки шаклда — «танқид» ва «танқидчилик» шаклларида қўлланилади (Масалан, «Шарқ юлдузи» журнали (1972 йил, № 3) КПСС Марказий Комитетининг адабий танқид ҳақидаги қарорида бу терминни «танқидчилик» тарзida таржима этган, журналнинг шу сонидаги мақолаларда эса «танқидчилик» термини кенг ишлатилган). Бу китобда ҳам бу икки термин тенг ҳуқуқли сўзлар сифатида қаралади.

алоҳида аҳамият берганлигини уқтириш ва бу масалалар юзасидан эришилган ижобий якун ва хулосларнинг бугунги қимматини тайин этиш мақсадида ҳар тарихий давр доирасида адабий танқид томонидан дикқат марказига қўйилган масалалар (Масалан, 20-йиллар ўзбек адабиётida замонавий тематика учун кураш) ажратиб олинниб, ёритилади. Табиийки, адабиёт ва танқид ривожининг турли даврларида айнан бир масалага қайтиш рўй бергани каби, ушбу танқид тарихида ҳам ўша масалаларга такрор қайтилади, аммо бу ҳолда ўша масалаларнинг янги шароитда қандай янгича ҳал этилганлигини аниқлашга эътибор қилинади. Масалан, асримизнинг йигирманчи йилларида бизнинг адабий танқидчилигимиз учун адабий меросга лойиқ баҳо беролмаслик характерлидир; 30-йилларнинг иккинчи ярмида эса адабий меросга муносабат изчил ижобий тус ола бошлайди ва Улуф Ватан урушидан кейинги даврда бу ижобий муносабат яна ҳам чуқурлашади. Иккинчи мисол: адабиётда замонавийлик учун кураш проблемаси ҳам совет адабиёти ва танқидчилигининг олтмиш йилдан ортиқ ривожи жараённида турли даврларда ўзига хос мазмун ва шаклларда ҳал этилади. Айнан бир ижодий проблеманинг ҳал этилишида адабий-тарихий жараённинг турли даврларида юзага чиққан бундай фарқлар сабоқлидир ва шу сабабли улар ҳар давр доирасида ўз хусусиятлари билан ёритилиши лозим.

Шу билан бирга, ушбу китоб муаллифлари «Ўзбек совет адабиёти тарихи» учун танланган ушбу методика ва структурани бирдан-бир маъқул структура ва методика деб ҳисобламайдилар. Шубҳасиз, танқид тарихини ўрганиш соҳасидаги бундан кейинги изланишлар бу ишнинг методикасига ва танқид тарихига оид китобларнинг структурасига лозимий ўзгаришларни киргизажак.

Совет адабиёти тарихини даврлаштириш (периодизация) масаласи каби, танқид тарихини даврлаштириш масаласи ҳам ҳали умумсовет адабиётшунослигига ҳал бўлмаган масаладир. Бу китобда ўзбек совет танқиди тарихи материали шартли равишда икки катта даврга бўлиб берилади. Биринчи давр 1917—1956 йилларни, яъни совет тузумининг барпо бўлиши, социализм қурилиши, совет мамлакатини фашизм ҳужумидан ҳимоя этиш ва Улуф Ватан урушидан кейинги тикланиш жараёнини (биринчи том) ва иккинчи

давр ривожланган социализмнинг илк босқичи адабий танқиди жараёнини акс эттиради.

Бу икки катта давр ичіда ҳам турлича босқичлар бор. Бу босқичларни тайинлашда адабий танқид ривожидаги айрим хусусиятлар эътиборга олинади. Бу босқичлар ҳам маълум даражада шартлидир.

«Ўзбек совет адабий танқид тарихи»нинг турли боблари қуйндаги муаллифлар томонидан ёзилган:

Биринчи том — «Кириш» (Адабий танқид тарихини ўрганишнинг методологияк ва методик масалалари) — И. Султонов; «Ўзбек совет әдабий танқидининг вужудга келиши ва илк қадамлари» (1917—1932) — М. Юнусов; «Ўзбек совет адабий танқиди социалистик реализм эстетикаси билан қуролланиш йўлида» (1932—1941) — Т. Расулов; «Улуғ Ватан уруши даври ўзбек адабий танқиди» (1941—1945) — Б. Назаров; «Улуғ Ватан урушидан кейинги давр ўзбек танқиди» (1945—1956) — М. Қўшжонов, А. Қулжонов ва С. Мелиев;

Иккинчи том — «Адабий танқид тарихида янги босқичнинг бошланиши» (1956—1962) — П. Қодиров; «Адабий танқиднинг тез ва кенг ривожланиш йўлига кириши» (1962—1972) — У. Тўйчиев; «Ўзбек адабий танқиди янги босқичда» (1972—1980) — Ж. Камолов; «Хотима» — И. Султонов.

Ўзбек адабиётшунослиги тарихини ўрганиш алоҳида вазифа бўлиб, икки томлик муаллифлари бу вазифани ўз олдиларига қўймайдилар. Аммо адабий танқиднинг тарихи умумий адабиётшуносликнинг ривожи билан чамбарчас алоқадор эканини эътиборга олиб, бу икки томлик охирида ўзбек адабиётшунослиги сўнгги босқичининг қисқача образини бериш лозим топилди. «Ҳозирги замон ўзбек адабиётшунослиги» деб номланган тўққизинчи (қўшимча) боб Н. Раҳимжонов томонидан ёзилган.

Ишни илмий ходимлардан С. Мелиев, А. Багиров, Х. Лутфиддинова, лаборантлардан С. Жумабоева ва М. Олимовлар нашрга тайёрладилар.

**ЎЗБЕК СОВЕТ АДАБИЙ  
ТАНКИДИННИГ ВУЖУДГА  
КЕЛИШИ ВА ИЛК  
ҚАДАМЛАРИ  
(1917—1932 ЙИЛЛАР)**

**РЕВОЛЮЦИОН ВОҚЕЛИК ВА АДАБИЁТ**

Ўзбек совет адабий танқиди ўзининг ўрганиш обьекти — бадиий адабиёт сингари Октябрь инқилоби самарасидир. Унинг вужудга келиши ва дастлабки қадамлари қийин ва мураккаб бўлди. Адабий танқид сўз санъати билан узвий алоқада ҳаракат қилиб, социалистик жамиятимизнинг тонгидагёй ўз вазифаларини тўғри белгилаб олишга уринди. Бу борадаги илк маҳсулотларнинг кучли ва заиф томонлари ўша даврдаги синфий кураш, ижтимоий ва идеологик ҳаётдаги зиддиятлар билан изоҳланадиган ҳодисалар эди.

Адабиётимизнинг Октябрдан кейинги бошланғич даври ва йигирманчи йиллар турли хил ижодий излашишлар билан характерланади. Ёзувчиларимиз зулм ва асорат тўла ўтмишни фош этиб, янги инқилобий воқеликни илҳом билан тасвирлаётган асарлар адабий танқид олдига қатор жиҳдий масалаларни қўйди. Улар: салафларимиздан фарқли равишда совет ёзувчиси қандай бўлиши керак? Совет адабиётининг ижодий методи қанақа бўлади? Замонавийлик ва замонавий мавзу ўртасидаги алоқа нимада? Маданий меросга қандай муносабатда бўлиш лозим? Адабиётда янги инсон образи қандай яратилади? Адабий турлар ва жанрларнинг ривожида классиклардан нимани ўрганимиз? ва шунинг кабилар эди.

Бу масалаларни имкони етганча ечишга уринаётган танқид кундалик адабий жараёнга актив аралашадиган, конкрет асарларни таҳлил қилиш йўли билан жамоатчилик эътиборини актуал замонавий проблемаларга тортадиган бўлди. Танқид чинакам ижтимоий фикр даражасига кўтарилиши учун ҳаётга адабиётнинг ўзидан ҳам чуқур кириб боришни ва бадиий асарлар

тимсолида воқеликнинг етакчи тенденцияларини аниқлаб беришни ўргана бошлади.

Ҳаёт ва адабиётга янгича нуқтаи назар билан қарашга даъват этилган танқид воқеликда рўй берадиган сиёсий-ижтимоий, иқтисодий ҳам маданий ўзгаришлар билан узвий алоқада эди. Бинобарин, даврнинг умумий манзарасини, яъни ижтимоий базисда нималар содир бўлаётганини кўз олдимизга келтирмай туриб, устқурма бўлган адабий танқид хусусиятларини тўғри белгилаб бўлмайди.

Хўш, ижтимоий базисда қандай ўзгаришлар бўлаётган эди? Маълумки, Октябрь қуролли қўзғолони ғалаба қозониши биланоқ чақирилган Советларнинг Бутун Россия Иккинчи съезди Россия давлати қўл остидаги барча миллатларга ўзини белгилаш ҳуқуқини берди. Орадан бир оз вақт ўтгач, Туркистон Автоном Совет Социалистик Республикаси ташкил топди ва ихтиёрий равишда РСФСР составига кирди.

1918 йил апрель ойининг сўнгги ўн кунлигига бўлиб ўтган Автоном республиканинг съезди Туркистон республикасининг суверен ҳукумат сифатидаги ҳуқуқларини белгилаб берди.

РКП(б) Марказий Комитети ва РСФСР ҳукуматининг партия ва совет органларига, шунингдек хўжалик ва ҳарбий шохобчаларига кўрсатган ғоят катта ёрдами туфайли Туркистон республикаси Советларнинг душмани бўлган интервентларга, оқ гвардиячилар ва босмачиларга қарши мардона кураш олиб борди.

Совет ҳокимиютини ҳимоя қилиш учун ҳаёт-мамот жанглари давом этаётган ташвишли кунларда Владимир Ильич «Туркистондаги коммунист ўртоқларга» маҳсус хат билан мурожаат қилди. Ўз моҳияти эътибори билан ғоят катта аҳамиятга эга бўлган бу машҳур хатда доҳий, жумладан, ёзган эди:

«Туркистон халқлари билан тўғри муносабат боғлаш эндилиқда Россия Социалистик Федератив Совет Республикаси учун, ҳеч муболағасиз айтиш мумкин, жуда катта, жаҳоншумул-тариҳий аҳамиятга эгадир»<sup>1</sup>.

Иттироқ Совнархози 1919 йилнинг сўнгги чорагида, В. И. Ленин кўрсатмасига биноан, Туркистонга моддий-техника ёрдами юбориш масаласини кўриб чиқди. Туркистон нон, металл, мануфактура билан таъминлана бошлади. Фарғона водийсіда тўқимачилик саноатига асос солинди. Бундай дўстона ёрдам бошқа шаҳар-

<sup>1</sup> Ленин В. И. Тўла асарлар тўплами. 39-том. 349-бет.

ларга ҳам келиб турди. Масалан, 1923 йилнинг декабрида Бухорога бир гуруҳ москвалик меҳмонлар келиб, халқ хўжалиги ва маданий ҳаётнинг турли соҳаларида ишни янгича ташкил қилиш йўлларини кўрсатдилар. Меҳмонлар орасида Москва шаҳар Краснопресня район Совети ходимлари ва бир неча завод ва фабрика ишчилари, шу жумладан, «Трехгорная мануфактура» фабрикасининг зарбори Морозкин, «Борец» заводи илғор ишчиси Андреев, собиқ темир йўл ишчиси, рабфак талабаси Родионовлар бор эди. Москваликлар Бухоро меҳнаткашлари билан дўстона алоқа боғлаб уларни маданий оталиққа олдилар<sup>2</sup>.

РКП(б)нинг X съезди (1921 й.) барча совет халқларининг, айниқса ўтмишда қолоқ бўлган халқларнинг миллий маданиятини ривожлантириш зарурлигини таъкидлади. Съезд резолюциясида ижтимоий-маданий жиҳатдан олдинга ўтиб кетган Марказий Россияга етиб олиш учун маҳаллий меҳнаткаш оммага ёрдам бериш лозимлиги айтилган эди. Маданий қурилиш борасида эса матбуот, клуб ишлари, театр ва саводсизликни битириш курслари ҳамда мактаблар муҳим роль ўйнаши кераклиги кўрсатиб ўтилган.

Йигирманчи йилларнинг бошида Туркистонда маданий қурилиш ишлари, бир томондан, халқ хўжалиги жуда оғир аҳволни бошидан кечираётган, иккинчидан, антагонистик синфлар мавжуд бўлиб, кескин синфий ва идеологик кураш давом этаётган ғоят қийин шароитда олиб борилди. Эксплуататор синфларнинг тури табақага мансуб қолдиқлари маданий-маориф соҳасидаги ҳар қандай янгиликка тўсқинлик қилишга киришдилар. Республикаизнинг қатор шаҳарлари, айниқса қишлоқларида маданий инқилоб душманлари мактабларни вайрон қилиб, ўқитувчиларни ўлдиридилар. Лекин нурга интилган оммани бу хуружлар ҳақ йўлдан қайтаролмади. Маърифат учун бошланган умумхалқ юришига Иттироқ ҳукумати яқиндан ёрдам берди.

Социалистик маданият ғалабаси учун курашда аҳоли ўртасида оммавий-маърифий ишларни ривожлантиришда Совет ҳокимияти билан бирга ишлаш учун унинг томонига ўтган эски ўқитувчилар ва ёш совет педагоглари зиммасига катта вазифалар юклатилган эди. В. И. Лениннинг интернационалист ўқитувчиларнинг

<sup>2</sup> Озод Бухоро. 1924. 9 январь.

Бутун Россия Биринчи съездиде сўзлаган нутқида шундай кўрсатмалар бор:

«Ўқитувчилар армияси ўз олдига жуда катта оқартув вазифаларини қўймоғи ва аввало социалистик маорифнинг асосий армияси бўлмоғи лозим. Турмушни, билимни капиталга итоат қилишдан, буржуазия зулмидан қутқазиш лозим. Тор ўқитувчилик фаолияти доираси билан кифояланиш ярамайди. Ўқитувчилар курашаётган бутун меҳнаткашлар оммаси билан қўшилиб кетишлари керак. Янги педагогиканинг вазифаси — ўқитувчилик фаолиятини жамиятни социалистик асосда ташкил этиш вазифаси билан боғлашдан иборат»<sup>3</sup>.

Йигирманчи йилларда совет матбуоти, журналист зиёлилар социализмнинг ғалабаси учун курашувчи катта куч эди.

Республикада янги типдаги совет матбуотига асос солган «Иштирокион» («Коммунист») газетасидан кейин «Мехнаткашлар товуши» (1918), «Қизил байроқ» (1920), «Фарғона» (1921), «Озод Бухоро» (1922), «Зарафшон» (1922), «Қизил Ўзбекистон» (1925), «Ёш ленинчи» (1925), «Шарқ ҳақиқати» (1928) сингари газеталар мунтазам чиқиб турди ва ижтимоий-сиёсий ҳамда маданий-адабий ҳаётда социализмнинг колектив тарғиботчиси вазифасини бажарди<sup>4</sup>.

Бу даврда кундалик матбуотдан ташқари ўзбек тилида нашр этиладиган ижтимоий-сиёсий, адабий-бадиий журналларга ҳам эҳтиёж катта эди. Бинобарин, омманинг талабини қондириш йўлидаги дастлабки қадам бўлган «Қизил Хоразм» (1921), «Инқилоб» (1922), «Билим ўчоғи» (1922), «Учқун» (1923), «Маориф ва маданият» (1923), «Ўзгаришчи ёшлар» (1923) каби илк журналлар тўплаган тажрибалар асосида яна «Маориф ва ўқитувчи» (1925), «Ер юзи» (1925), «Янги йўл» (1925), «Аланга» (1928), болалар адабиёти на муналарини мактаб ўқувчиларига етказадиган «Ёш куч» (1929) журналлари чиқа бошлади.

Журналлар халқни, зиёлиларни социализм ишига садоқат руҳида, қийинчиликларни матонат билан енгиш ва революция ғалабаларини мустаҳкамлаш, қўл-

<sup>3</sup> Ленин В. И. Тўла асрлар тўплами. 36-том. 478-бет.

<sup>4</sup> Маданий ва адабий ҳаётда вақтлий матбуотнинг роли нақадар катта бўлгани З. Баширининг «Октябрь адабиёти ҳам вақтлий матбуот» (Туркистон. 1922. 29 сентябрь), Ш. Сулаймоннинг «Ўн йиллик матбуот тўйи» («Иштирокион» чиқа бошлаганига 10 йил тўлди. Ер юзи. 1929. 22—23-сонлари), Элбекнинг «Ўзнишр ва унинг навбатдаги вазифалари» (Шарқ ҳақиқати. 1929. 9 апрель) ва бошқа шуларга ўхшаш мақолаларда кўрсатиб берилган.

га киритилган ютуқларни янада кўпайтириш руҳида тарбиялашга хизмат қилди. Акмал Икромов «Ўзбекистон Марказий фирмә қўмитаси» номидан «Маориф ва ўқитувчи» редакциясига йўллаган табрик хатида, жумладан, қўйидагиларни ёзган эди:

«...Ўзбекистон Коммунистлар партиясининг олдидағи зўр ишлардан бўлган мафкура майдонидаги кураш, хотин-қизлар масаласи, иқтисодий фронтда муваффақият ва музafferиятнинг аҳамиятини юзаки суратдагина тасдиқ этмасдан жиҳдий таҳлил қилиш ҳар бир коммунистнинг, шўролар ҳукуматининг дўсти бўлган ҳар бир зиёлиниң вазифасидир. Партиямиз мафкура фронтида ҳам душманларга омонлик бермайди, йўлдан адашганларга кўмакни аямайди..., уларнинг самимий муҳаббатини жалб қилишга партия ҳаракат қиласди...»<sup>5</sup>.

Биз характерлаётган даврнинг ниҳоятда муҳим маданий янгиликлардан яна бири Иттифоқ миқёсида, шунингдек республикамида радиоэшиттиришнинг йўлга қўйилиши бўлди. Радио коммунистик тарбия ва тарғибот соҳасида партия қўлидаги кучли воситалардан бирига айланди. Радио, айни вақтда адабиётнинг ташвиқотига ҳам сезиларни ҳисса қўша бошлади. Адабий-драматик эшиттиришлар, социалистик қурилишнинг бориши ҳақидаги бадиий репортажлар, очерк ва ҳикоялар радио программасидан салмоқли ўрин оладиган бўлди.

Инқилобдан кейинги биринчи ўн йиллик тарихига қилинган қисқача экспурс кўрсатадики, ҳаётни социалистик асосда қайта қуриш осонликча амалга оширилмади. Аммо шу жуда қисқа мuddат ичida Коммунистик партия ва Совет ҳукумати меҳнаткаш омма ташаббусига таяниб, ақлни ҳайрон қолдирадиган жаҳоншумул тарихий ишларни қилдилар. Ижтимоий ҳаётдаги ажойиб ўзгаришлар кетидан маданиятда ҳам тараққиёт сари гигант қадамлар қўйилди. Эски ҳаётдан мерос бўлиб ўтган қолоқлик тез суръатлар билан тутатила бошлади. Амин Умарий айтгандек, бир вақтлар «Алифни билишга кўзи оч ўлка», «оми» деб ном олган батраклар, чўпонлар маданиятнинг «тоғдай остонасига қадамлар» қўя бошлади. Ўзбекистонда рўй берган ленинча маданий инқилобнинг дастлабки ғалабаси зўр тарихий аҳамиятга эга бўлган сиёсий воқеа бўлди. Бунинг ёрқин далилларидан бири ўзбек совет адабиё-

<sup>5</sup> Маориф ва ўқитувчи. 1927. 1-сон. 3-бет.

тининг юзага келиши ва янги ҳаётий, ғоявий мазмун асосида шаклланиш йўлига кириши эди.

Мамлакатнинг иқтисодий-ижтимоий ҳаётида В. И. Ленин кўрсатган «хилма-хил бўлаклардан тузишган воқеалик»<sup>6</sup>нинг ҳали давом этаётгани, идеология соҳасидаги синфий кураш йигирманчи йилларнинг ўртасида ҳам тўхтамагани даврнинг асосий манзараси эди. Бу ҳолат, шубҳасиз, санъат ва адабиётда акс этмаслиги мумкин эмасди. Адабиёт ва санъатнинг йўналишидаги турли-туманлик, бир томондан, матбуотда эълон қилинаётган асарларнинг ғоявий мазмунида ўз аксини топаётган бўлса, иккинчидан, юзага келган ва бир-бираига ўхшамаган адабий ташкилотларнинг программаси (платформаси)да сезилиб турарди.

Партия В. И. Ленин традицияларини давом эттирган ҳолда матбуот эркинлигига кенг йўл қўйиб берди. Маълумки, Октябрга қадар Ленин раҳбарлик қилган нашрларда инқилобий пролетариатнинг курашидан четда турган декадент — символист шоирларнинг (К. Бальмонт, Н. Минский) шеърлари ҳам босилган эди. Нима учун? Аввало, 1905 йил инқилобидан кейин бошланган умумий ижтимоий кўтарикилик даврида ишчилар ҳаракатидан узоқ баъзи шоирлар ҳам воқеаларга аралашиб, самодержавиени танқид қилувчи асарлар эълон қиласилар. Сўнгра, шуни унутмаслик керакки, Лениннинг ижодкор зиёлиларга, адабиётга муносабати доктриналардан (ақидапарастликдан) узоқ эди. Доҳий масалага шароитни, вазиятни ҳисобга олиб ёндашар, хато қилганларни ўрни билан принципиал равишда танқид қиласилар. Қайфияти ўзгариб турадиганларга нисбатан доимо ҳушёр бўлишга чақиравди<sup>7</sup>.

Худди шунга ўхшашиб, гражданлар уруши ва НЭП даврида, ҳатто йигирманчи йилларнинг ўрталарида ўзбек матбуотида босилган адабий материаллар ҳам турли ғоявий қайфиятдаги ёзувчилар қаламига мансуб эди. Газета ва журналлар саҳифасида Ҳамза ва Айнийнинг инқилобий шеърлари қаторида ижоди бир қадар мураккаб ва зиддиятли бўлган қалам аҳларининг асарлари ҳам босилиб турди. Октябрь туфайли юзага келган мазлумлар ҳуқуқининг тикланиши ва руҳий эркинлик учун кураш тўлқинлари уларни ҳам ўзига торти. Улар амирлик, хонлик зулмини қораловчи асарлар ёздилар.

<sup>6</sup> Ленин В. И. Тўла асарлар тўплами. 38-том. 183-бет.

<sup>7</sup> Қаранг: Эвентов И. Пробуждение новых сил. В. И. Ленин о поэзии. Л., 1977. С. 156—159.

Йигирманчи йиллардаги умумадабий ҳаёт учун муштарак хусусиятлардан яна бири ҳар хил адабий ташкилотларнинг мавжудлиги ва бир-бирига ўхшамаслиги эди. Инқилоб арафасида ташкил топиб, ишга киришган ҳамда йигирманчи йилларнинг бошида фаолият кўрсатган Пролеткультдан кейин МАПП (1923), РАПП (1925), ВОАПП (1929) қаторида Марказий Россияда яна Леф («Санъатнинг сўл фронти»), «Кузница» («Темирчилик ишхонаси»), «Перевал» («Довон»), «Опояз» («Поэтик тилни ўрганиш жамияти») ва бошқа группалар юзага келди. Шу даврдаги адабий тўдалар ичидаги имажинистлар, акмаистлар, футуристлар, серапион муридлар оқимларига мансуб ёзувчилар бор эди. Номлари эслатилган адабий ташкилотлар, группаларнинг ўз программаси ва тутган йўли (платформаси) бўлиб, ўзаро келишолмас, натижада мамлакатдаги ягона адабиётни майдага бўлакларга ажратиб юборган эдилар.

Ўзбекистонда ҳам инқилобнинг бошларидаёқ пролеткульт тузилган эди. 1924 йили Тошкентда иш бошлаган ТАПП (Тошкент пролетар ёзувчилари ассоциацияси) ва 1926 йили Самарқандда тузилган «Қизил қалам» жамияти барча пролетар ва совет ёзувчиларини ўз атрофига уюштируди. Кейинчалик улар УЗАПП (Ўзбекистон пролетар ёзувчилари ассоциацияси) (1930) доирасида бирлашдилар.

Биз кўздан кечираётган даврда адабиёт намояндаларини пролетар ва деҳқон ёзувчиси, инқилобий ёзувчи ва попутчик (йўловчи) каби тоифаларга ажратиш одат бўлган эди. Агар ўша даврдаги адабий-танқидий мақолаларга назар ташласак Файратий, У. Исмоилов, F. Гулом пролетар ёзувчилари деб, X. Олимжон, Ойдин, Ш. Сулаймон, С. Абдулла инқилобий ёзувчилар деб, Элбек ва Ойбек попутчиклар деб баҳоланганини кўрамиз.

«Попутчиклар» инқилобий ўзгаришларнинг маъносини тушуниб олишга интилаётган, имкониятига қараб янги ҳаётга қўшилиб, унинг ривожига таъсир кўрсатётган санъаткорлар эдилар.

Москвада чиқадиган «На посту» журнали редакцияси «попутчиклар»га нисбатан сўллик йўлини тутиб, соғ кўнгил билан ижод қилаётган А. Толстой, Н. Тихонов, С. Есенин, М. Пришвин каби ёзувчиларга ҳар хил салбий ном тақиб, ҳужум қилганда партия уларни бу нотўғри ҳуружлардан ҳимоя қилди. РКП(б)нинг XIII съезди (1924 йил, май) Марказий Комитетнинг матбуот бўлими тавсия қилган ва партия аъзоси бўл-

маган соф ниятли ёзувчиларга ўз устларида ишлашларига кўмаклашув лозимлиги ҳақидаги резолюцияни маъқуллади ва ўз қарорида: «...Коммунистлар билан бирга ўртоқлашиб ишлаб, уларнинг тарбия мактабини ўтаётган ва «попутчиклар» деб юритиладиган ёзувчилардан истеъдодлироқларига системали равишда кўрсатиб келинаётган ёрдамни давом эттириш керак»<sup>8</sup>, деб таъкидлади.

Ўзбекистондаги адабий танқиднинг бир гурӯҳ на moyandalari фаолиятида ҳам «На посту» группасининг усули қўлланганини кўрамиз. Улар на шахсий ижтимоий ҳаракати билан, на бадиий асарлари билан социалистик тузумга қарши бўлмаган, фақат муайян вақтлар тараддуланиб юрган ва ижодида ҳоргин кайфиятлар акс этиб, символистик образлар орқали дудмол фикрларни ифодалаган шоирларни ҳаддан ташқари қоралар эдилар. Эндиликда ҳадеб уларни «ватанпааст бадбин зиёлилар» деб сўка бериш, шунингдек, Элбекни «йўлдан озган муртад» деб ҳақорат қилиш, Ойбекка қараб «асарларингиздаги мафкурани ленинчи комсомол номига жавоб берадиган вазиятга келтирангиз сизга — нажот, бўлмаса — ҳалокат»<sup>9</sup> қабилицадаги ҳуружлар умумий ишимизга зарар келтирас, ижодкорларнинг руҳий тушкунлигига сабаб бўларди.

Шу муносабат билан Илья Эренбургнинг совет ёзувчилари кекса авлодига тааллуқли бўлган қуйидаги сўзларини эслаш ўринлидир: «Мен (ўша чоқларда) ёш партиясиз ёзувчи эдим; бирорлар учун «попутчик», бошқа бирорлар учун «душман», аслида эса инқилоб йилларигача шаклланган оддий совет зиёлиси эдим. Бизни қанчалик уришмасинлар, бизнинг эрта оқарган сочимизга қанча хўмрайиб қарамасинлар, биз совет ҳалқининг йўли — бизнинг йўлнимиз эканини билардик»<sup>10</sup>.

Адабиётшунос ва танқидчи, қатор дарслклар муаллифи А. Саъдийни «синфий душман» ёки «адабиётдаги меньшевик» деб таърифлаш, О. Ҳошимни миллий буржуазия зиёлиларининг маслакдоши қилиб қўйиш сингари ўта сўллик фактлари И. Эренбург тилга олган ҳодисаларнинг биздаги кўринишлари эди.

Ўзбек адабий танқидида учраган вуъгар социологизм руҳидаги қўпол чиқишлилар рус танқидчилигидаги

<sup>8</sup> Вопросы культуры при диктатуре пролетариата. М.—Л., 1926. С. 116.

<sup>9</sup> Қизил Узбекистон. 1928. 5 июль.

<sup>10</sup> Новый мир. 1961. № 9. С. 129.

ашаддий РАППчиларнинг юқорида номлари эслатилган кекса авлодга мансуб ёзувчиларга қарши уюштирган ҳужумларининг акс садосига ўхшайди.

Совет бадиий адабиётининг янги босқичга кўтарилишида, шу жумладан, адабий танқиднинг ижодий жараёнида жанговар ролни оширишда, танқид соҳасида йўл қўйилган хато ва камчиликларни бартараф этишда РКП(б) Марказий Комитетининг 1925 йил 18 июня «Партияниң адабиёт соҳасидаги сиёсати тўғрисида» чиқарган резолюцияси катта аҳамиятга эга бўлди.

Резолюцияда Коммунистик партия Улуғ Октябрь инқилоби туфайли жуда кенг меҳнаткашлар оммасининг инсоният маданиятини эгаллаш йўлига тушганлиги каби тарихий ҳодисани қайд этди: «Шундай қилиб, биз маданий инқилоб даврига кирдикки, бу коммунистик жамиятга томон бундан кейинги ҳаракатнинг заминини ташкил этади»<sup>11</sup>. Резолюцияда бадиий адабиётининг бу даврда жуда катта тарбиявий роль ўйнаши алоҳида уқтирилган. Адабиётнинг ижтимоий роли шунинг учун ҳам ошадики, жамиятда манфаатлари бир-бирига зид синфлар ҳали тугатилган эмас, эксплуататор синфларнинг социализм қурилишига актив қаршилиги давом этмоқда: «Шундай қилиб, бизда синфий кураш тўхтамагани каби, у адабиёт фронтида ҳам тўхтамайди». Бу шароитда ижодий интеллигенцияни буржуа идеологияси таъсиридан сақлаб қолиш вазифаси алоҳида актуаллик ва ўткирлик касб этади. Коммунистик партия пролетар гоявий позициясида турган ёзувчилардан идеология соҳасида гегемонияга эришишни талаб этди. Коммунистик партия бу тарихий вазифани бажариш жараёнида «эски маданий месросга, шунингдек, бадиий сўз мутахассисларига енгилтаклик ва менсимаслик билан муносабатда бўлишга қарши ҳар тарафлама курашиш»га даъват этди. Марказий Комитет резолюциясида: «Иттифоқимизнинг кўп сонли республикалари ва областларида миллий адабиётларнинг тараққиётига ҳам кучли эътибор бериш зарур»лиги таъкидлаб ўтилган эди.

Коммунистик партия томонидан совет адабиёти олдига қўйилган ҳамма вазифалар совет танқидчилигига ҳам тааллуқли эди, албатта. РКП(б) Марказий Коми-

<sup>11</sup> Бу резолюция илк марта Москвада чиқадиган «Справочник партийного работника» тўпламида эълон этилган (вып. V. 1926. С. 349—352).

тети резолюциясида адабий танқид «асосий тарбиявий қуроллардан бири» тарзида баҳоланди: «Коммунистик танқид адабиётда буйруқбозлик расмини мутлақо чиқариб ташлаши керак. Бу танқид фақат ўз ғоявий устунлигига суюнсагина чуқур тарбиявий аҳамиятга эга бўлади. Марксистик танқид ўз орасидан коммунистликни пеш қилиб, мағрутланишнинг ҳар қандайини, дарьвоси баланд ва лекин чаласавод манманлик кўринишларининг ҳар қандайини тамомила кескин суратда чиқариб ташлаши керак. Марксистик танқид ўз олдига ўқиш, ўрганиш шиорини қўймоги лозим...».

\* \* \*

Умуман совет адабиёти сингари унинг таркибий қисми бўлган ўзбек совет адабиётининг майдонга келиши ва ривожланиши тарихи диалектик, зиддиятли жараёндир. Унинг босиб ўтган йўли узоқ ва жиддий изланишлар, ғоявий-эстетик курашлар йўли, нуқсонлар ва ғалабалар йўлидир. Ўзбек совет адабиётининг илк қадамлари республикада ўтказилган маданий революция билан узвий боғлангандир.

Ўзбек совет адабиётининг шаклланиши ва ривожланишига таъсир кўрсатган бир қанча омиллар бор эди. Уларнинг энг муҳимлари: социалистик воқеликнинг мавжудлиги; партиянинг талантларни вояга етказиши соҳасидаги оталарча раҳбарлиги ва ижод эркинлиги; миллий адабий мерос ҳамда халқ оғзаки бадиий ижодини танқидий ўрганиш; рус ва жаҳон адабиёти классиклари тўплаган бой бадиий тажрибалардан баҳраманд бўлиш; қардош ёзувчилар билан ижодий алоқалардир.

Бадиий ва танқидий фикрнинг ўсишида ҳал қилувчи роль ўйнаган уч факторни алоҳида қайд этиб кўрсатиш лозим. Булардан бири, ишлаб чиқариш воситаларининг социалистик мулклиги заминида ишлаб чиқарувчи кучларнинг равнақи туфайли эришилган меҳнаткаш халқнинг моддий фаровонлиги — иқтисодий фактор; иккинчи, кейинчалик ўз вазифасини умумхалқ социалистик давлатига топширган пролетар диктатураси — сиёсий фактор; ниҳоят, учинчиси, жаҳонда энг илфор революцион дунёқараш — марксизм-ленинизм назарияси — идеологик фактор. Ана шу факторларсиз социалистик реализм адабиётининг муваффақиятларини таъминлаш мумкин бўлмасди.

Совет адабиётшунослари кейинги йилларда илмий тадқиқотнинг ижтимоий-тарихий методи йўлидан бориб, маънавий маданият ҳодисалари ва жараёнини чуқурроқ англашга интилмоқдалар. Адабий жараённи яхлит тарихий давр, яъни кенгроқ вақт кўлами билан ўлчаганда ҳар қайси даврнинг сифат жиҳатидан бир-бирига ўхшамаган ўзига хослиги яққол кўринади.

Сўнгги йилларга қадар биз ўзбек совет адабиётини даврлаштиришга календарь маъносида ёндашиб: «Социалистик революция давридаги адабиёт», «Гражданлар уруши йилларида адабиёт», «Халқ хўжалигини тиклаш ва индустрлаштириш даври адабиёти» тарзида кичик-кичик даврларга бўлиб текширдик. Адабий танқид ҳам ана шундай даврлаштириш асосида ўрганилар эди. Агар биз бошқа адабиётшунослар томонидан ҳам маъқулланаётган юқоридаги яхлит даврлаштиришни қабул қиласак, у тадқиқотнинг тӯғри усули сифатида кўп масалаларнинг илмий ҳал қилиниши учун калит вазифасини бажаради.

Шу нуқтаи назардан қараганда, ўзбек совет адабиётининг биринчи даврини «социализмга ўтиш ва унинг ғалабаси даври» деб олсак, унинг асосий пафоси эски дунёга — эксплуататорлик тузумига қарши кескин синфий кураш ва янги дунёни, янги совет кишисини тарбиялаш экани яққол сезилиб қолади.

Социализмга ўтиш даври умуман сиёsatда, ижтимоий-иқтисодий ҳаётда ашаддий синфий кураш даври бўлгани учун бу кураш ҳаёт ойнаси бўлган адабиётда акс этмаслиги мумкин эмасди. 20-йилларнинг иккинчи ярми ва 30-йилларнинг бошидаги адабий ҳаракатни кузатган Отажон Ҳошим бу ҳақда ёзган эди: «...Умуман тарих, қисман адабиёт тарихи кўрсатадики, синфий жамиятда ҳар бир адабиёт синфий бўлиб, унинг ёзувчи-шоирлари у синфининг вакиллари бўлиб хизмат қилганлар ва қиладилар. Социализм қурилиши даврида, синфий кураш шароитида туғилиб ўсмакда бўлган ўзбек шўро адабиёти ҳам истисно бўла олмайдир... Мана бу ҳол ўзбек шўро ёзувчиларидан, шоирларидан, онгли суратда шўро, социализм қурилишининг ёзувчилари, шоирлари бўлишни талаб қиладир»<sup>12-13</sup>. Адабиётимизнинг биринчи авлоди замон руҳини яхши тушунди. Бунинг энг яққол исботи шуки, Ҳамза, Айний,

<sup>12-13</sup> Ҳошим Отажон. Узбек шўро адабиётининг бир неча асосий ижодий масалалари//Ўзбекистон шўро адабиёти. 1932. 4—5-сонлар. 35-бет.

А. Қодирий, Ойбек, Ф. Ғулом, Ҳ. Олимжон, Ғайратий, Үйғун, Яшин, А. Қаҳҳор ва уларга ўхшаш ёзувчилар ўз асарларида Октябрь революциясининг ютуқлари ва совет ҳаётини мадҳ этдилар.

Ёзувчилар ва танқидчилар адабиётга оид мақолаларда социалистик идеология ва совет воқелигини тасдиқ этувчилар сифатида майдонга чиқдилар. Масалан, Ойбек ўша йилларда: «Курашади икки тўлқин, қараб турайми? Йўқ! Болғалар, ўроқ сафи ила бораман!» — деган бўлса, Ҳамид Олимжон бир танқидий мақоласида ёзган эди: «Биз лаззатларга бой, завқларга тўла бир даврда яшаймиз. Янги қурилишнинг темир йўлларига қўйилган ҳар полвон қадам, турмушишимиздаги ҳар қизғин ҳодиса ўзи билан бирга янги завқ, янги-янги нашидалар яратади. Ана шу нашидаларни туймак... самимий бир шаклда санъаткорона тасвир этмак шўро санъатининг постовойларига юклатилгандир... Шоир, адилларимиздан замоннинг тўлқинларини тингламоқ, тўйғу ва ҳисларимизни ташкил этмоқ, янги қурилишдаги курашга (таъкид бизники — М. Ю.) кенг оммани яна илгарига унダメоқ талаб қилинади<sup>14</sup>.

Үйғун учун комсомол «кураш боласи», шоир «кураш қизининг ёлқин кўзидан» илҳомланади, «кураш нурларига муштоқ әрларни» куйлади. «Давримизнинг юраги кескин кураш-ла сапчиб тепади». «Кескин кураш, жанг гардиши давримизни шундай айланган» и учун «янги ҳаёт қураётирмиз. Зиёд Сайд «Кураш мадҳияси учун» мақоласида: «Бизда ҳозирги жараён эскини синдириш, кураш, ҳамма соҳада беш йиллик план учун кураш жараёни бораётир...», — деб ёзди.

Қисқаси, дунёни қайтадан яратиш, кураш пафоси ўзбек совет шоирлари, прозаиклари ва драматурглари ижодидаги бош ғоя эди.

Янги, совет адабиёти ва танқидининг эстетик принциплари бир қанча ҳолларда махсус танқидий мақолаларда эмас, балки бадиий асарларда ифода этилар эди. Масалан, Ойбекнинг юқоридаги шеъри ёки Ф. Ғуломнинг «Гўзаллик нимада?», Ғайратийнинг «Тузалган ўлкага» шеърлари — шоирларнинг ғоявий-эстетик программаларидир.

Бутун мамлакат тарихда мисли кўрилмаган ижодий жараёнга, ҳамма соҳада янгиланиш жараёнига катта ғайрат билан киришган даврда адабиёт ва санъат на-мояндалари ҳам инқилобий ғояларни акс эттирувчи

<sup>14</sup> Ер юзи. 1929. № 12, 2—3-бетлар.

янги — социалистик маънавий бойликларни яратиш ҳаракатидан четда туришлари мумкин эмасди. Чунки улар янги совет кишилари ва новатор ёзувчилар эдилар.

Ўзбек совет адабиётининг бешиги ҳисобланган инқилобдан кейинги бошланғич давр ва 20-йиллар хусусида гапиргандага янги замон ҳақида ёзилган асарларнинг кўпчилиги шеърият бўлганини, бошқа адабий турларга қараганда поэзия етакчи роль ўйнаганини таъкидлаш лозим.

Турли ҳалқлар тарихида бўлиб ўтадиган кескин ижтимоий ўзгаришлар, сиёсий-ижтимоий ҳаётдаги бурилиш пайтлари билан танишиш шуни кўрсатадики, ҳар бир янги, ёш жамиятнинг ривожланиши жараёнида прозага нисбатан поэзия аввалроқ ва кўпроқ хизмат қиласди, тезроқ ривожланади. Бу ҳолни социалистик жамият билан бирга майдонга келиб, у билан бирга камол топган адабиётимиз мисолида ҳам кўриш мумкин. Поэзия Октябрь инқилобининг дастлабки кунларида, 20-йилларда, ниҳоят, Улуғ Ватан уруши йилларида олдинда борди, разведкачи бурчини ўтади.

Совет адабиётининг кўп овозли оркестрида жаранглаб эшитилиб турадиган созлардан бўлган ўзбек адабиёти ҳам, бир томондан, узоқ асрлик поэтик традицияга эга бўлгани, иккинчидан, даврнинг жўшқин руҳйи акс эттириш тақозоси билан илк қадамларини Ҳамза ва Айний асарларидан бошлади. Ўлар бошлиқ қилган адабий жараёнга Авлоний ва Сўфизода, Фақирий ва Оразийлар шеърияти келиб қўшилди. Ҳамзанинг «Атиргул» (1919) китобидаги бош мотив янги совет кишиси қалбida уйғонган озодлик ва социалистик воқеиликдан мамнунлик ҳиссидир.

Садриддин Айнийнинг «Инқилоб учқунлари» (1923) тўпламига кирган, кўпчилиги 1919—1920 йилларда ёзилган шеърлари мазмунан Ҳамза асарларига оҳангдошdir. Шоир Айний «Хуррият марши» (Марсельеза)-да инқилобчи йўлдошларни илгарига қараб қадам босишга, дунёдан зулмни қувиб, адолат ўрнатишга, бирлашишга чақирса, «Байналмилал марши» (Интернационал)да эса «Ишчи, аскар, деҳқон, қўзғалинг!» дейди.

Абдулла Авлоний 1919 йили «Иштирокион» газетаси саҳифаларида босилган «Хуррият марши», «Фирқа олойларина» (дружиналарига — М. Ю.), «Изчиларга (пионерларга — М. Ю.) тортиқ», «Ишчилар қулоғина» («Касабачилар ҳаракати» журнали. 1920, № 4) каби

шеърларида Ҳамза ва Айний шеърларидаги сингари чақириқлар бор.

Октябрь инқилобидан кейин шу нарса ғоят равшан бўлиб қолдики, фақат социализм кенг омманинг руҳий ва гражданлик ҳаётини таъминлайди. Дилдаги реал мақсадларни, эҳтиёж ва ҳавасларни амалга ошириш йўлларини очади. СССР Ёзувчиларининг Бутуниттифоқ Биринчи съездидаги Лидия Сайфуллинанинг партия ва ҳукумат «бизларни жуда тез ва бажонидил ёзувчи қилиб етиштирдилар» деган сўзлари М. Горькийга ғоят манзур бўлган эди. Дарҳақиқат, шундай бўлди.

Йигирманчи йиллар ўзбек совет поэзиясининг шаклланишида ижоди Октябрдан олдин бошланган шоирлар кетидан тезгина қўлига қалам олган Ғайратий, Ойбек, F. Гулом, Уйғун, Боту, Ҳ. Олимжон, Ш. Сулеймон, Миртемир, Ойдин, Ҳ. Шамс, Элбек яхши фаолият кўрсатдилар. Бу даврда уларнинг илк шеърий тўплamlари босилди.

Октябрдан кейинги тоҷик, туркман, қозоқ ва ўзбек совет прозаси илк қадамларини новелладан бошлади. Абдулла Қодирийнинг «кичик асарлар»и тушунчасига кирадиган қатор лавҳа, новелла, ҳажвия ва ҳикоялари; Элбекнинг «Машоқчи Эрбўта», «Келгусининг қуёши», «Қўшчи Турғун»; Ботунинг «Янги қишлоқ», «Ҳошимжон», «Турсун»; Ғайратийнинг «Иккинчи пичоқ», «Яширин тилаклар», «Омонат домла»; F. Гуломнинг бир қатор ҳажвий ҳикоялари ва «Ҳикоялар», «Жўра бўза», «Кулгили ҳикоялар» тўпламлари; Абдулла Қаҳҳорнинг «Бошисиз одам», «Гумроҳ», «Рақиб», «Тангрининг кулгиси»; Уйғуннинг «Ҳикоялар» китоби; Ш. Сулеймоннинг «Лолазордан шумғия», «Хитой зонтиги», «Паразитлар», «Қотил» каби асарлари ва яна неча ўнлаб ҳикоялар йигирманчи йиллар ва ўттизинчи йилларнинг бошидаги «кичик проза» намуналари эди.

Ёзувчиларимиз кичик жанрларда орттирган тажрибалари асосида повесть ва роман яратишга киришдилар. Айнийнинг «Бухоро жаллодлари», «Одина», «Қулбобо» повестлари ҳамда «Дохунда» романи; Абдулла Қодирийнинг «Ўтган кунлар» ва «Меҳробдан чаён» романлари ўзбек прозаси катта ҳажмли бадиий асарларда тарихий воқеаларнинг кўп планли тўла тасвирини бера олиш даражасига кўтарилаётганлигидан дарак бериб туради.

Ўзбек прозаси ва поэзиясидан фарқли равища драматургия узоқ асрлик ёзма традицияга эга эмасди. Миллий ўзбек театрининг майдонга келишида, бир

томондан, халқ демократик театрининг (масхарабозлиқ, қизиқчилик, қўғирчоқбозлиқ) — халқ оғзаки драмасининг асрлар давомида авлоддан-авлодга ўтиб келган традицияси муҳим роль ўйнаган бўлса, иккинчидан, рус классик драматургияси билан қардош Озарбайжон ва татар драматургияси қўлга киритган ютуқлардан ижодий фойдаланиш тажриба мактаби бурчни ўтади.

Туркистон партия ва совет ташкилотлари театр санъатини ривожлантириш мақсадида қатор тадбирларни амалга оширилар. 1921 йил май ойида Туркистон Халқ Комиссарлари Совети намунавий ўзбек Давлат труппасини тузиш тўғрисида маҳсус қарор чиқарди. Маннон Уйғур раҳбар қилиб белгиланган бу труппа 1924 йили Москвага ўқишга юборилди. Труппа аъзолари ёзда Тошкентга келган чоғларда рус ва Фарбий Европа драматургларининг асарларини саҳналаштириб, кўрсатар эдилар.

Ўзбек совет адабиётининг асосчиси Ҳамза Ҳакимзоданинг «Бой ила хизматчи»си илк совет пьесаси сифатида драматургиямизнинг катта ютуғи бўлди. Унинг «Туҳматчилар жазоси» (1918), «Қармоқ» (1919), «Бурунги қозилар ёхуд Майсарапнинг иши» (1926), «Ер ислоҳоти» (1925), «Паранжи сирларидан бир лавҳа...» каби асарлари майдонда келди. Ҳамзадан кейин ўзбек совет драматургиясига кириб келган ёшлар — Яшин, Ойдин, Зиё Саид, Собир Абдулла, Назир Сафаров, С. Ҳусайн ва бошқалар қаторида уларнинг катта замондошлари ҳам замонавий мавзуларда ижод қилишга киришдилар.

Инқилобнинг дастлабки йилларидан бошлаб болалар адабиёти ҳам юзага кела бошлади. 1919 йили Самарқандда «Болалар йўлдоши» журнали таъсис этилиб, унда болалар учун маҳсус ёзилган асарлар эълон қилинди. 1921 йили Тошкентда «Болалар дунёси» журнали иш бошлади. Кейинроқ «Шарқ чечаги» (1921), «Ўзгариш болалари», «Ёш куч» чиқадиган бўлди. Бу журналлар ҳали болалар учун яратилган бадиий асарлар оз бўлган бир вақтда ахлоқий-тарбиявий, ўқиш ва меҳнат мавзуларида эълон қилиб борган кичик-кичик шеър ва ҳикоялари билан анча фойдали иш қилди. Йигирманчи йилларнинг ўрталарига келиб болалар адабиётининг аҳволи ҳамда вазифаларини характерловчи мақолалар қўрина бошлади. Уттизинчи йилларнинг бошидан «Ёш ленинчи» газетаси, шунингдек

«Вожатий», «Ёш куч» журналлари қатор мақолаларъ эълон қилди.

Поэзия, проза ва драматургия соҳасида яратилган бадиий маҳсулот ана шу даврдаги адабий ҳаётнинг умумий манзарасини ўзида маълум даражада акс этириб турарди.

СССР ёзувчиларининг Бутуниттифоқ Биринчи съездига тайёргарлик бошланган йилларда М. Горький бошчилигида совет адабиётининг барча миллӣ отрядлари билан алоқа қиласидиган бригадалар тузилгани маълум. Узбекистонга келган бригаданинг раҳбари В. Ермилов 1934 йили шундай ёзган эди: «Ўзбекистон адабиёти билан алоқа қилиш учун тузилган бригада ўз ишини ўзбек адабиётини ўрганишдан бошлади. Бу ерда жуда жиддий ютуқлар бор... Кенг ишчи ва колхозчи томошабинларнинг севиши ва шуҳрати билан фойдаланадиган ўзбек драматургиясиға эгамиз. Яшин, Анқабой, Исломилов, Фатхуллин, Зиё Сайд ва Сафаровнинг пъесалари ва бошқалар социалистик тарбияда катта иш қилмоқдалар.

Ўзбек наср ва назмининг ўсиши Faфур Fулом, Fайратий, Ҳамид Олимжон, Уйғун, Ойбек, Ҳасан Пўлат, Ойдин, Абдулла Қаҳҳор, А. Қодирий, Ҳусайн Шамс ва бошқалар билан бўлди... Уларнинг ижодларини Совет Иттифоқи ва бутун адабий жамоатчилик муҳокамасига қўйиш зарур; уларнинг ижодий тажрибаларини совет адабиёти бутун бошқа отрядларининг мулки қилиш керак...»<sup>15</sup>.

Номларини В. Ермилов санаб ўтган ёзувчилар ҳали етук сўз санъаткори даражасига кўтарилиб улгурмаган бўлсалар-да, эришган дастлабки ютуқлари билан, социализмни қуилаганликлари билан баҳтли эдилар. Бу туйфуни А. Фадеев жуда яхши ифодалаган: «Биз одамларга социалистик ҳаёт ҳақида, унга қандай қилиб эришганимиз тўғрисида биринчи бўлиб ҳикоя қилиш баҳтига мусассар бўлдик. Ўтмишнинг энг йирик санъаткорларидан биронтаси ҳам инсониятнинг бадиий тараққиётида айттолмаган сўзларни гўдак лабларимиз билан айтиш баҳти бизга насиб қилди... Жаҳон санъатида биринчи марта тарихнинг янги қаҳрамони — социалистик жамият кишиси намоён бўлди ва тилга кирди...»<sup>16</sup>.

<sup>15</sup> Узбекистон шўро адабиёти. 1934. № 1. 29—31-бетлар.

<sup>16</sup> Фадеев А. За тридцать лет. М., 1959. С. 199.

Шундай қилиб, йигирманчи йилларнинг охири ва ўттизинчى йилларнинг бошига келганда қувонишга лойиқ ютуқлар қўлга киритилган, энг муҳими янги совет кишиси образи асосий қаҳрамон сифатида давр адабиётига кира бошлаган эди. Энди ана шу қилиб улгурилган ишларни чуқур таҳлил этадиган, илмий-назарий жиҳатдан принципиал тўғри баҳолайдиган ҳамда ёзувчиларнинг ўсишига ёрдам берадиган танқид керак эди. Совет адабиёти янги типдаги бадиий тафаккур бўлгани сингари у янги типдаги танқидий тафаккур бўлиб, ёзувчи билан китобхонлар оммаси ўртасига воситачи ва объектив ҳакам бўлмоғи, кишиларда ҳақиқий эстетик дидни тарбиялашга хизмат қилиши лозим эди.

### ЯНГИ АДАБИЙ ТАНҚИДНИНГ ИЛК ҚАДАМЛАРИ<sup>17</sup>

Адабий танқид бадиий ижоднинг замонавий конкрет асарлари тўғрисида муҳокама юритиб, инсон ва жамият ўртасидаги мураккаб ижтимоий, ахлоқий, тарбиявий масалалардан баҳс очади. Воқеликни илмий-назарий ҳамда эстетик-ҳиссий идрок этишга хизмат қиласи. Бинобарин, у санъатга ҳам, илмга ҳам дахлдордир. Унда ақлий хулосалар билан руҳий ҳаяжон, мантиқий тафаккур билан образли фикрлаш мужассам ҳолда намоён бўлади. У илмий-адабий ижоднинг мустақил соҳасига айланиши билан ижтимоий воқелик ҳамда адабиёт ўртасидаги специфик алоқа шаклларидан бири сифатида ривожланган ва инсон зеҳний оламининг такомилида актив роль ўйнаган.

В. Г. Белинский илк мақолаларидан бирида «танқид нима?» деган саволга жавоб бериб: у ҳам ғоявий, ҳам бадиий жиҳатдан жамиятни вояга етказувчи, янги эстетик тушунчаларни устувор этиб, китобхонда чинакам инсоний фазилатларни тарбияловчи «ҳаракатдаги эстетика», дейди. Танқид мағҳумини нотўғри ва тор маънода тушунувчилар ҳақида гапирав экан: «...кўпчилик учун танқид қилиш — сўкиш, танқид — ҳақорат

<sup>17</sup> Бизнинг ўзбек совет адабий танқидига доир ушбу ишимизга қадар майдонда «Адабиёт ҳақида илмий текширишлар» (1934), «15 йил ичида ўзбек совет адабиёти» (1939) каби мақолалар тўпламлари, Ҳомил Еқубовнинг «Танқид ва адабиётшуносликка бир назар» («Адабиётимизнинг ярим асри» тўплами, 1967) сарлавҳали салмоқли мақоласи, шунингдек Бахтиёр Назаровнинг «Ўзбек адабий танқидчилиги (ғоявийлик, метод, қаҳрамон)» китоби бор эди (1979). Мазкур ишда биздан аввал эълон этилган ҳамма асарларнинг мазмунни эътиборга олинади.

қилиб ёзилган мақоладан бошқа нарса эмас... Танқид «ҳукм қилмоқ» деган маънони ифодаловчи грек сўзидан келиб чиққандир; демак, унинг кенг маъноси «ҳукм қилмоқ», «фикр юритмоқ» демакдир»<sup>18</sup>.

Ўзбекистонда ана шу фазилатга эга адабий танқид юзага кела бошлади. Адабий танқид олим ва ёзувчига хос истеъодод бир шахсда умумлашуви туфайли юзага чиқадиган ижод туридир. Танқидчининг бадиий асарларга оид юритаётган ҳар бир мулоҳазаси ҳаёт фактларидан келиб чиқадиган аниқ мантиққа эга бўлиши, баён қилаётган фикрларининг услуби равон ва ҳажми ихчам бўлиши лозим. Танқидчи ўз даврининг фарзанди сифатида жўшқин ҳаётнинг катта ва кичик воқеаларига актив аралашади. Ёзувчи конкрет бадиий образлар билан тасвиrlаган foявий-бадиий ниятни, турмуш манзараларини, ҳис-ҳаяжонни танқидчи осон тилда изоҳлаб беради. У китобхон билан ёзувчи ўртасидаги объектив, пок ниятли, ҳалол воситачи ролини ўйнайди. Танқидчи зиммасига ғамхўр мураббий масъулияти юклатилгани ҳолда, умуман танқиднинг ўзи жамият аъзоларининг тарбиячисидир. Айниқса бизнинг социалистик жамиятимизда унинг тарбиявий моҳияти ниҳоятда ўси.

РКП(б) Марказий Комитети «Партияning бадиий адабиёт соҳасидаги сиёсати ҳақида» (1925 йил 18 июнь) қабул қилган резолюциясида адабий танқиднинг пролетар революцияси ва социализм қурилиши давридаги йўналиши ва мазмуни бундай таърифлаб берилган эди: «Коммунистик танқид коммунизм позицияларини бир минут ҳам қўлдан бермай, пролетар идеологиясидан заррача ҳам чекинмай, турли адабий асарларининг мазмунидаги объектив синфий маънони очиб беришга даъват этилгани, пролетариат билан бирликда бора оладиган ва албатта борадиган адабий табақаларнинг барчаси билан муомалада ниҳоятда эҳтиёт бўлиб, сабр-тоқат кўрсатиб, ётиғи билан иш кўрмоги керак»-лиги айтилади. Резолюцияда танқид буйруқбозликтан йироқ бўлиши лозимлиги таъкидланиб, у «фақат ўз foявий устунлигига суюнсагина чуқур тарбиявий аҳамиятга эга бўла олади»<sup>19</sup>,— дейилади.

Бу талабларга жавоб бериш учун адабий танқиднинг савияси юксак бўлиб, даврнинг бадиий тенденция-

<sup>18</sup> Белинский В. Г. Танланган асарлар. Тошкент. 1955. 219—220-бетлар.

<sup>19</sup> О партийной и советской печати. М., 1954. С. 346.

сини тўғри тушуниши, адабий ҳодисаларга холисона ёндашиб, ўтмиш билан ҳозирги замон орасидаги ғоявий-бадиий алоқаларни тўғри белгилашга ёрдам берадиган тарихийлик принципига риоя қилиши ва, ниҳоят, алоҳида ёзувчилар ҳақида гапирганда улар ижодининг ўзига хос хусусиятларини очиб бериши ҳамда ёшларни эҳтиёткорлик билан тарбиялаб катта ижодий йўлга солиб юбориши зарур эди.

РКП(б) Марказий Комитетининг резолюцияси жамоатчилик эътиборини адабий танқидга янада кўпроқ жалб эта бошлади. Йигирманчи йилларнинг иккинчи ярми ва ўттизинчи йилларнинг бошида адабий ҳаётда актив иштирок этган ва Ўзбекистон Ёзувчилари союзининг биринчи секретари бўлган Раҳмат Мажидий танқидчи кадрларни етиштириш ва уларнинг ёзувчиларга амалий ёрдами ғоят зарурлиги тўғрисида қўйидагиларни айтган эди:

«...Ёзувчиларнинг асарларига чуқур таҳлил асосида принципиал юксаклиқда турган большевик танқиди зарур дастакдир. Умуман адабий ҳаракатнинг адабий танқиддан бошқа яшови, ўсуви мумкин эмас. Бизда ёзувчилар, шоирларнинг кундан-кунга кўпайиб ва тарақкий қилиб турган бир даврда танқидчи кадрлар масаласи ва танқиднинг сифати учун кураш жуда кескин суратда туради... Ҳозир ёзувчилардан социализм даврининг мафкуравий соғлом ва бадиий кучли асарлар яратиш талаб қилинса, адабий танқидчилар олдига қўйилган талаб ҳам бундан кам эмас...»<sup>20</sup>.

Ўзбекистондаги адабий танқиднинг майдонга келиши ва шаклланиши йўлларини кузатар эканмиз, танқид ўзининг илк қадамларини асосан тақриздан бошлаганига ишонч ҳосил қиласмиз. Яна шу факт эътиборга лойиқки, инқилобдан кейинги дастлабки йиллардаги адабий тақризлар кўпроқ спектаклларга ёзилган ҳамда вақтли матбуот саҳифаларида босилиб тўрган<sup>21</sup>.

<sup>20</sup> Ўзбекистон шўро адабиёти. 1932. 1—2-сонлар. 29-бет.

<sup>21</sup> Мисол учун Ҳуршиднинг «Шоҳнома»дан олиб инсценировка қилинган «Захҳоки морон» (Иштироқиён. 1919. 9 октябрь). Шафақ Махдумнинг «Ёрқиной» ва «Ҳеч ким билмасин» (Қизил байроқ. 1921. 17 сентябрь), Мирмулланинг «Фарғона фожиасидан З-бўллим» (Қизил байроқ. 1921. 9 октябрь), фамилияси номаълум авторнинг Ҳ. Жовид асари «Шайх Санъон» (Туркистон. 1929. 6 июнь), Турғунбойнинг «Лайли ва Мажнун» (Туркистон 1924, 13 май), «Сергак» таҳаллусли тақризчининг «Аршин мололон» (Қизил Ўзбекистон. 1925. 11 май) каби саҳна асарлари ҳақидаги ўнлаб тақризларни кўрсатиш мумкин.

Эҳтимол, театр тақризларидан орттирилган тажриба натижаси бўлса керак, секин-аста алоҳида бадиий асарлар, тўпламларга ёзилган тақризлар ҳам кўрина бошлайди. «За-най» имзоли авторнинг «Халил фаранг» (Қизил Байроқ. 1921. 3 февраль), «Чўл боласи» тахаллуси муаллифнинг «Ер юлдузлари» (Зарафшон. 1926. 13 август), С. Айнийнинг повестлари, А. Қодирийнинг романларига ёзилган ва турли адабиётчилар қаламига мансуб бошқа тақризлар фикримизнинг далилидир.

Булардан кейин бизнинг салафларимиз ва замондошларимизнинг ҳёти ҳамда адабий фаолиятига бағишиланган мақолалар юзага келади. Тўғрулнинг «Эски шоирларимиздан Муқими» (Фарғона. 1923. 17 март), Л. Олимийнинг «Унутилган шоир» (Сўғизода ҳақида. Фарғона. 1925. 30 март), Фитратнинг «Муқаддиматул-адаб» («Маориф ва ўқитғувчи». 1926. 7—8-сонлари) ва «Бедил» (брошюра, Москва, 1923), А. Сулаймоннинг «Тагор ва тагоршунослик (Маориф ва ўқитғувчи, 1926. 11—12-сонлари) ва «500 йил» (Навоий ҳақида. Туркистон. 1924. 23 сентябрь) каби мақолалари Октябргача бўлган бадиий хазинамизнинг биз учун қимматини ўйқотмаган ва янги авлодга хизмат қиласидиган томонларини ўз илмий савиляри даражасида очиб беришга интилади. Уларнинг ҳар бирни қисман ўз фазилати, шунингдек нуқсонларига эга эканини, айниқса салафларимиз ижодини синфиийлик нуқтаи назаридан баҳолашетиши маслигини айтиш лозим.

Ёзувчи ва танқидчиларнинг бир қисми ўзбек совет адабиётининг ривожига ёрдам берадиган актуал масалалар билан шуғулландилар. Қундалик жараёнга оид танқидий ва илмий-маърифий ишлари билан газета ва журналлар саҳифаларида тез-тез кўриниб турган ёзувчи ва адабиётшунослардан Абдулла Қодирий, Лутфулла Олимий, Абдураҳмон Саъдий, Элбек, ёшлардан Ҳамид Олимжон,Faфур Ғулом, Миртемир, Уйғун, Шоқир Сулаймон, Боту, Кашшоф Тригулов, Сотти Ҳусайн, Абдулла Қаҳҳор, Олтой, Отажон Ҳошим, Юнус Латиф ва бошқаларни кўрсатиш мумкин. Улар ўзбек совет адабиётининг шаклланишига доир энг актуал проблемалар устида баҳс юритганлар.

Октябрь инқилобигача бўлган ўзбек матбуотида «танқид» рубрикаси остида асосан турли ижтимоий-сиёсий, ахлоқий ва диний мавзудаги бაъзи бир адабий, илмий мақолалар, фельетон ва очерклар, ҳикоялар, тил ва тафаккурга оид ҳар хил мунозаралар ҳамда публицистик мақолалар босилган бўлса, инқилобдан

кейинги ўзбек совет матбуоти саҳифаларида энди «Танқид ва адабий мубоҳасалар», «Фаний текширишлар», «Матбуот ва адабиёт», «Санойи нафиса оламида», «Театр ва концерт» каби янги рубрикалар остида турли адабий-бадиий тўпламлар, саҳна асарлари, спектакллар, концертлар, дарслклар, нашриёт ҳам матбуот ишларига оид обзорлар эълон қилинди. Адабий жараёнга доир оригинал мақолалар, танқид ва тақризлар билан бирга қардош халқлар адабиёти, айниқса, рус, татар, озарбайжон ва бошқа халқларнинг сўз санъаткорлари, олимлари, адабиётшунос ва санъатшунослари ҳақида ҳам мақолалар босилиб турди.

Шарқ ва Фарбнинг санъат назарияси, гўзаллик ҳақидаги қарашлари хусусида, шунингдек, В. И. Ленин, Г. В. Плеханов, В. Г. Белинский, Н. Г. Чернишевский, А. Луначарскийнинг эстетик қарашлари тўғрисида мақолалар берилиб борди<sup>22</sup>. Марксча-ленинча эстетика ва адабиётшунослик тарихига оид ишлар ва В. И. Лениннинг «Партия ташкилоти ва партия адабиёти» асаридан таржималар қилина бошлади. В. И. Лениннинг адабиётнинг коммунистик партиявийлиги, Пролеткульт ва ҳар хил формалистик оқимларга қарши ёзилган мақолалари янги туғилиб келаётган пролетар адабиёти ва танқидининг ғоявий-эстетик жиҳатдан тўғри йўлдан бориб ривожланишида ҳал қилувчи аҳамиятга эга бўлди.

Ўзбек адабий танқидининг шаклланишида Озарбайжон инқилобий публицисти Н. Наримонов, татар совет адаби О. Иброҳимов қаламига мансуб илмий-назарий мақолаларнинг таъсирини ҳам қайд қилиш керак<sup>23</sup>. Ўзбек матбуотида мазкур мутафаккирлар ҳаёти ва ижоди ҳақида материаллар босилиши ўша даврда катта ижобий ҳодиса эди. Бу даврда турли адабий турва жанрлардаги асарларни баҳолаш зарурати адабий-танқидий фикрнинг жонланишига сезиларли таъсир кўрсатди.

Ўзбекистонда яшаган рус ёзувчи ва танқидчилари Ф. Оликов, Б. Пестовский, М. Гаврилов, М. Шевердин, А. Аршируний, М. Алексеев<sup>24</sup> ва бошқаларнинг ўзбек

<sup>22</sup> Инқилобчи ёзувчи Николай Гаврил ўғли Чернишевский. Алланга. 1929. № 2—3.

<sup>23</sup> Наримонов Н. Ленин ва Шарқ. Тошкент. 1925; Наримон Наримонов (1870—1925). Тошкент. 1924.

<sup>24</sup> Пестовский Б. А. Ўзбек театрнинг тарихи//Инқилоб. 1923. № 3; Аршаруний. А. Заметки о художественной литературе Средней Азии//Новый Восток. 1929. № 26—27; Шевердин

совет адабиётида юзага келган роман (А. Қодирий), повесть (С. Айний) ва театр санъати масалаларига бағишиланган чиқишилари ҳам адабий танқид активлашиб бораётганидан дарак берив турарди.

Үлкада чиқиб турган рус тилидаги матбуот Туркистанда маҳаллий тилларда чиқа бошлаган янги матбуоттинг ютуқларидан қувониб, матбуот — «инқилобнинг энг катта ютуғи»<sup>25</sup> эканлигини қайд қилди. «Красная печать» ўзининг б-сонида «Газета-журналларнинг бу даврдаги асосий ғоявий-сиёсий вазифаси чоризмнинг Туркистондаги эски мустамлакачилик сарқитлари ва шу билан бирга маҳаллий миллатчилик оғишларига қарши кураш», — деб ёзди.

Ийигрманчи йилларда адабий танқиднинг вужудга келиши жараёнида бир-биридан тубдан фарқ қиласидан икки тенденция равшан кўзга ташланиб туради. Улардан бири — илмий изланишлар йўлидан бориши: Садриддин Айний, Абдураҳмон Саъдий, Лутфулла Олимий, Олим Шарафиддинов, Отажон Ҳошим, Аъзам Айюб каби танқидчи ва адабиётшуносларнинг ҳар бири ўзига хос ғоявий-услубий нуқсонлари, адабий фактларни изоҳлашда учрайдиган чигалликларига қарамай, илмий фикрлашга интилдилар. Бу қаторда танқидчиклик фаолиятини эндигина бошлаган Ҳомил Ёқубов, Ойбек, Юнус Латиф, Шокир Сулаймонлар ҳам бор эди.

Иккинчи тенденция вакилларининг фаолияти учун характерли белги Пролеткульт ва РАППчиларнинг маълум даражада таъсири, шунингдек, вульгар социологизм руҳи сезилиб туришидир. Бу гуруҳга мансуб кишилар маданий меростга нигилистик муносабатда бўладилар, адабий фактларни талқин қилишда схематизмга йўл қўядилар. Масалан, талантли танқидчи Сотти Ҳусайн ўзбек совет адабиётининг ёш кадрларини тарбиялашда, истеъоддларни пайқаб адабиётга олиб киришда яхши ташаббус кўрсатди. Аммо А. Қодирий ижодини вульгар социологизм нуқтаи назарида туриб схематик тарзда анализ қилди. Шундай нуқсонлар Зиё Саид, Умаржон Исмоилов, Юнус Латиф фаолиятида ҳам бор. Жалил Бойбўлатов ва Миёнбузрук Солиҳов эса вульгар социологизмнинг энг катта муридлари эди.

РКП(б) Марказий Комитетининг 1925 йил 18 июнь резолюциясида: «...Бизда умуман синфий кураш тўхтамаганидек, бу кураш адабиёт фронтида ҳам тўхтагани

д и н М. Первый узбекский роман (А. Кадыри «Прошлые дни»)// За партию. 1928. № 3 (7) и др.

<sup>25</sup> Красная печать. Ташкент. 1928. № 6. С. 8.

йўқ...», — дейилган эди. Шунинг учун бадиий адабиётда акс этаётган синфий кураш масаласига, жумладан, партиявийлик масаласига юқорида таъкидлаб ўтгани миздек, танқид алоҳида эътибор берди. Бу соҳада Ҳ. Олимжон, Уйғун, Ойбек, О. Ҳошим ва, айрим хатоларидан қатъи назар, С. Ҳусайн, З. Саид, Ю. Латиф анча фойдали ишлар қилдилар.

\* \* \*

Шуни қайд қилиш керакки. Ўзбекистонда адабий танқиднинг туғилиши биринчи навбатда «танқид нима?» саволига жавоб излашдан бошланди. Танқидий тафаккурнинг Октябрдан кейинги бошланғич йиллари ҳали анча ибтидоий бўлишига қарамай, юқоридаги саволга берилган жавоблар (садда бўлса-да) асосан тўғри эди.

Чунончи, танқид ҳақида ҳаммадан аввал гап бошлаган Элбек бўлди. Элбек танқид деганда ҳар қандай соҳада ишловчи кишиларнинг ўз касби бўйича яратилган асарларнинг ютуқ ва камчиликларини шахсий раз ёки мақтовларсиз, холисона айтиб, уларга тўғри йўл-йўриқ кўрсатишни тушунди ва танқидни объектив, самимий ва изчил бўлиши кераклигини тўғри қайд қилди. Унинг фикрича, «Танқид демак, бир ишда ва ё нарсада бўлатурғон камчиликларни шул ишнинг ишловчиларига кўрсатиб, тузатдирув ва тўлдирув учун айтиладурғон сўз демакдир. Буни ишлатувчи ўртоқларнинг-да танқид деган нарсани ўртага қўйиб, истар яхшилик, истар ёмонлик-да бир томонга оғдирмасдан ишлатувлари тегишдир.

Ўз ғаразимиз учун танқидни ишлатувимиз ярашмайдир. Чунки бу чоқ танқид деган нарсамиз танқидликдан чиқиб, оддий бир сўз ҳолини оладир. Яъни танқидчи ўртоқларнинг кайфларина қарашли бўлиб, аларнинг яхши кўрган кишига яхши, ёмон кўрган кишига ёмон йўл илиа юргизиладир. Шунинг учун-да танқидни ўз йўлида ишлатув керакдир. Бу кун бир кишининг мавқеига қараб мақтов, эртаси бирининг ёмонлавига қараб, ёки олдоғи бўлғонға қараб танқид юритув танқидни қурбон этув демакдир»<sup>26</sup>.

Қисқаси, танқиднинг руҳи танқидчининг кайфиятига қараб эмас, холисона бўлиши керак.

<sup>26</sup> Элбек. Бизда танқидчилик//Иштирокиён. 1920. 2 май.

Элбек В. Г. Белинский асарлари билан таниш бўлганми, йўқми, буни айтиш қийин. Аммо унинг, бир қадар ибтидоий услугуб билан бўлса-да, танқиднинг объектив бўлиши ва у танқидчининг шахсий гаразидан, субъектив кайфиятидан холи бўлиши лозимлиги, ниҳоят танқидчи ёзувчининг ижодий ҳамкори экани тўғрисидаги фикрлари юқорида биз келтирган В. Г. Белинский фикрларига мантиқан яқиндир.

Неъмат Ҳаким эса Элбекдан фарқли ўлароқ фанний (илмий) танқид, шунингдек, турмушдаги турли камчиликларни кўрсатувчи сатирик танқид адабий-бадиий танқидга ўхшамаслигини айтиб, адабий танқид хусусидаги мавжуд тушунчаларни бирмунча кенгайтиришга ҳаракат қиласди. У турмушдаги ҳар хил камчиликларни танқид қилувчи сатирик асарлардан ҳамда турли ижтимоий, табиий фанлар танқидидан бошқача бўлган адабий танқиднинг хусусиятлари ҳақида гапиради: «Танқид нима?» — дейди у ва давом этиб ёзади: «Бу сўроққа ҳар ким жавоб бера олса ҳам, лекин унинг маъносини тил билан айтмак бошқа, амал билан кўрсатиш бошқадир». «...Менинг танқид тўғрисида айтитурғон нарсам... турмушдаги воқеаларни<sup>[нг]</sup> танқиди эмас, балки ўзбек матбуотидаги китоб ва мақолаларни<sup>[нг]</sup> танқид қисмигинадир. Агар турмушдаги воқеаларнинг танқиди ҳақида бўлса, сўзнинг кўп узайиши ҳам мумкин бўлар эди...»

Танқид ва адабий муҳокамаларнинг кўпи нафис асарларга тушадилар. Баъзи бир дарсликларга бўлиб турадир...»<sup>27</sup>.

Неъмат Ҳаким шу тариқа танқиднинг доирасини белгилаб олгандан кейин бу соҳада кимлар қандай мақолалари билан иштирок этаётганлари, уларнинг савияси устида қисқача тўхтар экан, айниқса А. Саъдий активлигини, кўпинча жиддий масалалар ҳақида биринчи бўлиб фикр юритишини маъқуллайди. «Муштум» саҳифаларида танқидга ижобий баҳо беради. Неъмат Ҳаким адабий танқиднинг ростгўй ва холосона бўлишини истайди. Унингча «танқидга аралашаётганлар шахсий нарсаларни ташласалар жуда яхши бўларди». Адабий ҳаёт тўғри йўлдан бориб ривожланиши учун танқиддан чекинмаслик керак. Агар танқид қилинган шахс «ранжиса ранжий берсин. Бир неча йиллар ўтгандан кейин ўзи ҳам раҳмат ўқийди...» (ўша жойда).

<sup>27</sup> Неъмат Ҳаким. Ўзбек адабиётида танқид ва адабий муҳокамалар. Танқид нима?//Туркистон. 1924. 25 июнь.

Муаллиф адабий танқид спецификаси, унинг бошқа фан соҳасидаги танқид ва матбуотдаги сатирик жанрлардан фарқлари, танқид ва танқидчининг ижтимоий бурч ва вазифалари, танқидда объективлик ва принципиаллик, таҳлил усуллари (ғоявий, бадиий ва тил жиҳатдан таҳлил), сатирик матбуотда адабий танқидга хос формалар ҳақида (ибтидоий тарзда бўлса-да) тўғри фикр юритади.

Абдураҳмон Саъдийнинг мuloҳазасига кўра: «Танқид — агар бир фикр иккинчи бир фикр ишчанлигининг етишган ва етишмаган ёқларини очмоқ ҳам ажратмоқ, буларга бир қиймат қўймоқ томонига жўнатилса, бу вақтда танқид деб аталган бир фикрий ишчанлик туғилган бўлади. Танқид фикр ишчанлигининг қийин бўлғонларидан биридир. Бу ҳар кимнинг кучидан келмайдир. Керак фалсафий, керак фаний, керак ижтимоий ва турли асарлар, ижодлар бўлсин, уларни чин маъноси билан танқид қилмоқ учун маҳсус бир танқидчилик истеъдоди лозим... Санъаткорона ва шеърий бир асарнинг танқиди учун, айниқса санъат ва шеърий назариялардан, гўзал санъат ва адабиёт тарихидан, шу туғдирилган давр ва муҳитнинг ижтимоий ва иқтисодий ҳолларидан ва шу жамоатнинг умумий ҳолати руҳиясидан, умуман шу жамият ва шу синфнинг бутун идеологияси, идеалидан яхши хабарланган бўлмоғи тегишидир»<sup>28</sup>.

А. Саъдий танқид ва унинг жамиятдаги бурчи ҳақида (фикр ифодасининг бир қадар нотекислигидан қатъи назар) илмий мuloҳаза юритади. У, танқид бадиий адабиёт сингари ижтимоий ҳаёт билан мустаҳкам алоқада эканини, у ҳам синфиyllигини, муайян синф идеологиясини ўзида акс эттиражагини тўғри тушунади. Зотан, жамиятнинг ижтимоий ҳаётида, сиёсатда рўй берадиган воқеаларнинг ижтимоий онгдаги акси билан адабиёт ва танқид ўртасида узвий алоқа мавжуд. Ёзувчининг асарини мамлакатдаги ўзгаришларга қиёс қилмай туриб анализ қилиш мумкин эмаслигини танқид яхши англаши лозим. А. Саъдий ҳукмрон синф идеологияси, ҳолати руҳияси билан адабий танқид ўртасида диалектика алоқа бор, демаса ҳам унинг фикрларидан келиб чиқадиган хулоса шудир.

Муаллиф танқид осон ҳунар эмаслигини таъкидлар экан, танқидчи олдида турган масъулиятни алоҳида

<sup>28</sup> Саъдий Абдураҳмон. Амалий ҳам назарий адабиёт дарслари. Ўрта мактаблар учун дарслик. Иккинчи босмаси. Тошкент. 1925. 192—193-бетлар.

кўрсатади. Танқидчи нозик адабий дид, туйғу эгаси бўлишдан ташқари адабиёт тарихини, назариясини, тадқиқот методикасини билиши даркор.

А. Саъдийнинг кўчириб келтирилган фикрларини ўқигандан беихтиёр В. Г. Белинскийнинг: «Танқидчининг ихтисоси осон деб ҳисоблайдиган, танқид озми-кўпми ҳамманинг қўлидан келади, деб ўйладиганлар хато қилади; танқидчининг таланти оз учрайди. Унинг йўли эса қалтис ва хавфли. Дарҳақиқат, бир томондан, чуқур ҳис-туйғулар, санъатга қизғин муҳаббат, объектни жиддий ва ҳар томонлама ўрганиб чиқиш, ақл-идрок-нинг объективлиги каби қатор шартларнинг бир талантда мавжудлиги, холисона муҳокама юритиш зарурлиги ва, иккинчи томондан, зиммага олинган вазифа нақадар юксак»<sup>29</sup>,— деган сўzlари эсга келади.

Иигирманчи йиллар адабий танқиди бутун бир жараён бўлгани ҳолда танқидий асарлар яратилишида бир-биридан хиёл фарқ қиладиган уч усул бор эди: танқидчининг ёзувчи ижоди ҳақидаги кузатишлари; ёзувчининг асарларга баҳоси ва танқидчининг танқидчи мақолаларига муносабати. Ҳар уч усул билан яратилган маҳсулот ичиди объектив, соғлом фикр натижаси бўлган ишлар қаторида фактларни бузиб кўрсатадиган субъективизм намуналари ҳам учрайди. Бу хилдаги танқид адабиётнинг тўғри ривожланишига салбий таъсир кўрсатди.

Адабий танқиднинг жонланишида ижобий роль ўйнаган усул, шубҳасиз, соғлом позицияда туриб ёзилган танқидчининг ёзувчи ижоди ҳақидаги холисона фикридир. Шуни мамнуният билан қайд қилиш жоизки, ўзбек совет адабиётининг асосчиси, инқилобчи шоир Ҳамза Ҳакимзода Ниёзий ҳамда биринчи ўзбек совет романинг муаллифи Абдулла Қодирий ижоди дастлабки илмий мақолаларнинг объекти бўлди. Адабиётимиз Октябрдан сўнг босиб ўтган 6 йиллик йўлни кўздан кечирган А. Саъдий Ҳамза тўғрисида ёзган эди: «Ҳамза Ҳакимзода инқилобдан кейин ўзбек ишчилари, меҳнаткашлари, мазлумлари қайғуси билан ёзган синфий руҳдаги турли шеърлари, ашуаллари билан ўзбек шеъри ва шеърий адабиётининг фаол омилларидан эканини очиқ кўрсатди». Танқидчи Ҳамзанинг инқилобий шеърларидан айрим мисоллар келтириб фикрини тасдиқлагач, шоирни Октябрдан кейинги инқилобий

<sup>29</sup> Белинский В. Г. Собрание сочинений. В 3-х томах. Т. I. М., 1948. С. 225.

руҳдаги талант деб баҳолайди ва унинг пъесалари саҳналарда аллақачонлардан бери ўйналиб келаётган бўлса-да, босилмагани сабабли биз уларни кўра олмадик,— деб ачинади.

Яна: «Хусусан асарларининг кўпи ўзбекларнинг замондаги ўз турмушларидан, шу вақтдаги турли ижтиёмий ҳаёт воқеаларидан олиниб ёзилган бўлмоқлари айрим диққатни жалб этиб турадир. Ўзида юрак шоири (яъни лирик шоир — М. Ю.) бўлиш, музикачиллик ва турли куйлар ихтиро этиш, драматурглик ҳам артистлик йиғилган бир шахсни ҳам биз ҳали ёлғиз Ҳакимзода ўртоқда кўра оламиз»<sup>30</sup>.

А. Саъдийнинг Абдулла Қодирий ҳақидаги мулоҳазалари ҳам ҳақиқий аҳволни тўғри ифодалайди. Қодирийни ҳикоялар, айниқса ҳажвий ҳикоялар устаси бўлган ёш ва кучли адаб сифатида характерлайди. Ўзбек совет бадиий адабиётининг юксалишида катта хизмат қилган «бу шеърий (яъни бадиий — М. Ю.) талант «Инқилоб» журналида босилган «Ўтган кунлар» романни билан ўзбек адабиёти майдонида роман ёзувчиликнинг биринчи қадамини босиб юборди»<sup>31</sup>.

Шу мақолада Боту «қизил шеърий адабиётда ҳамон очилиб, гуриллаб турган, ўзига кўп умид боғлатган кучли талант»,— деб таърифланса, Элбек ишчи-дехқон турмушидан, қишлоқ болалари ҳаётидан ёзадиган сермаҳсуд шоир экани айтилади. Адабиёт майдонида ягона масалчи ҳозирча фақат шу, лекин «унинг лирик шеърлар ёзишдаги кучи ҳали унча юқорилаб кета олмагани» таъкидланади.

Иигирманчи йилларда ҳам ёзувчи, ҳам танқидчи ўлароқ активлик кўрсатган Зариф Баширнинг Элбек ижодига берган баҳоси А. Саъдийнига мазмунан яқиндир. Зариф Башир Элбекнинг «Армуғон» (1921) масаллар тўплами чиқиши ва «Ўзбек ёш шоирлари» (1922)да босилган шеърлари муносабати билан ёзган мақоласида қўйидаги фикрни баён қиласи: «...Элбек ўзбек шоирларининг энг кўп ёзувчиларидан бўлиб, унинг ёзғон шеърлари ўзга шоирларга қараганда тамоман бошқа бир ўринни тутадир». Хўш, бу ўриннинг бошқачалиги нимада? Маълум бўлишича, шоир узунузун достонлар ёзмаса-да, унинг яратган шеърлари «Элбек — достончи» деган эътиқодни ўқувчиларга синг-

<sup>30</sup> Саъдий А. Олти йил ичida ўзбек шеърий адабиёти//Туркистон. 1924. 21 июнь.

<sup>31</sup> Уша жойда.

дирган. Достончи бўлганда ҳам идеалист зиёлилар учун ёзмайди. Унинг бармоқда ёзган шеърлари халқа яқин. «Элбек халқ шоири бўлганлигини, турмушга очиқ қарааш йўлини тутганлигини унинг шеърлари очиқ кўрсатиб турадир...»<sup>32</sup>. З. Башир яна унда лириклик етиш маслигини айтади.

Шуни уқтириш керакки, номлари зикр қилинган ҳар иккала танқидчи ҳам Элбек ижодини асосан тўғри таърифлаганлари ҳолда, шоир анча мураккаб йўлни босиб ўтгани, ҳамма асарлари ҳам давр талабига тўла жавоб бера олмаганини кўрсатмайдилар. Элбек шеърлари ва масаллари орасида дудмол, ғоявий ноаниқ, мубҳам асарлар ҳам борки, уларни турлича талқин қилиш мумкин.

«Элбек «Меҳнат куйлари»да бир қанча муҳим масалаларни, хусусан камбағал деҳқонлар, батракларга ва қишлоқ турмушига бағишлиланган шеърларида олинган темани тўғри ҳал қиласди. Шу сабабли Элбекнинг бир қадар сўллашиб, бизга яқин келаётганини кўрсатиб ўтиш керакдир»<sup>33</sup>,— дейди Анқабой.

Танқидчилар орасида совет давридаги алоҳида ёзувчи ижодига бағишлиланган мақолалар ёзганлар қаторида XIX асрнинг охири ва XX аср бошларида яшаган шоирларни тилга оладиганлари ҳам бор. Масалан, Тўхтамурод Аълам ўғли (Тўғрул) «Эски шоирларимиздан Муқимий» сарлавҳали мақоласида Муқимий ўша замонда ўз теварагидаги ҳақсизлик ва адолатсизликдан норози ҳамда юрагида ўз ватани — юрти учун самимий ва пок муҳаббат сақлаган шоир сифатида таърифланаиди. Афсуски, охирида: «унинг баъзи шеърлари шу қадар очиқ, баситки, уни авом шоири»,— деса бўлади, тарзида хато хулоса чиқаради. Л. Олимий эса ижоди инқилобдан аввал бошланган Сўфизоданинг адабий фаолияти ҳақида «Унутилган шоир» номли адабий портрет яратган. «Истеъод, қобилият, талант деган нарса табиатнинг дунёда мисли йўқ жавҳаридирки, бу «аксири аъзам» жуда оз кишиларгагина муюссар бўладур» жумлалари билан бошланадиган бу портретда шоирнинг узоқ йиллик ҳаётий ва ижодий йўли кузатилади. Муаллиф Сўфизода шеърлари илгари «Шўро», «Ойина», «Садойи Туркистон» газеталарида босилгани, Афғонистонда бўлганида «Сирожул ахбор» газетаси

<sup>32</sup> Б ашир З. Ўзбек шоири Элбек. Туркистон. 1923. 3 октябрь.

<sup>33</sup> А нқабой. Ўзбек пролетар ёзувчиларининг ижодий юзи// Қурилиш. 1931. № 3. 17-бет.

бир қанча ғазал ва мухаммасларини эълон қилгани, унинг ижоди чуқур халқчиллик руҳи билан сугорилгани хусусида муфассал гапирадиз<sup>34</sup>.

20-йилларнинг муҳим хусусияти адабиётнинг ва адабий таңқиднинг кескин синфий кураш шароитида ривожланишидир. Бу ҳодисани конкрет тасаввур қилиш учун аксилинқилобий миллатчилик ғояларини ўз ижодида ифода этган Чўлпон асарлари ва мақолаларида адабий таңқидда муносабат қандай бўлганини кўрсатиш кифоя. Чўлпоннинг<sup>35</sup> поэзия ва драматургия соҳасидаги асарлари адабий таңқидда жиддий мунозараларга сабаб бўлди. Шоирнинг «Ўйғониши» (1922) тўплами нашр этилиши муносабати билан Э. Башир ёзди: «Чўлпон ўртоқ хаёлга жуда бой бўлгани ҳолда ...унинг хаёли табиатда ва кишилик дунёсида бор ва бўлиши мумкин бўлган доиралардагина учадир». Тақризчининг фикрича, шоир асарлари бадиий тасвирга бой, оз сўзлаб (оз ёзиб), кўп мазмунни ифодалайди, тили соғ ўзбек тилидир... З. Башир кейин Чўлпон асарларининг ғоявий мавқеи масаласига ўтар экан, у «эл», «халқ» сўзларини қанча кўп ёзса ва сўзласа ҳам халқ шоири эмас, халққа яқин бўлган зиёлилар шоиридир...»<sup>36</sup>, дейди.

З. Баширнинг бу чалкаш фикрлари 20-йилларда кўпгина таңқидчиларнинг методологик жиҳатидан етарли қуролданмаганини кўрсатади. Чунки, Чўлпоннинг «Ўйғониши» тўпламига кирган асарлари муаллифнинг совет воқелигига салбий муносабатини ифода этар эди. Таңқиднинг биринчи вазифаси — муаллифнинг дунёқарашини, воқеликка муносабатини тайин этиш эканлигини З. Башир эътиборга олмаган эди.

Аммо таңқид соҳасида марксча-ленинча методологияни муваффақиятли равишда эгаллаётган кадрлар ҳам бор эди. Айн (Олим Шарафуддинов)нинг «Ўзбек шоирлари. Чўлпон»<sup>37</sup> мақоласи шундан далолат берар эди. Ижодкор сифатида ўша кезларда дурустгина нуфузга эга бўлган Чўлпон тўғрисида Айн билдирган жиддий ва дадил таңқидий мулоҳазалар адабий жа-

<sup>34</sup> Фаргона. 1925. 30 март.

<sup>35</sup> Йигирманчи йилларнинг биринчи ярмида аксилинқилобий миллатчилик позицияларида турган баъзи ёзувчилар (Чўлпон ва Фитрат) ижодининг тавсифи бу китобнинг вазифасига кирмайди. Улар ҳақида батафсил маълумот олиш учун қаранг: История узбекской советской литературы. Т. I. Ташкент. 1987.

<sup>36</sup> Туркистан. 1923. 4 май.

<sup>37</sup> Қизил Ўзбекистон. 1927. 14 февраль.

моатчиликда катта таассурот қолдирди. Ўша даврда ёш танқидчи сифатида сафга кирган Ҳомил Ёқубов кейинчалик (олтмишинчи йилларга келиб) хотирлайди: «...Айн мақоласи адабий ҳаётда ва танқидчиликда муҳим воқеа бўлди. У материалистик танқид принципларига амал қилиб, асар анализини ғоявий мазмундан келтириб чиқарди. Лекин Айн бадиий тил, форма масаласини четлаб ўтмайди. Ҳатто у Чўлпон ҳам адабий тилни ишлаш ва бадиий тилни мукаммаллаштиришда катта иш қилганини қайд этиб ўтади»<sup>38</sup>.

Айн Чўлпонни инқилобгача, ундан сўнг ҳам энг кўп ёзаётганлар қаторига қўяди ва классикларнинг «тор рамкасини бузиб», уларнинг стили ва тилини соддалаштиргани ҳақида гапиради. Шоирнинг ғоявий нуқсонлари, «хусусан мағкураси, адабий таъсири устида» тўхталиб, уни мақтаганларга қарши эътиroz билдириб, «Чўлпон миллатчи, ватанпараст (яъни ўта тор миллатчи — М. Ю.) бадбин зиёлилар шоиридир»,— деган асосли, тўғри хulosча чиқарди, Чўлпонни хаёлпараст, замон ва муҳитдан узоқ деб характерлайди.

Орадан икки ой ўтгач, Ойбекнинг «Чўлпон шоирни қандай текшириш керак»<sup>39</sup> мақоласи пайдо бўлди. Муаллиф Айн билан мунозараға киришар экан, шоирнинг ғоявий нуқсонлари ҳақидаги фикрларга қўшилади: «Чўлпонда миллий парчалар йўқ, деб ҳеч ким айта олмас, бу факт»,— дейди. Унингча, «Айн каби масалага юзаки» қарамай, «ижтимоий (социологический) метод билан қуролланиб» нима учун шоирнинг «қўнглига миллий туйғулар» ўрнашиб қолганини, масаланинг синфий моҳиятини очиб бериш керак. «Чўлпон бир шахсдир. Шахс ижтимоий муҳит чизгиларининг кесишган нуқтасидир. Шундай экан, у пролетариат шоири бўла олармиди? Албатта бўлолмайди».

Ойбек Чўлпон ижодининг синфий моҳиятини очиб беришни ҳақли равишда талаб этгани ҳолда, унинг асарларидағи формал фазилатларнинг ролини ўша асарлардаги мазмундан ажратиб баҳолади ва натижада Чўлпон маҳоратининг сабоқлари ҳақида муболағали, нотўғри хulosаларга келди. Ойбекка кўра «Пушкин йўқсил учун ёнган бир шахс эмас... Лекин уни рус ишчиси, комсомоли, фирмаси, олими севади. Чунки, у кўп гўзал асарлар яратди, рус шеърининг бадиий намуна-

<sup>38</sup> Қаранг: Адабаётимизнинг ярим асрн (мақолалар тўплами). Тошкент. 1967. 355-бет.

<sup>39</sup> Қизил. Ўзбекистон. 1927. 17 май.

ларини берди. Биз ҳам худди ана шу сабабларга биноан Чўлпондан қўй торта олмаймиз».

Ойбекнинг хатоси шундан иборат эдикى, у Пушкиннинг чуқур гуманистик мазмунли асарлари билан Чўлпоннинг тор миллатчилик билан сугорилган асарларининг мазмуни орасидаги жуда катта фарқни эътиборга олмайди, Чўлпон асарларидағи бадий воситалар реакцион ғояларга хизмат этганини пайқамайди. Сўзни яна танқидчи Ҳ. Ёқубовга берайлик: «Ойбек мақоласининг ижобий томони шунда кўринадики, у ўзбек адабиётшунослигига социологик текшириш методини киритишига; адабий процессни белгиловчи ва ҳаракатга келтирувчи объектив ижтимоий синфий қонуният борлигини таъкидлашга уриниб кўрди... Аммо у шакл ва мазмун ўртасидаги диалектик бирликни кўра олмади...»<sup>40</sup>.

Айн ва Ойбек изидан бориб, «Мунаққиднинг мунаққиди»<sup>41</sup> мақоласини ёзган Усмонхон (Эшонхўжаев)нинг чиқиши мунозара қизиб бораётганидан, бაъзан кескин тус олаётганидан дарак берарди. Усмонхон Ойбекни бирёқлама танқид қилиб, Чўлпон ижодида мазмун билан шакл алоқаларини нотўғри тушунгандикда айблади. Чўлпоннинг бадий шаклидан фойдаланамиз, дегани учун Ойбекни адабиётга «буржуача қарайди»ганлар сирасига қўшади. Шуни айтиш керакки, Ойбек Усмонхонга йавобида<sup>42</sup> аввал бадий асарнинг мазмуни билан шаклини бир-биридан ажратиб иш кўргани «зўр хато» эканини бўйнига олгани ҳолда, адабиётни марксистик нуқтаи назаридан текшириш — «бадий асарлар ичига кўмилган ҳис ва фикрларни санъат тилидан социология тилига» кўчиришdir, деган тўғри эътиқодида қолади.

Адабий танқиднинг Чўлпон ижодига берган баҳоси у ғоявий-эстетик жиҳатдан анча етилиб қолгани аломатидир. Чунки Чўлпоннинг «Уйғониш» шеърий тўплами ва ундан кейинги бир қанча шеърий асарлари учун (юқорида қайд этилгандек) замонанинг муҳим ижтимоий ҳодисаларидан четда туриш, шахсий кечинмалар доирасидан чиқа олмаслик, Октябрь революциясининг оламшумул тарихий аҳамиятини тушунмаслик характеристли эди. Ёш совет адабий танқидчилиги шоир ижоди-

<sup>40</sup> Адабиётнимизнинг ярим асрн (мақолалар тўплами). Тошкент. 1967. 356-бет.

<sup>41</sup> Қизил Узбекистон. 1927. 22 ва 23 июнь.

<sup>42</sup> Қизил Узбекистон. 1927. 28 август.

даги ана шу салбий томонларнинг адабиёт учун зарарни очиб берди. Шу билан бирга, Чўлпон ҳақида танқидда айтилган фикрлар 20-йиллар ўзбек адабий танқидининг ожиз томонидан ҳам далолат беради. Бу ожиз томон шундан иборатки, адабий танқид (унинг ҳатто марксизм-ленинизм позицияларида туришга итилган кадрлари ҳам) Чўлпон ижодининг бу даврда мамлакатда Октябрь революциясидан норози эксплуататор синфларнинг кайфиятларини акс эттирганини изчил равишда очиб беролмади, шоир асалари ҳақидаги мунозара идеологик моментга биринчи навбатда урғу қилиш ўрнига бадиий маҳорат, тил ва стиль масалаларига урғу қилди.

Чўлпоннинг адабий жараёнга қараши ҳам тўғри эмас эди. «Улуғ ҳинди» номли Тагорга бағишиланган мақоласида классик ва совет адабиёти ўртасидаги месрос ва ворислик алоқаларини тушунмай шундай ёзган эди: «Эски адабиёт билан янги адабиёт ўртасида қолган шарқли ёш чинакам чучмал вазиятдадир. Ўзбеклар эскидан ҳеч сабабсиз аразлаган, хафа, янгига эндиғина суқилиб кирмоқда. У адабиёт майдонида янгиликка нисбатан ёш бола, гўдак, чақалоқ. Эскиликка нисбатан етим, кимсасиз...» (Маориф ва ўқитғувчи. 1925. № 7—8. 75-бет). Унинг фикрича, Навоий, Лутфий, Бойқаро, Машраб, Умархон, Фазлий, Муқимиylар бир хил эмиш. Файратий, Боту, Ойбек, Авлоний, Ҳамза каби шоирлар эса уни «йўлсиз қолдирган» эмишлар. Мана, унинг боши берк кўчага кириб қолгани.

1927 йил 4—5 октябрда Самарқандда ўтган Ўзбекистон маданиятчиларининг Иккинчи қурултойида Ўзбекистон Компартияси Марказий Комитетининг биринчи секретари Акмал Икромов ўз докладида адабиёт атрофидаги мунозараларга тўхтаб, шундай деган эди: «Айн томонидан Чўлпонни танқид қилиб ёзилган мақола муносабати билан бизда бир қанча мубоҳасалар бўлиб ўtdи. Айн Чўлпонни мафкура жиҳатидан тўғри танқид қилди... Қайтариб айтаманки, мафкура жиҳатидан шундай танқиднинг бўлиши керак эди... Еш шоиримиз Ойбек эса масалани мафкура жиҳатидан кўра олмай, фақат тил, услуб, ифода ёғини кўрди...»<sup>43</sup>. Докладда айтилган бу гаплар Айн қарашларини маъқуллаш ва, умуман, Чўлпон тўғрисидаги баҳсларга якун эди.

<sup>43</sup> Қизил Узбекистон. 1927. 10 октябрь.

Йигирманчи йилларнинг иккинчи ярмига келиб ёш совет шоирларининг китоблари бирин-кетин нашр этила бошлади ва танқид уларга ўз муносабатини билдира борди. 1925 йили Олтойнинг «Ер юлдузлари» тўплами нашр этилди. Китобнинг охирида муаллифнинг сўнг сўзи бор эди: унда, жумладан, шундай мулоҳазаларни ўқиймиз: «Октябрь ўзгариши... инқилобий адабиёт туғдирди. Бу адабиёт ҳали ёш, бунинг асоси — кучли инқилобий руҳ билан суғорилган ёш адабиётчиларнинг ҳаммалари «пролетариат адабиётининг хизматчилари» отини олиш ҳақига бутунлай муваффақ бўла олмаган бўлсалар ҳам, ораларида шунига интилувчилар йўқ эмас».

Бу ўринда Олтой ҳали бизда пролетар адабиёти юзага келгани йўқ демоқчи. «Ер юлдузлари»да баён қилинган бу нотўғри фикр муносабати билан пролетар адабиёти атрофида жиддий мунозара бўлиб ўтди. Китобга ёзилган биринчи тақризнинг<sup>44</sup> автори «Чўл боласи» тўпламини умуман маъқуллагани ва шоир мавҳум нарсалар тўғрисида ёзмасдан, «кўзига кўринган нарсаларнигина олгани, шунинг учун ҳам нима демоқчи экани очиқ»ligини таъкидлагани ҳолда бизда пролетар адабиёти бор ёки йўқлиги масаласини четлаб ўтади. Фақат «Олтой шеърлари «ўзбек адабиётига пойdevor бўладир... меҳнаткаш адабиётини қуришда катта хизмат кўрсатадир...»,— дейиш билан чегараланди.

Олтой 1928 йилга келиб аввалги фикрларини яна такрорлайди. «Нафис адабиётда соғлом мафкура ва соғлом танқид керак»<sup>45</sup> номли мақолосида ёзади: «...Ҳали бизда айтишга лойиқ пролетар адабиёти йўқ, унинг маълум шакли, тузилган фундаменти йўқ, энди тузилиб боради... Унинг мустаҳкам шакл-қиёфаси ва шакли билан боғланган мундарижаси ҳам йўқ...». Олтойга кўра, пролетар адабиётини вужудга келтиришга майл, интилиш бўлса-да, ҳали у муайян эмас ва қандай бўлишини ҳеч ким билмайди. Ваҳолонки, «Ер юлдузлари» нашр қилинган вақтдаёқ, пролетар ва деҳқон адабиёти номи билан юритилган ўзбек совет адабиёти бир қанча яхши асарлар яратиб ултурган, ўз янги мазмунига мувофиқ янги форма ҳам яратса бошлаган эди. Файратий, Боту, Уйғун, Ҳ. Олимжон, Ойбек, Ойдин,

<sup>44</sup> Зарафшон. 1926. 13 август.

<sup>45</sup> Қизил Ўзбекистон. 1928. 7 август.

Ү. Носир яратган ва кейинчалик уларнинг биринчи китобларига кирган шеърлар (айрим иуқсонларидан қатъи назар) пролетар адабиётининг намуналари эди.

Олтойнинг фақат ижтимоий чиқиши пролетар бўлгани ёзувчигина пролетар ёзувчиси бўлади, деб масалага схематик равишда тор қараши танқидчиларнинг ҳақли эътиrozига сабаб бўлди. Сотти Ҳусайн «Ўзбек адабиётининг ҳозирги муҳим масалалари» мақоласида: «Бизда пролетар адабиёти борми?» саволини ўртага қўяди ҳамда ўзи жавоб беради: «...Пролетариат ҳокимиятга чиқиши билан ўз вақтида маданий-маориф иши билан шуғулланиши лозим. Шу йўсинда санъат ва адабиётни ҳам янгидан қурғусидир. ...Иттифоқ пролетар ёзувчилар қурултойи чор даврида мустамлака бўлган жойларда ҳам пролетар адабиёти бор, дейди. Ҳозир бизда ўзбек пролетар адабиёти ва унинг вакиллари бор. Буни инкор қилиш пролетар мавзуидаги миллий маданиятни инкор қилиш бўлади»<sup>46</sup>.

Тематикаси, ғоявий йўналиши ва мундарижаси жиҳатидан янги адабиёт туғилгани, у социалистик ҳаётни куйлаб, ҳоким пролетариат синфининг мағкуррасига айлангани хусусида гапирган. С. Ҳусайн бу адабиётнинг бир қанча вакиллари ижоди ҳали «санъатча заиф» эканини тўғри қайд қиласди.

1929 йили «Ёш ленинчи» газетаси қошидаги ёш пролетар адаби, шоирлар тўгараги нашр этган «Қўрмана» тўпламига йигирмага яқин ижодкорнинг шеър ва ҳикоялари киритилган. Улар орасида Миртемир, Юнус Латиф, Комил Нуъмон (Яшин), Собир Абдулла, Эргаш, Хасан Пўлатлар бор. С. Ҳусайн «Қўрмана» эгалари тўғрисида номли кириш сўзида ана шу ёшларни пролетар ёзувчилари деб таърифлайди ва «тўгаракдаги ўртоқларнинг барчаси деярли пролетариатнинг синфиий мақсадларини ўз олдига қўйган ёшлардир...»<sup>47</sup>, — дейди.

Танқидчи ва ёзувчилар пролетар адабиёти мағхумини тор тушунмаслик лозимлиги тўғрисида ҳам фикр юритадилар. Боту «Пролетариат адабиёти тўғрисида бир неча сўз» мақоласида бу адабиётни пролетариат синфининг болалари яратсагина, у пролетариатнинг нафис адабиёти ҳисобланади,— дегувчиларни танқид қиласди. «Агар қўлининг қадоги йўқолмаган пролетарлардан бошқаларнинг пролетариат синфи манфаати

<sup>46</sup> Қизил Ўзбекистон. 1929. 25 ва 28 январь.

<sup>47</sup> Қўрмана. Шеър ва ҳикоялар тўплами. Самарқанд—Тошкент, 1929.

учунгина хизмат қиладиган асарлари ҳам пролетариат-адабиётига кирмаса пролетар адабиётининг тараққиёти қандай бўлиши мумкин?..»<sup>48</sup>— сўрайди у. Агар ёзувчи завод, машина, болға, омочларни мақтаб асар ёса, у пролетар ёзувчиси ҳисобланиши, бўлмаса бу сифатдан маҳрум этилишини совет адабиёти доирасини торайтиш, миллионлар адабиёти бўлишига халақит бериш, деб тушунади Боту.

Танқидчи Анқабой ҳам Ўзбекистонда пролетариат диктатурасининг мавжудлиги албатта пролетар адабиётининг замини бўлажагини айтар экан, ёзади: «Бизнинг пролетар адабиётимиз, пролетариатнинг ўз маданияти биргина ўзининг кучи билангина қурилмайди»<sup>49</sup>. Унингча, пролетар адабиёти меросдан ҳам фойдаланади, пролетар бўлмаган ёзувчилар билан ҳамкорлик қиласди.Faфур Гулом, Уйғун, Умаржон Исмоилов, Гайратий, Зиё Саид пролетар ёзувчилари, Ҳ. Олимжон, Ш. Сулаймон, Миртемир, Ойдин, Яшин инқилобий ёзувчилар деб таърифланади. Пролетар адабиётининг кучайиши, гегемонликни қўлга олиши билан инқилобий ёзувчилар пролетар ёзувчилари қаторига ўтар эмиш.

Иигирманчи йиллар адабий танқидида жиддий мунозарага сабаб бўлган мавзулардан яна бири футуризм эди. Гарчи бу ҳақдаги дастлабки мулоҳазалар 1923 йилнинг охири ва 1924 йилнинг бошида А. Саъдий томонидан айтилган бўлса-да, футуризм кўпчиликнинг эътиборини тортишига сабаб яна «Ер юлдузлари» бўлди.

А. Саъдий 1923 йил сўнгида Тошкентдаги татарбошқирд ёшларининг «Билик» номли тўгарагида футуризм тўғрисида лекция ўқиёти ва ҳозирги ўзбек адабиётida (яъни инқилобдан кейинги 6—7 йиллик адабиётда) футуризм оқим сифатида йўқ, деган фикрни айтади. «Эшитувчи» имзоли муаллиф лекцияда баён этилганларни «Туркистон» газетасида нотўғри талқин қилиб, А. Саъдий «ўзбекларда адабиёт йўқ», — деб айтди дейиш даражасига боради.

А. Саъдий «Эшитувчи»га жавобан ёзган «Юзим очиқ, ниқоблантирангиз» номли эътирозида фақат футуризм хусусида сўзлаганини, у оқим сифатида йўқлигини билдирганини такрор айтади: «Умуман Шарқда футуризм оқими ҳали туғилгани йўқ. Кейинги янги

<sup>48</sup> Коммунист. 1928. 3-сон. 48-бет.

<sup>49</sup> Анқабой. Ўзбек пролетар ёзувчиларининг ижодий юзи// Қурилиш. 1931. 3-сон. 11-бет.

усмонли адабиётидан яхши хабарим бўлмаса-да, уларда ҳам бу оқим туғилғондир, деб билмайман... Ўзбек ва қозоқ адабиётига келсак, буларда унинг аломати ҳали кўринмайди. Тезлик билан кўринар, деб ҳам айта олмайман...»<sup>50</sup>. Кўриниб турибдики, муаллиф масалага илмий нуқтаи назардан ёндашади. Футуризм учун муайян иқтисодий-техникавий шароитлар талаб қилинажагини, унинг ўзига хос тили, услуби борлигини таъкидлайди.

Орадан икки йил ўтгач, футуризм баҳси (юқорида қайд қилганимиздек), Олтой тифайли қайта бошланди. У ёзган эди: «...Бизнинг адабиётимизда футуризм оқими худди Гарбдагидек бўлиб туғилмайдир. Бизда ишчи йўқ бўлса, деҳқон бор. Мана шунинг турмушида, тирикчилигида футуризм учун манба йўқ, деб ҳеч ким айта олмайдир...»<sup>51</sup>. Олтойга кўра, ҳар бир миллатнинг футуризми бир-бирига ўхшамайди. Ҳар миллатнинг турмуш шароити, одати, интилиши айrim хусусиятлари билан фарқ қиласди. Футуризмнинг асоси, замини турмуш бўлгани сабабли турмуш жараёнини тасвирлайди. Бинобарин, холоса қиласди у: «Биринчи бўлган бу йўлдаги тажриbamни оммага таниш учун тақдим этаман».

Маълумки, лотинча «футурум» (келажак) сўзидан олинган футуризм оқими дастлаб XX аср бошида «Италияда, буржуа маданиятининг инқизотга учраши оқибатида юзага келди. Футуристлар ўтмишни рад этиб, ҳамма нарсани келажакдан кутишга чақирдилар. Классик эстетик принципларга қарши суръат, тезлик эстетикасини ташвиқ қилиб, машиналарни, электрни, локомотивларни тасвирлашни одамлардан ҳам афзалроқ кўриб, биринчي ўринга қўйдилар. Сунъий неологизмлар ўйлаб чиқара бошлидилар, формани мазмундан устун ҳисобладилар.

Бир оз вақтдан кейин Россияда ҳам бир гуруҳ шоирлар ўзларини футуристлар деб атаб, футуризмга тақлид қила бошлидилар. Аммо улар Италия футуристларига ўхшамасди. А. М. Горький 1915 йили «Рус футуризми тўғрисида»ги мақоласида илк вакили Маринетти бўлган футуризм, шубҳасиз, «Россияда йўқ»лиги ва ана шу футуристлар орасида талантли ёшлар борлигини, агар улар «кулгили ва бақироқ» бўлмасалар, ҳақиқий ижодий изланишлар йўлидан борсалар ўсиш-

<sup>50</sup> Туркистон. 1924. 9 январь.

<sup>51</sup> Ер юлдузлари. 92—93-бетлар.

ларига имкон бериш лозим бўларди, — дейди. Бир вақтлар ҳатто Маяковский ҳам футуристлар таъсирида бўлгани Горький фикрларини қувватлади.

Ўзбек адабиётида футуризм оқим сифатида шаклландими ёки шаклланмадими? саволи атрофидаги мунозараларда кўпчилик салбий жавоб бергани тўғри бўлди. Ёзувчи ва таңқидчи З. Башир «Ер юлдузлари» ва футуризм» деган мақоласида Олтойни таңқид қиласди. Айниқса китоб муқовасига «Футуризм ва замон адабиётлари» деб ёзилиши, Ўзбекистон Давлат нашиёти мажмуя тўғрисидаги эълонида: «Футуризм шеърлари босилиб чиқди, тездан олиб қолингиз» дегани З. Баширни таажжублантиради. Муаллиф футуризм қачон, қаерда ва қандай шаронтда пайдо бўлганини муфассал изоҳлагач, бизнинг давримизда у «қандай қилиб деҳқонларнинг, йўқсилларнинг замон адабиёти бўла олади? Бу фикрга қўшила олмаймиз», — дейди. Шоирнинг асарлари гоявий жиҳатдан пухта, лекин сўзни кўпайтириб, шеърнинг адабий қимматини йўқотади... мазмун шеър охирига келиб «думи хуржунда»<sup>52</sup> бўлиб қолади, деб хулоса қиласди у.

Кашшофт Треғуловнинг фикричай<sup>53</sup>, Олтойнинг мажмуаси ва унинг охиридаги «Бир-икки сўз» шундан гувоҳлик берадики, «гарчи муваффақиятсизлик билан бўлса ҳам, футуристликка қараб йўл солган». Футуристлиқни беҳуда уриниш тарзида баҳолаган Треғулов «Бир-икки сўз»да баён қилинган: «Бизда ишчи йўқ бўлса, деҳқонлар бор. Мана шунинг турмушида, тириклигида футуризм учун манба йўқ деб ҳеч ким айта олмайдир» каби даъволарни «музга ёзилган» кераксиз гаплар қаторига киритади. Шоирни бу йўлдан қайтиб, ишчи-деҳқон оммаси тушунадиган асарлар яратишга чақиради.

«Нафис адабиёт тўғрисидаги мунозараага»<sup>54</sup> мақоласининг муаллифи Ботир ҳам юқоридаги «Бир-икки сўз»да айтилган: футуризм ўзбек адабиётининг «сўл жабҳаси», «озод тасвир қилиш оқими» сингари гапларни қоралади. Ўзбек поэзияси учун бегона бу усуслни таңқид қиларкан «Олтойнинг футуристча ёзилган шеърини ўқиб бир маъно чиқариш... сувсиз чўлдан балиқ излаш билан баробар», — дейди.

<sup>52</sup> Маориф ва ўқитгувчи. 1927. 3—4-сонлари (битта муқовада). 46—52-бетлар.

<sup>53</sup> Треғулов К. Нафис адабиёт жабҳасини соғломлаштириш йўлида//Қизил Ўзбекистон. 1928. 4—5 июль.

<sup>54</sup> Қизил Ўзбекистон. 1928. 5 октябрь.

Танқидчи Юнус Латиф бу қарашларга мутлақо қўшилгани ҳолда адабиётдаги шаклий изланишлар масаласига тўхтаганда ёзди: «Олтой янги шакл қилиб (гарчи футуризмнинг ўзи бўлмаса ҳам) футуризм шаклинни қўллаши биз учун қулайсиз ва керак эмас»<sup>55</sup>.

Эҳтимол, бўлиб ўтган баҳслар Олтойни аввалгисидан бошқача хulosага келишига таъсир этгандир, ҳар ҳолда, у қуйидагиларни айтишга мажбур бўлди: «...Бизнинг ўзбек адабиётимизда футуризм тўғрисида кўп шов-шув бўлиб ўтди... Китоб устига ёзилган — футуризм деб аталгани Ўзнашрнинг айби. Китоб эгаси бундан бехабар». Шундан кейин «биздаги футуризм янги даврга, унинг мазмунига мувофиқ шакл излашга интилишдир, аммо у ҳали маррасига бориб етгани йўқ», — деб якун қиласи: «Демак, бизда футуризм оқими йўқ, унга интилиш ҳам йўқ»<sup>56</sup>...

Адабий танқид кундалик умумий жараён билан чегараланмай, муҳим назарий масалаларни ҳам ўртага қўйиб, уларни ечинига ҳаракат қилди. Ижтимоий онг формаларидан бўлган санъат ва адабиёт, унинг синфиий характери, жамият ҳаётида тутган ўрни ҳақида кекса авлодга мансуб танқидчи ва адабиётшунослар биринчи бўлиб фикр юрита бошладилар. Бу ўринда адабиётнинг синфийлиги хусусидаги А. Саъдий қарашларини хотирлаш тўғри бўлур эди. У ёзди: «...Гўзаллик ҳақидаги онг ва тасаввурлар замон ўтиши билан турли... ўзгаришларга қараб ўзгаратурғон бир нарсадир. Гўзаллик ўз-ўзича бир равишда борлиққа молик ўлғон тамом мустақил бир нарса эмас, балки бизнинг шууримизнинг ва ёки... тушунча ва ҳукмларимизнинг натижасидан иборатдир»<sup>57</sup>.

Танқидчи «Санъат — ахлоқий тоянинг ифодасидир», деган таъриф «эски замоннинг» таърифи бўлиб, санъатнинг асл моҳиятини очиб бермаслигини айтади. Санъат асарлари унингча «замоннинг, муҳитнинг, муҳитдаги

<sup>55</sup> Латиф Ю. Янги адабиёт атрофида//Ёш ленинчи. 1928. 13 июнь.

<sup>56</sup> Олтой. Нафис адабиётда соғлам мафкура ва соглам танқид керак /Қизил Узбекистон. 1928. 10 август. Эслатиб ўтиш жониздирки, Олтой 1924 йилдан бошлаб «Туркистон» газетасинда эълон қилишга киришган «футуристча» шеърлар ёзувчиларнинг пародиясига сабаб бўлди. Абдулла Қодирли («Овсар») Москвадан «Муштум»га юборган пародиясида («Муштум». 1924. 17-сон), С. Айний «Машраб» журналидаги (1925. 21-сон) ҳажвий шеърида футуристликни поэзиядаги тутуриқсизлик сифатида масхара қиласидар.

<sup>57</sup> Саъдий Абдураҳмон. Гўзал санъат дунёсида//Ипқи-лоб. 1922. № 2. 39—41-бетлар.

урф ва одатларнинг, фикр ва туйғуларнинг... руҳий ва ижтимоий ҳолларнинг равишига мувофиқ» тарзда зуҳур этади ва ривожланади. Даврнинг иқтисодий ва ижтимоий асослари «ўзгариши билан гўзал санъат асарлари ҳам ўзгарадир». А. Саъдий фикрича, жамиятдаги ана шундай ўзгаришлар таъсирида аввалги урф одатлар, ахлоқ ҳис-туйғулар уларни вужудга келтирган асослар билан бирга тугайди ва «иккинчи турлик санъат асарларига ўринларини беришга мажбур» бўладилар. Янги туғилган санъат асарлари янги давр руҳини, янги фикрларни ифодалайди.

«Гўзал санъат дунёсида» мақоласининг эътиборга лойиқ жиҳатлари шундаки, муаллиф гўзаллик ҳақидаги тасаввур қотиб қолган нарса эмаслигини, санъат кишиликтининг тарихий тараққиёт жараёнини акс эттиражагини тўғри тушунади: санъат ижтимоий-иқтисодий ҳаётдан сиртда, мустақил яшамайди, унинг тарихий тараққиёти ташки ўзгаришлар билан боғлиқ; жамияттининг иқтисодий тузумидаги эволюциядан тортиб унинг моддий ишлаб чиқариши ва ижтимоий онгигда рўй берадиган эволюциягача барчаси санъатда ўз аксини топади. Санъатнинг конкрет тарихий давр билан боғлиқлигини айтиш билан бирга унинг эстетик, идеологик ва руҳий моҳиятини ҳам унутмайди. Фақат бир мәсалла, прогрессив инсоний ғояларни, гуманистик ва халқицлил оҳангларини акс эттирган юксак бадиий асарларгина эски жамияттининг емирилиши билан ўтмишга айланмайди, деган эътиқод тўғри ҳал этилмай қолади.

Йигирманчи йилларнинг ўрталарига келиб, Фитрат ҳам «Санъат нима?» саволига жавоб беришга ҳаракат қилди. Унинг «Адабиёт қондалари» қўлланмаси «санъат» сўзига умумий ёки кенг таъриф беришдан бошланади: «Санъат — луғатда ҳунар демакдирким, бир нарсани яхши ишлаб чиқаришдан иборатdir. Бир киши бир ишини ўзига касб қилиб олиб, шунга берилиб, яхши ишлаб чиқарадирган бўлса, шу иш унинг санъати бўладир...»<sup>58</sup>. Инсон амалий фаолияттининг ҳамма томонларига мансуб бўлган, фақат технологик жиҳатдан эмас, эстетик жиҳатдан кўринган иштиёқ, моҳирлик, усталик — санъаткорлик ҳисобланади. Санъати танбур чалиш бўлган кишининг «Ироқ» куйини яхши-

<sup>58</sup> Фитрат. Адабиёт қондалари (адабиёт муаллимлари ҳам адабиёт ҳаваслилари учун қўлланма). Самарқанд—Тошкент. 1926. З-бет.

лаб чалиши билан чиройли танбур ясаган ёки чиройли тобоқ ясаган ҳунарманднинг санъати бир хил эмас. Тобоқ, танбур материалга кўчган маҳорат. «Ироқ» куйи эса «кишига маънавий таъсир» этади, унинг «миясини тўлқинлантириб», руҳий озиқ беради.

Технологик ва эстетик санъатни шу йўсинда тушунтирган Фитрат, инсонга руҳий-маънавий таъсир кўрсатувчи, қалбини тўлқинлантирувчи санъатни «гўзал санъат» мағҳумига киритади. Гўзал санъатда кишиларнинг турли хил кайфиятлари акс этажаги хусусида гапириб, хулоса қиласди: «Юрак, фикр, туйғу тўлқинларини сўз, товуш, бўёв, шакл, ҳарф, ҳаракат каби товарлар (материаллар)<sup>59</sup> ёрдами билан жонлантира чиқариб, бошқаларда ҳам шу тўлқинни яратмоқ ҳунарига гўзал санъат дейиладир». Бу силсилада сўз — адабиёт, товуш — музика, бўёқ — рассомлик, шакл — меъморлик, ҳаракат — рақс тарзида талқин қилинади.

Бадиий адабиётга берилган таъриф ҳам санъат таърифига ўхшайди: «Адабиёт — фикр туйғуларимиздаги тўлқинларни сўзлар, гаплар ёрдами билан тасвир қилиб, бошқаларда ҳам худди шу тўлқинларни яратмоқдалар»<sup>60</sup>.

Шоир Ойбек «Адабиёт қоидалари»га ёзган тақризидаги<sup>61</sup> китобни «ҳозирги адабий ҳаётимизнинг суст даврида муҳим бир нарса», — деб баҳолайди ва унданги материаллар системали тузилганини, қоидаларни тушунтиришга ҳозирги замон шоирларининг асарлари билан чекланмай, салафларимиз асарларидан ҳам мисоллар берилганини маъқуллайди. Асарнинг яна бир хусусияти — «адиб Фитратнинг жозиб, гўзал услуби» эканини таъкидлайди. Кейин «китобнинг кўпгина камчиликлари»га тўхтайди.

Бу ўринда биз асосий эътиборни санъат таърифи устидаги масалага қаратмоқчимиз. Ойбек Фитратнинг таърифидаги жиддий нуқсон «санъат ва адабиётга бу кунги кўз билан (марксчиларча) қарамаган»ликда, марксистча ижтимоий таҳлил йўқлигига, деб тўғри танқид қиласди. Фитрат адабиётга ҳам, санъатга ҳам ёндашганда улар «синфларининг мафкуравий бир қуроли» эканини, улар доимо «синфий муносабатларнинг тарихи билан бирга такомил» этишини аниқ кўрсатмайди. Бу жиҳатдан Ойбек ҳақли. Давом этиб, уни

<sup>59</sup> Тугри роғи воситалар.— М. Ю., Фитрат. Уша асар. З—4-бетлар.

<sup>60</sup> Уша асар. 5-бет.

<sup>61</sup> Қизил Узбекистон. 1926. 8 декабрь.

«санъат — санъат учун» назарияси тарафдори қилиб кўрсатади.

Шундай ҳам айтиш керакки, юқоридаги чала, бир томонлама таърифдан «санъат — санъат учун» назариясини келтириб чиқариш уччалик түғри бўлмайди. Чунки, Фитрат санъатни бутунлай ҳаётдан ажратиб, факат гўзаллик туфайли яшайди, деб тасаввур қилмайди. Қисқача таърифга кириш қисмида у ёзди: «...Одам ўзининг теграсидаги турли воқеалардан, бўлиб турган ишлардан, турли кўринишлардан, бошқа кишиларнинг бошига тушган баҳтли-баҳтсиз воқеалардан ҳам таъсиранадир...» (Ўша китоб. 4-бет). Кўриниб турибдики, бир оз туманли бўлса ҳам инсон қалбida уйғонадиган ҳис-туйғулар ҳаётда рўй берадиган воқеалар билан боғлиқ деб ҳисоблайди. Фитрат санъат за адабиёт муайян фикрни турли бадиий воситалар орқали ифодалайди, дейди, аммо ўша фикр бирор ижтимоий синф ёки гуруҳники бўлажагини уқтирумайди, холос.

Бизнинг мулоҳазамизга кўра, Фитрат Л. Н. Толстойнинг санъатга берган таърифидан, Ойбек Г. В. Плехановнинг Толстойни танқидидан жабардор бўлганлар. Буни исботлаш қийин эмас. Масалан, Лев Толстой «Санъат нима?» номли трактатида ёзди: «Санъат — кишиларнинг ўзаро алоқа воситаларидан биридир... Бу алоқанинг сўз воситаси билан бўладиган алоқадан фарқ қиласидиган ўзига хос хусусияти шундаки, сўз билан бир шахс иккинчисига ўз фикрини етказади, санъат билан эса одамлар бир-бирига ҳис-туйғуларини етказадилар... Бир бор ўзида сезилган туйғуни бошқалар ҳам ўзида сезадиган қилиб етказиш — санъатнинг фаолияти ана шундан иборат»<sup>62</sup>.

Келтирилган парча шундан далолат берадики, Лев Толстой сўз — фикрни, санъат — ҳис-туйғуни одамларга етказади деб, кейин гёё ўзини-ўзи тузатгандек бўлиб, «сўзларда ифодаланган» туйғу иборасини қўшади. Демак, сўзини алоҳида олиб санъатдан ажратиш мумкин эмас экан. Энди Фитратнинг юқорида келтирилган фикрига яна қулоқ солайлик: «Юрак, фикр, туйғу тўлқинларини сўз, товуш, бўёқ, шакл, ҳарф, ҳаракат каби» воситалар ёрдамида ифодалаб, «бошқаларда ҳам шутўлқинни яратмоқ...» санъатдир. Л. Толстойдаги ҳаракат, ранглар, шакл (чизиқ)лар бу ерда ҳам тилга олинади. Фақат фикр, сўз, товуш кабилар билан тўл-

<sup>62</sup> Кўчирма Плехановдан олинди. Қаранг: Плеханов Г. В.. Избр. философ. произведения. Т. V. М., 1958. С. 284—285.

дирилган. Ёзувчи қалбида уйгонган ҳаяжон китобхонга ўтиши ҳар икки муаллифда ҳам бир хил.

Хўш, Плеханов Л. Толстойнинг санъат ҳақидаги таърифиға қандай ёндашади? Сўзни санъатдан хориждаги алоқа воситаси тарзида кўрсатишга Плеханов қўшилмайди. Шунингдек, унингча, «санъат одамларнинг фақат ҳис-туйғуларини ифодалайди, дейиш ҳам нотўғри. Йўқ, у одамларнинг ҳис-туйғуларини ҳам, фикрларини ҳам ифодалайди, аммо мавҳум равишда эмас, жонли образларда ифодалайди. Унинг асосий бош хусусияти ана шундан иборат»<sup>63</sup>. Плеханов ҳар қандай ҳаяжон, эмоция кишини ўраб олган ташқи воқелик таъсирида пайдо бўлажагини, «санъат — ижтимоий ҳодиса» эканини, унинг тарих тараққиётидаги ролини материалистик нуқтани назардан ўрганиш лозимлигини таъкидлайди. Санъат ҳар бир даврнинг, ҳалқининг иқтисодий-ижтимоий ҳаётидан ўсиб чиқажагини кўрсатади. Шулардан кўриниб турибдники, Фитратни танқид қилишда Ойбек Плеханов изидан борган.

Ўзбек адабий танқидининг майдонга келиши ва илк фаолиятининг тўғри изга тушиб олишида республика партия ташкилотининг ҳамда партия ва ҳукумат раҳбарлари Акмал Икромов, Файзулла Хўжаевнинг адабиётга кўрсатган йўл-йўриқлари, танқидий мулоҳазалари муҳим роль ўйнади. Ёшлидан бадиий ижодга руҳан яқин бўлган А. Икромов ўзбекистон Компартияси Марказий Комитетининг биринчи секретари лавозимиға кўтарилигач, маданий-адабий ҳаётга бевосита аралашиб, раҳбарлик қила бошлади. Кучли ғоявий-синфий кураш давом этаётган адабий ҳаётни ташкил қилишдаги кўп масалалар ҳали барча учун ҳам аниқ бўлмаган бир шароитда А. Икромов бу соҳадаги Ленин кўрсатмаларига амал қилиб иш кўрди.

Катта сиёсий ва назарий тайёргарликка эга бўлган А. Икромов ёзувчилар билан шахсий учрашувларида уларга давр руҳини тўғри тушунтирас, оқилона маслаҳатлар берарди. Ҳамза Ҳакимзода, Садриддин Айний, Ҳамид Олимжон, Абдулла Қодирий, Ойбек,Faфур Гулом, Комил Яшин каби санъаткорлар билан бўлган суҳбатларда ўзбек совет адабиётининг аҳволи ҳамда вазифаларига оид қимматли фикрлар баён қиласарди. Садриддин Айний А. Икромов билан бўлган бир суҳбатни хотирлаб, ёзади: «...1932 йилнинг ок-

<sup>63</sup> Плеханов Г. В. Ўша асар. 285-бет.

тябрида Иттифоқ совет ёзувчилари союзининг Ташкилот Комитетига кетаётib, Тошкентга тушдим. У ерда Ўзкомпартия раҳбари Акмал Икромов билан учрашув имкониятига эга бўлдим. Суҳбат вақтида ўртоқ Икромов 1928 йили нашр этилган «Қулбобо» повестимни кенгайтиб, қайта ишлашга маслаҳат берди. Шу маслаҳатдан фойдаланиб, янги куч билан иккى қиши ва бир ёз давомида шу асар устида ишладим. Натижада «Қулбобо» романга айланди<sup>64</sup>. 1926 йили Самарқандда иш бошлаган «Қизил қалам» адабий ташкилотининг таъсис мажлисида Файзулла Хўжаев билан бирга Акмал Икромов ҳам иштирок этди. Кейинчалик бу ташкилот ишини кузатиб борди.

Акмал Икромов социалистик маданиятии яратиш, совет адабиётини ғоявий-эстетик жиҳатдан етакчи дарражага кўтариш тўғрисида кўп ғамхўрлик қилди. Унинг бир қанча нутқларида адабий танқидга алоҳида эътибор берилиган. Масалан, 1927 йил 4—5 октябрда бўлиб ўтган Ўзбекистон маданиятчиларининг Иккинчи қурултойидаги маърузасида бизда мафкуравий ўткир ва соғлом танқид бўлиши керак деса, 1932 йил 13 июлдаги ЎзКП(б) МКнинг V Пленумидаги докладида яна адабиёт масалаларига тўхталиб, ёзувчилар рус ва жаҳон адабиёти классикларини билишлари кераклиги, таржима ишларини яхшилаш зарурлиги ва адабиёт оламидаги ўдеологик кураш хусусларида гапиргач, танқиддаги бирёқламалик ҳамда савияси паст танқидчилар умумий ишимизга ёмон таъсир кўрсатаётганини конкрет мисоллар билан исботлади. Танқиддаги чаласаводликка, ибтидоийликка барҳам бериш, танқидчиларнинг назарий савиясини кўтариш кун тартибида турган вазифа эканини айтди.

Мавзуумиз доирасидан бир оз олдинга ўтиб бўлсада, айтиш керакки, Акмал Икромов Ўзбекистон ёзувчиларининг 1934 йил 7—11 марта бўлиб ўтган Биринчи қурултойида сўзлаган сермазмун нутқида адабий танқидга катта ўрин берди. Адабий танқиднинг мақсади ур-ийқитчилик эмас, балки ижодкорнинг ғоявий-эстетик жиҳатдан давр талабига жавоб берадиган асар яратишига кўмаклашиш, илғор позицияларга ўтишига даъват этиш, классиклардан ўрганишни ташвиқ қилиш эканини алоҳида таъкидлади.

Рус адабиётидан ўрганиш ҳақида у шундай деди: «Бу куниги рус адабиёти специфик миллий адабиётгина

<sup>64</sup> Литература Средней Азии. 1934. 7 апреля. № 12.

эмас. Бу адабиёт интернационал адабиётдир. Чунки, гарчи у шакл жиҳатидан рус ёки иттифоқимиздаги бошқа миллатларнинг машнатини ва ҳаёт шароитини акслантисса ҳам, Октябрь меваси бўлиб, ҳар бир ишчига... социалистик қурилиш йўлида курашаётган ҳар бир кишига яқин. У фақат шакли билангина миллий бўлиб, мундарижаси билан пролетарча интернационал руҳдадир» (Санъат ва адабиёт тўғрисида. Тошкент. 1935, 42—43-бетлар).

Ёзувчи юксак бадиий маҳоратни эгаллаши лозимлиги, тил маданиятини кўтариш, қўшиқ санъати аҳволини яхшилаш, таржима ишларига жиҳдий эътибор қилиш, форма ва мазмун бирлиги ҳақидаги фикрлари ҳамон ўз қимматини йўқотгани йўқ.

Файзулла Хўжаев ҳам ўзининг кўп докладлари, нутқлари ва мақолаларида социалистик маданият ҳамда санъат-адабиёт вазифаларига тўхталиб ўтади. «Ўзбекистон Октябрь революциясининг 15 йиллигига» (1932) мақоласида, жумладан, ёзган эди: «Оммавий адабиёт ўсиб бормоқда. Янги революцион бадиий адабиётнинг тез ўсиши учун замин яратилди. Ўзбек драма ва музикали-этнографик театрлари жуда катта ютуқларга эришди»<sup>65</sup>.

Файзулла Хўжаев алоҳида ёзувчилар билан қилган сұҳбатлари ва уларнинг китоблари ҳақидаги қайдларида муҳим фикрларни билдиради. 1930 йили С. Айнининг «Одина» повести Москвада рус тилида чоп этилиши муносабати билан Файзулла Хўжаев унга сўз боши ёзди ва асарнинг реалистик моҳиятини қўйидагича характерлади: «Садриддин Айнининг бу повести тожик халқининг ҳаёти ва турмуш шароитларини бадиий формада ифодалашга қаратилган дастлабки уринишdir. Айний ўз повестида мутлақо ҳуқуқсиз бўлган ва шафқатсиз эксплуатацияга маҳкум этилган ўнлаб ва юз минглаб меҳнаткашларнинг ҳаётини ҳаққоний равишда ҳеч қандай бўёқсиз тасвирлаб беради...»<sup>66</sup>.

РКП(б) Марказий Комитетининг «Партияининг адабиёт соҳасидаги сиёсати ҳақида»ги резолюциясида адабий танқид ва унинг «партия қўлидаги асосий тарбиявий қуроллардан бири» экани, шунингдек, у «ғоявий устунлигига суюнган ҳолда ўз олдинга ўқиш-ўрга-

<sup>65</sup> Хўжаев Файзулла. Танланган асарлар. Уч томлик. 1-том. Тошкент. 1976. 313-бет.

<sup>66</sup> Айний замондошлари хотирасида (тўплам). Тошкент. 1978. 9-бет.

ниш шиорини қўймоғи керак»лиги тўғрисидаги кўрсатмалари ўзбек адабий танқидининг шаклланишида фоят катта аҳамиятга эга бўлди. Шу билан бирга, республика партия ташкилоти ва ҳукуматининг, айниқса, Акмал Икромовнинг санъат ва адабиётга доимий ғамхўрлиги, марксизм-ленинизмни яхши эгаллаш борасидаги кўрсатмалари назарий тайёргарликка эга бўлган, марксча-ленинча методологияга амал қилишга интилаётган танқидчиларнинг етишувига замин ҳозирлади.

Асосий касби танқидчи бўлган Отажон Ҳошим ўз фоявий-назарий даражасини кўтариш устида тинмай ишлади. Диалектик материализм проблемалари билан ҳам шуғулланиб «Диалектика ҳам диалектик усулда ўйлаш» (Маориф ва ўқитувчи, 1925. № 3) номли мақоласида марксистик диалектиканни янги сифатга эга бўлган ягона тўғри дунёқараш тарзида баҳолади. Тарихий материализм масалаларига оид асарларида давлат, пролетарнат диктатураси, синфен жамнинат каби мухим масалалар устида асосли, тўғри фикр юритди<sup>67</sup>. Бундай ишлар Отажон Ҳошимнинг марксист танқидчи бўлиб етишувига самарали таъсир қилди.

Профессионал етук танқидчилар қаторида Олим Шарафиддинов, Сотти Ҳусайн (айрим хатоларидан қатъи назар) қаторида тилшунос ва фольклорист Фози Олим (Юнусов), шоирлардан Ойбек, Боту, Ҳамид Олимжон, Уйғун, Шокир Сулаймон, Фози Юнус ва ёш танқидчилардан Юнус Латиф, Анқабой, Вел Ўразай (Абдулла Ўразоев) каби ижодчилар қалам тебратаетган эдилар. Уларнинг танқидий мақолаларида давр адабиётининг барча актуал проблемалари дадил ўртага қўйилиб, уларни ҳал қилишда марксизм-ленинизм классиклари асарларидағи эстетик қарашларга, таниқли марксист назариячилар Г. В. Плеханов, А. В. Луначарский ва бошқа маданият, адабиёт арбоблари фикрларига суюнадиган бўлдилар.

Қисқаси, танқидий тафаккурнинг салмоғи йигирманчи йилларнинг охири ва ўттизинчи йилларнинг бошига келганда анча ортди. У энди адабий ижоднинг алоҳида ўзига хос соҳаси сифатида мустақил ҳаёт кечириш арафасида эди.

Адабий танқид шу йилларда эришган ижодий ютуқлар ва ўсиш жараёнида учраган нуқсонлар кун тар-

<sup>67</sup> Бу ҳақда тўлиқроқ маълумот олиш учун қаранг: Аҳмадов А. Из истории марксистско-ленинской философии в советском Узбекистане (1917—1928). Канд. дисс., 1963. ФБ АН УзССР. Д. 789.

тибида турган бир нече мұхым проблемаларни ҳал қылишда яққол намоён бўлди. Биз бу ерда қуйидаги уч масалага тўхтаб ўтамиз:

- социалистик воқелик, янги инсон ва адабий танқид;
- адабий танқидда жанрий изланишлар;
- адабий танқид ва классик мерос проблемаси.

### СОЦИАЛИСТИК ВОҚЕЛИК, ЯНГИ ИНСОН ВА АДАБИЙ ТАНҚИД

«Давлат ва шахс» ёки «жамият ва шахс» проблемаси асрлар давомида башарият илғор фарзандларининг фикрини банд қилиб келди. Марксгача бўлган сиёсатдан ва файласуфлар, шунингдек, рус революцион-демократ танқидчилари адолатли жамият ва озод инсон ҳақида орзу қилиб, мавжуд давлат тузумини қаттиқ қораладилар. Фақатгина марксизм-ленинизм сиёсий-ижтимоий озодликнинг тўғри йўлини кўрсатиб берди. Капиталистик давлатларнинг синфий моҳияти шундан иборатки, у инсоннинг жамиятдаги аҳволини, унинг реал ҳаётий имкониятларини, меҳнат шароитини, ўз қобилиятини кўрсата олиш ҳаракатини, ҳуқуқ ва бурчларини бутунлай чеклайди. Меҳнат аҳлини камситади, хўрлайди, талант ва иродасини тазийқ остига олади ҳамда иқтисодий, сиёсий, ғоявий, психолого-тик жиҳатдан эзади.

Эксплуататорликка асосланган жамиятда одамларнинг тақдирига ҳалокатли таъсир қиласидиган нарса табиий равишда эрк, ҳуқуқ, меҳнат учун кураш билан ғайринсоний шароитлар ўртасидаги зиддиятлардир. Бу ҳалокатли аҳволдан қутулишнинг ягона йўли ҳаётни социалистик асосда қайта қуриш бўлиб, фақат шу йўлгина инсонни ўз моҳиятига қайтаради, хўрликдан қутқаради. Ижтимоий муносабатлар жамулжами ҳисобланган инсон тубан аҳволга тушиб қолган экан, унинг сабабларини мавжуд жамият характеристидан излаш керак. К. Маркс фикрича: «Агар инсон характеристининг яратилиши шароитларга боғлиқ бўлса, у тақдирда шароитларни инсоний қилиш керак»<sup>68</sup>.

Инсон учун зарур барча шароит ва ҳуқуқларни фақат социалистик давлат таъминлайди. Шунинг учун ҳам Октябрь инқилоби ғалабасидан кейинги дастлабки кунларда ёқ ҳалқ оммаси зориқиб кутган тинчлик

<sup>68</sup> Маркс К. и Энгельс Ф. Соч. Т. 2. С. 145—146 (таржи-ма бизниси).

ҳақидаги, ер ҳақидаги Декретлар, шунингдек, 8 соатлик иш куни, меҳнаткашлар соғлигини сақлаш тӯғрисидаги қонунлар қабул қилинди. Меҳнаткашлар ва эксплуатация қилинаётган халқлар ҳуқуқи Декларацияси чоризм томонидан эзилган барча миллат ва әлатлар тенглиги ҳам мустақиллигини эълон қилди ва уларнинг тараққиёти учун кенг, ёрқин йўл очиб берди. Инсон ўзидағи ҳамма ақлий, жисмоний қобилиятни ривож топтириш йўлига тушиб олди.

Одамлар эски дунёга, эксплуататорликка асосланган жамиятга қарши қатъий ҳужумга ўтишга, зулмга чек қўйишга турли йўллар билан келишди. Мўлжални тӯғри олиб, инқилоб йўлига тушиб олганлар қаторида, аввал йўлинни бирданига аниқлаб ололмай, бир оз ўйланиб туриб. сўнг озодлик даргоҳига кириб келгандар ҳам бўлди. Октябрь эса уларни ҳам ҳал қилувчи жангларга бирга олиб кетди.

Илгари ҳокимлар ва мулкдорлар олдида ҳеч қандай қадр-қимматга эга бўлмаган оддий инсон энди ўзлигини таниб, ҳаётдаги мустаҳкам ўрнига эга бўлди. Унинг кўзи олдида дунё қайтадан пайдо бўлди. У янги жамиятга янгича қарашни ўрганди. Инқилобий ғояннинг гуманизми, олижаноблиги унингadolatparvarлигига, чинакам шафқатлилигига ўз ифодасини топди. Утмишда меҳнаткаш халққа нисбатан деярли кўрсатилмаган муомалалар: меҳр, яхшилик, ҳамжиҳатлик, ғамхўрлик, қийин ҳолларда ёрдамга келиш каби инсонпарварлик социалистик жамиятнинг қонуни бўлиб қолди.

Инқилоб бўронларида, гражданлар уруши жангларида, халқ хўжалигини тиклаш ва эксплуататорлик дунёсига қарши синфий кураш жараёнинда ҳамда совет ҳокимиятини мустаҳкамлаш йўлида кўрсатилган жонбозликда, ниҳоят, биринчи беш йилликнинг бунёдкорлик жабҳаларинда янги совет кишисининг ҳарактери тоблана борди. Совет кишисининг шахсий «мен»и янги тарихий ўзгаришлар, инсон тақдиридаги кескин бурилишлар туфайли колектив қисматига қўшилиб кетди. У фақат ўзи учун эмас, колективи учун, ҳатто бутун мамлакат учун жавобгарликни ҳис этадиган бўлиб қолди. Умумхалқ проблемалари алоҳида шахснинг мақсад ва интилишлари умумхалққа тааллуқли масалаларга айланди.

Тарихда биринчи энг гуманистик, энг инсоний социалистик жамият бағрида янги киши етишаётгани

ўттизинчи йилларнинг бошидаги ижобий қаҳрамон Сидиқжоннинг колхозга кириш олдидағи гаплари равшан кўрсатиб туради: «...Шу ёшимгача бирон киши менинг афтимга қараган эмас... Бирон киши мендан: кимсан, дунёга нима деб келгансан, нима қилиб юрибсан, қандай орзу-армонларинг бор, деб сўрагани, шу ҳам одам-ку, деб гапимга қулоқ солгани йўқ... Мана энди, ҳали бир эмас, ўн эмас, юздан ортиқ киши юзимга қарайди... Шунча одам менинг номимни тилга олади, менинг тўғримда ўйлаб юрган гапимни гапиради... Мени ўзига тенг кўриб, гапимга қулоқ солади... Гап шундаки, шунча одамга, бутун бошлиқ бир мажлисга масала бўлиб турибман» (А. Қаҳҳор. Кўшчинор чироқлари). Бу янги инсон камолотига қўйилган биринчи қадам эди. Совет адабиёти шу ажойиб жараённи тасвирлашга даъват этилган эди.

Яқин ўтмишдаги демократ-инқилобий йўналишдаги адабиётдан фарқли ўлароқ совет адабиётида янги қаҳрамон эстетикаси юзага келди. Инсон шахсининг гармоник ривожланиши учун барча шароитлар яратилгани ёзувчиларни илҳомлантириб юборди. Инқилоб фарзанди ва янги типдаги ёзувчи бўлган совет ёзувчилари ва совет адабиёти олдида жуда кўп замонавий проблемалар турарди, улар бир-бири билан ғоят мустаҳкам алоқада эди. Совет ҳокимиятининг дастлабки йилларида, шунингдек, йигирманчи йилларда ҳеч кечиктириб бўлмайдиган масала ҳаётни революцион асосда қайта қураётган янги одам образини яратиш эди.

Умумсовет адабиётининг, жумладан, ўзбек совет адабиётининг буюк аҳамияти ва улкан хизмати шундан иборат бўлдики, у янги тарихий даврнинг туғилишида иштирок этган жонли қаҳрамонлар образини яратишга киришди. Инқилоб адабиётга янги ҳаётий ва ғоявий мазмун олиб кирганини кўрсатиб берди. В. Шчербина айтишича, Октябрдан кейин дарҳол бадний тасвирида икки йўналиш аниқланди. Биринчидан, эпик тасвирининг катта куч билан ривожланиши бўлса, иккинчидан, лириканинг янгидан туғилиши — шахсий кечинмалар тасвирининг дунё ва инсон онгини қайта куриш масалалари билан узвий туташиб кетиши эди<sup>69</sup>.

Йигирманчи йилларда совет адабиёти инқилоб, гражданлар уруши ва синфий кураш материалини ўз-

<sup>69</sup> Великий Октябрь и литературный процесс современной эпохи. 1917—1977. Сб. ст. М., 1979. С. 16.

лаштириш устида ишлади. Кўпчилик асарлар ҳар хил тасвирий усуслар билан шу асосий масалага боғланарди. Ҳали у қадар етук бўлмаган ва бадний жиҳатдан наст-баланд асарларимизда революция бўронлари орасидан ўтиб келаётган, давр руҳини ўзида ифодалайдиган образлар стакчи ролни ўйнай бошлади. Инқилобчининг ташқи қиёфаси — жанговар ҳаракати, воқеалар олдида бориши, чарм куртка кийиб, тўппонча тақиб юриши дуруст кўрсатилгани ҳолда, унинг руҳий ҳолати, эмоционал тарзи, шахсий орзу-истакларига ортиқча эътибор қилинмади. Қаҳрамоннинг ахлоқий-маънавий қиёфасини белгиловчи асосий омил синфиий кураш бўлиб қолди. У жамият иши учун, революция иши учун ўзининг шахсий фароғатидан кечадиган шахс эди.

Рус совет адабиётида Горький мактабининг шогирдлари: Д. Фурмановнинг «Чапаев», А. Фадеевнинг «Тор-мор», Н. Островскийнинг «Пўлат қандай тобланди», М. Шолоховнинг «Очилган қўриқ» ва Л. Леоновнинг «Соть» романи Октябрь инқилоби ва гражданлар уруши қаҳрамонларини қизғин воқеалар изидан бориб реал акс эттирган асарлар эди. Катта ва илғор рус совет адабиётидан ибрат олган миллый республикалардаги ёзувчилар ҳам революционерлар образини яратишга киришдилар. С. Сейфуллининг «Тор йўл, той-ғоқ кечув» номли тарихий-мемуар романи, С. Муқоновнинг «Жумбоқ ялов», Ф. Мусреповнинг «Учрашмай кетган бир сиймо» асари; С. Айнийнинг революцион шеърлари ва «Дохунда», «Куллар», Б. Кербобоевнинг «Дадил қадам»; Ҳамза Ҳакимзоданинг инқилобий шеърлари ва инқилобчилар образини яратган саҳна асарлари, Абдулла Қаҳҳор, Файратий, Уйғун, Ҳамид Олимжон, Ойбек, Шокир Сулаймон, Ҳ. Шамс, П. Турсун ва бошқа ёзувчиларнинг шеър, ҳикоя, повестлари-даги Октябрь фарзандлари фикримизнинг далилидир. Қисқаси, адабиёт янги жамият учун кураш формаларидан бири эди.

Кўп миллатли ва кўп тилли совет адабиёти қаҳрамонлари ўз социалистик Ватанининг тўла ҳуқуқли гражданлари бўлган коммунистлар ва партиясизлар ватанпарварлар сифатида гавдаланадилар. Уларнинг миллати, тили, урф-одати, кийим-кечаги ҳар хил, аммо идеали бир эди. Туғилиш жараёни ҳам бир-бирига ўхшарди. Бу қаҳрамонлар ўз андозасини С. Сайфуллин, Д. Бедний, Ҳамзадан олган эдилар.

Биз ўзимизга ҳар жиҳатдан яқинроқ Ҳамзани ол-сак, у инқилобчи янги инсон образининг энг мукаммал тимсоли эди. Шайхзода сўзлари билан айтганда: «Ҳамза ўзининг бутун моҳияти, йиллар бўйи пишиб келган курашчан хулқи билан, маънавий ва ахлоқий олами билан, ўз шикоят ва хитоблари билан совет инқилобини қабул қилишга тайёр эди; шу важдан у янги халқ ҳокимиятини ҳеч иккilanmasdan ўз foясининг мужассам программасидай кутиб олди. Ҳеч муబалағасиз айтиш мумкини, Ҳакимзода янги типдаги ўзбек зиёллисининг, маданиятпарвар совет кишисининг яққол ўрнаги, партиявий адабининг ибраторумуз намояндиши, коммунизм кўчасига кирган янги инсон типининг (таъкид бизники — М. Ю.) мужассам намунасидаи тарихимизга кирди»<sup>70</sup>.

Инқилобчи ишчи образи, эски дунёни тор-мор қилиб, меҳнаткашлар манфаатини ҳимоя қилувчи янги дунё фидокорлари образи дастлаб поэзияда кўринади. Мисол учун Ҳамза ва Айний поэзиясига мурожаат этиш кифоя. Ҳамза 1917 йили «Қуроллан, меҳнатчи-лар! Бўлсин дунё сенинг», «Бизнинг замон, хизматчи-лар, Майдонга чиқ, ишчилар!»—деган бўлса, 1918 йили Советларни қутлаб, «Яша Шўро!» деб ҳайқирди. Инқилоб олиб келган озодликни синфий душманлардан ҳимоя қилиш керак эди. Шунинг учун шоир «Бизга кимлар қарши турса, шартта-шартта отамиз», «қонли байроғимиз жаҳонни қизартсан», дейди ва «Мазлум-лар эрк дунёсин қоплон, шерлари»га — қизил аскарларга мурожаатида «Инқилоб байроғин селпиб, илгари» босишга чақиради. Чунки, бу байроқ истиқбол учун кураш йўлига ўтган жафокаш халқнинг асл фарзандлари қонига йўғрилган. Озодлик байроғи жуда қимматга тушганини Ҳамза қатор драмаларида яхши кўрсатиб берди. «Бой ила хизматчи»даги Фофир, «Қаҳрамон Ўғуз ёхуд ота ўғли»даги Абдулла ва Ўғуз, «Йистибодд қурбонлари»даги Сайдхон шулар жумласидандир.

«Йистибодд қурбонлари» («Лошмон фожиаси»нинг учинчи бўлими) даги революционер Сайдхон чоризм амалдорлари ўқига юзма-юз туриб, сотқин мурдорларни жасорат билан фош қиласди. «...Ажал қошида эканман, энди очиқ айтайки, мен ҳақиқий инқилобчи, биргина бу мустабид Николайнинг эмас, бутун ер юзидағи

<sup>70</sup> Мақсад Шайхзода. Олти томлик. Бешинчи том. Тошкент. 1973. 96-бет.

империалист ва капиталистларнинг ришталарини қирқиб... кулларини кўкка совурмоқ учун ҳақиқий яратилган бир үшчиман, шуни билинг!... Бизнинг томчи қонларимиздан тезда қизил гиёхлар ўсиб чиқар...».

Бухоро амирининг даҳшатли зулмини ўз бошидан кечирган С. Айний инқилобча «Музладик намли зиндан тубинда», деб ёзган экан, энди: «иашчи, деҳқон ва қизил аскар бирлашиб», «Олдай бос, хоинлар қолмасун ер юзинда», — дейди. «Байналмилал (Интернационал)» маршида меҳнаткаш оммани «золимларни қуввишга» даъват этади ва пролетариат гимни «Интернационал» руҳига кириб, ёзди: «Сўнги уруш бўлур бу, Қонли уруш бўлур бу, Байналмилал юриш бу, Қаттиғ юриш бўлур бу».

Абдулла Авлоний ҳам инқилобий мазмундаги маршлар ёзганини эслатиб ўтиш ўринлидир.

Биз кўздан кечираётган давр қаҳрамонига хос белгиларни нима учун дастлаб шеърлардан, қўшиқлардан ва маршлардан изладик? Чунки, ўша йилларда ижтимоий-сиёсий мавзудаги публицистик мақолалар сингари поэзия бошқа жанрлардан аввал ҳамда оператив рашида бу масалага аҳамият берди. Кекса авлодга мансуб адабиётшуносларнинг айтишича:

—...Ўша вақтда ўз замонаснинг ҳамма муҳим ижтимоий, ғоявий-бадний проблемаларига бевосита ҳозиржавоблик қилган оператив ва жанговар бадний жанр поэзия бўлди. Бу жиҳатдан у вақт поэзияси публицистикага жуда ҳам яқинлашиб келар, ғоявий-бадний проблемаларни ҳал этишда эса, ҳатто у вақтда ҳали жуда ҳам тарақкий топмаган адабий танқиднинг ҳам ўрнини босар... эди. Иккинчидан, янги совет ҳаёти ҳодисалари, совет тематикаси поэзиянинг асосий тематикасини ташкил этар, поэзиянинг диққати асосан замонаси ҳаётига тортилган... эди»<sup>71</sup>.

Аввало, янги инқилобий воқелик, қолаверса, юқоридаги каби асалар таъсирида ўзбек адабиётида социализм ғалабаларини мустаҳкамлаш учун, ўтмишнинг ижтимоний ва майший ҳаётдаги сарқитларини йўқотиш учун курашувчи янги типдаги қаҳрамонлар яратилди. Ойбек, F. Фулом, Ўйғун, X. Олимжон, X. Шамс, Файратий, Шайхзода, Миртемир сингари ёш, аммо анча танилиб қолган шоирларнинг биринчи шеърий китоблари (ҳали қаноатлантирадиган даражада мукаммал бўлмаса-да)

<sup>71</sup> Иззат Султон. Асалар. Тўрт томлик. Иккинчи том. Тошкент. 1972. 266-бет.

давр қиёфасини, замондошлар портретини чизиш ниятида юзага келган. Шокир Сулаймон, Элбек, Файратий, Боту, Абдулла Қаҳҳор, Парда Турсун ва бошқа ёзувчиларнинг илк ҳикоялари ва повестларига қаҳрамон сифатида кирганлар гражданлар уруши даври ва йигирманчи йиллар руҳини ифодаловчи образлар эдилар.

Ўзбек совет адабиёти йилномасига кирган қаҳрамонлар идеаллаштириб тасвирланган шахслар эмаслар. Реал ҳаётдан ўсиб чиқсан, социализм учун олиб борилган курашлардан ўтиб келиб, китобларга кирганлар. Зотан, уларни яратган ёзувчиларнинг ўзлари кўпинча биографик жиҳатдан қаҳрамонларига жуда ўхшаб кетар ва шу сабабли руҳий яқинликни сезар эдилар. Бинобарин, бадий тўқимадан кўра тарихий ҳужжатлар, ҳамманинг эсида турган кечаги кун воқеалари салмоқли ўрин эгалларди.

Поэзия, проза ва драматургияда аксини топган янги инсон образини анализ қилишга адабий танқид сустроқ киришди. Бу масалада асосан тақриз олдинда борди. Тақризчиларнинг ҳам кўпчилиги Мирмулла Шермуҳамедов, Айний, Файратий, Элбек, Яшин, Ойбек, Ҳ. Олимжон, Зиё Саид сингари ижодкорлар ва О. Шарафиддинов, О. Ҳошим, С. Ҳусайн, А. Саъдий, Анқабой каби танқидчи ҳам адабиётшунослар эдилар. Булар қаторида исми, фамилияси аниқланмаган, фақат шартли тахаллусигина маълум авторлар ҳам бор.

Масалан, Мухбир тахаллусли бир танқидчи Ҳамзанинг «Истибодд қурбонлари» ҳақида фикр юритиб, унда яратилган янги қаҳрамонлар образини анализ қиласди ва совет адабиётида дастлаб Ҳамза ижодида кўринган ишчи, деҳқон ва коммунистлар образига алоҳида эътибор беради. Социалистик воқелигимиизда туғилаётган қаҳрамонларни илк бор сезгирлик билан пайқаб, янгилик сифатида тарғиб қиласди. Йиқилобчининг, совет кишисининг сиймосини жонли равишда кўрсатиш учун саҳна асарлари Ҳамзага адабиёт билан ҳаётни бир-бирига боғлашга хизмат қилганини таъкидлайди. Спектаклдаги: «Ҳой, ҳой ишчилар!» жуда яхши. Кетмон, ўроқ ва болға кўтаргандарнинг қиёфат ва айтган сўзлари шўролар ҳукуматининг душманларига яхши калтакдир. Ҳусусан, уларнинг охирида намойиш билан кириб келишлари жуда яхши бўлди»<sup>72</sup>,— дейди танқидчи.

<sup>72</sup> Янги Шарқ. 1919. 24 август.

Ҳамзанинг революцион ва адабий фаолияти ҳақида гапирганда қозоқ халқининг Ҳамза типидаги оташин фарзанди Сакен Сайфуллин, Озарбайжон совет маданияти ва адабиёти асосчиси Жаъфар Жабборли эсга келади. Улар ҳам ўз вақтида кескин синфий кураш оловларида тобланиб, ишчи ва деҳқонларниң орзу ва мақсадларни ифодалаб берган эдилар. Бу маслакдош шопрлар янги даврниң янги кишилари образини яратиб бериш қаторида, инқилобий жараёнга тиш-тироғи билан қаршилик кўрсатадиган реакцион кучларга қақшатғич зарба бердилар. Ўзбек адабий танқидида майдонга келган тақризлар, мақолалар буни яхши изоҳлаб кўрсатган.

Йигирманчи йиллар адабий танқиди, айрим фактларни мустасно қиласанда, Ҳамза ижодига умуман тўғри баҳо беролмади. Унинг инқилобий темадаги пьесалари саҳналаштирилиши муносабати билан матбуотда бирбирига зид, баъзан тўғридан-тўғри камситувчи тақризлар босила бошлади. Бундай чиқишларда ғоявий рақибларниң қўли борлиги сезилиб турарди. Мисол тариқасида «Боғбон» тахаллусли шахснинг Ҳамза асарларига ёзган «Иффат қурбони», «Юлгинбой» каби тақризларини кўрсатиш кифоя. «Бой ила хизматчи» 1919 йили намойиш қилиниб катта муваффақият қозонгач, «Боғбон» уни ерга уриб, ҳақиқатдан кўз юмиб, асар «санойи нафиса» нуқтаи назаридан талабга жавоб бермайди, деган хулоса чиқаради. Пьеса томошабинларда инқилобий сафарбарлик руҳини уйғотгани хусусида оғиз очмай, актёрлар ўйинидаги заиф томонларга ёпишади. 1921 йили у «Иффат қурбони» тўғрисида гапирап экан, асарнинг замонавийлиги, совет воқелигининг афзаллиги ташвиқ қилинганини четлаб ўтиб: «...Бу асар «Фарғона фожиаси»нинг иккинчи қисми бўлиб, ўзбек саҳналарида жуда кўп ўйналиб, жуда кўп танқидга учрагандир... Лошмон фожиалари халқа руҳан лаззат бермайди»<sup>73</sup>, — дейди.

Ҳамза асарларини ғаразгўй «танқидчи»лар ҳужумидан ҳимоя қилишда ёзувчи ва танқидчи, тўғрироғи, театр танқидчиси Мирмулла Шермуҳамедовadolатли мавқени эгаллади. «Бу ҳужумлар қаинчалик асоссиз бўлишига қарамай театр ишига салбий таъсир кўрсатди,— деб ёзади С. Аҳмедов.— Айрим истеъоддли артистлар саҳнани бутунлай ташлаб кетдилар... Ана шундай қийин бир пайтда Ҳамза ва унинг сафдошларини

<sup>73</sup> Қизил байроқ. 1921. 6 октябрь.

Мирмулла ҳимоя қилди. Мирмулла бу ҳужумларга жавобан Ҳамза асарларини одилона ва холис, ўзи айтгандек, «бетарафона» таҳлил этиб, уларнинг янги жамият қурилишидаги аҳамиятини кўрсатиб берди...»<sup>74</sup>

Мирмулла «Қаҳрамон Ўғуз» спектаклига бағищланган тақризизда пьеса мазмунига қисқача тўхталиб, ҳикоя қиласи: «...Асарда Абдулла исмли бир ўзгаришчининг (иинқилобчининг — М. Ю.) эски идора вақтида ўзгариш ишлари орқасидан юрганлиги сабабли қамоққа олинган вақтида унинг ўғли Ўгуз отасини озод қилмоқ учун кўп уриниб, энди қутқараӣ деб турганда уни «турма маъмурлари сезиб қолиб, ўзгаришчи Абдулла яна бошқа ўзгаришчилар билан бирга ўлим жазосига ҳукм қилиниб, дор тагига олиб борилган вақтда, бирдан ўзгариш бoshланиб», ҳужум вақтида турма маъмурларидан бир қанчаси ўлади. Ўлнигга ҳукм қилингандар озод этилади, аммо отишмаларда Ўғуз ҳалок бўлади.

Спектаклнинг бош қаҳрамони Ўғуз, Мирмулла фикрича, томошабинлар олдида қаҳрамонлик сифатларини у қадар кўрсатмайди. «Бир роман ёхуд бошқа асарларда,— дейди у,— қаҳрамон оти билан кўринган бир тип шу асарнинг бутун кўринишини ўзининг қаҳрамонлик ишлари ва ҳаракатлари билан зийнатлаб, ўқувчи ва томошабиннинг назар-диққатини ўзига жалб этмаги лозим»<sup>75</sup>. Кўринадики, автор пьесадаги етишмовчиликни холисона қайд қиласи, бироқ актёрлар талқинига нисбатан жиддий талабчанлик билан ёндашади.

Адабиётшунос ва тақиидчи Абдураҳмон Саъдий дастлабки йилларда ўзбек адабиёти эришган ютуқларни таҳлил қилган «Олти йил ичиди ўзбек шеърий адабиёти» мақоласида Ҳамза тўғрисида адолатли муҳокама юритганини юқорида айтган эдик.

Қисқаси, матбуотда, «Қизил қалам» мажмуасида Ҳамзага бағишлиб ёзилган мақолалар, шонр асарларига берилган тақризлар маълум маънода ҳамзашуносликнинг бошланиши эди.

А. Саъдийнинг «Адабий ижод майдонида»<sup>76</sup> ва «Ўзбек ёш шоирлари»<sup>77</sup> мақолалари ҳам ўзбек адабиётининг совет воқеалиги билан алоқасидан баҳс очади.

<sup>74</sup> Аҳмедов Суннатилла. Мунаққид Мирмулла. Гулистон. 1977 №5. 16-бет.

<sup>75</sup> Қизил байроқ. 1921. 16 октябрь.

<sup>76</sup> Ўзгаришчи ёшлар. 1924. № 7.

<sup>77</sup> Туркистон. 1924. 12 январь.

Муаллиф Боту ижодини кўздан кечирар экан, у инқи-  
лоб ва социалистик идеологияни акс эттиришда ишчи  
ва деҳқонлар образига мурожаат қилганини, Элбек эса  
деҳқонлар ҳаётини тасвирлашда анча ютуқларга эриш-  
ганини сўзлаб: «Қишлоқ турмушидан, деҳқон ва йўқ-  
силларнинг тирикчилигидан олиб ёзилган ҳикоялар,  
романлар, томошаликлар» ва жуда «кам бир вақтда»  
ёзган бошқа асарларини қўллаб-қувватлади.

Ўзбек совет адабиётси йигирманчи йилларнинг ўрта-  
сига келиб қатор янги ёзувчиларни, оригинал асарлар-  
ни берди. Улардан бири ва муҳим воқеа сифатида ку-  
тиб олингани Манзура Собир қизи (Ойдин)нинг  
«Янгиликка қадам» пьесаси эди. Аввало шуни айтиш  
керакки, пьеса авторининг ўзи биринчилардан бўлиб  
счилган биринчи маърифатли қиз, биринчи ўзбек совет  
шоираси ва драматурги ўлароқ ғоят нодир ҳодиса эди.  
Ойдин тақдирода ўзбек хотин-қизлари ҳаётида юз бер-  
ган буюк революцияни кўриш мумкин. Онгли фаолияти-  
нинг дастлабки йилларидан ўз ҳаётини хотин-қизларни  
руҳий-маънавий асоратдан озод қилишига, очилиб ёруғ  
дунё юзини кўришига бағишлаган шоира барча тўсиқ-  
ларни матонат билан енгиб, олға юрди.

«Янгиликка қадам» автобиографик характердаги  
асар эди. Шоира Зулфиянинг Ойдин тўғрисидаги  
очилгац биринчи маърифатли қиз, биринчи ўзбек совет  
йўли билан маҳаллалардаги дугоналари аҳволини ўрга-  
ниб юрадиган вакила Маствора Манзуранинг прототипи-  
дир. 1925 йили «Янги асарлар» рубрикаси остида бо-  
силган тақризда бу хусусда қўйидагилар ёзилган:  
«...Ўзбек хотин-қизларининг олдинги сафида турувчи-  
лар ҳозир билим юртларида, мактабларда ўқимоқдалар.  
Иқтисодий қуллик остида ётган камбағал хотинлар ўз-  
ларига суюнчиқ топгандай бўлиб, артель ва ҳунар  
бирликларига уюшиб ишламоқдалар... Баъзи оғзи кат-  
таларнинг гапига қулоқ солмай: «Энди ақлимиз боши-  
мизда»<sup>78</sup>,— дейдилар. «Китобхон» имзоли шу авторнинг  
айтишича, кейинги йиллар кўрсатиб турибдики, хотин-  
қизларимиз эркакларга ёндашиб, биргаликда ишлаб,  
идора ва уй-рўзгор вазифаларини баробар бажаришга  
қобил эканликларини кўрсатдилар.

«Китобхон» ўзбек қизлари орасидан чиққан ёш ёзув-  
чи Манзура Собировани чин дилдан қутлаб, ушбу  
пьесанинг «Энг катта хусусияти ва бошқалардан фарқи  
шундаки, янги турмуш қурмоқ йўлида курашаётган

<sup>78</sup> Қизил Ўзбекистон. 1925. 19 август.

«бир ўзбек қизи томонидан ёзилиб, майдонга отилган», — дейди.

Шокир Сулаймоннинг «Гуласал» сочмасидаги «Булутўпар мирза теракларни ёқалаб ҳар куни фабрикага келадиган Гуласал», «Ўч» ҳақиқасидаги жонкуяр колхоз раиси Суярқул ака; Файратийнинг «Тиланчи хотин»идаги Дилбар ва «Иккинчи пичоқ»даги Мушаррафхонлар ўтмишда мусибатли ҳаёт кечириб Октябрь туфайли, Коммунистик партия ва Совет ҳукуматининг ғамхўрлиги орқасида инсонлик шарафига эга бўлган, актив жамоатчи сифатида камол топган янги кишилардирлар.

Йигирманчىй йилларда ҳалқимиз замонавий драматик асарларга чанқоқ эди. Чунки, шу куннинг воқеалирини, Ватан олдидаги бурчини яхши адо этаётган садоқатли шахсларни саҳнада кўришни истарди. Ҳамзадан кейин биринчилардан бўлиб Яшин шу талабни қондириш ниятида «Икки коммунист»ни яратди. Ўзбекистонда гражданлар уруши — босмачиликка қарши курашда фидокорлик кўрсатган ҳақиқий коммунист Арслон асарнинг бош ижобий қаҳрамони бўлиб саҳнага чиқади. «Драматург Яшин Арслон образини яратиш билан гражданлар урушидаги большевик қаҳрамонларимизнинг қайта ишланган варианти «Тор-мор»да Арслон нинг қайта ишланган варианти «Тор-мор»да Арслон образи бўрттирилган, анча умумлаштирилган» (С. Ҳусайн).

Адабий танқид замонавий материални, замондош образини бадиий адабиёт қандай ўзлаштираётгани ва бу соҳадаги нуқсонлар нимадан иборатлигини мухокама қилишга бора-бора кўпроқ эътибор берадиган бўлиб қолди. Агар йигирманчىй йилларнинг биринчى ярмида инқилобий воқеалар марказида турган коммунистлар социалистик қурилишни бошқараётган ва меҳнатда, колективда ўрнак бўлаётган кишилар ҳақидаги асарлар мамнуният билан кутиб олинган бўлса, йигирманчىй йилларнинг иккинчى ярмидан бошлаб шу образлар тўлақонлими, ёзувчилар ўз қаҳрамонларининг ички дунёсини, психологиясини ҳам тасвирлаётими, деган саволлар қўйила бошлади. С. Ҳусайн айтганидек, «социализм қуриш йўлида жон-дили билан куйиб-пишиб ишловчилар» бадиий адабиётга олиб кирилганда ҳаётни кўрсатишнинг «натуралистик йўлини ташлаб, одамларни чуқур руҳий кўрсатишга»<sup>79</sup> ўтилган бўлинарди.

<sup>79</sup> Шарқ ҳақиқати. 1929. 26 апрель.

Бундан аввалги бобда тилга олганимиз «Кўрмана» номли шеър ва ҳикоялар тўпламининг мавзуи жуда актуаллигини тасаввур қилиш учун айрим сарлавҳаларга назар ташлайлик: «Тўлқин», «Бахтлар баҳорида», «Октябрь ўн йиллигига», «Инқилоб», «Ўзгариш қуёши», «Курашувчи куч», «Меҳнат соқчилари», «Фан керак», «Ҳаёт сезиглари», «Трактор» ва ҳоказо.

«Кўрмана»га сўз боши ёзган С. Ҳусайн авторлар фоявий тўғри маслакда эканликларини, яхши шеърлар ва ҳикоялар яратадиганликларини айтиб, кўпчилик «ҳали ҳам ҳаётнинг айланасини томоша қилиб юриб, ички қатламларига» кириб боролмаётганлари, ижтиёмий ҳаётда рўй берадиган «руҳий-фирқий» ўзгаришларни «гавдалантиришга уннаганлари йўқ»лиги, ёзувчинга фақат «дунё инқилоби тўғрисида ёзиш»нинг ўзи кифоя қилмай, санъаткорлик —«сўз усталиги» ҳам жуда кераклиги хусусида тўхтаб ўтади.

Айниқса, поэзияда яққолроқ кўриниб қолганлигини танқидчилар ва ҳатто шоирларнинг ўзлари ҳам пайқаб қолган ана шу заиф томон жамоатчилик ҳукмига олиб чиқилди. Масалан, «Кўрмана»га тақриз ёзган танқидчи Сайд Фани пролетар шоири (кенг маънода совет шоири — М. Ю.) бўлиш учун «инқилоб», «пролетар», «байнамилал» ва бошқа шундай «қизил сўзлар бўлса» етади, «деб ўйлайдиганлар янгишажагини уқтиради. «Мен гул — булбулдан эмас, ўроқ ва болгадан илҳом оламан», деган билан ҳеч ким бирданига пролетар шоири бўлиб қолмаслигини таъкидлайди. Поэзияда тасвиранган ишчи фақат болға уришдан бошқа манфаати, истаги йўқ одамлар бўлиб қолганига ачинади. Улар «кеча-кундуз ишлайдилар, ҳеч истироҳат қилмайдилар»<sup>80</sup>.

Шу тариқа адабий танқид ёзувчидан коммунистлар, ишчилар ва деҳқонларни тасвирилаганда «даврнинг ижтиёмий типи» (С. Ҳусайн) сифатида, социалистик ҳаёт тажрибаси билан мустаҳкам алоқада талқин этишибилан бирга уларнинг ҳар бирига хос индивидуал характеристери, психологияси, тили худди жонли кишиларни кидек сезилиб туришини талаб қилди. Танқидчи Олим Шарафиддиновнинг «Баҳор севинчлари» (Уйғун асари)-га бағишланган катта мақоласида ҳам шу фикр олға сурилади. Уйғуннинг ўзбек совет поэзиясига кириб келиши, биринчи китоби «инқилобчи, умидли шоирлардан» бири эканидан дарак беришини қувониб сўзлайди.

<sup>80</sup> Қизил Ўзбекистон. 1929. 10 май.

Айни замонда, шеъриятдаги умумий нуқсон бу тўпламда ҳам борлигини далиллар билан исботлайди.

Олим Шарафиддиновга кўра, «замонавий мавзулар устида қалам юритган, бу кунни тараннум қилган шоирларда масаланинг моҳиятини очиб бермаслик, «ёки бирёзлама англаш каби ҳоллар ўзини кўрсатиб туради...». «Қишлоқдан баҳс этганда,— дейди танқидчи,— қишлоқнинг табиатини, гуллардан чаман ёйишини, йигитларнинг ботирларча кетмон чопишини, тракторнинг йўргалаб юришини тасвирлашдан нари ўтмайдилар. Инқилобдан гапирса, қизил байроқнинг ҳилпираши, зулматнинг қочиши, хотин-қизларнинг озодликка чиқиши кабилар юзаки равишда тасвирланади».

Ўйғуннинг «Комсомол», «Шаҳар», «Достон» номли шеърлари ҳам шундай. Комсомолнинг, шаҳарнинг ташқи қиёфаси чизилади, ташқи белгилари устида фикр юритилади. Комсомолнинг характерли хусусиятларини беролмаслик — «комсомолни англамаслик» бўлганидек, «социализм қурмоқда бўлган шаҳарнинг ролини очиб беролмаслик» унинг моҳиятини етарли даражада тасаввур қилмасликдир<sup>81</sup>, деган холосага келади танқидчи «Баҳор севинчлари» тўғрисидаги мақоласида.

Айрим вақтларда давр қаҳрамонлари хатти-ҳаракатини бузиб кўрсатиш ҳоллари рўй берди. Бу ўринда гап Шокир Сулаймоннинг «Қанотсиз бургутлар» ҳикояси устида боради. «Аланга» журналининг 1929 йил 12-сонида босилган бу ҳикоя ўша йилларда муҳим ижтимоий-иқтисодий аҳамиятга эга бўлган ғалла ўрим-йифимида комсомоллар иштирокига бағишиланган. Воқеа шундай ривожланадики, оқибатда ёшлар бу йифиндан ўзларининг ёмон ниятлари йўлида фойдаланадилар. Бир группа комсомоллар икки севишган ёш — Карим билан Қимматойнинг бахтини кўролмай, бир тунда Қимматойни хилватга судраб кетиб зўрлайдилар. Хўрланган қизни шу қишлоқдаги бир хотин уйига олиб кетиб, кейин қидирув шуъбасига хабар қиласди. Жиноятчи комсомол хотинга туҳмат қилиб қаматади. Бу ҳам етмагандек, хотиннинг ўғлидан қамоқдаги онасига олиб бориш учун заҳарланган нон бериб юборади. Бола йўлда нондан еб ўлади... Виждонсиз, безори комсомоллар устидан «намунали суд» қилдириш учун Карим шаҳарга келганда ўзи газетада танқид қилган кооперативчилар томонидан ўлдирилади.

<sup>81</sup> Шарқ ҳақиқати. 1930. 14—15 август.

Ҳикоянинг қисқача мазмунидан англашилади, битта эмас, бир гуруҳ комсомоллар қабиҳ жиноятга аралашадилар. Ёзувчи бир эмас, бир қанча мудҳиш кирдикорларни бир-бирига улаб, бир жойга тўплайди ва умумлаштиради. Адабиётда кўринган бу носоғлом, тоявий мажруҳ асарга иисбатан танқид сукт сақлаб туролмади. Ҳамид Олимжоннинг «Замон ва Шокир Сулаймон»<sup>82</sup> номли жiddий танқидий мақоласида «автор тушунчаларининг тили билан айтганда, бу маъракада комсомоллар фирманинг темир таянчи, қишлоқнинг соғлом қўшини сифати билан эмас, безори, халқда ўзларига иисбатан нафрат түғдирувчи бўлиб майдонга чиқадилар... Шокир Сулаймон дунёни бузилган, лой-қаган..., ифлосланган ҳолда кўради», — дейди.

Танқидчи Кашшоф Треғулов «Нафис адабиёт жабхамизни соғломлаштириш йўлида»<sup>83</sup> деган обзорида Ш. Сулаймон поэзиясидаги схематик образларни, ишчи-деконлар ҳаёти тасвиirlанганда психологик кайфият, руҳий ҳолатни назарда тутмаслиги, кундалик ҳаёт нафаси сезилиб турмаслиги масалаларига тўхтади. Уйғун эса «Ўз хатоларимиз устида ўрганамиз»<sup>84</sup> мақоласида шахсийижодий йўлининг биринчи (1925—1928)га танқидий назар билан қараб, йўл қўйган камчиликларини объектив равишда таҳлил қиласди.

Адабий танқид юқорида кўрсатиб ўтилган нуқсонларнинг сабабларини очиб беришга ҳаракат қиласди. Вел Ўразай фикрича, ёзувчилар конкрет турмушни билишга жiddий киришмаётирлар; «қишлоқ, шаҳар, завод, фабрика, шахта, колхоз, совхозларнинг турмуши билан мустаҳкам боғланиб, уларни ўрганиб», керакли материал билан қуролланиш лозим... «Бизнинг гўзал адабиётимиз ишчи ва меҳнаткаш деҳқонларнинг ичига кира олса, уларнинг юракларидан чиққан сўзлар ва бошларида қайнаган фикрлар» билан иш кўрса, исталган мақсадга эришажагини айтади<sup>85</sup>.

Йигирманчи йилларнинг охирига келиб янги инсон образи тобора тўлароқ акс эта бошлади. Ўша даврда пролетар шоири сифатида танилган Файратий биринчи шеърлар тўплами («Эрк товуши») даёқ ишлаб чиқаришда етишмакда бўлган янги социалистик одамни, қишлоқ ҳаётида бўлиб ўтаётган ҳодисаларни тасвири-

<sup>82</sup> Ьш ленинчи. 1930. 26 март.

<sup>83</sup> Қизил Узбекистон. 1929. 4—5 июль.

<sup>84</sup> Қурилиш. 1931. № 3.

<sup>85</sup> Вил Ўразай. Гўзал адабиёт соҳасидаги вазифаларимиз ҳақида//Аланга. 1930. № 1.

лади» (О. Шарафиддинов). Ф. Гулом «Кўкан» поэмасида «мехнаткаш деҳқонларни қашшоқликдан, хўрликдан қутқариб, бахтли, тўқ, маданий ҳаётга олиб чиқкан... колхозда қаҳрамоннинг янги одамга, янги тип деҳқонга айланиши»<sup>86</sup> жараёнини кўрсатди. Уйғун яратган Жонтемир ҳам ана шундай янги совет кишиси образи эди. Улар учун характерли хусусиятлар ҳаётга актив аралашув, партия ва халқ ишига садоқат, ватанпарварлик, ҳалолликдири.

Ватанимиз ва халқимиз тарихида «буюк бурилиш йили» номини олган 1929 йилдан бошлаб адабиётимиз ҳаётга ҳамма вақтдагидан кўра яқинроқ бўлишга интилди. Социалистик қайта қурилиш даври деярли барча ёзувчилар учун ижтимоий-сиёсий мактаб бўлди. Олим Шарафиддинов таъбири билан айтганда: «...вужудга келган буюк қурилишлар, ижтимоий муносабатдаги улуғ ўзгаришлар, пролетариат ва олдинги колхозчилар орасида социалистик онгнинг ўсиши, меҳнатнинг социалистик формасининг кенгайиши—ёзувчиларнинг фикр-ҳисларига катта таъсир қилди. Уларнинг қарашларига шу чоққача кўрилмаган, буюк тарихий аҳамиятга эга бўлган мавзу, материалларни ёзиб ташлади. Булар ёзувчиларга катта масъулият юклиди... Бу мавзу ва материалларни эгалламоқ учун ёзувчи... турмушнинг чуқурликларига кириши, социалистик қурилишнинг актив иштирокчисига айланиши лозим»<sup>87</sup>.

Горький ташаббуси билан бошланган ажойиб ҳаракат—янги ҳаётни чуқурроқ ўрганиш ниятида турли ишлаб чиқариш корхоналарига, қурилишларга, колхоз ва совхозларга ёзувчилар юриши қизғин тус олди. Республикамизда Ф. Гулом, Ҳ. Олимжон, А. Қаҳҳор, Ҳ. Шамс каби ёзувчилар раҳбарлигида алоҳида-алоҳида бригадалар тузилди. Улар Текстилькомбинат, Ташсельмаш, ҳарбий қисмлар ва мактабларга бориб ишчиларнинг, қурувчиларнинг, ҳарбий хизматчиларнинг ҳаёти, меҳнати ва характерини ўрганиш қаторида ўзлари уларнинг маданий турмушини яхшилашга, адабий тўгараклар ташкил қилиб, ёш ёзувчиларнинг ижодий ўсишига яқиндан ёрдам бердилар.

Шоира Ойдин қишлоқни коллективлаштириш жарёнида одамларнинг қайта тарбияланиши масаласини

<sup>86</sup> Еқубов Ҳомил. Ўзбек совет поэзияси 15 йилда / 15 йил ичидаги ўзбек совет адабиёти. Тошкент. 1939. 59-бет.

<sup>87</sup> Шарафиддинов О. Таъланган асарлар. Тошкент. 1978. 215-бет.

кузатиши ҳамда хотин-қизлар турмушидан асар ёзиш учун Кўқонга комаңдировка қилинди.

Октябрнинг XVI йиллигига тайёргарлик ойларида бундай тадбирларда фақат Тошкентнинг ўзида 48 ёзувчи иштирок этади. Шу даврда адабий жамоатчилик ўртасида «Адабиёт магниткаси учун курашамиз», «Адабий Турксиб учун» каби шиорлар матбуот саҳифаларида тез-тез учраб туради. Ана шу ажойиб ҳаракат натижасида (илгари ҳам тилга олганимиз) бақувват асарлар: «Қўкан», «Жонтемир», «Дилбар—давр қизи», «Темирчи Жўра», «Бахтлар водийси», «Махорат», «Ёндирамиз», «Онамга хат», «Машина қулоғида», «Қўприк устида» (Ойдин), «Дастгоҳ қўшифи», «Учинчи бригада» (Ҳ. Шамс) каби асарлар, У. Носир, А. Умарий, С. Жўра, Ҳ. Пўлат, Зулфия ва бошқа шоирларнинг яхши шеър ва тўпламлари юзага келди. Булар ўттизинчи йилларнинг бошидаги адабиётимиз қўлга киритган ютуқларнинг намуналари эдилар.

Ойбекнинг Дилбар ва Жўраси, Ҳ. Олимжоннинг Ҳайдар капитани, Гайратийнинг Тўхташи, Айнийнинг Ёдгор ва Гулнори («Дохунда»), Яшиннинг Азамати, Самсоғи («Ёндирамиз»), қатор шоирларнинг лирик қаҳрамонлари ҳар бири ўз индивидуал хусусиятларига эга бўлган, шахсий ҳаёти, психологияси, ҳиссиёти ва руҳий кечинмалари билан бошқаларга ўҳшамайдиган, эсда қоладиган ва бизларга қадрдон бўлиб қолган янги кишилардир. Улар кечагина эксплуататорлик жамияти зўравонлари зулми ва руҳий тазиқи остида инсонлик заковати топталганлар социалистик тузум шарофати билан ўз қадру қимматини қўлга киритиб, маънавий дунёси бой одамлар эканини кўрсатганилар. Озод қилинган куч-қудрат, талант ва ташабbus нималарга қодир эканини бутун жаҳонга намойиш қилгандарнинг биринчи авлодидирлар.

Иигирманчи йилларда РАППчилар, ЛЕФчилар шиор сифатида ташвиқ қилган «адабиёт одамларни эмас, иш жараёнини, металл эстетикасини тасвирлаши керак», — деган гаплар ўттизинчи йилларнинг бошига келиб ўз, аҳамиятини йўқотди. Ёзувчилар ижодий тажрибаларида турмушни қайта қуриш соҳасидаги ишларни жонли одамларсиз ва уларнинг шодликлари ҳамда қайғуси, ютуғи-ю мағлубияти, орзу-истакларисиз тасвирлаш мумкин эмаслигини тушуниб олдилар. Бўни Ойбек жуда яхши ифодалаб берди. У «ишлиси синфи туйғуларини акс эттириш, социализм қурилиши практикасида янги одамлар қандай ўзгараётгани»ни

Бутун мураккаблиги билан кўрсатиб бериш ёзувчининг асосий бурчи эканини қайд қилди.

Ойбек давом этиб, ёзган эди: «Давримиз қаҳрамонлик давридир. Социализм учун курашда одамларнинг маънавий борлиги қандай ўзгараётганини биламиш: ...Бизнинг Ўзбекистон шаронтида этишган, кечагина бармоғини қалам ўрнида ишлатган, диний хурофатларга ботган кишилардан қандай қилиб фабрика, заводларда, колхозларда ишнинг, яратувчиликнинг, курашнинг олдинги қаторида кетаётган қаҳрамонлар вужудга келганини бадиий асарларда жонлантиришимиз керак... Социалистик реализм одамни, қаҳрамонларни ижтимоий практикада, бутун муҳит доирасида типик воқеаларда, индивидуал чизиқлардан маҳрум қилмасдан, маълум коллектив табақани ифода қила биладирган йўсинда кўрсатади...»<sup>88</sup>.

### ЖАНРИЙ ИЗЛANIШЛАР ВА АДАБИЙ ТАНҚИД

Октябрдан кейинги дастлабки ўн йиллик адабиёт ва санъатда инқилобий пафосни ифодалай оладиган, янги ғоявий мазмунга мувофиқ янги жанрий формалар излаш даври бўлди. Айтиш керакки, бу соҳада ҳам традицион жанрларни ҳисобга олмасдан туриб, мутлақо сунъий формалар яратишга уриниш мумкин эмасди. Масалани тўғри ҳал этишда традиция ва новаторлик диалектикасини ҳисобга олиш шарт эди. Аммо етакчи тенденция жанрий изланишдаги йўналишнинг янгилигидан иборат бўлди.

Инқилобий ғоя билан йўғрилган адабиёт олдида ана шу ижтимоий, замонавий руҳга мувофиқ бадиий форма ҳам яратиш вазифаси турарди. Чунки, ўша йилларда «пролетар» ва «деҳқон» адабиёти деб юритиляётган совет адабиёти («совет адабиёти» истилоҳи, тўғрироғи биримаси, 1923 йилдан Москва, Ленинград олимлари томонидан қўллана бошлаган эди) инқилоб аллангалари ва гражданлар уруши суронларида шакллана бошлаган иносон руҳий оламини очиб беришга даъват этилгани учун форма (шакл)даги новаторликка интилиш давр тақозоси бўлиб қолди.

Совет адабиёти тарихи учун шу нарса характерлики, йигирманчи йилларда мавжуд бўлган турли-туман группа ва ташкилотлар бир-бирига ўхшамаган стиль ва эстетик программаларга эга эди. Партия ва совет давлати ҳеч қачон адабий ҳаётга буйруқ бермадилар, яго-

<sup>88</sup> Қизил Узбекистон. 1933. 17 август.

на адабий услубни талаб қилмадилар. Маълумки, В. И. Ленин «Партия ташкилоти ва партия адабиёти» (1905) мақоласидаёқ «адабиёт иши — умумпролетар ишининг бир қисми бўлиши керак»,— деган ва айни бир вақтда: «адабиётни бундай бир андозага, бир қолипга солиб бараварлаш» тўғри эмаслигини, «бу ишда шахсий ташаббусга, шахсий қобилиятга, фикр ва хаёлга, форма ва мазмунга майдонни кенг очиб бериш мутлақо лозим»лигини алоҳида таъкидлаган эди.

Шундай қилиб, ёзувчига ижодий изланиш ва ўз бадний ниятини ифодалашда хилма-хил усуллардан фойдаланиш ҳуқуқини бериш ленинча партиявилик принципининг туб масалаларидан бирига айланди. Жанрий ранг-баранглик учун кураш, традицион жанрларнинг номаълум имкониятларини очиш ва уларни сифат жиҳатидан янгилаш адабий ҳаётнинг ривожига таъсири қилувчи омиллар эди.

В. И. Ленин маслаҳатлари билан тайёрлашга киришилган, бироқ доҳий вафотидан кейин эълон қилинган РКП(б) МҚнинг «Партияниң бадий адабиёт соҳасидаги сиёсати ҳақида»ги резолюциясида бадний форма хусусида шундай дейилган:

«...Ишчилар синфи капиталистик жамият доирасидаёқ ўзини галибона революцияга тайёрлаган... сиёсий курашнинг жуда яхши идеологик қуролини тайёрлаб олган ғэди. Аммо... маданият соҳасида эзилиб ётган синф бўлганидан ўз бадний адабиётини, ўз адабиётининг алоҳида бадний формасини, ўз услубини ишлаб чиқа олмаган эди. Пролетариат қўлида ҳозирдаёқ истаган бир адабий асарнинг ижтимоий-сиёсий мазмунини белгилайдиган бехато мезон бир бўлса ҳам, лекин ҳали ҳозирча уининг ихтиёрида бадний формага доир масалаларнинг барчасига шундай аниқ жавоб йўқ»<sup>89</sup>.

Совет адабиётининг методи — социалистик реализм (бу терминологик бирикма 1932 йилдан бошлаб оммалашган эди) бадний форма ва жанрларнинг ранг-баранглигини тақозо этарди. Бинобарин, резолюцияда партия «адабий форма соҳасида бирон оқим тарафдори бўлиб, ўзини боғлаб қўя олмайди... Бу соҳада турили группа ва оқимларнинг эркин мусобақасини ёқлаши керак»,— дейилган ва янги даврининг ўзига мувофиқ услугуб яратилажагига умид билдирилган.

Шуни унутмаслик керакки, Октябрь ғалабасидан кейинги ўтиш даврининг, социализм куртаклари тобора

<sup>89</sup> Сб. «О партийной и советской печати». М., 1954 . С. 344.

баравж бўлаётган йилларнинг ҳаёт жараёни ғоят хилма-хил воқеаларга бой эди. Ана шу реал воқелик инъикоси бўлган сўз санъати, унинг услугуб ва жанрлари илгариги традицион босқичда қололмасди. Инқиlobий жараён уларга ҳам таҳrir киритди.

Адабий жанрлар тараққиёти учун қандай тенденциялар характерли эди?

Октябргача бўлган ўзбек поэзияси кўп асрлик бой анъанага эга бўлгани учун йигирманчи йилларда профа ва драматургияга қараганда поэзия олдинда бораётган эди. Шунинг учун гапни поэтик жанрлардан бошлаш мақсадга мувофиқдир.

Бадиий форма (шакл) мазмунга нисбатан мустақил характерга эга. Шу сабабли бир бадиий форма турлича мазмунни ифода этишга хизмат қилиши мумкин. Адабиётда мазмун тез ўзгариб турувчан, революцион элемент бўлса, адабий формалар (шеърнинг турли шакллари, драматик тур, роман, повесть, ҳикоя) кам ўзгарувчан, нисбатан консерватив ҳодисадир. Ҳар бир санъаткор ўз бадиий режасига кўра истаган формани қўллаши мумкин. У қай бир вақт эски шеърий жанрни олиб, архаик нутқ ва бирикмаларни ишлатиш орқали муайян образнинг ўтган замонга хослигини, характерларнинг архаклигини таъкидлайди. Санъаткор ҳатто янги ғоявий мазмунни ифодалашда аждодлар яратган бадиий арсеналга мурожаат қиласди. Ахир классик адабиётимиз тўплаган бой тажрибалар авлодлар ва аждодлар ўртасидаги ижодий алоқа воситаси сифатида бизга хизмат қилиши, истеъмолга киритилиши лозим эди.

Ўзбек совет адабиёти дастлабки босқичда инқиlobий воқеликни ва замонавий руҳни тасвиrlашда ўқувчиларга илгаридан таниш ғазал, мухаммас, рубоий каби лирик жанрлардан эркин равишда фойдаланди. Аруз ҳам ёмон хизмат қилмади. Кейинчалик ҳам Fafur Fu-lom, Собир Абдулла, Уйғун, Ҳабибий, Чустий, Чархий арузда муваффақият билан ижод қилдилар. Лекин изланиш даври учун бунинг ўзи етарли эмасди.

Л. И. Тимофеев айтганидек, Улуғ Октябрь инқиlobининг ғалабаси келажакни ҳозирги кунга айлантириб юборди. Ҳозирги кун эса Совет мамлакатининг барча халқлари олдига шундай муҳим умумий ҳаётий масалалар қўйдики, улар ўз индивидуал хусусиятларига эга бўлган ҳолда ўша умумий масалаларга жавоб излашга қатъият билан киришдилар ва оқибатда керакли жавобни топдилар. Бу ижтимоий ҳаётни ва совет

санъатининг ривожланиш йўлларини белгилаб берди.

Шундай шароитда асосий вазифалардан бири миллий, тарихий тажрибаларни жадаллик билан ўрганиш ва давр талабига кўра кенгайтириш ҳисобланарди. Чунки ҳаётнинг янги масалаларига жавоб бериш учун кўпинча аввалги тажрибалар етишмай қолаётган эди. Уни бутун Совет мамлакатининг ҳаётида юзага келган иш формалари намунасидан излаш ва топиш зарур бўлиб қолди<sup>90</sup>.

Жўшқин ҳаёт ритмлари осойишта товланадиган ғазаллар, рубойлар оҳангига сифмай қолаётганини ҳис этган шоирлар жўшиб, пафос билан куйланадиган вазнларни изламаслиги мумкин эмасди. Агар традицион вазнларда яратилган образлар кўпроқ психологик, баъзан (достонларда) кўриш орқали қабул қилинадиган образлар бўлса, энди овоз ва сўз билан яратиладиган образ муҳим бўлиб қолди.

Узбек совет адабиётини бошлаб берган ва унинг мавзу доирасини, гоявий-эстетик йўналишини жуда узоқ йилларга белгилаб берган Ҳамза Ҳакимзода қалбига сифмаётган революцион ҳайқириқларни, озод инсоннинг шодлигини ифодалаш учун қўшиқлар (ашула́лар) формасидан фойдаланди. Миллионларга қарата айтилган «Яша Шўро», «Ишчилар уйғон», «Ҳой, ҳой, отамиз!» каби асарлар давр садоси, адабий манифестлар ва чақириқлар эди.

Шоирлар томонидан ёзилган марш ва марсельезаларнинг майдонга келиши ҳам замон руҳини ифодалашга интилиш натижаси бўлди. «Иштирокион» газетасининг 1919 йил 10 июнь сонида босилган Авлонийнинг «Ҳуррият марши» Туркистон элини «ҳур бўлиб яшашга, бир бўлиб яшашга» даъват этган бўлса, 1919 йил 28 октябрда «Меҳнаткашлар товуши» газетасида С. Айнийнинг «Ҳуррият марши (Марсельеза)» шеъри эълон қилиниди. Шу йилнинг иккинчи ярмида Айнийнинг яна «Мактаб марши», «Ҳилоли аҳмар марши», «Байналмилал марши» сингари асарлари вужудга келди.

Қозоқ революцион шоири, Ҳамзанинг маслакдоши ва ўртоғи Сакен Сайфуллиннинг 1919 йили ёзилган «Қозоқ ёшлари марсельезаси», шунингдек «Кел, йигитлар», «Қизил эрлар», «Бизнинг ҳаёт — экспресс» сингари неча ўнлаб шеърлар; қирғиз шоири Аали То-

<sup>90</sup> История советской многонациональной литературы. М., 1970. Т. I. С. 38.

қамбоевнинг «Комсомолка Дуня» қўшиғи оҳангида ёзилган «Сеуле» ва «Мен — Чолқор» номли жанговар асарлари; Озарбайжонда Советларни қутлаган Жалил Мамадқулизода ва Самад Вурғуннинг оташин мисралари, ҳар бири ўз индивидуал хусусиятига эга бўлган халқларнинг умумий ҳаётий масалаларга биргалашиб янги бадий формаларда жавоб бериш намуналари эди.

Бу ўринда адабий ўзаро алоқалар ва таъсирларнинг ролини ҳам унутмаслик керак. Бадий адабиётдаги таъсирлар ўз характеристига кўра бир хил эмаслиги тадқиқотчиларга маълум. Ўлар узоқ вақтдан бери давом этиб келаётган тарихий адабий алоқалар заминида, тилларнинг ва иқтисодий-маънавий турмушнинг, урф-одатларнинг яқинлиги орқасида, ижтимоий идеал ва тематиканинг муштараклиги натижасида рўй берган таъсирлар бўлиши мумкин. Биз юқорида келтирган миссоллар Советлар мамлакати халқлари олдига қўйилган вазифаларнинг бирлиги ҳамда ёрқин истиқбол учун курашда инқилобий пафосни тўғри кўрсатишга интилиш йўлидаги таъсирлардир. Эътироф этиш керакки, «Темалар ва формалар, приёмлар ва жанрлар тарихи — шубҳасиз, миллатлараро тарихдир. Гарчи ҳозирги замондаги кўпчилик жанрлар грек ва рим адабиётларидан келиб чиқсан бўлсалар-да, ўрта асрларда ёк улар жиддий равишда ўзгариб, янги хусусиятларга эга бўлган эдилар»<sup>91</sup>. Жанрлар ва приёмларнинг қадимги дунё адабиётидан кейинчалик Европа адабиётига, ундан рус адабиётига, ниҳоят Русь тупроғидаги бошқа миллатлар адабиётига кўчиши ва шу кўчиш жараёнида илк белгилар, хусусиятлар ўзгариб, бойиб бориши, янги сифатга эга бўлиши шундан далолат беради.

Россия давлати составидаги халқлар, элатлар Октябрни бадий тафаккурнинг, айниқса реалистик тафаккурнинг турли босқичларида кутиб олганлари туфайли социалистик воқеликни қандай жанр ва қайси форма воситасида тасвирлаш кераклигини тезда англаб ололмадилар. Намуна излаб бошқа адабиётларга, нисбатан кўпроқ тажрибага эга бўлган рус совет адабиётига, рус совет ёзувчиларига мурожаат этдилар. Аввало совет классиклари В. Маяковский ва М. Горькийнинг, бир оз кейин Д. Бедний, И. Уткин, М. Светлов асарлари катта ибрат мактаби бўлди. Чунки янги ҳа-

<sup>91</sup> Уэллик Р., Уоррен О. Теория литературы. М., 1978. С. 72.

ёт янги бадиий формаларни тақозо этаётганини дастлаб В. Маяковский, М. Горький ва уларнинг сафдошлари англаган ва ўша формаларни ярата бошлаган эдилар.

В. Маяковскийнинг таъсир доираси ғоят кенг ва ғоят чуқур эди. Валерий Брюсов 1917—1922 йиллардаги совет поэзиясини анализ қилиб ёзган эди: «Маяковский шеърлари беш йилликнинг ажойиб ҳодисаларидан... У вазн билан алоқасини кескин узмайдиган, аммо ритмик хилма-хилликка ихтиёр берадиган «эркин» шеърнинг алоҳида шаклини топди... Маяковскийнинг ёш поэзияга таъсири жуда кучли бўлди...»<sup>92</sup>.

Маяковский Европа адабиётига, Яқин ва Ўрта Шарқ адабиётига момақалдироқдек гулдурос билан кириб борди. Унинг эркин шеър соҳасидаги муваффақиятлари Ватанимиз чегараларидан ташқаридағи санъаткорларни ҳам завқлантириб, ўз орқасидан эргаштириб кетди. Мисол учун немис шоири И. Бехер ва турк шоири Н. Ҳикматни кўрсатиш кифоя.

Исёнкор шоир-коммунист, Туркияning улуғ граждани Нозим Ҳикмат СССРни ўзининг иккинчи Ватани деб ҳисоблар, йигирманчи йилларнинг ўрталарида юртимизга келганда ўз қувончини «Сенинг эшигиннга кўзларимга нур, зеҳнимга шуур истаб келдим»,— деб ифодалади.

У 1927 йили Москвада Шарқ меҳнаткашлари Коммунистик университетини тамомлаган бир группа зиёлилар билан Бокуга боради ва СССРда экан вақтида ёзган шеърларини 1928 йили «Гунаши ичанларинг туркусиси» («Қуёш ичганлар қўшифи») номи билан чоп этиради. Эркин (сарабаст) вазндаги бу шеърлар озарбайжонлик ёш шоирларда кучли таассурот қолдиради. Самад Вурғун, Акрам Жаъфарзода, Сулаймон Рустам, Микоил Рафили, Расул Ризо ва бошқалар унга эргашиб сарабаст шеърлар ёза бошладилар.

Нозим Ҳикмат шеърларининг Узбекистонда тарқалиши 1928—1929 йиллардан бошланди. Ўша даврда ёш ўзбек зиёлиларидан (ёзувчилар ва театр ходимларидан) бир гуруҳи Озарбайжонда таълим олган, баъзи бирлари командировкага бориб, озар шоирлари билан мулоқотда бўлган эди. Миртемир Озарбайжонга сафарини шундай эслайди:

<sup>92</sup> Б р ю с о в В а л е р и й . Вчера, сегодня и завтра русской поэзии. «Печать и революция». Кн. 7. 1922. С. 56—57.

«1929 йили Сотти Ҳусайн тўрт ёш ёзувчи учун саёҳат уюштирганлиги эсимда. Туркманистон тупроғидан ўтиб, Ҳазар денгизи орқали Бокуга бордик. Озарбайжон ёзувчилар уюшмасида аввало Сулаймон Рустам ва Миржалоллар<sup>93</sup> билан танишдик, шеърлар ўқишидик. Кейин Ж. Жабборли уйига бордик... Сулаймон Рустам «Аламдан нашъая» (1927) деган китобидан тақдим этди... «Коммунист» газетаси редакциясида бўлганимиз ҳам шу бугунгидек эсимда... Кетиш вақтида китоб дўконидан Нозим Ҳикмат қаламига хос «Гунаши ичанларнинг туркусин» китобини олдик»<sup>94</sup>.

1929 йили Н. Ҳикматнинг қатор шеърлари Миртемир, Шайхзода, Ҳ. Олимжон таржимасида «Аланга» ва «Ер юзи» журналларида эълон қилинди. Таржимонларнинг ўзлари ҳам сарбаст шеърлар ёздилар. Миртемирнинг «Шуълалар қўйнида» (1928) тўпламидаги бир қанча шеърлар шу усулдаги асарлар эди. Н. Ҳикмат шеърларининг журналларда пайдо бўлиши ва ўзбек шоирлари (Ҳ. Олимжон, Гайратий, Ш. Сулаймон ва бошқалар) ёза бошлаган қатор эркин шеърлари адабий танқид учун мунозара мавзуи бўлди.

Адабиётда бўлаётган бу қизғин изланишлар адабий танқиднинг эътиборини жалб қилмаслиги мумкин эмас эди. Арабнежад (А. Алавий) «Бизда шакл масаласи ва Нозим Ҳикмат» сарлавҳали мақоласида ўзбек совет поэзиясининг заиф жиҳатларидан бири шакл масаласи эканини айтиб, аruz ва ҳижо вазни (яъни бармоқ вазни) «оҳиста оқар вазнлар бўлиб, янги ҳаётдаги суръат ва ҳаракатни бера олишга қодир эмасdir. Шунинг учун бу вазнлarda берилмак исталган янги шеърлар «шакл ва мазмун зиддияти» билан хаста бўладилар»,— дейди. Унинг фикрича, бизнинг бу вазнларимиз жилдираб оқсан чашмани эслатади. Ваҳолонки, бу кунги ҳаётимиз долғали, пурсуръатdir. Бинобарин, шакл соҳасидаги изланишлар «шоирларимизни сарбаст шеърига томон итарди... Сарбаст шеърининг асосини ташкил этган ички динамика ва ритмиангламай, қофия ва вазнсиз, истаган жойда сатрни терадиган бир нав сочиқ жумлалар вужудга келди...». Қийин аҳвол рўй бериб турган бир шароитда «Озарбайжон адабиётida турк шоири Нозим Ҳикмат ўзининг шеъри билан май-

<sup>93</sup> Уша йилларда С. Рустам «Ганж қизил қаламлар» иттифоқининг масъул котиби лавозимида ишлар, Миржалол ана шу иттифоқ активларидан бўлган.

<sup>94</sup> Ўзбекистон маданияти. 1977. 14 январь.

донга чиқди ва бизда бу масаланинг ҳолига янги зиё тўкди»<sup>95</sup>.

Танқидчи Ҳомил Ёқуб «Ойбек ва унинг шеърлари» мақоласида шоирнинг ижодий жиҳатдан ўсаётгани, аввалги ҳазин, инжиқ оҳанглар энди ўйноқи мотивларга айланаштаганини мисолларда кўрсатиб давом этади: «Ойбек сўнгги чоқларда янги шаклда шеърлар ёзмоқда. Бундай шеърларга «козод шеър» (яъни, эркин шеър — М. Ю.) дейиладир. Озод шеър Олтой шеърларида таназзул шаклини олган. Ойбек энг яхши шаклларда ёзади»<sup>96</sup>.

Адабий танқидда эркин шеърни бошқа поэтик формаларга нисбатан осон деб тасаввур қиласидиган кишилар ҳам йўқ эмасди. Масалан, Анқабойнинг қарашига кўра эркин шеър усули «Техник жиҳатидан шоирлар учун унча қийин эмас. Фақат бу усулда сўзларнинг тузилиши ва тартиби тўғри келса бўлади. Эркин (вазнисиз) усулда шеър ёзувчилар кўп вақт ўзларини маълум бир рамка ичida ҳисобламаганларидан сўзнинг ҳар тарафлами яхши чиқиши ва ўтқир бўлишилиги устида ишлашга имконият топадилар»<sup>97</sup>.

Эркин шеър осон бадиий формаларданми? Йўқ, албатта. Бармоқ вазнида ёзилган шеърда мисралардаги ҳижолар сони баробар бўлиши, мисралар охиридаги сўзларнинг қофиядош экани, бандлар (строфалар) сони ҳам teng келиши, оҳанг бир маромда оқиши асосий шартлардан саналади. Сарбаст шеър эса ана шу қонуниятлардан четга чиқади. Бўғинлар сони бир хил бўлган вазн (ўлчов)дан, қофиялардан, бандлардан озод. Бошқача айтганда, традицион ҳисобланган компонентлар системасига нисбатан ўзини эркин тутади. Шу сабабли у эркин шеър. Ёки, шоир Миртемир таъбири билан айтганда, «нозимона шеър».

Таъкидлаш лозимки, сарбаст шеър қофия, туроқ, пауза (тўхталиб ўтиш) кабилардан бутунлай ҳоли эмас, фақат уларнинг тартиби бошқача. Бу форманинг ритмик вариантлари хилма-хил бўлиб, дафъатан назар ташлаганда, гўё ҳеч қандай тартиб йўққа ўхшайди. У истаган жойда мисраларни бўлиб ташлайдиган тарқоқ жумлалар йиғиндиси эмас. Чуқур ижтимоий мазмунни ифодаловчи, гражданлик пафоси жаранглаб турган овоз, ҳис-ҳаяжон, мисраларни юштирувчи оҳанг

<sup>95</sup> Аланга. 1929. 11-сон. 7—8-бетлар.

<sup>96</sup> Қизил Ўзбекистон. 1929. 16 август.

<sup>97</sup> Ёш ёзувчи — журналистлар алифбеси. Тошкент. 1931. 52-бет.

бор. Эркин шеърда сўзларни ритмик жиҳатдан тўғри уюштириш муҳим аҳамиятга эга. «Зинапояли» қилиб ажратилган сўзларнинг ҳар бирига катта маъно юклатилади. Интонация, ритм бу шеърда катта роль ўйнагани учун уни ритмик шеър деб ҳам атайдилар. Ритм уни ҳаракатга келтирувчи кучдир. Одатда шоир ўзи ифода қилмоқчи бўлган ғоявий мазмунни ритм билан узвий алоқада кўради. Эмоционалликни кучайтириш учун инверсиядан кенг фойдаланади ва «зинапоялар»га икки-уч сўзнигина эмас, ҳатто битта сўзни ҳам ажратиб таъкидлайди. Кўринадики, эркин шеър анча мураккаб санъат. Уни ўзлаштириш анча мушкул. Шакли осонга ўхшаса ҳам ўзи қийин, яъни саҳли мумтаниъ, яъни мураккаб содда ҳисобланадиган бу шеър Fafur Гуломнинг «Динамо» (1931), X. Олимжоннинг «Кўклам» (1929), Ш. Сулаймоннинг «Эрк куйлари» (1927), Миртемирнинг «Шуълалар қўйнида» (1928) каби илк шеърий тўпламларида ўзбек поэзиясига кириб, «гражданлик» ҳуқуқини олди. Адабий танқид бу жараёнга маддад берди.

Тажриба кўрсатадики, ўз ўрнида, мақсад ва мавзига мос қилиб, уқув билан ишлатилган ҳамма шакллар ҳам яхши. Шундай экан, арузни бармоқقا, бармоқни сарбастга қарши қўйиш ғайрииммий ҳодисадир. Йигирманчи йиллар шеъриятида традицион формалар ва янги шакллар қаторида сочма шеърнинг (шеърий прозанинг) Ҳамза, Ойбек, Миртемир, Ш. Сулаймон ва бошқа шоирлар ижодида қўллангани фикримизнинг далили, изланишларнинг давомидир. Сочма аниқ ва қатъий вазндан ҳоли, «қора» сўзда ёзиладиган, лекин таъсир кучи баланд шеър (наср). Сочманинг ўз қондлари, ўз вазнлари, ҳеч ким томонидан ёзилмаган қонунлари бор. Ундаги образлар, катта вазифалар юклатилган поэтик қочириқлар шоирдан катта меҳнат талаб қиласди. Сочма шоирнинг туйғу ва фикрлари тўлқинланиб, тошиб кетган вақтда ёзилади (Миртемир). Бироқ, сочма шеърият, кенгроқ олганда, поэзия доирасидан чиқиб кетмайди. Ҳамма бадиий асарлар (хоҳ назм, хоҳ наср бўлсин) кенг маънода поэзия тушунчасига киргани учун сочма ҳеч шубҳасиз поэтик асардир.

Йигирманчи йилларда сочмани (шеърий прозани) минбар адабиёти деб ҳам юритганлар. Аммо ҳамма сочма шеърлар ҳам (эҳтимол, бу соҳадаги тажрибанинг камлигидан бўлса керак) муваффақиятли чиқа берган эмас. Шунинг учун ҳам Юнус Латиф ёш ўзбек совет поэзияси ҳали етук кадрларга эга эмаслиги тўғ-

рисида сўзлагач, янги шакл яратиш устида олиб борилаётган изланишларни қисқача характерлаб: «Шо-кир Сулаймон минбар адабиёти билан ўртага чиқаркан, у узундан-узоқ, кишини зериктирадиган тарзда ёза бошлади. Миртемирнинг сочма асарлари техник жиҳатдан тузук бўлса ҳам, иқтисодсизлик кучлидир»<sup>98</sup>, — дейди.

Юнус Латифнинг айтгандарни ўша даврдаги аҳволни тўғри ёритганини орадан бир неча ўн йиллар ўтгач, Миртемирнинг ўзи ҳам тасдиқлаган эди: «Мен илгари сочмада кўп машқ қилганман. Ҳозир ҳам сочма ёзишни қўйганим йўқ. Лекин йигирманчи йиллардаги сочмалар ҳозиргидай эмас. Кўпроқ тескари жумла тузишга ҳаракат қиласадим у вақтларда. Гёё янгиликдай. Узлуксиз машқлардан кейин бу ожизлик эканини сезиб қолдим»<sup>99</sup>.

Иzlaniш ўз луғавий маъносига кўра ҳали қўлга киритилмаган, ўзлаштирилмаган нарсаларни излаш, қидириш жараёницир. Унинг оқибати ахтарилганни топиш ва ўзлаштириш билан тугайди. Йигирманчи йиллар ўзбек поэзиясидаги ғоявий-бадиий изланишлар, мундарижанинг шаклга мослиги йўлида бўлган коллектив ҳаракат яхши натижаларга олиб келди. Аллақачондан бери хизмат қилиб келаётган аруз, миллий шеъримиз — бармоқдаги ёрқин ва ўйноқи формалар қаторида эркин шеър (сарбаст), минбар адабиёти (сочма) ва оқ шеърлар новаторлик намуналари сифатида хизмат қилди. Кейин улар традиция бўлиб қолдилар.

\* \* \*

Йигирманчи йиллар прозаси қандай анъанавий заминда туғилиб, қандай жанрий изланишларни бошидан кечиргани ва адабий танқид унга нисбатан қандай муносабатда бўлгани тавсифига киришишдан олдин прозамизнинг ўтмишига бир назар ташлаб олиш тўғри бўлур эди. Илгариги насрый хазинамизда бизгача нималар мавжуд эди ва борлари ҳаракатда бўлганми ёки истеъмолдан бутунлай чиқиб кетганми? Буни аниқламай туриб, тўғри мулоҳаза юритиш мумкин эмас.

Ўзбек, қозоқ озарбайжон, тожик, қорақалпоқ, туркман совет адабиётларида аввало, «кичик проза» вужудга келиб, тажриба майдони вазифасини ўтади. Йигир-

<sup>98</sup> Еш ленинчи. 1928. 13 июнь.

<sup>99</sup> Ўзбекистон маданияти. 1974. 4 январь.

манчи йилларда профессионал прозаиклар — Айний, Абдулла Қодирий, Ҳусайн Шамс, Зариф Башир, Зиё Саид, Элбек ва бошқалар, шу жумладан, Ғафур Ғулом, Шокир Сулаймон, Ғайратий, Ҳамид Олимжон, Собир Абдулла, Чўлпон каби шоирлар ҳам ҳикоя ёздилар.

Шу нарса таажжубланарлики, ҳикоялар ёзувчиларнинг ижодий тажрибасида синовдан ўтган ва ўқувчилар яхши қабул қилаётган бир вақтда адабий танқидда бир-бирини рад этадиган турли-туман фикрлар баён қилинаётган эди. Кейинчалик ўзи ҳам қатор ҳикоялар ёзисб кўрган Зариф Башир 1922 йили: «Ёвропа адабиёт йўли билан бориш ўзбек адабиёти учун ғоят даражада зарар бўлғонлигидан ҳикоя ва романлар чиқиб, майдон олмасдан бурун уларнинг лозим бўлиб-бўлмоғонлиқлари, лозим бўлғонда қандай йўл билан боришлари кераклиги тўғрисида мусобақа ва мубоҳаса очиб, бир қарорга келиб қўймоқ вақтли матбуотнинг вазифаларидир»<sup>100</sup>,— деб ёзган эди.

Адабий жараён эса З. Башир шубҳаларига ўрин қолдирмай ҳикоячиликнинг истиқболини кўрсатаётган ва бадиий ижоднинг бу формаси ҳаётга сингиб бораётганидан далолат бериб турган эди. Абдураҳмон Саъдий бу мунозараларда қатнашар экан, ҳикоячиликка ижобий ёндашиб, шундай ёзди: «...Туркистон тупроғи Русия ижтимоий ўзгаришидан кейин шу оз фурсат ичida яна кўпгина шеърий кучларни қўзғатиб, тезлик билан ўстириб юборди... Кейинги бўйиллик шеърий адабиёти (баддий адабиёт — М. Ю.) умум ҳалқники бўлиш йўлида ўсадир... Ҳикоялар ва айниқса ҳажвий ҳикоялар ёзмоқда кўп усталиқ кўрсатувчи кучли ёш инқилобий ўзбек адаби Жулқунбой (А. Қодирий) ҳам шу олти йиллик даврда ўзбек шеърий адабиётининг бу ёқдан кўтарилишида катта бир омил бўла олди»<sup>101</sup>.

А. Саъдий совет адабиётининг ҳалқ оммасига яқинлашувида ҳикоя жанри алоҳида роль ўйнаётгани масаласига ҳам эътиборни жалб этади. «Замонга, вақтга мувофиқ қисқа-қисқа синфий, инқилобий ҳикоялар» майдонга келаётгани тўғрисида сўзлаб, Абдулла Қодирийдан кейин Мирмулла ҳикояларини характерлайди: «Бу адабнинг ҳикоялари айниқса руҳонийларга ҳам бойларга душманлик, йўқсил ва қашшоқларга, мазлумларга дўстлик ва марҳамат руҳи билан суғо-

<sup>100</sup> Б а ш и р З. Ўзбек адабиёти ҳам вақтли матбуот//Туркистон. 1922. 29 сентябрь.

<sup>101</sup> Туркистон. 1924. 21 июнь.

рилгандир. Мирмулла ҳикоя ёзишда яхши усталик кўрсатадир...»<sup>102</sup>.

А. Саъдий ўзининг «Амалий ҳам назарий адабиёт дарслари» китобида проза жанрларига таъриф беришга ва уларнинг чегараларини белгилашга интилади. Унингча, эпик асар ёки ривоя одамларнинг бошидан кечган, ҳақиқатда рўй берган воқеаларни, табиат ҳодисаларини акс эттиради. «Воқеий кўчириклар» (бўлиб ўтган ёки бадиий тўқима саргузаштлар — М. Ю.) ҳикоя ва роман исми билан иккига бўлинади. Улар ўртасидаги фарқ узунлик ва қисқаликда. «Ҳикоя бир ёки бир неча айрим воқеа ва ҳолларни тасвир қилиб кўчиришдан иборат. Ҳикоялар бир қаҳрамоннинг табнатан очиб беришга эришадилар. Ҳикоялар қисқа ҳам узун бўлиши мумкин»<sup>103</sup>.

А. Саъдий ҳикоя жанрини шу тариқа қисқача тавсифлагандан кейин ўзбек адабиётидаги дуруст ҳикояларга мисол тариқасида Абдулла Қодирийнинг «Улоқда», «Отам ва большевик», шунингдек, Чўлпоннинг «Ойдин кечаларда», «Йўл эсдалиги» асарларини, ниҳоят, Фитратнинг «Қиёмат»ини кўрсатади. Авторнинг фикрича, санаб ўтилган ҳикоялар шу жанрнинг барча хусусиятларини ўзида қамраган намуналардир.

Фитрат ҳам «Адабиёт қоидалари»<sup>104</sup> номли назарий характердаги ўқув қўлланмасида санъат ва адабиётнинг ўзига хос хусусиятлари, шакл ва мундарижа, услуб (стиль), шеърий вазнлар, фольклор ва ёзма адабиёт масалалари қаторида адабий жанрларга тўхтаб, ҳикоя тўғрисидаги мулоҳазаларини айтади. Муаллиф совет адабиёти учун илгариги баён услуби мувофиқ келмай қолгани тўғрисида гапирав экан: «Эски ёзувчиларимиз асарнинг бирлигини сақламоқчи бўлиб жуда ифротға тушар эдилар (тасвирни ҳаддан ошириб юборар эдилар — М. Ю.). Бир ҳикоя ёзғонда «аммо ровиёни ахбор ва ноқилони осон андоқ ривоят қилурларким...», — деб ҳикоя қаҳрамонининг туғилиши кунидан бошлаб ўлимига қадар бўлиб ўтган воқеаларни бир йўсинда бир турли қилиб қаторлаб тизар эдилар... Бундан қочмоқ учун ҳикоя, роман, достонларни турли кўринишлар, янги-янги фаслларда тузиш лозимдир»<sup>105</sup>.

<sup>102</sup> Ўша жойда.

<sup>103</sup> Амалий ҳам назарий адабиёт дарслерлари (ўрта мактаблар учун дарслер). Тошкент. 1924. 153-бет.

<sup>104</sup> Фитрат т. Адабиёт қоидалари (адабиёт муаллимлари ҳам адабиёт ҳаваслилари учун қўлланма). Самарқанд — Тошкент. 1926.

<sup>105</sup> Ўша жойда. 10-бет.

Олим Шарафиддинов: «Ўзбек адабиётида ғарб руҳидаги, ғарб шаклидаги ҳикоянавислик Абдулла Қодирйининг «Ўтган кунлар»и билан бошланади»<sup>106</sup>,— дер экан, кичик ҳажмдаги прозанигина назарда тутмай, кенг маънодаги қиссаҳонлик, воқеагўйлик усулини кўзда тутади. Ёзувчи традицион нақлчилик усулини четлаб ўтиб, давр тақозо қилган янги йўлдан борганини таъкидлайди.

Сотти Ҳусайн ёзади: «Ҳикоя турмуш ҳодисаларининг бирортасини тасвирлаб беради»<sup>107</sup>. Йигирманчи йилларда адабиёт назарияси яхшироқ ишланмагани ва адабий таңқид ва адабиётшунослик жанрлар хусусида умумий тўхтамга келмаган бўлишига қарамай, ўша йиллар савиясига кўра, ёзувчи ва ўқувчиларни чалғитадиган нотўғри фикрлар айтилмаган. А. Саъдий кичик ҳажмли эпик прозани «қисқа ҳикоя» деган бўлса, Фитрат ҳикояни ривоядан ажralиб чиқиб бир воқеани, ҳаётнинг биргина ҳодисаси ё бир киши саргузаштини тасвирлайди, деб кўрсатган ва С. Ҳусайн ҳикоя турмуш ҳодисаларидан бирини тасвирлайди, деган бўлса, уларнинг ҳар бири ибтидоий фикрлар бўлишига қарамай, хато эмас.

Биз шу давр матбуотини вараклар эканмиз, «бўлғон ҳикоя», «воқеий ҳикоя», «воқеий кичкина ҳикоя», «ҳикоя тарзида», «ҳикоя йўсинида», «маҳзун бир ҳикоя» каби, гўё шу жанрнинг ҳажмини, темасини, мазмунини аниқловчи ифодаларга дуч келамиз.

Бу — ўша вақтда таңқидда кичик насрый асарга таъриф топиш йўлидаги изланишларнинг аломатидир.

Октябрдан кейинги ўзбек ҳикояларида инсон тақдирига янгича ёндашиш, шахс ва жамият орасидаги муносабатларнинг ўзгаргани, шароит ва характер алоқалари ўз ифодасини топган. Газета ва журнallар саҳифаларида эълон қилиниб турган ҳикояларнинг бош қаҳрамони янги совет кишиси ва унинг инқилоб ғалабаларини мустаҳкамлаш йўлидаги жанговар кураши эди. Ҳикоянавислар эскилик билан янгиликнинг ҳаётмамот жангини, социализм идеалларининг ёрқин истиқболини кўрсатишга ўзларини сафарбар деб билдилар. Енгаётган социалистик воқелик уларга битмас-туганмас илҳом манбаи бўлиб хизмат қилди.

Ўзбек адабиётида ҳикоядан кейин майдонга келиб, шакллана бошлаган (адабиётшуносликда ўртача про-

<sup>106</sup> Ёш ленинчи. 1928. 8 февраль.

<sup>107</sup> Ҳусайн С. «Ўтган кунлар» ҳам ўтган кунлар /Шарқ ҳақиқати. 1929. 5 август.

закк эпик жанр деб юритиладиган) жанр **повестдир**. Агар повесть учун характерли белгиларни хотирга келтириб туриб, қадимдан адабиётимизда ишлатиб келинган қисса истилоҳига қиёс қилиб кўрсак, улар ўртасидаги ўхашаликни илғаб олиш қийин эмас. Худди бурунги (XII—XIII асрлардаги) рус термини «повесть» кенг маънога эга бўлиб, умуман айтиб бериш, сўзлаб бериш мафҳумларини ифодалагани сингари, қисса ҳам бизда узоқ давом этадиган саргузаштларни айтиб беришини, нақл қилишни назарда тутган. Рус адабиётидаги «Повесть временных лет», «Повесть о нашествии Батыя на Рязань» каби асарларни тилга олганда, хаёлнимизга «Қиссан Рабғузий», «Қиссан Сайфулмулук»лар келади. «Повествователь» ва «қиссаҳон» сўзлари ҳам эгизакдек туюлади.

Алишер Навоий «Сабъаи сайдир»да устозларининг Баҳром тўғрисидаги достонларида етти иқлим подшоҳининг қизларини унга афсоналар айтиб берганларини ғайритабиий ҳисоблаб, «Қиссаҳон қизлари магар эдилар?» — дейди.

Қисса ва қиссаҳон сўзлари кейин ҳам кўп қўлланган.

Баъзи фактлар повесть адабий жанрнинг номи сифатида асримизнинг бошидаёқ маълум бўлганини кўрсатади. Масалан, Сирдарё область ҳарбий губернаторлиги томонидан Абдулла Авлонийга «Шуҳрат» газетасини чиқариш учун 1907 йил 9 ноябрда алоҳида рухсат—гувоҳнома берилади. Гувоҳномада ҳафтада бир бор чиқарилиши мўлжалланган газетанинг программаси (ёритилажак материаллари) тасдиқланганда адабий маҳсулотлардан фельетон, повесть, ҳикоя ва шеърлар, шунингдек, адабиётга оид танқидий ва библиографик мақолалар босилиб туражаги айтилади<sup>108</sup>. Биз ана шу ҳужжатга қадар повесть сўзини матбуотда учратмаймиз.

Ўзбек адабиётшунослари ва танқидчилари йигирманчи йилларнинг биринчи ярмидаёқ повестга ўзлари тушунганча таъриф беришга уриниб кўрадилар. Бунинг сабаби бадий тажрибада (ўтмиш ва ҳозирги замон мавзууда) юзага келган ҳамда повесть тушунчасига кирадиган Ҳамзанинг «Янги саодат» (1915), «Учрашув» (1916), Айнийнинг «Хонадони хушбахт» («Бахтиёр оила», 1917), «Бухоро жаллодларининг ўзаро мусоҳа-

<sup>108</sup> А. Авлонийнинг ЎзССР Социал-таъминот министрлигига сақланаётган «Шахсий пенсионерлар»нинг 1942 рақамли делоси.

балари» (1922), «Одина» (1924) асарлари ва улардан кейин яратилган «Ҳайит ҳаром бўлди» (Боту), «Қулбобо» (Айний) ва бошқа қатор адабий фактлар эди. «Янги саодат», «Бахтиёр оила» ва «Бухоро жаллодлари» бир томондан каттароқ ҳажмли замонавий реалистик проза — повесть яратиш йўлидаги янги ҳодиса бўлса, иккинчи томондан баён услубидаги баъзи жиҳатлар ва умумий мазмундаги дидактикага мойиллик билан ўтмиш анъаналарига бориб уланади. «Одина» бош қаҳрамон тасвиридаги руҳий маъюсликдан қатъи назар автор ижодидаги янги ютуқ эди.

А. Саъдий тушунчасида повесть — «роман даражасида катталик ололмаган узун ҳикоя»<sup>109</sup> дир. Элбекнинг «Қушчи Турғун» (1925) асарини Фитрат ҳам узун ҳикоядир<sup>110</sup>, — дейди. Маълум бўладики, кекса авлодга мансуб танқидчи ва адабиётшунослар повесть таъбирини кам қўллайдилар. Сотти Ҳусайн «Ўтган кунлар»га бағишиланган мақолалар туркумида (бу мақолалар кейин қайта ишланиб, алоҳида китоб ҳолида нашр этилган) повесть ҳажмини белгилаган бўлиб, ёзади: «Повесть ҳикоядан юқори, романдан кичик бўлиб, ҳодисаларнинг ҳикояга қараганда катта расмини олади»<sup>111</sup>.

Келтирилган фикрлардан повесть деганда ҳикоя билан роман оралиғида турган, тасвир объектив бўлган воқеалар ҳикояга нисбатан кенгроқ ва персонажлар сони кўпроқ жанр англашилади. Лекин «узун ҳикоя» таъбири жанрнинг сюжет доирасини белгилай олмаган. Зотан, бу мураккаб масала эди. У даврни қўя турайлик, повестнинг ҳажми ҳамон мунозараликку. Агар адабиётлар тарихига назар ташласак, ҳатто санъаткорларнинг ўзлари ҳам асарларининг жанрини белгилашда иккиланган ёки аслидан бошқачароқ ном билан атаган вақтлари бўлган.

Масалан, А. С. Пушкин 1822 йил 29 апрелда Н. И. Гнедичга ёзган хатида «Қавказ асири»ни нашр этишни ундан илтимос қиласар экан, асарга хоҳлаган номни қўйишига — поэмами, шеърий эртакми, повестми деб аташга ижозат беради. «Белкин повестлари»ни новелла жанрига киритиш мумкин бўлгани ҳолда Пушкин повесть сўзини қўллади. Эпопея характеридаги «Клим Самгиннинг ҳаёти»ни М. Горький «повествование» деб

<sup>109</sup> Амалий ҳам назарий адабиёт дарслклари. 153-бет.

<sup>110</sup> Адабиёт қоидалари. 116-бет.

<sup>111</sup> Шарқ ҳақиқати. 1929. 5 август.

номлайди. Кўринадики, санъаткорлар ҳар қайси жанрнинг ўзига хос хусусиятларини, худди адабиёт назариясидаги сингари, қатъий ҳисобга олиб ўтиргмаганлар.

«Ўзбек «кичик проза»сининг бошланғич манбалари ҳозирги терминология билан алоқадор бўлган ривоя (ривоят), ҳикоят тушунчалари эканини, бугунги повестга яқин қисса сўзи ишлатилганини айтдик. Ҳўш, романни ифодаловчи аниқ бир таъбир бўлганми? Маълумки, Европа ва рус адабиётидаги каби умумлашган бир атама бизда бўлмаган. Бундан инқилобгача бўлган ўзбек, тоҷик, туркман адабиётларида катта эпик асарлар учун характерли бўлган архитектоника (бадиий обидаларнинг таркибий қисмлари — композиция, образлар системаси, ҳаётий жараённи кўрсатувчи уларнинг муносабатлари, воқеалар силсиласи, эмоционал тасвирий воситалар ва бошқа элементларни бирлаштириб бир бутун қилиб турувчи тузилиши маълум эмасди) деган хулоса келиб чиқмайди.

Катта ҳажмли эпик асарларнинг тадрижий такомили диққат билан кузатилса, бу борада ҳам муайян илдизлар борлигини пайқаш қийин эмас. Ёзуучи Асқад Мухтор айтганидек, «Биринчи ўзбек романлари қаердан пайдо бўлди? Гарчи яширин имкониятлар ҳолида бўлса-да, қандайдир традициялар бўлганми? Шубҳасиз бўлган... Масалан, ўзбек эпосида «роман» жанрига хос қўп планлилик, халқ ҳаракати, омманинг тақдирни, кучли характерлар, турмушнинг кенг манзараси, мураккаб сюжет чизиқлари, прозаик тафсилотлар, деталлаштириш сингари асосий компонентлар бўлган»<sup>112</sup>.

Дарвоҷе, халқ оғзаки бадиий ижодининг ўлмас намуналари «Алпомиш», «Кунтуғмиш», «Ширин билан Шакар», «Зулғизар ва Авазхон»ларнинг ҳар бири бир эпик асар бўлиб, уларда романга мансуб кўп хусусиятлар мавжуд. Ёки Навоий достонларини олайлик. Биз уларни сўз орасида кўпинча «шеърий роман» деб айтамиз-ку! Демак, «шеърий роман» мағҳумини қўллагандан, биз асосан, «Хамса»даги достонлар фақат шеърий асарларгина эмас, балки айни бир вақтда идеалдаги романтик воқеаларни, шунингдек, шоирнинг ўзи гувоҳ бўлган реал воқелик ҳамда одамларни романда тасвирлагандек кенг планда ва мураккаб ҳаётий коллизияларда тасвирлашини кўзда тутамиз. Демак, Навоий ижодида ҳам «роман тафаккур» унсурлари мавжуд.

<sup>112</sup> Асқад Мухтар. О молодежи и традициях//Звезда Востока. 1960. № 3. С. 110.

Маълумки, Белинский романни «янги замоннинг эпоси» деб атаган. Романнинг жанр сифатида ўз спецификасини рад этмаган ҳолда, бизнинг қадимий қисса ва достонларимизда романга хос кўпгина хусусиятлар мавжудлигидан ҳам кўз юмиш мумкин эмас.

Ўзбек адабиётида XVIII асрнинг иккинчи ярми ва XIX асрнинг бошларида диққатга сазовор бир янги тенденция сезилади. Форс-тоҷик тилидаги тарихий йилномалар, баъзи таzkиралар, айрим бадиий асарларни ўзбек тилига таржима қилиниш жараёнида оригиналдаги ифода мураккаблиги ва тасвирдаги тумтароқлик ўзбек-часида анча соддалаштириб, сингишли қилиб берилади. Навоий достонлари ва бошқа катта достонларни проза йўли билан қайтадан ёзиш, тўғрироғи, ихчамлаштириб прозага кўчириш ҳодисалари учрайди. Бизнингча, бу назмни насрга айлантирувчи мусаннифларнинг шахсий ташаббуси натижасигина бўлмай, давр талаби ҳам эди. XVIII—XIX асрга келиб ўзбек адабий тилининг ички тадрижий такомилида сезиларли ўзгаришлар рўй берди. Олдинги асрларга нисбатан тилдаги араб-форс элементлари камайиб, туркий тил ҳалққа яқинлаша бошлади.

Навоий ва ундан кейинги давр шоирлари асарларнинг тили XIX аср охири ва XX аср бошларидағи оддий китобхонларга оғирлик қилиб қолди. Соддалаштирилган насрый тил эса аҳолининг турли қатламларига осон тушунилар эди. Бинобарин, Хоразм шоирни Умар Боқий «Ҳайратул аброр»дан бошқа достонларни «Қиссаи Фарҳод ва Ширин», «Қиссаи Лайли ва Мажнун», «Қиссаи ҳафт манзари Баҳром» номлари остида «авомуннос (оддий ҳалқ — М. Ю.) ҳам баҳра олармикин»,— деган ниятда насрый баён қиласиди. Ҳеч шубҳа йўқки, бундай тажрибалар катта ҳажмдаги прозага хос билим ва малакаларни оширишда, романга тайёрлик кўришида ижобий роль ўйнаган.

Ўзбек совет адабиётида «роман» сўзини бадиий прозанинг бир шакли тарзида биринчи марта Ҳамза Ҳакимзода ишлатади. Аввалги саҳифаларда тилга олга нимиз «Янги саодат ёхуд миллий роман», яна «Ишқ» номли роман шундан далолат беради. Ўз-ўзидан гуշунарлики, бу «роман»лар янги даврда қатъий бир термин сифатида қабул қилинган жанр талабларига (яъни алоҳида шахслар тақдирни орқали тасвирланадиган ва ижтимоий қимматга эга бўлган воқеаларнинг бўлиши, кўп планлилик, кучли характерлар тўқнашуви, конфликтлар кескинлиги, образларнинг руҳий ҳолатини

реалистик равища кўрсатувчи чуқур психологизм, ҳаётнинг муайян даврдаги кенг манзараси чизилиши, миллий хусусиятларни ёрқин акс этириш орқали умумбашарий аҳамиятга эга томонларни очиш ва бошқаларга) ҳали тўла жавоб беролмасди. Улар кўпроқ оиласидан маший ҳаётни ва янгича муҳаббат (Назокат ва Олимжон севгиси ва оила қуриши) саргузаштларини ижтиёмий масалаларга боғлашга ҳаракат қилган ҳолда тасвирлаган.

«Янги саодат»га «Миллий роман» деб сарлавҳа қўйган Ҳамзанинг ўзи асарнинг сўз бошисида уни рисола деб атайди: «Бу рисола мактабга маҳсус бўлмай, балки қора ҳалқимизнинг эр ва хотинлари орасида ўқилиб турган... хурофий ва ахлоқни бузадиган асоссиз китоблар ўрнига қўйилган». Китобхонларга ва «соҳибут таҳрир»лар, «вал қалам қоръинлар»га мурожаат этиб, рисолада учрайдиган ифода ва услубдаги нуқсонларни «лутф-шафқат юзасидан» кўрсатишларини илтинос қилади: «Чунки бу рисоланинг иккинчи табъларида ёхуд қўлимда ёзилиб турган ва ёзилган рисолаларимни нуқссиз ўлмоғига шояд сабаб бўлур эдилар...»<sup>113</sup>, — дейди. Келтирилган фактлардан маълум бўладики, Ҳамзада роман ёзишдек катта мақсад бўлгани ва бу ишга амалий равища киришгани ҳолда истилоҳ тўғрисидағи фикри қуюлиб етмаган ва бу жанрининг барча таблабарини мукаммал тасаввур қила олмаган.

Роман жанрини рус ва Европа реалистик романлари маъносида тўла тасаввур қилган ва ёзган асари ана шу жанр хусусиятларини ўзига қамраб олган ёзувчи ўзбек романининг отаси Абдулла Қодирй бўлди. У биринчи ўзбек реалистик романи «Ўтган кунлар»га ёзган кириш сўзида деган эди: «...Ёзмоққа ниятланганим ушбу — «Ўтган кунлар» янги замон романчилиги билан танишмоқ йўлида кичкина бир тажриба»<sup>114</sup>. Бу «кичкина тажриба» оқибатда фақат ўзбек прозаси учун эмас, Ўрта Осиё ва Қозоғистон реалистик романчилиги учун дастлабки ибрат мактаби бўлиб қолди. Ҳар ҳолда, «Ўтган кунлар», биринчи навбатда, «Ўзбек адабиёти, санъати ва маданияти тарихида тўнғич новаторлик ҳодисаларидан бири, чин янгилик, ҳақиқий «янги сўз» эди. Абдулла Қодирй ўзининг бу асари билан реализм йўлида «довон ошади» ва унинг ижодида бундан кейин

<sup>113</sup> Ҳамза Ҳакимзода. Янги саодат ёки миллий роман (1915). ЎзССР ФА Шарқшунослик институти. Ҳамза фонди. инв. № 7628. 2-бет.

<sup>114</sup> Инқилоб. 1923. 9—10-сонлар. 19-бет.

бўлган ҳамма ижобий ўзгаришлар шу «Ўтган кунлар»да реализм методини эгаллаш юзасидан эришган ютуғининг ривожи бўлиб қолади»<sup>115</sup>.

Бадиий тажрибада роман жанри ўзбек адабиётида гражданлик ҳуқуқи олгандан кейин адабий танқид ва адабиётшунослик намоядалари «Роман нима?» деган масала атрофида фикр юрита бошладилар. Билдирилган фикрлар қанчалик содда, ибтидоий бўлишига қарамай, романнинг асосий ташқи белгиларини аниқлаш хоҳиши сезилади. Танқидчи ва адабиётшунос Абдураҳмон Саъдий ёзади: «Роман ҳикоядан кўп узун, кенг, тўлиқ ҳам унда тасвир этилган воқеалар кўп қатламлик бўладир. Романларда қаҳрамоннинг бутун умридаги ёки умрининг кўп улушидаги воқеа ва ҳоллари ўзининг теграсидаги кишилари билан тасвир қилинади. Уларда бош қаҳрамоннинг эргашувчилари ҳам бўлади...»

...Роман бир жамоадаги кишиларнинг ҳамма қатламларининг турмушкини суратлантирадир. Қисқаси, ул бир ёки бир қанча қаҳрамон орқали бир жамоадаги чин турмушни олишга интилади. Мана шунинг учун роман тафсилий бўладир...»<sup>116</sup>.

Автор, аввало, романнинг ҳажмини аниқлаб олади. У узоқ ҳикоя қилишга мўлжалланган, кўлами кенг, воқеалар системаси тасвирида кўп планлилик мавжуд бўлган катта эпик асар, дейди. Кейин романнинг сюжети бош қаҳрамон саргузаштлари атрофида ривожланиб, қаҳрамон характерининг тобланишида «унинг теграсидаги кишилар»нинг роли ҳам борлиги, роман тафсилий асар бўлганидан унда жамиятдаги кўпчилик ижтимоий табақа вакиллари ҳаёти ҳам акс этажагини, у албатта «чин турмуш» — реалистик ҳаёт бўлиши лозим экани таъкидланади.

А. Саъдий романлар мавзуи ва мундарижасига кўра ҳар хил: реалистик, фантастик, психологик, тарихий бўлади дер экан, айни вақтда улар воқеликнинг фотографияси, балки ёзувчи идроки ва илҳоми орқали сузиб берилган, аслидан фарқ қиласидаги эмоционал воқелик тарзида баҳолайди. Агар роман ҳаётдан нусха кўчирса, воқеалар ҳам, шахслар ҳам «фотограф олган расмлар даражасида бир қимматга молик бўлур эди. Шунинг билан бирга романнинг санъаткорлиги ҳам бўлмас

<sup>115</sup> Иzzat Султон. Асарлар. Тўрт томлик. 2-том. Тошкент. 1972. 364-бет.

<sup>116</sup> Саъдий Абдураҳмон. Амалий ҳам назарий адабиёт дарслари. 153—154-бетлар.

эди»<sup>117</sup>. Романнавис ҳаётни бўямасдан тасвирлаб, ижобий, етакчи тенденциялар қаторида салбий ҳодисаларни ҳам тасвирлаши ва уларни ишонарли қилиб кўрсатиш учун тип яратиши керак ва ҳоказо.

А. Саъдийдан бир оз кейин бошқа адабиётчилар ҳам роман баҳсига қўшилади. Унингча: «Ҳаётнинг белгили бир даврини кенг суратда тасвир этиб ёзилган асарга роман дейилади... Романда асарнинг қаҳрамони ё қаҳрамонлари қайси замонда, қайси муҳитда, қайси жамиятда яшаган бўлсалар, шуларнинг урф-одат, қонун, тилак, ҳавас-орзу, камчилик, ахлоқ-эътиқодлари ингичка ҳам кенг суратда тасвир этиладир... Адабиётнинг энг оғир ва энг қийин шуъбаси ҳам роман ёзмоқдир»<sup>118</sup>.

Келтирилган кўчирмадан шу нарса аёнки, муаллиф романни жуда қисқа таърифлайди. Унинг ҳажми катта экани, қаҳрамонлари бирдан ортиқ бўлиши мумкинлиги, улар конкрет замон, жамият ва муҳитда кўрсатилиши шарт экани, ниҳоят, жамият аъзоларининг ҳаёт асослари, урф-одати, идеали чуқур акс эттирилган бўлиши шартлиги айтилган, холос.

Иигирманчи йилларнинг охирига келиб Сотти Ҳусайн «Ўтган кунлар»ни анализ қилиш жараёнида прозаик жанр сифатида роман бошқа адабий асарлардан нима билан ажралишини тушунтиришга ҳаракат қиласди: «Роман ўзи нима?.. Шеър, ҳикоя, повесть ва ҳоказодар каби роман ҳам адабиётнинг бир навидир. Романчилик адабиётда жуда эркин бўлиб, ўз ичига бошқа адабий жанрларни ҳам оладир... Роман ўзининг олдига аҳамиятли ижтимоий бир масалани қўйиб ҳал қиласди. Ёки бирор даврни ўз ичига олиб, қўйган мавзунинг мазмунидан четлашмасдан, уни кенгайтириб-кенгайтириб, натижада бир бутунликка олиб чиқади»<sup>119</sup>.

С. Ҳусайн давом этиб, роман воқеаларини ҳикоя қилиб ўтиромай образлар орқали кўрсатади, айниқса, образларнинг «руҳий кечинмалари ва сезгилари»нинг тасвирланиши китобхон учун «катта аҳамиятга моликдир»,— дейди. Унингча, қаҳрамоннинг «бошидан кечиражак, руҳий ҳолатлари бирор синфининг ёки айрим ижтимоий гуруҳнинг руҳини англашади». Романчиликда йўллар, усуслар турлича бўлиб, улардан фойдаланиш ёзувчининг дунёқараши ва режасига боғлиқ. Танқидчи

<sup>117</sup> Уша асар. 154-бет.

<sup>118</sup> Адабиёт қоидалари. 117-бет.

<sup>119</sup> Ҳусайн С. Ўтган кунлар. Тошкент—Баку. 1931. 10—11-бетлар.

романлар мавзуига ва материал мазмунига қараб психологик, социал-маиший, ижтимоий турларга бўлининини айтади.

С. Ҳусайн «Ўтган кунлар» муносабати билан тарихий роман устида ҳам гапиради: «Тарихий роман деб нимага айтамиз? Маълумки, тарихий романчилик умуман романчиликдан жуда ажралмаса-да, қисман фарқ қиласди. Тарихий романнинг ёзувчиси ўзи яшаб турган вақтдан узоқ ўтмишдаги тарихий ҳодисалардан олиб ёзадир... Баъзи романлар тарихий ҳақиқатларга яқинроқ ёндашсалар-да, баъзилари узоқ бўлади»<sup>120</sup>.

«Бундан ташқари,— дейди танқидчи,— адабий асарлар объектив ва субъективга бўлинади». Агар романнавис айтмоқчи бўлган бадиий мақсадини ҳақиқатга яқин ва ишонарли қилиб тасвиrlаса — объектив, ўз идеалларни ҳақиқатга яқинми ё узоқми эканига эътибор бермай ёза берса — субъективдир. С. Ҳусайн шу фикрлардан келиб чиқиб, Абдулла Қодирий «Ўтган кунлар»да буржуа тарихчиси Ж. Зайдонга эргашиб, тарихни идеаллаштириб, субъектив равишда тасвиrlайди, деб ноҳақ айблайди.

Рисолада ёзувчи тарихий воқеаларни кўрсатишда тарихчи бўлиб кетади, дейилади-ю яна шу ернинг ўзида тарихий воқеаларни айнан кўрсатмаганлиги айтилади. Романда иштирок этувчи кишилар танқидчи наздида образ эмас, «асосан бир-бирига қарши қўйилган идеаллар»дир. Унга образлар, жойлар, нарсалар тасвиридаги (бадиий асарнинг муҳим шарти бўлган) деталлаштириш ёқмайди. Аммо ёзувчининг «тасвир қуввати кучли» бўлиб, ўқувчидаги «ҳаяжонли туйғулар қолдириши»ни, табиат тасвири, тили жозибадор эканини тан олмасликка иложи қолмайди.

Шунга қарамай, романнинг оригиналгини шубҳа остига олади: «Абдулла Қодирийнинг биринчи тажриба... тарзида ёзган романи бу қадар янгилик билан майдонга чиқуви қизиқ бўлиб кўринади. Биринчи марта ёзилган ва ўзбек адабиётида биринчи кўринган «Ўтган кунлар»ни бундайин ишланган приёмларда ёзилган бўлуви учун ўқувчиларимиз таҳсил қилишади...»<sup>121</sup>. С. Ҳусайн тушунтиришича, ёзувчи Европа романларини ўқиб, техникасидан фойдаланган, Ж. Зайдон таъсирида бўлган, приёмларини ўрганган, тақлид қилган. Бошқача қилиб айтганда, Сотти Ҳусайн ўзбек адабиётида роман

<sup>120</sup> Уша жойда. 12-бет.

<sup>121</sup> Уша жойда. 76—77-бетлар.

жанри туғилганини тан олади (романга бутун бир туркум мақолаларнинг бағишланиши бу ҳодисанинг катта аҳамиятга эга эканини кўрсатар эди), аммо бу воқеага муносиб баҳо беролмайди.

Миён Бузрук романга бутунлай бошқача ёндашади. Унинг фикрлари ҳақиқатга анча яқин. «Ўзбек янги адабиётининг ҳали йўртмачоқ ҳолда бўлганини айтишга ҳожат ҳам йўқ. Айниқса романчиликда ҳеч бир турли ҳозирлиги ва тажрибаси йўқдир. Ўзбек адабиётида роман жиҳатидан таржимачилик ҳам сўнг замонгacha бошланмаган эди... Демак, янги адабиёт табиатни тасвир қилувчи асрий романчиликда (Европа тилидаги романчиликда — М. Ю.) ҳеч ҳозирлик, ҳеч тажрибаси бўлмаган эди. Ўзбек адабий вазияти бу даражада бўлган замонда Жулқунбойнинг оригинал бўлган «Ўтган кунлар» романни чиқди...»<sup>122</sup>.

Абдулла Қодирий «Ўтган кунлар» ва ўтган кунлар танқиди устида баъзи изоҳлар»<sup>123</sup> номли мақоласида С. Ҳусайн танқидида ноўрин айтилган қатор жиҳатларга жавоб беради. Адаб муомаласига риоя қилган ҳолда, ўзига «ғариброқ туюлган бир неча нуқталар устида изоҳлар» берар экан, тасвир услуби билан алоқадор бўлган ва танқидчи айبلاغан «дидактика усули» масаласига тўхтайди. «Бунинг сабаби: «Ўтган кунлар»нинг оммәмизнинг савиясига қараб ёзилишидадир». Дурустроқ маълумотга эга бўлган халқ оммаси ўрта аср услубида ёзилган «достон ва ҳикоялар билан озиқланиб» келганини ҳисобга олиб, Европа ва рус романларига хос «сўнгги приём»ни тўла қўлламаганини айтади ёзувчи. ««Чойхонада ўтирган таниш бир деҳқондан,— деб ёзади Абдулла Қодирий — «Мулла ака, шу Кумуш бибининг китовини («Ўтган кунлар»ни демоқчи) хўб ёзгансиз-ку, бироқ баъзи ерида гапни худди чови аралаш ушлайсиз-да, тушуниб олгунча энка-тенкамиз чиқади-да!» — деб «сўнгги приём» дан шикоят қилганини эшитган эдим».

Демак, халқ кўпдан ўзига таниш ва тушунарли бўлиб қолган «ровийлар андоқ ривоят қилурларким...» тарзидаги баён услубига ва воқеалар кўчимидағи: «Бу ҳодисотлар баёни шу ерда турсин, эндиги гапни фалончидан эшитинг...» каби сюжетдаги эпизодларни улайдиган изоҳларга ўрганиб кетганидан тўғридан-тўғри баён ғайритабиий туюлган. Буни аввалдан ҳис этган

<sup>122</sup> Шарқ ҳақиқати. 1929. 1 апрель.

<sup>123</sup> Шарқ ҳақиқати. 1929. 12 ноябрь.

Абдулла Қодирний «... бир фаслни тамом ташлаб ўтар эканман, «фалон ҳолни бундан сўнгги фаслларнинг бирида ўқирсиз» каби сўз билан ўқувчига таъминот бериб қўйишгача мажбурият сезар эдим»<sup>124</sup>, — дейди.

Шу тариқа янги давр реалистик романчилиги ўзининг илк босқичида анъанавий тасвир услубидан мутлақо воз кечолмай халқа яқинлашган. «Сўнгги приём» эса секин-аста етакчи мавқени эгаллаган.

«Ўтган кунлар» ўзбек адабиётида Европада тушунилганидек, ҳақиқий реалистик роман бунёдга келганинг далили эди. Адабий танқидда шу ҳақиқатнинг тасдиқ топиши танқид жанрининг анча балофатга етгани аломатидир.

\* \* \*

Ўтмишда ўзбек адабиётида ёзма реалистик драма тажрибаси бўлмагани бу турнинг совет давридаги шаклланиш жараёнида бир қатор қийинчилликларни туғдирди. Ўзбек совет драматурги саҳна санъатини эгаллаш учун дастлаб драма техникасини билиши, замонавий мавзулардаги ҳаётнинг муҳим проблемаларини томошабин ҳукмига олиб чиқиши, кучли характерлар тўқнашувидан юзага келадиган кескин конфликтлар яратиши, мантиқан бир-бирига уланадиган, саҳнадаги воқеаларни ҳаракатга келтириб турувчи диалог ўйлаб топиши, қаҳрамонларнинг психологик кечинмаларини бериши, ягона талабга жавоб берадиган саҳна тилини ишлаши зарур эди. Драманинг таркибий қисмлари ҳи, собланадиган бу компонентлар илгари бизда ишланмагани туфайли нотаниш йўлларни босиб ўтишга тўғри келди. Бу борада, биринчи навбатда, рус классик ва совет драматургияси, шунингдек Европа драматургияси ёрдамга келди. Улардан кўпгина асарлар ўзбек тилига таржима қилиниб саҳнага қўйилди.

Маълумки, ўзбек халқи драматургияси асрлар давомида, ҳатто XX аср бошларигача оғзаки пьесалар шаклида ҳукм сурди. Бироқ ислом идеологияси ўз ҳукмронлиги давомида театр санъатининг ривожланишига гов бўлиб келди. XIX асрнинг охирларида ўлкада рус фуқаросининг кўлайиши Туркистонда театр трупларининг пайдо бўлишига, Тошкентда биринчи професионал театрнинг (1877) ташкил этилишига сабаб бўл-

<sup>124</sup> Уша жойда.

ди. Иқтисодий, сиёсий ва маданий ҳаётдаги ўзгаришлар, маърифатпарварлик ғоялари билан майдонга чиққан жадидлар ғоявий позициясидаги ёзувчилар ҳаракати европача драматик асарларнинг пайдо бўлишига олиб келди: Масалан, Беҳбудийнинг «Падаркуш» (1911—1913) пьесаси бу соҳадаги биринчи асар...»<sup>125</sup> ҳисобланади.

Шундан кейин Ҳамза, А. Бадрий, Нусратулла Қудратулла, Абдулла Қодирий, Ҳожи Муин, Абдулла Авлонийлар қатор саҳна асарлари яратиб, ўз имкониятларини синаб кўрдилар. Айниқса, Ҳамза профессионал драматург сифатида замонавий ва тарихий мавзуларда пьесалар ёзишни давом эттири ҳамда драматургияга асос солди.

Ўзбек драматургияси ривожининг Ҳамзадан аввалги ва Ҳамза гувоҳ бўлган босқичида «Падаркуш» (Беҳбудий), «Бахтсиз куёв» (А. Қодирий), «Мазлума хотин» (Ҳожи Муин), «Заҳарли ҳаёт» (Ҳамза), «Финак» (Авлоний) сингари асарларда маърифатпарварлик ғоялари ташвиқ қилинади ва турли кўринишдаги жаҳолат, диний фанатизм танқид қилинади. Шуни ҳам айтиш лозимки, бу пьесалар ғоявий-бадиий жиҳатдан қандай нуқсонларга эга бўлмасинлар, ўзбек драматургиясининг сўнгги ривожига туртки бўлиб хизмат қилдилар.

Ўзбек совет адабиётининг ilk даври ва йигирманчи йиллар театр санъатининг жонланиб кетган даври ҳисобланади.

Драматургиянинг туғилиши ва ривожи адабий танқиднинг маълум даражада эътиборига сазовор бўлди. Бу даврдаги вақтли матбуот саҳифаларида рус ва бошқа қардош халқлар адабиётида шуҳрат топган спектакллар Тошкент, Самарқанд, Бухоро каби шаҳарларда кўрсатилганидек, маҳаллий авторларнинг пьесалари ҳам саҳналаштирилгани системали равишда ёритиб борилди. 1919, 1923 ва 1925 йиллари кўрсатилган У. Ҳожибековнинг «Аршин мололон» опереттаси; 1920 йили «Турон» саҳнасига қўйилган Урдубодунинг «Андалуснинг сўнгги кунлари», шу йили татаристонлик артистлар олиб келган «Хўжа ва приказчик» комедияси; 1923 йили Қозондан келган труппа томонидан ўйналган К. Тинчуриннинг «Сўнган юлдузлар» пьесаси ҳамда Хуршид таржимасида саҳналаштирилган Ҳусайн Жовиднинг «Шайх Санъони»; 1926 йили Москва артистлари ижросида томошабинларга ҳавола этилган «Ревизор» ва

<sup>125</sup> Ўзбек Совет Энциклопедияси. Тошкент. 1973. 4-том. 124-бет.

бошқа ўнлаб театр томошалари ўша давр маданий ҳаётида муҳим воқеа бўлди.

Булар кетидан ўзбек совет драматургиясининг оригинал асарлари майдонга келди. Бу йўлда ҳозирги замон драматургияси ва саҳна санъати устаси Ҳамзанинг «Бой ила хизматчи» ҳамда бошқа асарлари, айниқса унинг умумий фаолияти foят катта роль ўйнайди. 1939 йили танқидчи Сотти Ҳусайн шундай ёзган эди: Ҳамза «театрни кенг халқ оммасига тез яқинлаштириш учун ўз асарларида кўпроқ ўзбек халқ театри материалистидан халқ ўйинлари, қизиқчилик, ажойиб эртаклардан кенг суратда фойдаланди... Оғир саҳна шаронтида режиссёр, актёр, ёзувчи бўлиб ишлади. Ҳамза социалистик реалистик, революцион романтик хусусиятларни, бошлангич даражада бўлса-да, бирлаштира олган ёзувчидир... Ҳамзанинг саҳна тили бобида биринчи марта қилган ишлари ҳозиргача ўз қимматини сақлайди...»<sup>126</sup>.

Ил сайин кўпайиб бораётган саҳнавий адабий маҳсулот танқидий мулоҳазалар учун бой озиқ берар эди. Навбатдаги вазифа драматургия жанрларининг асосий белгиларини аниқлаб олиш, уни ижтимоий-тарбиявий бурчи ва гоявий эстетик аҳамияти томонидан баҳолаш, тажрибада рўй бераётган хатоларни тузатишга ёрдам бериш, ютуқларни қўллаб-қувватлаш эди.

Ўзбек драматургияси ривожининг ilk босқичида яна бир танқид — «офзаки танқид» ёки (ҳозирги кунларда адабиётшуносликда ишлатилаётган термин билан айтганда) «жонли танқидий практика» катта роль ўйнади. Бу танқид кўпинча ташкилий шаклларда рўёбга чиқади (асарларни ўқиб муҳокама қилиш, репертуарни комиссиялар орқали ўтказиш).

Ил дамларда пьесаларни театр труппалари томонидан қабул қилиш ва саҳнага қўйишида талабчанлик ва тартиб бўлмаган эди. Бинобарин, эски шаҳар сиёсий маориф қўмитаси қошида «Санойи нафиса» бўлими тузилиб, маҳсус репертуар комиссияси иш бошлади. Уларнинг биргаликда чиқарган фармойишида, жумладан, қўйидагилар айтилади: «1. Эски шаҳарда саҳналарда қўйилиб турган ва қўйилгуси бўлган барча репертуар (театр рисолалари)ни текшириб, қўйишга яроқли ва яроқсизларини ажратмоқ учун санойи нафиса бўлими ёнида театр китобларини (пьесаларни—М. Ю.)

<sup>126</sup> 15 йил ичидаги ўзбек совет адабиёти. Тошкент. 1939. 108—109-бетлар.

кўрув ҳайъати тузилади; 2. Ҳайъат томонидан кўрилиб, қўйиншга яроқли топилган театр китоблари саҳнага қўйиншга мумкин бўлар...; 3. Ҳар қайси труппа, ҳаваскор тўда ва бошқалар қўлларида бўлган театр китобларини шу ҳайъатга топширурлар»<sup>127</sup>.

Фармойишда яна ҳозиргача ўйнаб келинган пьесаларни бекор қилиш, бир хил спектаклларни сурункасига бир театрда кетма-кет қўрсатмаслик, илгаридан номи халққа маълум бўлган пьесаларнинг номини ўзгартиб эълон қиласлик тўғрисида гапирилади.

«Жонли танқидий практика» совет адабиёти тарихида бундан кейин ҳам кенг ўрин тутадиган бўлди.

Ёзма танқиднинг илк қадамлари драматургия соҳасида бўлган илк тажрибаларга баҳо беришдан бошланди.

Ўқтам номли автор «Бизда босма пьеса тарихи»<sup>128</sup> мақоласида «фақат Европаники каби саҳнага қўярлик этиб ёзилган асарлар» қачондан юзага келгани ҳусусида сўзлаб, «бизда саҳна адабиётининг тарихи 1912 йилда Беҳбудийнинг «Падаркуш»и билан бошланади. Бундан сўнг Ҳамза Ҳакимзода Ниёзий, Ҳожи Муин, Абдулла Қодирий, А. Бадрий пьесалари босилади»,— дейди. Лекин танқидчи фикрича, «саҳна адабиётининг ёзилишида қайнаган давр... Октябрдан кейин бўлди». Совет ҳокимияти йиллари янги талантларнинг уйғониши ва ғайрат билан ишга киришган даври сифатида серҳосил эди.

Ўқтам анчагина драматурглар ва пьесалар борлигини айтиб, танқиднинг ривожи йўлидаги бир тўсиқни жуда тўғри қўрсатиб, пьесаларнинг кўплари босилмай қолиб кетаётганидан шикоят қиласди. «Агар шу асарларнинг лоақал ярмиси бостирилган бўлса эди, танқидлар этилиб, муҳаррирлар янгилишларини билган, саҳна адабиётимиз тугалланмаликка, тараққий этмакка юз тутган... бўлур эди».

Бу ерда айтилган гапларга яқин фикрлар А. Азаматнинг «Ўзбек театрининг тақдирни» мақоласида ҳам бор. Бир қанча драматурглар «ўз молларини қўлтиқларига қистириб, қанча замонлар ноширлар ахтариб сарсон бўлиб юрдилар. Ва бир неча ортиқроқ ҳиммат қилгандари ўзларининг бор-йўқларини сотиб асарларини бостиридилар... Масала бу равища борса, театр адабиёти-

<sup>127</sup> Қизил байроқ. 1921. 6 октябрь.

<sup>128</sup> Туркистон. 1924. 7 ноябрь.

нинг кенгайишига, театр тараққиётига йўл очилмайди»<sup>129</sup>.

Вақтли матбуотда йигирманчи йилларнинг охирига қадар эълон қилинган мақола ва тақризларнинг энг кўпи адабиётнинг драма турига эмас, балки театр санъати масалаларига ва актёрлар маҳорати анализига бағишиланган, аммо улар орасида спектаклнинг гоявий бадиий қимматини, замонавий ҳаёт билан алоқаси ва тарбиявий аҳамиятини чуқур очиб берадиганлари ғоят кам. У тақризларда саҳна санъатининг назарий муаммолари, жанрий изланишларга оид мулоҳазалар учрамайди. Жанр хусусидаги гаплар фақат йигирманчи йилларнинг охирига келиб муҳокама қилина бошлади.

Саҳна учун яратилган адабиёт, яъни драматик турнинг аҳамияти танқидчилар томонидан тез тушунилди ва оммага тушунтирилди.

«Ч. Үғли» имзоли танқидчининг айтишинча, «Театр асари (пьеса — М. Ю.) театрнинг жон томиридир. Яхши ва нафис театр адабиётига эга бўлмасак, театрдан сира фойдалана олмаймиз»<sup>130</sup>. Унинг тўғри таъкидлашига кўра, пьеса ёзиш ҳамманинг ҳам қўлидан келавермайди. «Театр ёзувчиси (драматург — М. Ю.) деганда бошига келган бир сюжетни оқ қофозлар бетига қоралаб қўйиб, бир талай воқеа-ҳодисалар туғдириш ва тузишни билатурган киши деб англанмасин. Театр ёзувчиси ҳамма вақт ҳалқнинг руҳини текширишга мажбур бўлган санъаткордир... Томошибинларга келсак улар театр ёзувчисидан саҳнада ўзларининг яшатилиши ва яшнатишларини талаб қиласидилар»<sup>131</sup>.

1917—1932 йиллар мобайнидаги репертуарга назар ташласак, у драма, комедия, трагедия, оперетта, балет, ниҳоят интермедия, мелодрама кабилардан иборат эканини кўрамиз. Кўпроқ ҳаракатда бўлганлари драма ёки музикали драма, комедия, трагедиядир.

Ўша танқидчининг фикрича, драма (кўпинча пьеса ҳам дейди) жиддий асар, у табиий бўлиши, сюжетни ҳаётдан олиши керак. У эрмак учун яратилмайди, «халқни ўйлашга ва зеҳн ишлатишга мажбур қилиши» керак. Драма бирданига кўпчиликнинг диққатини (спектакль шаклида) ўзига тортгани, ҳаяжонлантиргани сабабли «романдан, бир кишининг якка муҳокама юргизишидан кучлироқ бўлиб чиқадилар».

<sup>129</sup> Ўша жойда.

<sup>130</sup> Ч. Үғли. Театру масаласи.

<sup>131</sup> Ўша жойда. Бу саҳифада қўштириноқ ичига олинган жумлалар мақола авториники.

Драматург «бизнинг бу кунги турмушимиз ичидан ахтариб топиладиган нуқталар,... руҳимиздан чиққан фикрлар ва буларнинг ўзгариши» устида ўйлаши керак.

Саҳна асарларига бағишланган мақолаларда драматург билан актёрларнинг ижодий алоқасига ҳам алоҳида аҳамият берилади. Актёр автор ниятларини бошқаларга етказувчи асосий фигура ҳисобланади. «Шу сабабдан, агар бир артист бир ёзувчи томонидан ёзилган саҳна асарини тузатиш кучига эга бўлмаса, у њеч бир вақт чин артист бўла олмайди»<sup>132</sup>.

Адабий танқиднинг бу даврдаги катта роли шунда кўриндики, у театрлар соҳасида пайдо бўлган ҳамма драматик жанрларни табриклаб, қўллаб турди ва уларнинг аҳамиятини оммага тушунтириб борди.

Ўша йилларда оперетта асарлари (айниқса «Аршин мололон») тез-тез ўйналиб тургани учун бўлса керак, танқидчилик унга ўз муносабатини билдиради. С. Ҳусайн бу хусусда ёзади: «Кишини кўпда ўйлаш-мулоҳаза қилишга мажбур қilmай, музика, ашула, ўйин ва сўз пичинглари билан думоғни чоғ қиладиган турдаги театр — оперетта тўғрисида бизда жуда оз ёзилади, Ўзбек Давлат драма труппаси шу хилдаги нарсадан иккита томоша берди. Бири «Хужум», иккинчиси, «Аршин мололон». Бу хилдаги томошага «бизни чуқур мулоҳаза қилишга мажбур эт, деган талабни қўя олмаймиз. Чунки оперетта усулидаги театрнинг вазифаси хушчақчақ лаззат бериб, кишининг ҳордигини чиқаришдир»<sup>133</sup>.

Драма билан опереттанинг фарқи бўлса ҳам, дейди танқидчи, оперетта ўзининг синфий ва мафкуравий асосини йўқотмайди. Унинг фикрича, ҳозирги спектаклларнинг ҳаммаси ҳам томошабинларни соғлом руҳда хурсанд қилолмайди, уни ўзимизга хизмат қилдиришимиз керак. С. Ҳусайн опереттанинг ўзига хос жанрий белгиларига тўхтаб: «Биз опереттада мураккаб уч турли санъатни кўрамиз: музика, рақс, ашула ва ҳажвий сўз ўйинлари», дейди.

Оперетта ҳақида айтилган фикрларда бу жанр аломатлари деярли қамраб олинган. Дарҳақиқат, опереттада ашулачилик санъати (вокал) ва музика асбоблари куйи, рақс, балет элементлари қоришиқ ҳолда иштирок этади. Унинг асосида лапарга ўхшаш (куплет) ашула

<sup>132</sup> Бу ерда тирноқ ичига олинган жумлалар «Ч. Үғли» имзоли танқидчиники.

<sup>133</sup> Ўзбек театри (мақолалар тўплами). Самарқанд—Москва—1929. 45—46-бетлар.

ва рақс ётади. Операда қўлланадиган кўп компонентлар (ария, дуэт, ансамбль, хор) бу ерда иштирок этсада, улар енгил ва соддароқ бўлади. Совет оперетталари лирик-романтик характерга эга бўлиб, ҳозирги замоннинг актуал мавзуларида ёзилган, гуманизм руҳи билан суғорилган асарлардир.

Иигирманчи йилларда балетга муносабат анча салбий бўлди. Балет буржуазиянинг эстетик завқини қондириш учун «яланғоч баданларнинг қилтиллаши билан думоғини чоғ қилиш учун» ўйлаб чиқарилган, «енгил кайф-сафоли нарсалар билан бошқа ижтимоий гуруҳларни овора қилиб курашдан, бош кўтаришдан четлаштириш ролини ўйнаган», — дейди С. Ҳусайн. «Бизнинг саҳнамиз, — давом этади у, — шаҳроний ҳисни уйғотиш учун ўйин-кулгини қабул қилолмайди. Балетни «турмуш, ишлаб чиқариш билан боғлаб»<sup>134</sup> олиб бориш лозим.

Жуда қадимий бўлган балет санъати Октябрдан кейин қатор қийинчиликларни енгиб, тўғри ривожланиш ўйлига тушиб олди. Ўтмиш рус балетининг энг яхши анъаналаридан ижодий фойдаланиб, жиддий изланишлар натижасида янги мазмунни ифодаловчи янги форма яратди. Ўзининг ғоявий-бадиий хусусиятлари билан халққа яқин бўлган совет балети социалистик гуманизм принципларига асосланади. Юксак одамийлик руҳи билан суғорилгани туфайли ахлоқий тарбия воситаси бўлиб хизмат қиласи. Балетга юқоридаги каби менсималик назари билан қараган танқидчилар шундай вақт келадики, балет артистлари ўз санъатлари билан гражданлик ҳамда ватанпарварлик бурчларини адод этадилар, халқ уларни ардоқлайди, деб хаёлларига ҳам келтирмаганлар.

Саҳна асарларининг бошқа жанрларидан мелодрама, трагедия ва интермедияга берилган қисқача таърифлар ҳам ортиқча эътиrozга сабаб бўлмайди: Масалан: «Трагедия — бу йўлда ёзилган асарнинг қаҳрамони ўзидан ташқаридаги (объектив) шароитлар ва у шароитларнинг туғдирган оғирликлари билан курашади ва натижада кўпроқ маҳв ва ҳалок бўлади». Ёки «Интермедия бизнинг томошабинларимизга жуда яхши ёқади, бу уларни театрга тортади. Эски турмуш қолдиқлари, бузуқ одатлар, турлича захмларимиз билан курашни кўрсатишда интермедия жуда фойдали»<sup>135</sup>.

<sup>134</sup> Уша жойда. 46-бет.

<sup>135</sup> Уша жойда. 16—26-бетлар.

Танқидий чиқишларда театр санъатини давр талаби даражасига кўтариш учун аввало ғоявийлик ва маҳорат кераклиги таъкидланади. Янги, ёш кадрлардан «маҳорати кучли актёр ва режиссёrlар етишириар эканмиз, албатта улардан сиёсий савод талаб қилишимиз керак», — дейди С. Ҳусайн. Шуннайтиш керакки, ўша йилларда театр танқидчилиги заиф эди. Вақтли матбуотда эълон қилиниб турган тақриз ва мақолалар юзаки бўлиб, спектаклларни мукаммал анализ қилиш ўрнига ахборот бериш билан чегараланар, нари борса артистлардан ким яхши ва ким ёмон ўйнагани айтиларди.

Театр танқидчилиги ўзбек театрининг юксалишида катта роль ўйнаши кераклиги қайд қилинар экан, умуман танқид масъулиятли, оғир вазифа, у сўкишдан иборат эмас, асар моҳиятига яхши тушуниб муҳокама юритилса труппага ҳам, томошабинларга ҳам сабоқ бўлажаги уқтирилади. «Танқидчиликка маҳорати боркишиларни тарбиялаш» вазифаси қўйилади. Танқидий мақолалар «халқнинг ҳиссиятига таржимон бўладиган бир равища ёзилиши лозим», — дейилади.

Ўзбек театр санъатининг ривожига хизмат қиладиган муҳим омиллар қаторида рус совет саҳна усталаридан тинмай ўрганиш, қўшни республикалар билан, айниқса Озарбайжон, Татаристон театр арбоблари билан алоқа, боғлаш, тажриба алмashiш зарурлиги кўрсатилади.

Иигирманчи йилларнинг охири ва ўттизинчи йилларнинг бошида ўзбек совет драматургиясига бир груп ёш талантлар кириб келди. Улар орасида Комил Яшин, Назир Сафаров, Зиё Саид, Собир Абдулла, Умаржон Исмоилов, Зиннат Фатхуллин, Исмоил Акрам ва бошқалар бор эди. Дастрлаб «Қар қулоқ» (1926), «Лолахон» (1927), «Тенг-тенги билан» (1927), «Қуёш» (1929) сингари бир пардали пьесалар ва инсценировкалар ёзиб муайян тажрибага эга бўлган Яшиннинг биринчи йирик ва жиддий асари «Икки коммунист» (қайта ишланган варианти «Тор-мор») гражданлар уруши ва босмачилик ҳаракатига қарши кураш масаласини акс эттиради. Кейин «Ўртоқлар» (1930) ва «Ёндирамиз» (1931) пьесалари майдонга келди. «Ёндирамиз» қишлоқда колектив хўжалик ривожига тўсқинлик қилишга уринган синфиий душманларнинг хуружи ҳамда уларни фош этишда совет кишиларининг ватанпарварлигини кўрсатишига бағищланган эди.

Назир Сафаровнинг «Янги қишлоқ» (1927) номли бир пардали пьесаси, Зиё Саид билан ҳамкорликда яратилган «Тарих тилга кирди» (1931) асари; Собир Абдулланинг «Мухбирга ҳужум» (1927, тузатилган варианти «Отилмаган сопқон»), «Боғбон қиз» (1930) комедиялари, шунингдек «Ойхон» (1931), «Волокита» (1932) пьесалари; Зиннат Фатхуллиннинг «Маҳалла сирлари» (1928), «Ниқоб йиртилди» (1932), «Бургут янчилди» (1932) каби саҳна асарларида даврнинг актуал проблемалари — турли кўринишдаги синфий душманлар билан кураш, социализм ғалабаларини мустаҳкамлаш йўлидаги замондошларимиз фидокорлиги, хотин-қизлар озодлиги, саводсизликни тугатиш ва халқимиз маданий даражасини кўтариш етакчи мавзулардан эди.

Бу ерда номлари санаб ўтилган пьесалар муҳим сиёсий-ижтимоий ва гоявий масалаларга бағищланган бўлишига, янги инсон образини яратиш борасидаги дастлабки ютуқлар эканига қарамай, ҳали талабга тўла жавоб берадиган асарлар эмасди. Адабий танқид ўз вақтида уларнинг пайдо бўлишини табриклиш билан бирга мавжуд нуқсонларни кўрсатишга ҳаракат қилди<sup>136</sup>. Шу сабабли айтиш мумкинки, ўзбек драматургияси ва театр санъати ўттизинчи йилларнинг бошига келиб янги босқичга кўтарилган экан, бунда танқиднинг катта ижобий роли бўлди. Энди саҳна асарлари кўпинча тарихий мавзудаги достон ёки повестларни («Лайли ва Мажнун», «Шайх Санъон», «Бухоро жаллодлари») инсценировка қилиш билан, таржима пьесалар ҳисобига театрларни таъминлаш билан қаноатланиб қолмай, совет воқелиги мавзууда ёзилган оригинал драмалар, комедиялар яратиш имкониятига эга бўлди.

Шу вақтгача фаолият кўрсатиб келган майда ҳаваскор труппалар марказлашиб, йирик профессионал драма ва музикали драма театрлари вужудга келди.

«Бу вақтда, — деб ёзган эди танқидчи Сотти Ҳусайн, — Ўзбекистоннинг катта шаҳарларида давлат театрлари тузилди. Унга Москва ва Бокуда ўқиб, театрнинг назарий ва амалий мактабини ўтаб келган ўртоқлар раҳбарлик қилдилар. Халқининг маданий савиаси ўсиб, театр маданиятимиз тез кўтарилди»<sup>137</sup>.

<sup>136</sup> Ҳусайн С. Узбек совет драматургиямизга умумий қараш//15 йил ичida ўзбек совет адабиёти. Тошкент. 1939. 119—126-бетлар.

<sup>137</sup> 15 йил ичida ўзбек совет адабиёти (мақолалар тўплами). Тошкент. 1939. 119-бет.

С. Ҳусайнинг таъкидлашича, йигирманчи йилларнинг охири ва ўттизинчى йилларнинг биринчи ярмидаги ўзбек драматургиясининг кўтарилиш даврида Ҳамзанинг «Бой ила хизматчи», «Майсаранинг иши», «Бурунги сайловлар» пьесалари катта аҳамиятга эга бўлганидек, Ҳамза мактабининг шогирдлари Қомил Яшин, Собир Абдулла, Зиннат Фатхуллин, Умаржон Исмоилов, Назир Сафаров сингари талантли ёшлар плеядаси қаламига мансуб асарлар ҳам актив иштирок этди.

## АДАБИЙ ТАНҚИД ВА ҚЛАССИК МЕРОС ПРОБЛЕМАСИ

Илмий коммунизм асосчилари К. Маркс ва Ф. Энгельс кишилик жамияти тарихида маданий тараққиётнинг ролини материалистик нуқтаи назардан тушунтириб, бу жараёнда мерос ва ворислик муҳим аҳамиятга эга эканини уқтирганлар. Уларнинг таълимотига кўра, социалистик инқилоб фақат сиёсатдаги, иқтисодий-ижтимоий ҳаётдаги ўзгаришигина эмас, шунингдек, маданият соҳасидаги ўзгариш ҳамdir. Бошқа сўз билан айтганда, маданият масалалари, улардаги узилмас тадрижий такомил жамиятни инқилобий қайта қуришдаги конкрет вазифалар билан боғлиқдир.

Марксизм классикларининг маданий тараққиёт түғрисидаги қарашларини янги тарихий шароитда ривожлантирган В. И. Ленин прогрессив санъат ва адабиёт озодлик ҳаракати билан боғлиқларини асослаб берди. Инқилобий ўзгариш туфайли юзага келган социалистик маданият ҳар бир халқнинг илғор ғоявий-эстетик меросига, жумладан, қардош халқлар ва жаҳон прогрессив маданий меросига суюнажагини уқтириди.

Маркс яратган инқилобий назария нима учун миллионлар қалбидан жой олганини В. И. Ленин шундай изоҳлади:

«...Маркс капитализм даврида инсоният қўлга киритган билимларнинг мустаҳкам пойдеворига таянди... У кишилик жамияти яратган нарсаларнинг ҳаммасини танқидий кўз билан ишлаб чиқди, уларнинг бирор пунктини ҳам эътиборсиз қолдирмайди...»<sup>138</sup>.

В. И. Ленин жамиятнинг тарихий ривожланиши ва маданияти ягона жараён, уларни бир-биридан ажратиб бўлмайди; ижтимоий формациялар, айrim даврлар ўзгариб турса-да, башарият тарихи ҳеч қачон узилиб қолмай, бир бутун жаҳон тарихи ўлароқ давом этаверади, деб ўргатди. Демак, ҳар қандай янги давр ўзи-

<sup>138</sup> Ленин В. И. Тўла асарлар тўплами. 41-том. 339-бет.  
124

дан олдинги давр эришган ютуқларга асосланади. Бусиз ҳеч қандай тараққиётнинг бўлиши мумкин эмас.

Кўринадики, мерос ва ворислик алоқалари — диалектик жараён. Бизгача етиб келган маънавий-маърифий бойликларнинг ҳаммаси қабул қилина бермагандек, асоссиз ёппасига рад ҳам этилмайди. В. И. Ленин Улуғ Октябрдан бир оз олдин Гегелнинг «Логика фани» китобини конспектлаштириб туриб, шундай ёзган эди: «Диалектика учун қуруқдан-қуруқ инкор, бекордан-бекор инкор, скептик инкор, иккиланиш, гумонсираш характерли эмас ва муҳим эмас,— диалектика, шубҳасиз, ўзида инкор элементига эга ва у диалектиканинг энг муҳим элементи ҳисобланади, диалектика учун алоқадорликнинг моменти сифатидаги, тараққиётнинг моменти сифатидаги инкор, ижобийни сақлаб қолиш йўли билан бўладиган, яъни ҳар қандай иккиланишларсиз, ҳар қандай эклектикасиз инкор характерлидир»<sup>139</sup>.

Доҳийнинг социалистик маданиятни қандай яратиш қераклиги тўғрисидаги мулоҳазаларини ўрганиб чиққан И. С. Смирновнинг<sup>140</sup> айтишича, 1917 йил 25 октябрдан то 1918 йил 31 августгача бўлган муддат орасида В. И. Ленин 150 дан ортиқ ишларидан Совет Россиясини маданий қайта қуриш юзасидан принципиал фикрлар билдирган. Шунга қарамай, инқилобдан кейинги дастлабки йиллар ҳар жиҳатдан ғоят мураккаб бўлганидан, буюк социал тўнтиришлар қаршисида турган ёзувчилар ҳам, адабий-бадиий танқид ҳам бу йўл-йўриқларни ўзлаштиромади, қисқаси улар масалани тўғри англашга тайёр эмаслиги билиниб қолди. Тўғри йўлдан бормаслик ўз навбатида жиддий хатоларнинг содир бўлишига олиб келди. Хатолар аввало Пролеткульт фаолиятида яққол кўринди.

Октябрдан аввалроқ пайдо бўлган Пролеткульт ташкилоти инқилоб ғалабасидан кейин етишган ва фаолият кўрсатаетган ёш ёзувчиларни тўплаб, эксплуататор синфларга қарши кураш руҳида тарбиялашда, адабиётда учраётган буржуа ғояларига зарба беришда муайян ижобий хизматлар қилган бўлишига қарамай, маданий меросга ёндашувда нигилизм (инкор қилувчилик) йўлига кириб кетди. Бунда кўпроқ Пролеткултнинг оддий аъзоларидан кўра унинг раҳбарлари айбдор

<sup>139</sup> Ленин В. И. Тўла асарлар тўплами. 29-том. 217-бет.

<sup>140</sup> Смирнов И. С. Ленин и советская культура. М., 1960. С. 40.

эдилар. Улардан бири 1909 йилдаёқ В. И. Лениннинг ўлмас асари «Материализм ва эмпириокритицизм»да фош қилиб ташланган махист А. Богданов эди. Пролеткультнинг назариячиси бўлиб олган бу шахс пролетар маданияти проблемаларини, ўзининг субъектив идеалистик қарашлари асосида бузиб, тушунтиришга кириши. Унинг фикрлари бу ташкилотни ўтмиш маданий меросини инкор қилишга олиб келди. Богданов «синфиб биқиқлик» ҳақидаги сохта назарияни ўйлаб чиқариб, ҳар бир янги синф ўзидан олдин яратилган маданияти улоқтириб ташлаши, сўнг ўз маданиятини янгидан яратиши керак, деган даъвони илгари сурди<sup>141</sup>.

Пролеткультнинг активлари В. Кириллов, Ф. И. Калинин, Самобитник-Маширов ва бошқалар ўз бадиий асарларида Богданов «назария» сини амалда татбиқ қилишга уриндилар. Улар «ҳозирги замон кемасидан» Пушкинни, Гоголь ва Толстойни иргитиб юбормоқчи бўлдилар. Шоир В. Кириллов «Биз эртаги кунимиз ҳақи учун Рафаэлни ўтга ёқамиз, музейларни вайрон қиласиз, санъат гулларини пайҳон этамиз»<sup>142</sup> тарзидағи ибораларни мисраларга тизди.

1920 йилнинг октябрь ойида бўлиб ўтган Пролеткультнинг Биринчи Бутун Россия съезди муносабати билан В. И. Ленин 8 октябрь куни «Пролетар маданияти тўғрисида»ги резолюция лойиҳасини ёзди. Лойиҳада, жумладан шундай дейилган эди: «4. Революцион пролетариатнинг идеологияси бўлган марксизм ўзининг оламшумул-тарихий аҳамиятини шу билан қозондикн, марксизм буржуа даврининг қимматли ютуқларини асло улоқтириб ташламади, балки, аксинча, инсон тафаккури ва маданиятининг икки минг йилдан ортиқроқ вақт мобайнида ривожланиши натижасида вужудга келган қимматли нарсаларнинг ҳаммасини ўзлаштириди ва қайтадан ишлади.Faқат шу асосда ва шу йўлдан олиб бориладиган ва пролетариатнинг ҳар қандай эксплуатацияга қарши сўнгги курашидан иборат бўлган, пролетариат диктатурасининг амалий тажрибаси билан камолотга етказиладиган ишнигина чинакам пролетар маданиятининг ривожи деб билиш мумкин»<sup>143</sup>.

В. И. Ленин 9 октября Сиёсий бюро мажлисида ўтириб Пролетар маданияти тўғрисидаги резолюция-

<sup>141</sup> Иванов В. Формирование идейного единства советской литературы. 1917—1932. М., 1960. С. 146—148.

<sup>142</sup> Львов-Рогачевский Л. В. Очерки пролетарской литературы. М.—Л., 1927. С. 55—58.

<sup>143</sup> Ленин В. И. Тўла асарлар тўплами. 41-том. 376-бет.

нинг «хомаки нусхаси»ни ёзади ва бир кун аввалги революция лойиҳасидаги энг муҳим қоидаларни қайтадан таъкидлайди: «7. Янги пролетар маданияти ўйлаб чиқарилмайди, балки мавжуд маданиятнинг энг яхши намуналари, традициялари, ютуқлари марксизм дунё-қараши нуқтаи назаридан ва пролетариат диктатураси даврида пролетариат ҳаёти ва курашининг шарт-шароитлари нуқтаи назаридан ривожлантирилади...»<sup>144</sup>.

В. И. Ленин ва Коммунистик партияниң маданий мерос ҳақидаги кўрсатмалари Ўзбекистонда ҳам тадрижий равишда ўзлаштирилиб борди ва адабий танқид принципларининг ишланиб чиқишига ва тасдиқ бўлишига хизмат этди.

Коммунистик партия ва Совет ҳукумати ўзлари меросга муносабат намуналарини кўрсатди. 1921—1922 йилларда Дантели хотирлаш, Некрасов, Островский ва Пушкин юбилейларини ўtkазиш тадбирларига бошлилик қилди ҳамда бу маданият байрамларига ёзувчилар, рассомлар, музикачиларни актив жалб этди. Гражданлар уруши йилларида Москвада К. Маркс, А. Н. Радищев, Т. Г. Шевченко, Н. Г. Чернишевский, Г. В. Плеханов, А. И. Герцен сингари илмий коммунизм асосчилиари ва адабиёт классикларига ҳайкаллар, бюстлар ўрнатилди. Салафларимизни улуғлаш борасида қилинган бу ғоят муҳим ишлар маданий мерос пролетариат учун ўрганиш мактаби бўлажагини амалда кўрсатди. Оқибатда Пролеткультнинг аъзолари қарашларида ҳам ўзгариш сезилди. В. Кириллов: «Биз биландир шонли Пушкин, Ломоносов ва Кольцов», — деб ёзди.

Пролеткульт таъсирида 1923 йилнинг бошларида юзага келган МАПП — Москва пролетар ёзувчилари ассоциацияси, 1924 йилда тузилган ВАПП — Бутунитифоқ пролетар ёзувчилари ассоциацияси, РАПП — Россия пролетар ёзувчилари ассоциацияси (1925) кўпгина ёзувчиларни атрофига уюстириб, совет адабиёти ривожида муайян ижобий хизматлар қилди. Шу билац биргага, раппчилар фаолиятида ўта ўжарлик, ҳовлиқмалик қусурлари бор эди. Уша йилларнинг актив адабиётшуноси Ю. Либединский уларни «шиддатли тиришқоқлар» («Неистовые ревнители») деб атаган эди. Пролетар ёзувчиларининг Россия ассоциацияси ичida ўналиши жиҳатидан бир-биридан фарқ қиласиган турили группалар: «Леф», «Октябрь», «На посту» («Постда», журнал), «Красная новь» (журнал) бор эди.

<sup>144</sup> Ленин В. И. Уша асар, ўша том. 519-бет.

Худди Пролеткульт каби «Леф» (санъатнинг сўл фронти) ва «Постда» журнали атрофига тўплланганлар узоқ вақтгача классик меросни рад этиб келдилар. Ижоди инқилобгача бошланган ва «попутчиклар» («йўловчилар») деб юритилган ёзувчиларга нисбатан ҳам рақибларча муносабатда бўлдилар<sup>145</sup>.

\* \* \*

Биз юқорида Октябрдан кейин рус совет адабий танқидида маданий мерос атрофида бўлиб ўтган баҳсларга шунинг учун қисқача тўхтадикки, уларнинг акс садоси барча қардош республикалар адабиётида, шунингдек ўзбек адабиётида эшитилиб турди. Пойтахтдаги ёзувчилар ташкилотларидан ибрат олган ҳолда Ўзбекистонда ТАПП (1924), «Қизил қалам» (1926), ЎзАПП (1930) тузилган бўлса, Озарбайжонда «Захматкаш адаб ва шоирлар иттифоқи» (1922), «Адабиёт жамияти» (1925), АзАПП (1927); Қозогистонда ҚазАПП (1925) ва бошқалар майдонга келиб иш кўра бошлиди. Улар фаолиятининг мазмуни, худди икки томчи сувдек, РАППникига ўхшарди. Айрим ижобий томонлар ва йўл қўйилган хатолар бир хил эди.

Маълумки, РАПП идеологлари, янги адабиётни революция яратади, унинг актив кучлари — ижтимоий чиқиши жиҳатидан пролетар бўлган кишилар, деб турган бир пайтда инқилобдан илгари яратилган адабиёт ҳам барҳаёт эди ва китобхон ундан юз ўғирмаганди. Академик Н. И. Конрад айтганидек, пролетар диктатураси ҳокимияти XIX аср рус адабиётининг атоқли на moyндадари асарларини кўплаб нашр қилаётган ва билимдон адабиётшунослар тадқиқот ишлари билан шуғулланаётган эдилар. Революцион кайфият ҳукмрон бўлган бир даврда бу адабиётга қандайдир янги муносабат билдириш керак бўлди. «Социологик мактаб тарафдори бўлган адабиётшуносларнинг фикрича, истаган адабий асарнинг табиити, моҳияти, қиммати тўғрисида хатосиз ҳукм чиқариш имкониятини берадиган андоза (критерий) топилди. Бу андоза умуман адабиётнинг синфиийлиги концепциясидан иборат эди»<sup>146</sup>.

<sup>145</sup> Бу ҳақда тафсилий маълумот учун қаранг: Шешуков С. Неистовые ревнители. М., 1970. С. 80—85.

<sup>146</sup> Конрад Н. И. Избранные труды//Литература и театр. М., 1978. С. 115.

Бу концепцияга кўра, адабий асарнинг мазмуни, формаси, услуби, жумлалар тузилиши, қисқаси, ҳамма нарса авторнинг қайси синфга мансублигига боғлиқ бўлиб чиқарди. Синфийлик назарияси, оқибатда, вульгар социологизм оқимининг шаклланишига сабаб бўлди. Н. И. Конраднинг айтишича, XVIII—XIX аср рус адабиётини чуқур ўрганиш, эски билан янги ўртасидағи ворисликни аниқлашга интилиш жараёнида синфийликни тўғридан-тўғри ҳар қандай бадиий асарга татбиқ қилавериш жоиз эмаслиги билиниб қолди. Шу нарса маълум бўлдики, «кatta масштабга эга ва юксак даражада турган ёзувчи фақат ўз синфигагина мансублигидан ташқари ўз даври жамияти тенденциясини ифодалаган ҳолда ўз халқига ҳам мансубдир; шундай жамият тарихий реаллик бўлганидан унга хос белгилар (хусусиятлар) бирлиги ҳам шунча реалдир. Бинобарин, ёзувчи ана шу белгиларни ҳам ифодалashi мумкин; кўпинча худди ўша белгилар унинг ижодида энг муҳим жиҳат экани маълум бўлди. Адабиёт соҳасидаги «маданий мерос» масаласини ечиш йўли шу тариқа очилди ва башариятнинг ижодий даҳоси яратган бойликларга нигилистик муносабат хавфининг олди олинди...»<sup>147</sup>.

Шуни таъкидлаш керакки, ҳозир айтилганлар ўттизинчи йилларнинг бошларига оидdir. Йигирманчи йилларда эса ўзбек адабий танқиди бу холосаларга келиб улгурмаган, меросга нисбатан муносабат турлича эди. Аввал айтганимиздек, умуман танқиддаги каби, адабий мерос проблемасини ҳал этишда ҳам икки асосий йўналиш равшан кўринади. Улар вульгар-социологик ва маърифий-илмий йўналишлардир.

Маърифий-илмий тамойилга эга бўлган профессионал танқидчи ва адабиётшунослар, шунингдек танқид билан ҳам шуғулланувчи ёзувчилар орасида А. Саъдий, А. Мажидий, Айн (О. Шарафиддинов), С. Айний, Л. Олимий, О. Ҳошим, Боту каби ижодкорлар бор эди. Шуни таъкидлаш лозимки, Фитрат, Саъдий, Айний каби катта авлод вакиллари ўзлари марксист бўлмаганлари ва марксистик методологиядан узоқ бўлганлари ҳолда адабий меросни тарғиб қилишда яхши фаолият кўрсатдилар. Вульгар социологик руҳдаги хатолар кўпроқ Ж. Бойбулатов, В. Маҳмуд, Олтой, З. Саид, З. Башир, Ю. Латиф сингари адабиётчиларда учрар эди. Адабий меросни илмий нуқтаи назардан ўрганув-

<sup>147</sup> Уша жойда. 118-бет.

чилар доирасида ўз фаолиятининг дастлабки вақтларида меросга нигилистик ёндашиш ҳоллари бўлган айрим шахслар (Ю. Латиф, С. Ҳусайн) кейин у фикрлардан қайтганидек, узоқ йиллар схематизмдан, фактларни анализ қилишда жўн (примитив) муҳокама юритишдаң қутула олмаганлар ичида тўғри изга туша бошлаганлар ҳам йўқ эмасди.

Агар биз ўзбек адабий танқиди тарихининг бошланғич даври ва йигирманчи йилларнинг биринчи ярмидағи манзарасига назар ташласак, маданий меросни ўрганишга, уни объектив баҳолашга бўлган тамойил ҳар ҳолда кучли эканини кўрамиз. Масалан 1919 йили «Мусулмон иштирокион фирмасининг ўлка бюроси ҳузуридаги нашриёт шуъбаси» томонидан нашр этилган «Инсоният ҳақида Навоийнинг фикри»<sup>148</sup> сарлавҳали кичик бир рисоланинг кириш қисмида шундай фикрлар бор: мусулмон дунёсининг бошига қора кунлар тушганлигига сабаб золим подшоҳлар, уларни ёлғондан мақтовчи шоиrlар ва дин сотувчи эшонлар, уламолардир. Диндорларнинг эътиқоди ва диёнатига таъсир қилиш мақсадида айтиладики, зулм ва имон бирга яшай олмайди. Ҳақиқий хиёнат, асл мусулмонлик бечораларнинг кўнглини овлашдан, оч-яланғочларга моддий ёрдам беришдан, одилликдан иборатдир. «Мусулмонликда подшоҳлик, шайхлик, беклик деган имтиёзли мансаб ва йартабалар» бўлмаган. Бошлиқлар халқ хоҳиши билан лавозимга кўтарилган.

Лекин бу узоқ давом этмади. «Бора-бора иш бузила бошлади. Ҳийлакор алдовчилар иш бошига ўтдилар. Виждонсиз, билимсиз кишиларни топиб, муллолик ва шайхлик ўринларига ўтказдилар». Улар «подшоҳга итоат вожиб», «подшо тангрининг кўлагасидир» деган ёлғон фатволар, ёлғон насиҳатлар билан халқнинг кўзини боғладилар... Мусулмонлар қора ва ёмон ҳолларга тушдилар...»<sup>149</sup>.

Рисолачада ўша серкулфат замонларда «ҳақ ва ҳақиқат тарафдори бўлган кишилар йўқ эмасдилар. Улар қоронғу булутли кечаларда чаққан чақмоқлар каби» эдилар. «Мана ўуларнинг бирин Алишер Навоий ҳазратларидир», дейилади. Ношир, Навоий Султон Ҳусайнининг кенгашчиси бўлгани, Навоий туфайли кўпгина зулм ва ярамас ишлар йўли бекилгани, Навоий халққа хизмат учун подшоҳ саройида юрганини айтгач,

<sup>148</sup> УзССР ФА Абу Райхон Беруний номидаги Шарқшунослик институти фонди. Инв. № 10111.

<sup>149</sup> Ўша жойда 4—5-бетлар.

«Ҳайратул аброр»даги золим подшоҳлар ва риёкор шайхлар тўғрисидаги боблардан узун-узун нарчалар келтиради.

Мусулмон Иштирокион фирқасининг ўлка бюроси Навоийнинг зулмни, диний фанатизмни қораловчи фикрларини ташвиқ қилишида икки мақсадни кўзда тулади. Бири — кенг меҳнаткаш оммага кам маълум бўлган Навоий ижодидан кўичиликни хабардор қилиш. Иккинчиси — буюк шоирнинг ўлмас ғоялари замона-мизга ҳамоҳанг равишда яшаётганини кўрсатиш.

Дарвоқе, Улуғ Октябрь социалистик инқилоби асрий зулм ваadolatсизлик асосларини емириб, кишини киши томонидан эксплуатация қилишининг барча кўри-нишларига чек қўйган бир шароитда, дин ва диний муассасалар давлатдан ажратилиб, социалистик жамият учун заарли деб эълон қилиниб турганда Навоийнинг бу хусусдаги илфор қарашлари бизга ёрдамга келган эди. Жисмоний ва руҳний эксплуатацияга барҳам бериш муҳим вазифалардан бўлиб қолди. Рисоланинг охирида айтилгандек «биз уларга қарши турамиз; ёлғиз биз эмас, буюк отамиз Алишер Навоий ҳам уларга қарши тургандир»<sup>150</sup>.

Коммунистик партия ўлка бюросининг бу ташаббу-си адабий меросни ташвиқ қилиш соҳасидаги ишларга яхши туртки бўлади. Меросни ўрганиш тамоили ўсаёт-ганини кўрсатувчи фактлар қаторига «Қизил байроқ» газетасининг 1921 йил 20 май сонида босилган қисқа бир ахборотни ҳам киритиш мумкин. Ахборотда: «Би-лим ҳайъати томонидан... Навоий, Лутфий, Бойқаро ва бошқа эски ўзбек шоирларининг шеърларидан бирик-кан бир мажмуа тузиш иши топширилган эди. Шул мажмуа яқинда тузилиб битмак устидадир», дейилган.

Бадиий ижодда аксилиниқилобий миллатчилик руҳи-да хатоларга йўл қўйган Абдурауф Фитрат (унинг бадиий ижоди ҳақида қаранг: «История узбекской со-ветской литературы», «Фан», 1987. Т. I) 20-йилларда Шарқ ҳалқларининг маданий мероси ва адабиётини ўрганишга маълум ҳисса қўшди. Фитрат марксизм-лени-низм методологияси билан нотаниш эди. Шу сабабли унинг мақола ва илмий асарлари фанга фактик мате-риални киргизиши билангина қимматли эди.

Абдурауф Фитрат нуризм руҳи билан суғорилган «Тилимиз»<sup>151</sup> номли мақоласида ўзбек тили тарихидан

<sup>150</sup> Уша жойда. 15-бет.

<sup>151</sup> Иштирокион. 1919. 12 июнь. 132-сон.

баҳс очиб, Навоийнинг «Муҳокаматул луғатайн» китоби ва ундағи туркй сўзларнинг бой ва ранг-баранглиги ҳақида гапиради. «Дунёнинг энг буюк ҳакими бўлган Ибн Сино», «иккинчи Арасту аталган Форобий каби машҳур сиймолар халқимизнинг маданияти бешиги тепасида турганидан» ҳақли равища фаҳрланади.

Абдурауф Фитратнинг «Бедил»<sup>152</sup> номли рисоласи салафларимиз ижодига янгича нуқтаи назардан илмий ёндашувда илк қадамлардан эди. Автор шоир мөрросини монографик тадқиқот йўли билан эмас, балки Шариф, Ҳамид, Эгамберди, мулла Қурбон номли (баъзилари Москвада ўқиётган ва таътилда Бухорога келган) ошналарнинг бедилхонлик сұҳбати йўли билан ташвиқ қилишига киришади.

Сұҳбат ва баҳслашувлар давомида биз Шарқнинг буюк шоири Бедил оз ёзиб, кўп мазмунни ифодалашга уста экани, унинг куллиёти катта бир дengiz бўлиб, «ундан ҳар ким ўз кўзасига яраша сув» олажагини англаймиз. Ошналар Бедил ғазаллари ва рубоийларини ўқиш жараённида ҳар бири ўқилган парчанинг мағзини чақишида қатнашиб, коллектив равища мунозара қиладилар. Натижада шоир ўзи яшаган жамиятдан норозилик изҳор қилгани, диний ақидаларни, шайх ва зоҳидларни, хурофотни қоралаб, Каъбага бориб тошдан ҳақиқат излаганлар устидан кулгани ва «ҳавоси бузилган бу қоронғу зиндандан ташқарига, очиқ ҳавога чиқиши» кераклигини айтгани билан танишамиз.

Мунозара иштирокчилари Бедилдан кўплаб мисоллар келтириб, у одамни ердаги мавжудотларнинг энг улуғи — «ҳазрати инсон» деб таърифлагани, инсон ўз номига яраша мустақил, бошқаларга кўр-кўрона тақлид қилмай яшashi лозимлигини талаб этгани, олдинга қараб интилиши зарурлигини тасвирлаганидан, амлокдорларнинг қўшичи-деконларга ўтказаётган зулмидан шикоят қилиб ёзганидан хабардор бўламиш.

Шу нарса диққатга сазоворки, Фитрат сұҳбат аҳллари баҳсини инқилобий замон руҳида уюштиради. Шоир айтганиларидан бизга хизмат қиладиган рационал мағзни топади ва давримизга мувофиқ изоҳлайди. Масалан, инсон тараққиётга, эркка талпиниши унинг номига ярашадиган фазилат экани ҳақидаги Бедил фикрларини замонавий ҳодисалар билан тушунтириш ниятида мусоҳиблардан бирига сўз беради. Унинг айтишича, инсон қудрати ва мўъжизакорлиги айниқса Европадаги фан-техника ривожида яққол кўринади.

<sup>152</sup> Фитрат. Бедил. М., 1923.

Унга жавобан бошқа бир ҳамсуҳбат дейдики, «Европанинг бойлар ҳам бой ҳукуматларига қарши уларнинг қўли остида эзилиб қолган меҳнаткашлар томонидан» кураш бошланган. Бу жиҳатдан энг кучли иш майдони Россиядир. «Рус меҳнаткашлари бойлик ҳукуматини бутун қўйруқлари билан, қолдиқлари билан, излари билан супуриб ташладилар» (23-бет). Суҳбатдошлар биргаликда: мана шу ўзгаришлар моҳиятини тушунишимиз, «ҳазрати инсон» эканимизни билиб, унга кўра ҳаракат қилишимиз лозимдир», «табиат кучларини ўзимизга бўйсундиришимиз» керак, деб хулоса чиқарадилар.

Йигирманчи йиллар ўзбек адабиётида Бедил ижодига багишланган биринчي асар бўлган мазкур рисола шоир меросини чуқур ўрганиш борасида салмоқли тадқиқотлар майдонга келган бизнинг кунларимизда ҳам ўз ўрнига эга.

Ўрта асрнинг машҳур филологи Замахшарий ҳақидаги «Муқаддиматул адаб»<sup>153</sup> мақоласида Фитрат бу улуғ олимнинг ўлмас китоби қачондан бошлаб ўрганишга киришилгани, у тўғрида қайси манбаларда нималар айтилгани, «Муқаддиматул адаб»нинг қўлёзма нусхалари республикамизнинг қандай фондларида сақланаётганидан дарак беради. Автор бу илк ахборотда ёзади: «...Бу кунгача шу китоб тўғрисида жиддий текшириш ясаб, илмий бир мақола ёзувчи киши бўлмади. Мен ўзимнинг кучсизлигимга қарамасдан мана шу мақолани ёзиб, майдонга чиқармоқчи бўлдим. Менинг бу мақолам илмий бир нарса бўлмаса ҳам илмий кишиларнинг дикқатларини бу китобга тортишга сабаб бўлур, деб умид этаман». Кейин асардаги исмлар, феъллар, ой-кун номлари араб, форс ва бошқа тилларда қандай ифодаланиши масаласига қисқача тўхтайди.

Фитрат «XVI асрдан сўнги ўзбек адабиётига умумий бир қараши»<sup>154</sup> мақоласида ҳали илмий жамоатчиликка яхши маълум бўлмаган фактларни истеъмолга киритади ва дикқатга лойиқ мулоҳазалар баён қиласди. XVI асрнинг бошларида ижтимоий-сиёсий ҳаёт манзарасини қисқача тасвирлаб ўтгач, бу даврда қандай шоирлар ижод этганини, адабиёт нималар ҳисобига бойиганини тўғри кўрсатади. «Шайбонийнома» ва «Умар Ҳайём» номли мақолалар ҳам шу муаллиф қаламига мансуб, меросни ташвиқ қилишга қаратилган илк тадқиқотлардан эди.

<sup>153</sup> Маориф ва ўқитчувчи. 1926. 7—8-сонлар.

<sup>154</sup> Аланга. 1929. 8—9-сонлар.

Биринчи авлодга мансуб танқидчи ва адабиётшунос-лардан яна бири Абдураҳмон Саъдий йигирманчи йил-ларнинг биринчи ярмида фан ва маданият арблари меросидан кўпчиликни хабардор қилишга алоҳида эъти-бор беради. Унинг «Яссавий ким эди?»<sup>155</sup>, «Абунаср бин Муҳаммад Тархон Форобий»<sup>156</sup> ва бошқа шу характер-даги ишлари ўз даврида муҳим маърифий аҳамиятга эга бўлди. А. Саъдий бошқа бир қатор мақолаларида мерос билан янги замон ўртасидаги алоқаларни ўзи тушунган дәражада изоҳлашга уринди.

Муаллиф «Ўзбек маданиятни ва маориф қурултойи муносабати билан» мақоласида совет адабиётининг ри-вожи масалаларига тўхталиб ёзади: «Мактабларимизда, билим юртларимизда ва турли курсларимизда ҳам адабиёт ва шеъриятимиз буюк ўрин олмоги керакdir. Токи шуларнинг таъсирлари билан ёшлиларимиздаги адабий ва шеърий кучлар, гўзал санъат ўқувлари кучайиб, Туркистонда ижтимоят ва инқилоб яссавийлари, ўз-гариш навоийлари, қўзғолончи Муҳаммад Солиҳлари майдонга чиқсинлар...»<sup>157</sup>. Кўринадини, автор салафларимиз ижодини гарчи ғоявий бадиий жиҳатдан бир-биридан фарқ қиласа-да, прогрессив ва консерватив ёзувчиларни «ягона оқим»га қўшиб юборса-да, уларни рад этмайди.

Тўхтамурод Аъламов («Тўғрул») «Эски шоирларимиздан Муқимий»<sup>158</sup> номли мақоласида, жумладан ёзади: «Чигатой адабиётининг тарихини суриштирган вақтимизда ўз даврининг муҳим ва мўътабар шахсларидан бири деб Муқимиини таниймиз...». Шундан кейин Муқимиий ўз салафлари анъанасини давом эттиргани, газаллар ва ҳажвий манзумалар ёзгани, «ўз муҳити, турмуши, теварагидаги ҳақсизлик ва кўнгилсиз» ҳолларни тасвиrlаганини, «юрагида ўз ватани — юрти учун самимиy ва пок бир муҳаббат унга олий бир эҳтиром туйғуси» яшаганини айтади. Мақола сўнггида ўқиймиз: «XII аср мелодийдан бери «Чигатой адабиёти» оти билан юртилиб келган энг бой ва кенг бир адабиётининг энг охирги табақасидаги шоирларимиздан бўлганлиги учун Муқимиий ва унга ўхшац кишиларни унутмаслик, қимматларини кўтаришлик улуф вазифаларимиздандир».

Танқид тарихига оид материалларни диққат билан ўрганиш шундан далолат берадики, А. Саъдий, А. Ма-

<sup>155</sup> Инқилоб. 1922. 5-сон.

<sup>156</sup> Инқилоб. 1924. 11—12-сонлар.

<sup>157</sup> Қизил байроқ. 1922. 16 март.

<sup>158</sup> Фарғона. 1923. 17 март.

жидий, Тўғрул, О. Ҳошим, Л. Олимий каби танқидчилар илмий изланиш йўлидан бордилар. Уларнинг танқидий мақолалари, адабиётшуносликка онд текширишлари, хрестоматия ва дарслеклари ўша мураккаб, зиддиятли йилларнинг таъсирида вужудга келган, нуқсонлардан қатъи назар, меросга тўғри ёндашишга интилишнинг танқиддаги намуналари эди. Олимийнинг «Нодира» («Билим ўчоги» журнали, 1923. 23-сон); Фитратнинг «Навоийнинг форсий шоирлиги ҳам унинг форсий девони тўғрисида» («Маориф ва ўқитувчи». 1926. 12/24-сон); А. Мажидийнинг «Шоир Мирий» («Маориф ва ўқитувчи». 1927. 6-сон) мақолалари ҳам шу жумлага киради.

1926 йили Бокуда Озарбайжон адабиёт жамияти «Навоий» тўпламини нашр қиласди. Тўплам ўзбек адабиётини ўрганиш соҳасидаги илк қадам бўлган ишларни изоҳловчи кичик сўз бошидан кейин проф. Исмоил Ҳикматнинг «Амир Алишер Навоий» номли каттагина мақоласидан бошланади. Акад. А. Самойловичнинг айтишича, Навоийнинг даври, ҳаёти ва ижтимоий фаолиятини ёритишда И. Ҳикмат француз туркологи Белиннинг Навоий тўғрисидаги ишларига суннади. Шоирнинг ижодини таърифлаганди И. Ҳикмат ўзидан аввал Европа шарқшунослигига ҳукмрон нуқтаи назар таъсиридан чиқолмай, Навоийни Низомий, Хусрав Деҳлавий, Жомийнинг тақлидчиси қилиб кўрсатади. И. Ҳикмат Навоий ва Лутфий ижодлари ўртасидаги алоқаларни очишига интилади.

Проф. Чўпонзоданинг «Навоий — лингвист» номли тадқиқоти туркий тилларнинг дастлабки текширувчилари, жумладан, Маҳмуд Кошфарий ҳақидаги маълумот билан очилади. Навоийнинг лингвист сифатидаги назарий ва амалий фикрлари «Муҳокаматул лугатайн»да ифода қилинганини яхши кўрсатади. Китобдаги учинчи мақола Мирза Муҳсин Иброҳимий қаламига мансуб бўлиб, «Алишер Навоийга форс адабиёти таъсири» деб аталган. Автор уйғур ёзувида бизгача етиб келган «Қутадғу билғи»нинг тарқалишидан гап бошлаб, «Бахтиёрнома», «Меъроjnома» типидаги асарларни тилга олади.

Тўплам Жомийнинг «Искандарнома» хотимасида Навоий ҳақида айтган мақтовли мисралари билан якунланади (уни озарбайжон тилига Мирзажалол Юсуфзода таржима қилган).

Буюк форс-тожик шоирининг бу фикри Навоийнинг ижодига жуда буюк баҳо бўлиб, унинг «тақлидчилиги» ҳақидаги фикрни тамом рад этади.

Шу 1926 йили Навоийнинг таваллудига беш юз йилт тўлиши шарафига юбиярнинг «Вақфия» ҳамда «Муншаот» асарлари, шунингдек, Ҳусайн Бойқаро девони чоп этилади. Озарбайжон Давлат нашриёти бу китобларни айни замонда Биринчи Бутуниттифоқ туркологлар съездига ҳам совға ўлароқ тақдим қилган.

1925 йили Туркманистон Давлат нашриёти «Амир Алишер Навоий» китобини нашр қилди. У адабиётшунос ва шоир А. Қулмуҳамедов томонидан туркман тилига таржима қилинган «Мұхокаматул луғатайн» бўлиб, кириш сўз, Навоийнинг қисқача таржимаи ҳоли ва баъзи изоҳлар билан таъминланган. Акад. А. Самойлович шу китобга ёзган тақризида «Мұхокаматул луғатайн» туркӣ ҳалқлар ўртасида кенг тарқалган асар эканини уқтиради ва Ашурали Зоҳирӣ ҳам унинг 1917 йили литографик нашрини амалга оширганини айтади.

А. Қулмуҳамедов таржимасининг туркманча тўла номи: «Амир Алишер Навоий. Мұхокаматул луғатайн. Турк ва форс дилларини дангашдириб, турк дилининг бойлигини кўргазан бир китобдир». Шуниси қизиқки, таржимон «барлос уруғидан чиққан умумтурк шоири Навоийни ўзбек ёки туркман деб эълон қилмаслик керак», дейди.

Навоий меросини чуқурроқ ўрганишга бағишлиган китоблардан яна бири ва илмий жиҳатдан жиддийроғи 1928 йили Ленинградда рус тилида босилиб чиққан «Мир-Али-Шир» шарқшуносликда сезиларни из қолдирди. Китобда А. Н. Самойловичнинг «Ўрта Осиё — туркӣ адабий тил тарихига доир», Е. Э. Бертельснинг «Навоий ва Аттор», А. А. Ромаскевичнинг «Янги чифатой-форс луғати» ва В. В. Бартольднинг «Мир Алишер ва сиёсий ҳаёт» мақолалари бор. Шуни алоҳида таъкидлаш зарурки, Бартольднинг ўнлаб шарқ қўллэзмаларини ҳамда чет эл ориенталистларининг ишларини чуқур ўрганиш асосида тўплаган тарихий фактлари мақоланинг қимматини оширган. «Мир Алишер ва сиёсий ҳаёт» кейинчалик Навоий ҳакида ёзган жуда кўп олимларга нодир манба бўлиб хизмат қилди. Е. Э. Бертельснинг мақоласи эса Навоий ижодининг мустақиллиги ва оригиналлигини далиллар билан исбот этар эди.

Рус совет шарқшунослари Октябргача бўлган ўзбек маданияти ва адабиёти тарихини ўрганиш ишига катта ҳисса қўшдилар. Академик В. В. Бартольднинг «Туркистон тарихи» (1922), «Туркистон маданий ҳаётининг тарихи» (1927), «Улуғбек ва унинг даври» (1918), А. Н. Самойловичнинг СССР ФА докладлари тўпламла-

рида: «Ўрта Осиё — туркий адабиётдан материаллар» сериясида нашр этилган Амирий ва Лутфий туюқлари га, Атоий ижодига ва «Таашшуқнома»га бағишиланган мақолалари ва қатор тақризлари, А. Ю. Якубовскийнинг Ўрта Осиё тарихига оид бир қатор асарлари, А. А. Семенов, Е. Э. Бертельс ҳамда бошқа рус шарқшунос олимларининг асарлари ўзбек адабиётшунос ва танқидчиларига ўрнак бўлди.

Тажрибали шарқшунослар ўтмишни яхши билмай туриб ҳозирги замонни баҳолаш мумкин эмаслигини, маданиятлар, адабиётлар алоқаси бир бутун ҳодиса эканини кўрсатдилар. Е. Э. Бертельс «Ўзбек пролетар адабиёти чиғатой адабиётидан эволюция йўли билан ўсиб чиқади деб тахмин қилиш беҳуда бўлур эди... Шу билан бирга, у адабиётдан мутлақо узилиб қолиш мумкин ҳам эмас; узилиб қолиш фақат бегона намуналарга тақлид қилишини келтириб чиқараради... Бошқа чора йўқ, поэзияни йўқдан бор қилиб бўлмайди. Ўрта Осиёни бирлаштириб турган адабий алоқаларни узуб қўёлмаймиз»<sup>159</sup>, деб жуда тўғри ёзган эди.

Юқорида келтирилган фактлар шуни кўрсатадики, ўзбек, рус ва бошқа қардош халқларнинг шарқшунослари ташаббуси билан навоийшуносликнинг илк намуналари юзага келган эди.

\* \* \*

Ўзбек совет адабиёти классик меросдан фойдаланиши керакми ё керак эмасми, деган масалага ёндашишда салбий моҳияти жиҳатидан бир-биринн тўлдирадиган икки хил усулга дуч келамиз. Бири ўтакетган вуљгари-заторлик (Ж. Бойбўлатов) бўлса, иккинчиси миллатчилик (В. Маҳмуд) эди. Вадуд Маҳмуд «Бу кунги шеърларимиз ва санъаткорларимиз»<sup>160</sup> деган мақоласида ўтмиш ва ҳозирги адабиёт ўртасидаги ижодий алоқалар масаласига тўхталиб, ўтган асрлардаги «буюк адиб ва шоирларимиз фикрий ҳаёт эътибори билан ислом динига ва унинг жавоҳири бўлган исломий тасаввуфга мансуб бўлганидан» уларнинг поэтик ижоди ҳам шу тасаввувчилик доирасида қолган эди, дейди. В. Маҳмуд классикларимиз ижодидаги реалистик ҳаёт манзаралари, реалистик образларни, айниқса Лутфий ва Навоийлардан бошлаб етакчи тамойилга эга бўлган антиклерикал

<sup>159</sup> Научная мысль. 1930. № 1. С. 17—22.

<sup>160</sup> Маориф ва ўқитувчи. 1925. 4-сон, 55—58-бетлар.

мотивларни, улар меросининг моҳиятини ташкил қилувчи инсонпарварлик ва маърифатпарварликни англамайди.

Муаллифнинг фикрича, совет адабиётининг ўтмиш адабиёт билан «ҳеч қандай алоқаси йўқ, эскидан ажралган». У давом этиб, ёзади: «Эски назм: девон йўли, ғазал, қасида, маснавий, мураббаъ... каби шакллардан иборат. Эски тил ислом руҳини тараним этган, исломий истилоҳ ва таъбирлар билан тўлдирилган ва араб-форс маданиятининг ўртага отган фикр ва қолибларини ўзига кўп олган...»<sup>161</sup>. Бинобарин, совет адабиёти улардан фойдалана олмайди — мана В. Маҳмуднинг холосаси.

Йигирманчи йилларнинг иккинчи ярмига келиб адабий мерос масалаларини муҳокама қилишда ёш танқидчи ва ёзувчилар ҳам иштирок этадилар. Уларнинг бир қисми фаолиятидаги устун тенденция — нигилизм эди. Шонр ва танқидчи Юнус Латиф «Пролетар адабиёти»<sup>162</sup> номли мақоласида «...ХV асрдаги адабиёт сарой адабиёти бўлиб, ўша вақтдаги шоирлар феодал синфининг куйчилари эдилар... Инқилоб эски адабиётнинг соҳтакор эканлигини очиб берди», — деса, бошқа бир ўринда ўзбек халқининг атоқли шоирлари ва адаблари яратган туғма адабиётни форс, араб таъсиридагина шаклланган қилиб кўрсатади.

Унинг назарича, «Чигатой адабиёти, яъни турк адабиётининг энг порлоқ (олтин) даври форс, араб адабиётининг таъсирида ўси. Энди вазн, оҳанг, шаклда араб-форс адабиёти таъсирида қолган эски классик адабиётимиздан фойдаланиш мумкинми? Эски адабиётимизнинг шакллари ХХ асрда қўлланишга яроқсизлар... Пролетар маданияти эски маданиятдан тамом бўлак... Шундай бўлгач, эски адабиётимизнинг шаклларида бир асар яратиш ва улардан тўла фойдаланиш адабиётимиз учун лойик эмас»<sup>163</sup>.

Мунозарага киришганлардан Ботир «Биз эски адабиётни шакл-мундарижаси билан йиқитиб, ўрнига соғлом пролетар адабиётини туғдирамиз»<sup>164</sup> даъвоси билан чиқади.

Меросга ўта нигилистик муносабат, ҳатто уни ҳақорат қилиш даражасигача боришнинг мана ман деб турган намунаси Ж. Бойбулатовнинг «Ўзбек адабиёти на-

<sup>161</sup> Ўша жойда.

<sup>162</sup> Ёш ленинчи, 1928. 6 апрель.

<sup>163</sup> Қизил Ўзбекистон. 1928. 5 октябрь.

<sup>164</sup> Ўша жойда.

муналари» хрестоматиясини баҳолашида равшан кўринди.

Ж. Бойбулатовнинг бу янги ҳуружига сабаб «Ўзбек адабиёти намуналари»да меросга марксча-ленинча қарашнинг тарғиб этилиши эди.

«Ўзбек адабиёти намуналари» нима учун ўқувчиларга тақдим этилаётгани Отажон Ҳошим томонидан ёзилган «Сўз боши»<sup>165</sup>да анча муфассал изоҳлаб берилган. Отажон В. И. Лениннинг революция фақат ҳоким эксплуататор синфларни тугатиш билан чегараланмайди, галдаги мураккаб вазифалар қаторида буржуа маданиятидан танқидий фойдаланиб социализм қуриш иши туради, деган фикридан гап бошлайди. О. Ҳошим доҳийнинг комсомолнинг III съездидан пролетар маданияти қандай яратилиши тўғрисида қилган докладидан парчалар келтиради.

Муаллиф В. И. Ленин таълимотларига суюниб, яна шундай ёзади: «Пролетар адабиёти, пролетар маданияти тузиш учун эски адабиётни, эски маданиятни яхшилаб билиш, сўнгра уни «бошқатдан ишлаб чиқиши» керак. Чунки эски меросда кўп нарса феодализм, капитализм фикрига боп қилинган, бу жамиятларда ҳукм сурган синфларнинг руҳи киритилгандир... Эски маданий меросини яхши билиш, бунинг учун ундан керакли-көрекли жойларини олиб тўплаш ва тўплаганлари устида ишлаш — мана бу пролетар адабиёти, пролетар маданиятини тузиш учун асосдир. Бошқалар қаторида бизда ҳам бу иш бошланди»<sup>166</sup>.

Ийнрманчи йиллар рус адабий танқидидаги шиддатли нигилист Родовни эслатадиган Ж. Бойбулатов «Намуналар»ни тузган Фитратни ҳам, сўз боши ёзган Отажонни ҳам бўралаб сўкишга бошлади. Унинг «Ўзбек адабиёти ва чигатойчилик»<sup>167</sup> номли мақолалари бошидан охиригача классиклар ижодини қоралашдан ва уларни ташвиқ қилувчиларни сиёсий-гоявий қўпорувчиликда айблашдан иборат. Илмий баҳслашув доирасидан ғайриахлоқий йўлга тушиб кетган танқидчи Бойбулатов Отажоннинг эски маданий меросни яхши билиш ва танқидий қайта ишлаб, пролетар адабиётини яратишда

<sup>165</sup> Бу баъзи қўшимчалар билан «Пролетариат ва чигатой адабиёти» номи остида «Маориф ва ўқитувчи» журналининг 1928 йил 4-сонида босилган.

<sup>166</sup> Уша жойда, 5-бет.

<sup>167</sup> Қизил Ўзбекистон. 1929. 13, 14 ва 15 май; Байбулатов Д. Ж. Пантуркизм под флагом «Литературного наследия» узбеков, журнал «СААПП». 1931. № 1. Бу мақола кейин алоҳида брошюра қилиб ҳам босилган.

фойдаланиш лозимлиги ҳақидаги мулоҳазаларини келтириб, «Ҳошимов ўзбек пролетар адабиётининг пойдевори учун материални чигатой фирмасидан олади...», — дейди.

Уннингча, Яссавий, Боқирғоний, Сўфи Оллоёр, Дурбек, Лутфий, Навоий бир хил йўналишдаги, бир хил дунёқарашдаги шоирлардир. Бинобарин, уларнинг ҳаммаси «мавҳумий фалсафа, диний маънавият ва тасаввур маслагининг бориб турган вакиллари... Шерозий, Жомий, Румий каби мутасаввуфларга эргашиб кетган»<sup>168</sup> шоирлардир. Танқидчи Навоийни чигатой шоирларининг отаси деб сифатлаб, «Чор девон»га ёзилган «Дебоча»даги мен ҳар сўзни ҳамд ва наът билан бошлайман» қабилидаги сўзларни сохталаштириб тушунтиради.

Навоий газалларидан биридаги:

Ишқ аҳли иши топди бари васл ила чора  
Бечора Навоий ғаму ҳижронга йўлиқди,—

байтини олиб, қуйидагича изоҳлайди: «Бизнингча, Шерозий, Жомий, Румий кабилар худонинг даргоҳига эришдилар. Аммо Ҳусайн Бойқаро министри Навоий бу қисматдан маҳрум қолди. деган сўз бўлади»<sup>169</sup>.

«Намуналар»да берилган «Тузувчидан бир-икки сўз»-нинг охирида «Маълумдурки, бизнинг классик адабиётнимизда тизим усули (вазн системаси — М. Ю.) аруздир. Аруз эса арабча-форсча каби «мад»ли (узун-чўзғили) тилларга қаратиб тузулган ва шунга кўра инкишоф этгандир. Бизнинг тилда «мад» бўлмаса ҳам аруznинг талабига кўра бир кўп чўзғиларни (бўғинларни — М. Ю.) узайтиб («мад»ли қилиб) ўқиш мажбурияти бор»<sup>170</sup>.

Адабий мероснинг ашаддий рақиби Бойбулатов ҳозир келтирилган фикрларга мәмнуният билан суюниб, хулоса қиласи: «... Қисқаси, чигатой нафис адабиёти мазмун жиҳатидан тасаввуфлик билан, шакл жиҳатидан араб ҳам форслик билан суғорилгандир. Чигатой шоирларидан — бу мутасаввуфлардан, хаёлпарастлардан, символистлардан ва бошқалардан ўзбек пролетар адабиёти учун қандай бўлса ҳам, бир нарса олишимиз шубҳалидир»<sup>171</sup>.

«Намуналар» авторини ва Отажон Ҳошимни танқид қилиш жараёнида Бойбулатов маданий мерос ҳақидаги маркеча-ленинча таълимотни шу тариқа қўпол равишда

<sup>168</sup> Қизил Ўзбекистон. 1929. 13 май. 110-сон.

<sup>169</sup> Қизил Ўзбекистон. 1929. 14 май.

<sup>170</sup> Ўзбек адабиёти намуналари. 12-бет.

<sup>171</sup> Қизил Ўзбекистон. 1929. 14 май.

бузади. У коммунизм башарият дунёси яратган билимларнинг ҳаммасини эътиборсиз қолдирмай, диққат билан ўрганиш натижасида пайдо бўлганичи, пролетар маданияти бизгача етиб келган маънавий бойликларни яхши билиш, унга танқидий назар билан ёндашиш ва янги жамиятга хизмат қиласидаган томонларидан фойдаланиш орқали юзага келишини тасаввур қилолмайди.

Ж. Бойбўлатов мақолаларида бир қатор асосланмаган айбларга жавоб бермаслик мумкин эмасди. Бинобарин, Отажон «Адабий мерос ва чигатой адабиёти»<sup>172</sup> номли икки мақола билан мунозара га киришди. У Бойбўлатов мақолалари «илмий бир мақола эмас, балки қўпол бир фельетондир. Адабий мерос ва чигатой адабиёти каби муҳим масалаларни Бойбўлатов каби ҳал қилиш мумкин эмас», — деган, шахсан ўзи адабий меросни тушуниш ва изоҳлашда Ленин кўрсатмаларига амал қилганини айтади.

Отажон ўз жавобида «Сўз боши»даги айрим ўринларни яна конкретлаштиради ва оппонентнинг бузиб талқин қилган жойларини тузатади. Меросдан фойдаланишнинг бир неча босқичлари борлигини, улар: 1) маданий меросни диққат билан ўрганиш; 2) ундан керак жойларни танлаш; 3) танланган материалларни марксистик нуқтаи назардан қайта ишлаб чиқиш эканини таъкидлайди. «Эски адабиёт ҳам маданият пролетар маданияти ва пролетар адабиётини тузиш учун асосдир», деган фикрдан шу уч босқични илмий бир система асосида ўтиш англашилажагини айтади.

Мунозара жараёнида классик адабиётни баҳолашда аввал йўл қўйган хатоларини тузатишга ҳаракат қилиб: «Чигатой адабиёти кўп бадиий намуналар бергандир, бу адабиётнинг бир қанча санъаткор шоирлари бор»<sup>173</sup> лигини эътироф қиласиди. Лутфий, Навоий ва бошқа сўз усталари шеърларидан мисоллар келтириб, бадиий маҳорат масалаларига тўхтайди. Унинг фикрига кўра, «ҳозирги ўзбек пролетар шоирларининг камчилиги ҳам шу томонда», яъни маҳоратнинг етишмаслигида. Ўз фикрини яхшироқ тушунтириш ва қандай қилиб бадиий етук асарлар яратиш санъатини эгаллаш мумкинлигини уқтириш ниятида В. Маяковскийнинг «Шеърни қандай ёзиш керак?» номли китобидан мисоллар келтиради.

Афсуски, Отажон мақоланинг сўнгига янглиш хулосалар чиқаради. Салафларимиз ижодидан олинган ми-

<sup>172</sup> Қизил Ўзбекистон. 1929. 16 ва 17 июль.

<sup>173</sup> Қизил Ўзбекистон. 1929. 16 июль.

солларни изоҳлаб: «Мазкур намуналарда мазмун жуда кучсиз... шакл мазмун устидан ҳукм суради»<sup>174</sup>, деди.

Бундай танқидий чиқишилар умумий ишимиизга зарар келтиришидан жамоатчиликни огоҳлантириб, партия 1925 йил 18 июн резолюциясида: «...Марксистик танқид ўз орасидан коммунистликни пеш қилиб мағуруланишнинг ҳар қандайини, даъвоси баланд ва лекин чаласавод ана шундай мағурурликнинг ҳар қандайини тамомила кескин суратда чиқариб ташлаши керак. Марксистик танқид ўз олдига ўқиш, ўрганиш шиорини қўймоғи керак...» дейишига қарамай, меросни ур-йиқит қилувчилар ҳали тугамаган эди.

Биринчи беш йиллик планда бажарилиши кўзда тутилган улуғвор вазифалар, совет халқида жўш уриб турган ғайрат ва ташаббус, ўтмишнинг орқага судровчи сарқитларига қарши шафқатсиз кураш, ҳаётнинг барча соҳаларидағи ижодкорлик руҳи ўзбек адабиёти ва адабий танқидининг тематик доирасини белгилаб турарди. Беш йилликни куйловчи кўплаб бадиий асарлар яратилди. Улар адабий танқид учун бой материал ва мунозара майдони бўлиб қолди. Ана шу замонавий масалалар атрофидаги фикр олишувларда, ўз-ўзидан маданий мерос проблемаси ҳам муҳокама қилинар, таассуфки, у ҳамон ўзига лойиқ тўла ижобий баҳони ололмаётган эди. Буни Зиё Саид, Абдураҳмон Саъдий, Умаржон Исмонлий, Юнус Латиф мақола ва тақризларида очиқ кўриш мумкин.

Меросни рад этувчи танқидчилар учун муштарак бўлган ҳусусият шуки, улар Октябрдан кейин ўтмишга айланган ва консерватив бўлиб қолган бадиий обидалар билан социалистик жамият манфаатларига яқин, келажакка ўзимиз билан олиб бориб кетадиган маънавий бойликларни бир-биридан ажрата олмайдилар. Натижада Навоий ва Яссавий, Бобир ва Убайдий, Фазлий ва Махмур бир хил ғоявий-эстетик позицияда турган шоирлар сифатида талқин этилади ва феодал адабиёти намояндлари деб таърифланади.

Танқидчи ва драматург Зиё Саид «Кураш мадҳияси учун»<sup>175</sup> мақоласида ёш совет адабиётининг кун тартибida турган муҳим вазифалари ҳусусида гапириб, поэзияда кузатилаётган баъзи нуқсонларга ҳам тўхтайди. У «беш йиллик планнинг бутун руҳлари, барча ютуқ ва камчиликларимиз нафис адабиётимизда... кўркам сўзлар

<sup>174</sup> Қизил Узбекистон. 1929. 17 июль.

<sup>175</sup> Қизил Узбекистон. 1929. 6 сентябрь.

билин ойдинланиши, миллатчиликка қарши интернационализм идеяси санъат-адабиёт асарларида ишчи-дехқон кўпчилигининг психологиясига, қонига сингдирилиши лозим...» лигини айтгандан кейин «бизда ҳозирги жараён эскини синдириш, кураш», —дейди.

Зиё Сайд фикрича, эскини синдириш фақат ижтимоий ҳаётда, экономикадагина рўй бериб қолмай, маданий меросга ҳам тааллуқлидир. Адабиёт ва санъат аҳлларининг ижодида бу кураш акс этмаётир. «Музикамиз ўзининг муҳофазакор (консерватив — М. Ю.) муҳиблари қўриқчилигига эски традицияларни сақлаш, ҳозирги буюк қурилиш даврининг динамикали суръати қарши-сига ўлик «муножот»ларни, жонсиз «иаво»ларни кўндаланг қўйиш билан овора».

Инқилобдан кейинги йилларда маданий меросни ўрганиш билан анча жиддий шуғулланган Абдураҳмон Саъдий 1930 йилга келиб, «Кейинги йиллар ичida баъзилар томонидан... классиклардан, яъни эски ёзувчиларнинг олдингиларидан ўрганиш, деган зарарли шиор ўртага қўйилди»<sup>176</sup> қабилидаги гапларни айтди. Лекин у шу нотўғри позицияда туриб қолмади. Бир оз олдинга кетиб бўлса-да, айтиб ўтиш лозимки, проф. А. Саъдий 1934 йили нашр этилган «Ўзбек буржуа адабиёти» (XIX ва XX асрлар)<sup>177</sup> дарслигига кўпгина хато фикрларни тарғиб этиш билан бирга меросга бутунлай бошқача ёндашади. Китобдаги «Адабий мерос ҳам уни ўрганиш йўлими» деган парчада рус ёзувчилари ўзларининг буржуа жамиятидан қолган адабиётлари билан танишиб, унинг фойдаланадиган нуқтларидан кераклигини олганлари каби биз ҳам ўзбек буржуа жамиятидан қолган адабий меросимизни ўрганиз, дейилади. Автор В. И. Лениннинг комсомолнинг III съездидаги докладида мерос тўғрисида айтган гапларни келтириб, давом этади: «Лениннинг мана шу чуқур маъноли таълимотини биз керак, умуман бутун эски адабиётларни ўрганганда бўлсин ва керак шулар

<sup>176</sup> Қизил Ўзбекистон. 1930. 6 август.

<sup>177</sup> Ушбу дарслик Ўзбекистон Xalq Maorif Комиссарлиги томонидан 1933—1934 йил учун тасдиқланган программага мувофиқ тузилган. Тақризчи Ж. Бойбулатов, XIX аср ҳисобидан алоҳида фигура сифатида Муқимий берилган. Шоир мадрасада ўқигани учун «руҳоний шоирлардан» дейилган бўлса-да, «Танобчилар» тўғри таҳлил қилинади. Иккинчи боб XX аср шоирларидан баҳс этади. Бобнинг кириш қисмидаги жадидчиликнинг пайдо бўлиши, унинг (гўё характеристерли) белгиларни устида сўзланади. Сўнг Камий, Беҳбудий, Тавалло, Ҳамза, Абдулла Қодирий, Сидқий Хондайликий ижодига тўхталади.

ичинда ўзбек буржуа адабиётини ўрганганимизда бўлсин, ҳар вақт эсимизда тутиб боришимиз лозим. Ҳар бир маданий-адабий меросни раҳбарларимиз бўлган Маркс, Энгельс, Ленин... таълимотлари, яъни пролетариат нуқтаи назаридан қараб, танқид қўзи билан ўрганишимиз лозим»<sup>178</sup>.

Иигирманчи йиллардаги адабий ташкилотлар «Қизил қалам», «Ёш ленинчى» газетаси қошидаги адабий тўгарак, ниҳоят ЎзАПП (1930) адабий меросга бир хилда ёндашмади. «Қизил қалам» таъсис этилган вақтдан бошлаб меросни актив равишда ташвиқ қилишга бошлади. 1928 йили чоп этилган биринчи «Мажмуя»да бу равshan кўринди. «Мажмуя»га Отажон Ҳошим томонидан ёзилган «Пролетариат адабиёти ва адабий мерос» номли кириш мақолада меросга марксча-ленинча муносабат тўғри ёритилди. Автор Ленин фикрларига асосланиб, «пролетариат капитализм даврида маҳкум синф бўлганидан ўз санъатини, адабиётини мукаммал туза олмаган. Шунинг учун унга ўз ҳокимияти даврида тузишга тўғри келади»,— деб таъкидлайди... «Пролетариат санъати, адабиёти осмондан тушмайди, ёки ердан пайдо бўлиб қолмайди... янгиликлар ихтиро қилиш ўтган жамиятларнинг бизга мерос қилиб ташлаб кетган неча минг йиллик тажрибалари орқасидан юзага»<sup>179</sup> чиқади. Шундай экан, мерос устида «неча йиллар ҳартибли равишда колектив куч бўлиб ишлаш керак».

Бу назарий йўлланмадан кейин проф. А. Самойловичнинг «Навоий тўғрисида Европа олимлари» ва Фитратнинг «Умар Ҳайём» мақолалари босилган. Ҳар иккиси ҳам ўз даври учун муҳим илмий-маърифий аҳамиятга эга эди. «Мажмуя»нинг Ҳамза Ҳакимзода Ниёзий хотирасига бағишланган II китобида<sup>180</sup> аввал қабул қилинган йўл давом эттирилади. Отажоннинг «Жадид адабиёти тўғрисида», Абдурауфнинг «Чифатой адабиёти», Поповнинг «Адабиёт техникаси асослари» каби тадқиқотлари, улардаги меросга оид гаплар шундан далолат беради.

ЎзАПП фаолияти кўпроқ меросни қоралаш билан характерланади. Ташкилотнинг бош секретари Умаржон Исмоилов «Қизил қалам»ни қоралаб, у «бутун

<sup>178</sup> Уша китоб, 9-бет.

<sup>179</sup> «Қизил қалам» мажмуаси. I китоб, Самарқанд. 1928. 7—8-бетлар.

<sup>180</sup> «Қизил қалам» мажмуаси. II китоб. Самарқанд. 1929. Тошкент.

умрида чигатој адабиётини марксизм билан бўяб, амалга татбиқ қилишга тиришди... «Қизил қалам» эски шоирлардан Навоий, Умархон каби феодализм ва капитализм шоирларининг усулларини текшириб, ёш ёзувчиларга ундан дарс олишни ўргатди. Символист шоир Навоийни энг юқори даражага қўйиб, унинг бутун методларини ўрганишга қистаб, шунинг билан ёш ёзувчиларга символистикани ўргатиб келдилар»<sup>181</sup>.

ЎзАППнинг фикр афкори бўлган «Қурилиш» журнали эгаллаган мавқе ҳам асосан меросга нисбатан оппозицияда бўлди.

Қисқаси, узоқ йиллар давомида Навоий, Машраб, Турди, Муқимий ва бошқа салафларимизни «ҳозирги замон кемасидан» улоқтириб ташламоқчи бўлганлар озмунча эмасди. Нигилизм таъсирида бўлган ёшлар классикларга менсимаслик назари билан қараб, улардан ўрганиш ўрнига мустақил йўл тутмоқчи бўлдилар. Ўтмиш тажрибаларни қадрламаслик касали қарийб ўттизинчи йилларнинг биринчи ярмигача давом этди.

Шу нарса диққатга сазоворки, адабий танқид ахлари, «маданий мерос бизга керакми ёки керак эмасми?» деган саволга гоҳ ижобий, гоҳ салбий жавоб бериб келаётган бир вақтда бадиий тажрибада бу аллақачон ижобий ҳал қилинганди эди. Айниқса, янги мазмунни традицион формаларда ифодалаш зарурати эски вазн ва жанрларга мурожаат қилишга олиб келди.

Бу табиийдир. Маълумки, реалистик санъат ва адабиётда мазмун ва форма масаласи диалектик алоқадаги ҳодисадир. Форма мундарижа билан белгиланадиган мазмунли форма бўлса-да, баъзан ўз специфик хусусиятлари билан мазмундан фарқ қиласди. Форманинг нисбатан мустақил ролига баҳо бермаслик адабиётнинг эмоционал таъсир кучини тушунмасликка олиб келади. Шуни ҳам унутмаслик керакки, эски формалар бир неча асрлар аввал яратилиб, узоқ вақт давомида бадиий ижод тажрибасида қўллаб келиниши натижасида ёзувчи ва ўқувчиларнинг руҳига сингиб кетган. Бинобарин, санъаткор ўз ўқувчиларига тушунарли бўлиш, уларнинг қалби ва зеҳнига таъсир қилиш учун одат бўлиб келган тасвирий воситалардан фойдаланмаслиги мумкин эмас.

Салафларимиз ижодига ҳурмат билан қараб, улар қўллаган шеърий шаклларга мурожаат айниқса совет адабиётининг кекса намояндалари Оразий, Фақирий,

<sup>181</sup> Қурилиш. 1931. 3-сон. 3—5-бетлар.

Сўфизода, Чокар, Ҳамза, Айний, А. Мажидийларнинг ижоди учун характерлидир. Уларнинг ўткир революцион ғояларни ифодаловчи асарларида ғазал, мухаммас шаклидан ва аруз вазнидан кенг фойдаланилди. Ҳамзанинг «Ўзбек хотин-қизларига» ғазали кўпчиликка аллақачондан бери таниш усуlda ёзилган эди. Айний инқилобни, озодликни қутлаган эҳтиросли шеърларида мустазод шаклини қўллади, Сўфизода ишчи-дехонлар баҳтини куйлаганда мухаммасга мурожаат этди.

Давримизнинг ёш шоирлари Собир Абдулла, Насими, Нориншилпиқ, Ноил Рошидоний, «Макнун» ва яна кўп қалам аҳлларининг сатирик шеърлари ҳам традицион шаклларда ёзилган. Масалан, Танқа (С. Абдулла) диндорларни фош қилувчи сатираларидан бирини шундай бошлайди:

Алдоқчи эшон, мулло сарсона бўлиб ўлсун,  
Қилса яна эшонлик афсона бўлиб ўлсун...

Мойил Наманганий номли шоир бюрократни ўз тилидан гапиртиради:

Ениб лавкамни шўрол-рга хизмат қилмасам бўлмас,  
Олиб бекорга ойликни, маишат қилмасам бўлмас...

«Ҳазилкаш» тахаллусли бошқа бир шоир майпарастликни, безориликни танқид қилади:

«Масти лояъқил бўлиб, шовқин солиб, айтиб қўшиқ,  
Юрмаганлардан бўлур озурда бу доно шароб...

Буларга ўхшаш мисолларни кўплаб келтириш мумкин. Умуман ўзбек совет адабий танқидидаги идеологик курашлар марксча-ленинча инқилобий ғоялар ғалабаси билан якунланганидек, меросни танқидий ўрганиш ва ишчилар синфи манфаатлари нуқтаи назаридан қайта ишлашда ҳам марксизм-ленинизм тўғри йўл кўрсатиб турувчи компас бўлди. Адабиётнинг кишилик жамияти тарихидаги ролини, мерос ва ворислик алоқалари бир-биридан узилмас ҳодисалар эканини марксистик нуқтаи назардан тушуна бошлаган танқидчилар етакчи кучга айланди.

Боту «Пролетариат адабиёти тўғрисида»<sup>182</sup> мақоласида шундай ёзи: «Пролетариат ҳокимияти даврида эскиликини бузишгина бўлмасдан янги дунё қуриш ҳам бўлади. Албатта янги маданият — пролетар маданиятини қуришда кишилик жамияти томонидан саноқсиз асрлар бўйича тўпланган маданий бойликлар бутунлай

<sup>182</sup> Коммунист. 1928. № 3. 47-бет.

иргитилмайди. Ҳеч бир синф ўз маданиятини қурганда жамият кучи билан вужудга келтирилган маданий бойликларнинг кулини кўкка совуриб юборган эмас. Пролетарнат ҳам капитализмдан социализмга кўчиш даврида жамиятдаги маданий бойликларни ўз қўлига олиб, уларнинг ярамас унсурларини йўқотади ва яхши унсурларини қўшиб, маданиятни юксалтиради». Танқидчи Анқабой ҳам худди шундай нуқтаи назарни ифодаловчи мақолалар эълон қилди.

Классикларимиз ижодидаги гуманизм ва халқчиллик, ватанга муҳаббат мотивлари, воқеликни чуқур аングлашга интилиш, зулмга қарши ва адолат учун кураш, порлоқ истиқбол орзуси, инсон эркини улуғлаш, антиклерикализм, ниҳоят, юксак бадий маҳорат — булар ҳаммаси замонамизга оҳангдош ғоялар ва ибрат мактаби эди. Ёш совет танқидчилиги айрим намояндалари қарашларида классик адабиётнинг бу ажойиб фазилатлари аҳамиятини тўла тушунган ва актив ташвиқ этолмаган бўлса ҳам, йигирманчи йиллардаёқ бир қатор танқидчи ва адабиётшунослар адабий мероснинг янги, социалистик маданият қуришда ўйнаши мумкин бўлган ижобий роли ҳақида аниқ тасаввурга эга эди. Бу эса адабий танқид ва адабиётшуносликнинг тўғри ривож йўлини топиб олганидан гувоҳлик беради.

## ҚИСҚАЧА ХУЛОСАЛАР

Асримизнинг йигирманчи йилларида Ўзбекистонда адабий танқид шаклланаётган янги ўзбек совет адабиётининг ютуқ ва камчиликлари фонида туғилди, ривожланди ва шаклланди. Ҳамза Ҳакимзода Ниёзий, Садриддин Айний, Абдулла Қодирий, Гафур Ғулом, Ойбек, Ҳамид Олимжон, Уйғун, Яшин, Абдулла Қаҳҳор ва улар қаторидаги ёзувчиларнинг ижодий маҳсулоти танқидий-эстетик фикрнинг туғилиши ва ривожланишига замин бўлиб хизмат этди.

Ёш адабий танқид ўз навбатида адабий-тарихий жараёнда актив роль ўйнади. Адабиётшуносликнинг оператив, илфор ва жанговар отряди бўлган адабий танқид йигирманчи йилларнинг адабий ривожига доир кўпгина асосий масалаларни кўтарди, адабий ҳодисалар, ёзувчилар ва уларнинг асарлари ҳақида муҳокама юргизди, уларга асосан тўғри баҳо берди ва шу йўл билан адабиётнинг тўғри ривож йўлидан боришига таъсир этди. Совет адабий танқидчилиги марксизм-ленинизм асосларини борган сари чуқурроқ эгаллаш йўли билан

бориб, Коммунистик партияning адабиёт ва санъат соҳасидаги сиёсатининг тарғиботчиси сифатида майдонга чиқди. Унинг вулыгар социологизм ва формализм характеридаги айрим хато ва камчиликлари ўрганувчилик даврининг маҳсулоти бўлиб, ўткинчи характерга эга эди. Адабий танқидчилик адабиёт ва санъатнинг социализм учун курашдаги актив ролини қувватлади ва буржуа миллатчилиги, гоясизлик эстетикаси қараашлари билан муросасиз кураш олиб борди.

Танқид — бадиий адабиёт кўзгуси. Ҳар бир ҳалқнинг сўз санъатига хос фазилат ва нуқсонлар ана шу кўзгуда равшан акс этади. Танқид — адабиётнинг ўзни англаш воситаси. Ўзини англаш қанчалик теран, қанчалик аниқ бўлса, бутун адабий жараён учун мезон бўлиб хизмат қиласи. Танқид адабиётни ўрганиш ва таҳлил қилишнинг олдинги мэрраларида тургани ҳолда ўзига ҳамнафас адабиёт замон биографиясини, замондошлар образини қандай яратётгани хусусида фикр юритади, «ҳаракатдаги эстетика» (В. Белинский) бўлган совет адабий танқиди методологик жиҳатдан марксча-ленинча назарий асосларга суюнади.

1917—1932 йиллар мобайнида, яъни 15 йиллик муддат ичидаги сифатларга эга бўла бошлаган ўзбек совет адабий танқиди мустақил жанрга айланди ва шакллана бошлади. Аммо бу осонликча рўй бермади. Бу давр, бир томондан, идеология соҳасидаги кескин синфий кураш, иккинчидан, жиддий изланишлар кетаётган, санъат ва адабиётга оид эски назарий тушунчалар истеъмолдан чиқиб, янги нуқтаи назарлар пайдо бўлаётган, терминологик ўзгаришлар рўй бериб турган, адабиёт ҳақидаги фан ҳаёт тақозоси билан бирданига келиб чиқаётган саволларга тезда жавоб тополмаётган чоқлар эди. Даврнинг энг пешқадам ва ижодий актив танқидчилари фаолиятида кўринган изланишлар, ноетуклик ва баъзи илмий-методологик хатолар ана шу конкрет тарихий шароит билан боғлиқдир.

Танқидчиликда учраган меросни тан олмаслик, вульгаризаторлик, марксистик эстетикани схематиклаштириш ва жўнлаштириш П. С. Қоган, В. М. Фриче, В. Ф. Переверзевларга эргашиш, РАПП таъсирига берилиш — ўсиш йўлидаги нуқсонлар эди.

Ўзбек танқидчилари марксизм-ленинизмнинг санъат ва адабиёт ҳақидаги таълимотини ўрганиш ва В. Белинский, Н. Добролюбов, Н. Чернишевскийлар адабий мероси билан танишиш, айниқса В. Плеханов, А. Луначарский, В. Воронский ва бошқа марксист

танқидчиларнинг асарлари воситасида марксча-ленинча эстетик таълимот билан қуролланиш оқибатида танқид ва танқидчи функциясини тўғри англаб олдилар. Профессионал танқидчилар Отажон Ҳошим, Олим Шарафиддинов, Раҳмат Мажидий, Сотти Ҳусайн ва улардан кейин ўз фаолиятини бошлаган Ҳ. Ёқуб, И. Султон, Б. Карим, Ю. Латиф, Ю. Султон, шунингдек танқидчилик билан шуғулланган ёзувчилар — Ҳ. Олимжон, Ойбек, Уйғун, Ф. Фулом, З. Сайд, Шайхзодаларнинг ўттизинчи йилларнинг бошидаги мақолалари марксистик таълимотга амал қилишга интилиш намуналариdir. Танқидий тафаккурнинг партиявиyllиги позициясини эгаллаш натижасида ўзбек совет адабий танқиди ҳар хил заарли тенденциялар — миллатчилик, вульгар социологизм, формализмга қарши курашда ғалаба қозонди.

Рус классик ва совет адабий танқиди ҳазиналаридан унумли фойдаланиш, қардош халқларнинг бу борада тўплаган тажрибаларидан ибрат олиш туфайли Ўзбекистон танқидчиларининг савиаси ўсди. Улар бадиий адабиётни конкрет ҳаётда рўй бераётган ижтимоий-иқтисодий ва маданий-тарихий фактларга қиёсан ўрганишга интилдилар. Ёзувчилар эътиборини замонавий материалга қаратиб, Магнитогорск, Турксиб, ДнепроГЭС сингари даврнинг оламшумул тарихий аҳамиятга эга қурилишларидан илҳомланишга ва социализм қурилишининг актив иштирокчилари бўлишга чакирдилар.

Адабий танқидда кўринган яна бир фазилат — бадиий асар таҳлилида шакл ва мазмун бирлигига диққат қилиш эди. Агар дастлабки вақтларда муайян асар темаси ва сюжетигина айтилиб, бадиий форма кўпинча тилга олинмаса, энди танқидий асарларнинг кўпчилигида ғоявий мазмун қаторида композиция, стиль, тасвирий воситалар бирликда баҳоланадиган бўлди. Бадиий тилга оид мунозаралар уюштирилиб турди.

Етакчи танқидчиларнинг мақола ва тақризлари кўпчиликда қизиқиш уйғотадиган бўлди. Бошқача айтганда, танқид ижтимоий тафаккурни шакллантирувчи воситалардан бири бўлиб қолди. Танқидий мақолаларнинг жамоатчилик томонидан ўқилиши ўз навбатида у ерда анализ қилинган асарларга китобхонлар диққатини тортишга, оммалашувига сабаб бўлди. Танқид ёзувчиларга ғоявий-эстетик етук шеърлар, ҳикоялар, драмалар яратишда маслаҳатчи, ижодий ҳамкор бўла бошлади. Ёзувчиларнинг новаторлик борасида самара-

ли изланишлари, турли янги жанрлар борасидаги изланишлари қўллаб-қувватланди.

ВКП(б) Марказий Қомитетининг 1932 йил 23 апредла чиқарган «Адабий-бадиий ташкилотларни қайта қуриш тўғрисида»ги қарори «тамом партиявий бўлган адабиёт ва театр танқидининг ўсиши учун зарур бўлган ҳамма шароитларни туғдирди. Марказкомнинг қароридан кейин ўтган йиллар ичida танқидчи кадрларнинг асосий кучлари тўпландилар...» (Р. Мажидий). Танқидчилик маданияти бир қадар юқори кўтарилди. Булар барчаси партиянинг чидам билан системали равишда олиб борган тарбиявий иши ва узоқ давом этган мураккаб йўлнинг зафарли оқибати эди.

Алексей Сурковнинг совет адабий танқидига нисбат берилиши мумкин бўлган қуидаги сўзлари характерли: «Бугунги «социализм даврининг адабиётшунослари ва тарихчилари адабиётимиз йигирманчи, ўтизинчи ва қиринчи йилларда қандай бўлганини эсда тутиб, бизни коммунизм сари олиб кетаётган бугунги асфальт ўша йилларда оёғимиз остида бўлмаганини унутмасликларини истардим. Адабиёт курашларда туғилиб, турли хил балоларни бошидан кечирди. У ўзининг машақатли йўлида халқ билан бирга бўлиб, капиталистлар дунёси йўлимизга ташлаган минг хил тўсиқларни енгиб ўтди»<sup>183</sup>.

Асримизнинг йигирманчи йилларида Узбекистонда марксизм-ленинизм таълимотига асосланган адабий танқид туғилди ва ривожланди. Ўсиш даврига хос бир қанча хато ва камчиликларни истисно қилиб, айтиш мумкини, янги адабий танқид сўнгроқ «социалистик реализм» деб аталмиш янги ижодий методнинг асосий принципларини — социалистик идеалга суюниш, коммунистик ғоявийлик, халқчиллик ва бадиийлик принципларини тасдиқ этиш йўлидан бориб ривожланди. Танқидчилик ва адабиётшуносликда маданий ва адабий меросга марксча-ленинча муносабат ҳукмрон бўлиб қолди. Танқидчиликнинг касб бўлиб қолиши ва Отажон Ҳошим, Олим Шарафитдинов, Сотти Ҳусайн, Абдураҳмон Саъдий, Ҳомил Ёқубов ва бошқаларнинг професионал танқидчи сифатида майдонга чиқиши — даврнинг катта маданий ютуғидир.

Адабий танқиднинг шаклланиши ва ривожида ёзувчиларнинг роли катта бўлди. Йигирманчи йилларда

<sup>183</sup> Великий Октябрь и литературный процесс современной эпохи. М., 1979. С. 358.

Ойбек, Ҳамид Олимжон, Уйғун, Faфур Ғулом, А. Қодирий ва шулар қаторидаги совет ёзувчилари ўзларининг адабиётга ва адабий меросга алоқадор фикрлари билан Совет Ўзбекистонида марксча-ленинчада адабий танқиднинг ривожланишига асос солдилар ва матбуот органларида адабиёт бўлимларига раҳбарлик қилдилар («Янги Фарғона»да Ҳамза, «Муштум»да А. Қодирий).

Йигирманчи ва ўттизинчи йилларининг бошларида Ўзбекистонда тамом янги маданий ҳодиса — марксча-ленинчада адабий танқид туғилгани ва ўсганининг энг муҳим далили шуки, ўша даврнинг пешқадам танқидчилари томонида иштейдоди тан олинган ва ижодининг перспективлиги тасдиқ этилган ёзувчилар (Ҳамза, С. Айний, Абдулла Қодирий, F. Ғулом, Ойбек, Файратий, Уйғун, Яшин, Шайхзода, Собир Абдулла, Абдулла Қаҳҳор, Назир Сафаров ва шулар қаторидаги кўпгина ёзувчилар) ҳақиқатан ўзбек совет адабиётининг пойдеворини яратувчилар тариқасида адабиёт тарихидан ўрин олдилар.

Янги, марксча-ленинчада адабий танқид ўзи ҳам бундан кейинги ўн йилликлар мобайнида тўхтовсиз ўсиб, ҳозирги адабий-тарихий жараёнда катта ижобий роль ўйновчи факторга айланди.

ЎЗБЕК СОВЕТ  
АДАБИЙ ТАНҚИДИ  
СОЦИАЛИСТИК РЕАЛИЗМ  
ЭСТЕТИКАСИ БИЛАН  
ҚУРОЛЛАНИШ ЙЎЛИДА  
(1932—1941)  
АДАБИЁТ ЯНГИ БОСҚИЧДА

Ўттизинчи йиллар совет жамияти тарихига социализм асосларини қуриш даври сифатида киради. Қисқа бир муддат ичидаги совет халқлари ҳаётида оламшумул воқеалар юз берди: маданий инқиlob ғалаба қозонди, мамлакатимиз ёппасига саводхон, бошлангич, ўрта ва олий мактаблар билан таъминланган юрга айланди; мамлакатнинг иқтисодий ва маданий қиёфасини тамом ўзгартириб юборган беш йиллик планларининг муваффақиятли равишда амалга ошуви натижасида собиқ қолоқ Россия дунёнинг энг тараққий этган индустрисал мамлакатларидан бирига айланди. Қишлоқ хўжалиги соҳасида аҳамияти жиҳатидан революцияга тенг бўлган колективлаштиришнинг ғалабаси натижасида жаҳонда биринчи марта социалистик изда ривожланувчи қишлоқ юзага келди ва ривожланди. Бу оламшумул ютуқларнинг ҳаммаси меҳнаткашлар оммасининг революция томонидан уйғотилган кучи ва ташаббуси билан рӯёбга чиқди. Бу тарихий жараёнда одамларнинг маънавий-ахлоқий қиёфаси ўзгарди, меҳнатга коммунистик муносабат миллион-миллион кишиларнинг онгига устун бўла бошлади.

Бутун совет адабиёти шу тарихий ҳодисалар жараёнида ривож топди. Кўп миллатли совет адабиётининг ажралмас қисми — ўзбек совет адабиёти янги, аввалгидан баланд поғонага кўтарилиб, совет адабиётининг илғор отрядларидан бири бўлиб қолди.

Бу кўтарилиш даставвал адабий кадрларнинг ижодий фаолияти ошганида кўринди. Совет адабиётининг кекса авлоди — С. Айний, Абдулла Қодирий, Сўғизода, Авлоний ва бошқаларнинг совет даврига, социалистик қурилиш жараёнига бағишлиланган янги асарлари пайдо бўлди. Йигирманчи йилларда адабиётга кириб келган

Фафур Ғулом, Гайратий, Ойбек, Ҳ. Олимжон, А. Қаҳҳор, Яшин, Ойдин, С. Абдулла ва улар қаторидаги ёзувчиларнинг ижодий активлиги ошди, асарларининг гоявий-бадиий даражаси кескин равишда кўтарилди.

Уттизинчи йилларда адабиёт майдонига янги, қобиляйтли ёшлар кириб келдилар: Мақсад Шайхзода, Усмон Носир, Зулфия, Амин Үмарий, Султон Жўра, Ҳасан Пўлат, Назир Сафаров, Парда Турсун, Зиё Сайд, Зиннат Фатхуллин, Умаржон Исмоилов, Зафар Диёр ва бошқаларнинг ижоди ўзбек совет адабиёти хазинасини бойитди.

Поэзияда F. Ғуломнинг «Яловбардорликка», «Турк-сиф йўлларида», «Текстилькомбинат ва Миср эҳроми», Ойбекнинг «Дилбар — давр қизи», «Ўч», «Бахтигул ва Соғиндиқ», «Темирчи Жўра», Ҳ. Олимжоннинг «Бахтлар водийси», «Зайнаб ва Омон», «Ўзбекистон», Уйғуннинг «Назир отанинг ғазаби», «Гуласал», «Қуёш ўлкасига» асарлари пайдо бўлди. Бутун поэзиянинг пафоси — социализм даврини мадҳ этиш, коммунизм қураётган янги одамнинг фазилатларини тасвирлаш бўлиб қолди. Бу давр поэзиясининг етуклигидан яна бир намуна — лиро-эпик жанрнинг шаклланиши ва ривожи бўлди. F. Ғуломнинг «Кўкан», Ойбекнинг «Дилбар — давр қизи», «Ўч», У. Носирнинг «Норбўта» ва «Нақшон» асарлари бу даврда кенг ривож йўлига чиққан поэма жанрининг намуналари дандир.

Адабиётнинг етуклик йўлига киргани ва бу соҳада ютуқларга эришганининг яна бир кўрсаткичи — эпик жанрнинг шаклланиши ва ривожидир. Йигирманчи йилларда ҳикоялар ёзиш зарурлиги ҳақида кўпроқ гап борса («Ўтган кунлар», «Мехробдан чаён» каби романларнинг яратилиши нодир ҳодиса бўлса), ўттизинчи йилларда насрнинг катта ва кичик шаклларида гоявий-эстетик балогатдан гувоҳлик берувчи кўпгина асарлар яратилди. А. Қаҳҳор кичик насрый шаклнинг, Ҳ. Шамс, Ойдин, Абдулла Қодирий, Парда Турсунлар ҳикоя жанрининг моҳир вакиллари сифатида майдонга чиқдилар. Адабиёт аста-секин повесть жанрида ҳам ютуқларга эриша бошлиди. А. Қаҳҳорнинг «Қишлоқ устида ҳукм», А. Қодирийнинг «Обид кетмон», Ҳ. Шамснинг «Ота» повестлари шулар жумласидандир. Насрнинг ривожи ўзбек адабиётида романнинг янги намуналари яратилишига олиб келди. С. Айнийнинг «Қуллар», А. Қаҳҳорнинг «Сароб», Ойбекнинг «Қутлуғ қон» асарлари романчиликнинг ўзбек адабиётида юқори мавқе эгаллай олганининг далили эди.

Ҳамзанинг «Бой ила хизматчи» ва «Холисхон» драмалари ўзбек адабиёти учун янги бўлган драманинг ривожи қандай йўллар билан борганлигини аниқлашга катта ёрдам берди. 30-йиллар ўзбек драматургиясининг асосий материали — Туркистонда Совет ҳокимиятининг мустаҳкамланиши учун кураш (З. Сайд ва Н. Сафаровнинг «Тарих тилга кирди» драмаси) ёки совет даври кишининг янги қиёфаси (Яшиннинг «Номус ва муҳаббат» драмаси) бўлиб қолди. Драматургияда илк марта биографик жанрга асос солинди ва Ҳамза ҳаёти бунга олижаноб материал бўлиб хизмат этди. А. Умарий ва Яшиннинг «Ҳамза» драмаси буюк совет ёзувчиси образини драматургияга олиб кириш билан янги, совет ёзувчиси қиёфасининг шаклланишига катта туртки берди. Ҳамза — Октябрь революяси ва меҳнаткаш халқ тақдирни билан ўз ижоди ва ҳаётини чамбарчас боғлаган санъаткорнинг намунаси бўлиб қолди.

Ўзбекистонда болалар адабиётининг ривожи ҳам 30-йилларнинг характерли хусусиятидир. 20-йилларда ёқ айрим журналлар («Маориф ва ўқитчувчи») саҳифаларида болалар адабиётининг айрим намуналари пайдо бўлган бўлса, 30-йилларга келиб, болалар адабиёти ўзбек совет адабиётининг мустақил ва анча қувватли отрядига айланди.

Бу йилларда Иттифоқимиздаги барча миллий социалистик адабиётларнинг ғоявий-бадиий пафосида бир-бирига яқин жиҳатлар кўпайди; СССРдаги ҳамма тилларда кўп миллатли ягона совет адабиёти вужудга келганидан гувоҳлик берувчи намуналар пайдо бўлди. Шу жумладан, ўзбек ёзувчилари, баҳшилари, шоир ва драматургларининг ижоди ҳам рус тилига таржима орқали республикамиз доирасидан чиқиб совет халқларининг маънавий бойлигига айлана бошлади. С. Айний, А. Қодирий, Ойбек, А. Қаҳҳор романлари, F. Фулом, X. Олимжон, Уйғун шеър, поэма, қисса ва ҳикоялари ўзбек танқидчилиги қатори Бутуниттифоқ китобхони ва танқидчилиги назарига ҳам тушди.

Уттизинчى йилларда ўзбек адабий танқиди умумсовет адабиётининг ана шу янги кўтарилиши жараёнида тараққий этапи ва ижобий жараёнга ўз ҳиссасини қўшади. Кўп миллатли совет адабиёти ва адабий танқидчилигидаги кўтарилиши таъмин этишда ВКП(б) Марказий Комитетининг 1932 йил 23 апрелда «Адабий-бадиий ташкилотларни қайта қуриш тўғрисида» чиқарган қарори ҳал этувчи роль ўйнади (қарор «Партийное строительство» журналининг 1932 йил 9-сонида

эълон этилди.). Қарорда сўнгги йилларда социалистик қурилишнинг катта ютуқлари асосида совет мамлакатида адабиёт ва санъат соҳасида ҳам сон, ҳам сифат жиҳатидан юксалиш юз бергани, шу билан бирга, бир неча йил аввал, адабиётда ёт элементларнинг таъсири айниқса НЭП йилларида кучайган пайтда, пролетар адабиётининг кадрлари ҳали кучсиз бўлганда, партия пролетар ёзувчиларининг ва санъат ходимларининг мавқенини мустаҳкамлаш ниятида адабиёт ва санъат соҳасида алоҳида пролетар ташкилотларининг тузилишига ва мустаҳкамланишига ҳар тарафлама кўмаклашиб келганлиги қайд этилди.

Пролетар адабиёти ва санъати кадрлари ўсиб етишга улгурган: завод, фабрикалардан, колхозлардан янги ёзувчилар ва санъаткорлар майдонга чиқсан ҳозирги вақтда мавжуд пролетар адабий-бадиий ташкилотлари (ВОАПП, РАПП, РАМП ва бошқалар) рамкалари торлик қилиб қолмоқда ва бадиий ижоднинг жиддий равишда қанот ёзмоғига халал бермоқда.

ВКП(б) Марказий Комитети социалистик қурилишга хайриҳоҳ ҳамма ижодкорларни бирлаштириш ва уларни социалистик қурилиш вазифалари атрофига актив жалб этиш ниятида адабий-бадиий ташкилотларни қайта қуришни зарур деб топди. Қарорда айтилишича, аввалги пролетар ёзувчилари ассоциациялари (ВОАПП, РАПП) тугатилади ва ягона Совет Ёзувчилар союзи тузилади. Бу Союзнинг вазифаси — Совет ҳокимияти платформасини қувватловчи ва социалистик қурилишда иштирок этишга интилувчи ҳамма ёзувчиларни бирлаштиришdir.

Шу қарор асосида 1934 йилда бўлиб ўтган Бутуниттироқ совет ёзувчилари съезди СССР Ёзувчилари союзининг тузилганини тантанали эълон этди, адабиётнинг бундан кейинги ривожи йўлларини тайин этувчи жуда муҳим масалаларни муҳокама қилди ва СССР Ёзувчилар союзининг Уставини қабул этди. Уставда союзнинг вазифалари таърифлаб берилди. Совет адабиётининг етакчи ижодий методи — социалистик реализм экани тасдиқланди.

Қарор совет адабиётининг бундан кейинги ривожида асос солувчи роль ўйнади.

### АДАБИЙ ТАНҚИДДА ИЖОДИЙ АКТИВЛИК

Йигирманчи йиллар совет танқидчилигининг илк қадамлари даври бўлгани учун у адабий-тарихий жа-

раёнда баҳоли қудрат ижобий роль ўйнаган. Лекин танқидчиликнинг суст ривожланётгани кўпчилик томонидан эътироф этилган. Масалан, А. Қодирий «Ўтган кунлар» ҳақида С. Ҳусайннинг мулоҳазалари юзасидан фикр юритиб Ўзбекистонда адабий танқидчиликнинг ҳали адабий жараённинг ҳақиқий таъсирчан факторига айланмаганини қайд этишга мажбур бўлган. Совет ёзувчиларининг Биринчи Бутунитифоқ съезди (1934) ҳам адабий танқидни активлаштириш зарурлигини уқтириб ўтди. Адабиёт соҳасида бўлганидек, адабий танқид соҳасида ҳам ижодий активликни кенгайтириш лозим эди.

Ўттизинчи йилларда ҳам СССРда адабиёт ва санъат соҳасида янги кўтарилишнинг майдонга келишида Компартияning раҳбарлиги ва ғамхўрлиги ҳал этувчи роль ўйнади.

Совет ҳукумати ва Коммунистик партияning ёзувчилар ва танқидчилар ижодий фаолиятини оширишга қаратилган ғамхўрлиги адабиётнинг «яшаш майдони» бўлган матбуотни ривожлантиришда ҳам кўринди. 1933 йилда ўзбек тилида 178 ном остида газета ва журналлар чиқар эди. 1938 йилга келиб газета-журналлар 208 номда чиқа бошлади. «Ўзбекистон Шўро адабиёти» (кейин «Совет адабиёти»), «Ўзбекистон адабиёти ва санъати», «Советская литература народов Средней Азии», «Ёрқин ҳаёт», «Машъала» (кейин «Гулистон») каби журналлар таъсис этилди. «Қизил Ўзбекистон» ва «Ёш ленинчи», «Шарқ ҳақиқати», «Правда Востока» газеталарида республикамиз адабий ҳаёти ҳар қаҷонгидан кўпроқ ёритиб борилди. 30-йилларнинг биринчи ярмида бошланган марксизм-ленинизм классиклари асарларини таржима орқали пропаганда қилиш ишларида бу газета-журналлар айниқса муҳим роль ўйнади.

1933 йилда Москвада «Литературная критика» журналининг чиқа бошлаши ҳам ВКП(б) Марказий Комитети қароридан сўнг адабий ҳаётда танқиднинг аҳамияти ошганлигини кўрсатади. Журнал миллий республикаларимизда танқидий тафаккурнинг ривожига мадад берди.

Адабиёт ходимларининг ташкилий жиҳатдан уюшқоқлиги ва ғоявий бирлигини ошириш чоралари кўрилди. Масалан, 1932 йилнинг 16 июня Ташкент ва Самарқандда Ўзбекистон қалам аҳлларининг кенгаши ўтказилди. Кенгашда Ўзбекистон Ёзувчилари ташкилот комитети ва Ўзбекистон Ёзувчилар союзи тузилди.

1934 йил 7—11 марта Узбекистон совет ёзувчила-  
рининг Биринчи съезди бўлиб ўтди. Съездда Ташкилот  
комитетининг раиси Раҳмат Мажидийнинг «Адабий ҳа-  
ракатни қайта қуриш якунлари ва республика ёзувчи-  
ларининг вазифалари»га оид доклади тингланиб, муҳо-  
кама қилинди. Ташкилий масалалар бўйича Назир Са-  
фаровнинг, драматургиянинг аҳволи тўғрисида Зиё  
Саиднинг ва ёш ёзувчилар ижоди ҳақида Анқабойнинг  
докладлари эшитилди.

Съездда Ўзбекистон Компартияси Марказий Коми-  
тетининг Биринчи секретари А. Иқромов сермазмун  
нутқ сўзлаб, ўзбек совет адабиётидаги умумий аҳволи-  
ни таҳлил қилди ва унинг олдида турган энг муҳим ва-  
зифаларни ҳар тарафлама чуқур ёритиб ўтди.

Шу йили август ойида Москвада Бутуниттифоқ Совет ёзувчиларининг Биринчи съездини А. М. Горький  
қўйидаги сўзлар билан очди:

«Ҳурматли ўртоқлар! Совет Социалистик Республикалари ёзувчиларининг кўп асрлик тарихидаги I съездини очишдан аввал, мен Ёзувчилар союзи ташкилот комитети раиси сифатидаги ҳуқуқимга кўра, союзимизнинг моҳияти ва аҳамияти ҳақида бир неча сўз айтмоқчиман.

Союзимизнинг аҳамияти шундаки, барча республикаларимизнинг қабила ва тил жиҳатдан турлича бўлган адабиётлари бутун совет мамлакати пролетариати, бутун мамлакатларнинг бизга дўст бўлган революцион пролетариати ва ёзувчилари олдида бир бутун адабиёт сифатида ўз съездини бошламоқда.

Биз съездимизда очиқ кўриниб турган жўғрофий бирлигимизни эмас, балки хилма-хил ижодий приёмларимиз ва интилишларимизни инкор қилмайдиган ва бўғиб қўймайдиган мақсадимиз бирлигини ҳам намоњиш қиласмиз... Биз ҳалокатга маҳкум этилган дунё устидан ҳукм чиқарувчи ва революцион пролетариатнинг чинакам гуманизмини, бутун жаҳон меҳнаткашларини асрлар бўйи инсон меҳнатини бўғиб келган ҳасад, очқўзлик, разиллик, бемаънилик сингари барча ярамасликлардан халос этишга тарих даъват этган гуманизм кучини барқарор этувчи кишилар сифатида иш тутмоқдамиз...

Мақсадимиз ягона — маданий, революцион куч бўлган адабиёт яратишдир»<sup>1</sup>.

<sup>1</sup> М. Горький адабиёт ҳақида. Адабий танқидий мақолалар. Тошкент. 1962. 261-бет.

Совет ёзувчиларининг Бутуниттифоқ Биринчи съездидаги республикамиздан С. Айний, Ф. Ғулом, Ғайратий, Ойдин, Ҳ. Шамс, Зиё Сайд, Р. Мажидий, Н. Сафаров ва бошқа ёзувчилар иштирок этилди. Съезд совет адабиёти олдига турган вазифаларни кенг ва чуқур муҳокама этди.

Съездда 180 ёзувчи, адабиётшунос ва танқидчи сўзга чиқди. Делегатлар асосий докладчи А. М. Горький нутқидаги муҳим фикрларни ҳар тарафлама ривожлантирилди.

Совет Ёзувчиларининг Бутуниттифоқ Биринчи съездидаги ВҚП(б) Марказий Комитети ва Совет хукумати номидан А. А. Жданов нутқ сўзлади. Бу нутқда социалистик тузум шароитида ривожланувчи адабиёт олдидаги вазифалар аниқлаб берилди, совет адабиёти учун зарур бўлган хусусиятлар таҳлил этилди. А. А. Жданов ўз нутқида, айниқса, совет адабиётининг етакчи тематикаси, бош қаҳрамонлари ва замонавий позицияси тўғрисида принципиал аҳамиятга эга фикрлар баён этди. Жумладан, А. А. Жданов уқтириб ўтдики, совет ёзувчиси ўзининг бадиий асари учун керакли материални, мавзуни, образларни, бадиий сўз ва ибораларни совет халқи фаолиятидан, Днепрострой, Магнитогорскстрой қурувчиларининг ҳаёти ва тажрибасидан олади. Бизнинг ёзувчимиз ўз материалини қаҳрамон челюскинчилар давридан, колхозчилари тажрибаларидан, мамлакатимизнинг ҳамма бурчакларида қайнаб турган ижодий ишлардан олади. Бизнинг мамлакатимизда адабий асарнинг бош қаҳрамонлари — активлик билан янги ҳаёт қурувчилар: ишчилар, колхозчилар, партия аъзолари, хўжалик ходимлари, инженерлар, комсомоллар, пионерлардир. Совет адабиётининг асосий типлари ва асосий қаҳрамонлари ана шулар. Бизнинг адабиётимиз ташаббускорлик, қаҳрамонлик руҳи билан суғорилган. У оптимистик адабиётлар... янги ишга — социалистик қурилиш ишига хизмат қилаётгани билан кучлидир.

Бу принципиал кўрсатмалар совет адабиётининг ажралмас қисми бўлган адабий танқид олдига турган вазифаларни ҳам аниқлаб берди.

30-йилларнинг дастлабки давларидаёқ умумиттифоқ адабий танқидчилигида бўлгани каби ўзбек адабий танқидчилигида ҳам методологик жиҳатдан тарихий тараққиётга зид, боши берк кўчаларга кириб кетиляётганилиги аниқ сезила бошлаган эди.

Кўпчилик қалам аҳллари талабига биноан чиқарилган апрель (1932) қароридан кейин адабий-бадиий ва илмий ҳаёт тараққиёти учун янги, истиқболи ниҳоятда порлоқ ижодий шароит майдонга келди. Ёш совет марксистик танқидчилиги йигирманчи йилларда тажрибасизлик қилиб «адабиёт ва санъат соҳасида вульгар социологик равишда ёндашиб» келганлигини ўзи ҳам эътироф эта бошлади, ўз бурчи ва вазифаларини қайтадан белгилаб чиқишига киришди.

Эндиликда унинг зиммасига биринчи бор назария ва амалиядаги баъзи бир антимарксистик оқимлар, тенденция ва йўналишларга қарши олиб борган курашларини янги давр талабларига мувофиқ юксак илмий савияга кўтариш, социалистик эстетиканинг ҳақиқий марксча-ленинча принципларини ишлаб чиқишидек ниҳоятда қийин ва масъулиятли вазифа юкланган эди. Бу ишларни айрим танқидчилар ўйлаганидек фақат РАПП, ВОАПП ёки ЎЗАПП сингари уюшмалар фоалиятини қоралаш, РАПП ўртага ташлаган кўрсатмалардаги бемаънигарчиликларни қайта-қайта таъкидлайвериш йўли билангина амалга ошириб бўлмасди, албатта.

Муҳими ўша сохта, номигагина марксистик, назарий кўрсатмаларга чинакам марксистик санъат назарияси талабларини пухта қарши қўя билишда, адабий ва илмий жамоатчиликни социалистик реализм проблемалари билан таништира олишда эди.

Танқидчилик каби бениҳоя қийни, аммо шарафли вазифани бажармоқ учун аввало ўтмиш маданиятига алоқадор барча буюк салафлар меросидан тўла хабардор бўлмоғи, ўтмиш меросини танқидий ўзлаштириш орқали янги замон адабиёти ривожига хизмат қила оладиган қонуниятларни кашф эта билмоғи ва улардан санъат ҳодисаларига баҳо беришда, ижод жараёнлари спецификасини тушуниш ва тушунтиришда унумли фойдаланиб бормоғи лозим эди.

Шунингдек, унинг олдида улкан совет адабиётини мумкин қадар яхлит ҳолида кузатиб боришдан иборат янада янги ва янада мураккаброқ иккинчи бир вазифа ҳам кўндаланг бўлиб турарди. Энди танқид у ё бу группа шоир ва ёзувчилар ижодини бошқа группа шоир ва ёзувчилари ижодига қарама-қезиши қўйиб, ҳимоя қилувчи ё саваловчи қурол бўлиб қололмасди. Ҳаёт уни иложи бўлса СССРдаги деярли барча миллат ва элатлар адабиёти ютуқлари билан шуғулланишга, камчиликларни ҳам ана шу ютуқлар умумлашмасидан ке-

либ чиқадиган хулосаларга асосланиб туреб конкрет кўрсатиб беришга даъват этаётган эди.

Ўттизинчи йилларнинг ўрталарига қадар танқид худди ана шу янги, истиқболи ниҳоятда порлоқ йўналишда бирмунча сезиларли ютуқлар сари интилди. Бироқ ҳали бунга назарий жиҳатдан ҳам, амалий жиҳатдан ҳам тайёр эмаслиги учун бўлса керак, исталган натижаларга қисмангина эриша олди, холос.

Бунинг устига мазкур даврда ВҚП(б) Марказий Комитетининг ижод аҳлига «эҳтиёткорлик билан ёндашмоқ лозим» деган кўрсатмасини нотўғри тушуниш ҳоллари ҳам учраб турарди. Баъзи танқидчилар ҳатто бу кўрсатмани гёё «танқид қилмаслик», «тегмаслик» ҳақидаги директива деб қабул қилган эдилар.

«Бу танқидчилар,— деб ёзган эди ўша вақтларда «Литературний критик» журнали ўзининг бош мақолаларидан бирида,— ўз ёзувчиларининг оддий лаганбардор мадҳиябозига айланиб қолаётирлар. Улар ана шу ёзувчилар томонидан яратилган ҳар қанақа янги асарни ҳам кўкларга кўтариб мақтамоқ учун бор овозларини аямай жуда қаттиқ жар соладилар. Асарга оид гапларини мутлақо номатлуб бўёқлар, турли хил ялтироқ тақинчоқлар билан безашдан чарчамайдилар. Қитобхоннинг, шунингдек, ёзувчининг ҳам қизиқиш ва эҳтиёжлари билан эса деярли ишлари йўқ»<sup>2</sup>.

Албатта, бунда РАПП давридан оқова бўлиб келаётган эски гуруҳбозлик ва тарафкашликнинг баъзи бир қолдиқлари, шахсий симпатия ва антипатиялар ҳам маълум роль ўйнаган бўлиши мумкин.

«Ҳеч шубҳа йўқи»,— деб рўй берадиган аҳволга ачинган эди ўша бош мақоласида «Литературний критик»,— ҳаддан зиёд мақташ «кампания»сидан кейин унга қарши ёзувчининг ҳамма нарсасига қора бўёқ чаплаб ҳаддан зиёд сўкишни бошлаб юборадиганлар ҳам топилади. Бундайлар ҳозироқ мавжуд»<sup>3</sup>.

Дарҳақиқат, журнал янгилишмаган эди. 1936—1937 йилларга келиб аҳвол худди шундай бўлиб чиқди.

Фоявий-эстетик жиҳатдан чаласавод танқидчилар совет адабиётининг ҳатто етук намояндаларини ҳам «дushman элемент» сифатида ҳақоратлашдан тап тортмадилар<sup>4</sup>.

<sup>2</sup> Қаранг: Литературный критик. М., 1934.

<sup>3</sup> ўша ерда.

<sup>4</sup> Узбекистонда ҳам баъзи чаласавод танқидчилар бундай ёрлиқларни Сўғизода, А. Қодирий, Элбек, Усмон Носир, Шокир Сулеймон, Отажон Ҳошим сингари ижодкор ва олимлардан ташқари

Агар биз шу йилларда яратилган асарларда, хусусан, поэзия намуналарида ғояни тўғридан-тўғри яланғоч ҳолда, декларатив тарзда ифодалаш, қуруқ ва баландпарвоз риторикага берилиб кетиш каби қусурлар бениҳоя кўпайганини, бу иллат анча узоқ вақт давом этиб борганлигини эсласак, чаласавод танқидчиларнинг давр адабий ҳаракатчилигида ўйнаган салбий роли яна ҳам жиддийроқ фош этилиши мумкин.

Тўғри, улар ўзларининг «тирноқ орасидан кир қидириш»га асосланадиган хуружлари билан аксарият таланти, бадиий диди ва жасорати анча заиф қалам аҳлларинигина чўчита олар эдилар, холос. Таланти буюк, ғоявий-эстетик билими, эътиқодлари юксак ижодкорларимиз эса, уларга ҳеч қачон қулоқ солишмаган ва қулоқ солмайдилар ҳам.

Совет адабиётининг етакчи намояндадалирида деярли ҳамма вақт мантиқан асосли, назарий жиҳатдан пишиқ, чинакам марксистик танқид билан бирга бўлиш истаги кучли бўлган десак, янгишмаймиз.

Журнал ўзининг дастлабки сонлариданоқ барча республикалар адабий танқидчилигига назарий ва амалий билим берувчи йўлчи юлдузлик вазифасини ўттай бошлади. Унинг ҳал этмоққа интилган барча проблемалари жумласига совет адабиёти тараққиётiga ҳалол хизматларини аямаётган Иттифоқимиздаги барча ижодкор кучларни бирлаштириш учун курашиш, РАПП назариячилиги ва танқидчилигига хос вульгар социологик қарашларни, сохта марксистик қонун-қондаларни фош этиш, бу даврга келиб «социалистик реализм» номини олган янги метод ижодий принципларини ёритиб бориш, традиция ва новаторлик, метод ва дунёқараш, халқчиллик ва синфиийлик совет адабиёти ижодий методида реализм ва романтизм унсурларининг ўрни, адабий-бадиий тил тозалигини сақлаш сингари назарий проблемалар киради.

Журналнинг, хусусан, адабий танқидчиликни вульгар социализм хастиаликларидан қутқариб олиш йўлидаги изланишлари алоҳида диққатга сазовор эди.

Бу масала ҳамма вақт у ҳал этмоқчи бўлган проблемаларнинг марказини ташкил этиб борди. Масалан, журнал 1933—34 йилларда эълон қилган ilk мақола-

---

Ҳ. Олимжон, Ойбек, Миртемир, Шайхзодаларга ҳам ёпиштиromoқчи бўлишган.

ларида («Ленин и некоторые вопросы литературной критики», «Формализм и социалистический реализм», «Марксизм-ленинизм и художественная литература», «Мировоззрение и метод в художественном творчестве...») совет адабиёти ижодий методини «диалектико-материалистик метод» деб талқин қилиш марксча-ленинча санъат назариясига зид вульгаризаторлик эканлигини асосли равишда фош эта билган бўлса, бошқа бир қатор мақолаларида социалистик реализм масалаларини ўрганишининг методологик асосларини ишлаб чиқмоққа уринди<sup>5</sup>.

Шуниси муҳимки, аввало бу мақолаларда марксистик санъат назариясининг Плеханов даври тарихий шароитидаги тараққиётини ўрганиш билангина чекланиб қолинмай В. И. Ленин даврида ривожланган янги-ча методологиядан фойдаланиш лозимлиги уқтириб ўтилди. Бусиз ундан социалистик адабиёт хусусиятларини ўрганишда етарли даражада фойдаланиш мумкин эмаслигини тушунтиришга ҳаракат қилинди.

Иккинчидан, социалистик реализмга жаҳон прогрессив адабиёти кўп асрлик тарихида тўпланган тажрибалар хулосаси сифатида қарап, янги методни реализм ҳамда романтизмдаги эволюцияларни кузатиб чиқиб ўрганиш ишлари бошлаб берилди.

Учинчидан, социалистик воқеликка хос янги ижтимоий муносабатлар янги одамлар, характерлар тасвир усуслари ва маҳоратларига қандай таъсир ўтказаётганлигини кузатишга, фожейлилк ва кулгига мувофиқлик (комическое), типиклик ва индивидуаллик, адабий-бадиий тил ва воситалар, сюжет ва композиция сингари ўнлаб тушунчаларда қандай ўзгаришлар, бойишлар пайдо этажтганини билиб боришга чақирилади. Совет адабиётининг тўхтовсиз тараққиётини ушбу факторларга аҳамият бермай туриб тадқиқ этиш мумкин эмас, деган хулосага келинди.

Социалистик воқелик ва унинг адабиёти яратадиган янги нисон типларини аниқлаб изчил ўргана ва ёрита бориш масаласи ҳам журнални энг кўп қизиқтирган масалалардан эди. «Бу тема танқид шуғулланиши лозим бўлган барча проблемаларнинг марказида алоҳида актуаллик касб этиб турибди, чунки ҳозирги кунда бу

<sup>5</sup> Журналда бу даврда мазкур масала бўйича 40 дан ортиқ умумий назарий ва 60 га яқин муйяян ёзувчи ёки шоир асарларини таҳлил этишга бағишлиланган конкрет-танқидий мақолалар босилиб чиққан эди.

тун улкан адабиётимизда, исталган жиддий бадиий асарда, марказий тема шудир»<sup>6</sup>.

«Литературний критик»да ёритилган бундай жуда тўғри фикрларга эргашиш самараларини биз ўша давр ўзбек танқидчилигида ҳам кузатишмиз мумкин. Ота-жон Ҳошим, Ҳ. Олимжон, Уйғун, Ойбек, Раҳмат Мажидий, Олим Шарафиддинов, Сотти Ҳусайн ва Мақсуд Шайхзода сингари олим ва шоирларимиз илмий тафаккурида бу нарса айниқса яққол сезилади.

Ўттизинчи йилларда бутуниттифоқ адабий танқидчилиги қатори ўзбек адабий танқидчилигининг ҳам профессионал савиясига жиддий ижодий таъсир ўтказа олган иккинчи муҳим омил етук марксист олим ҳамда машҳур драматург А. В. Луначарскийнинг тадқиқотлари эди.

О. Ҳошимовнинг «Ўзбек шўро адабиётининг бир неча асосий ижодий масалалари»<sup>7</sup>, Раҳмат Мажидийнинг «Большевизмнинг буюк санъати учун»<sup>8</sup>, Ҳ. Олимжоннинг «Ёзувчининг савиясини кўтарайлик»<sup>9</sup>, «Социалистик реализмни эгаллаш йўлида» (мақолани муаллиф Уйғун билан биргаликда ёзган эди)<sup>10</sup>, А. Қодирийнинг «Учёба у классиков — залог нашего роста»<sup>11</sup>, Ойбекнинг «Танқид соҳасида саводсизлик ва ур-ийқитчиликка қарши ўт очайлик»<sup>12</sup>, «Социалистик лирика учун»<sup>13</sup>, «Сўнгги йиллар ўзбек поэзияси»<sup>14</sup>, «Ўзбек поэзиясида тил»<sup>15</sup> сингари мақолаларидағи профессионал савияда бу нарса айниқса яққол сезилади.

Бу мақолаларда адабиётнинг синфиyllиги, ғоявийлиги ва партиявиyилиги масалаларини сўз санъатининг спецификасидан келиб чиқиб таҳлил қилинади; бадиийлик категориясини эса шакл ва мазмун, типиклик ва индивидуаллик, характер ва шароит сингари факторларнинг диалектик бирлиқда намоён бўлиши деб тушиунирилди.

<sup>6</sup> Қаранг: Литературный критик. 1934. № 12. С. 10 (бош мақоладан).

<sup>7</sup> Ўзбекистон Шўро адабиёти. 1932. 4—5-сонлар (1933 йилда бу мақоланинг кенгайтирилган ва қайта таҳрир қилинган нусхаси рисола ҳолида «Ўздавнашр» томонидан ҳам чоп этилган).

<sup>8</sup> Ўша жойда.

<sup>9</sup> Ёш большевик. 1933. № 6—7.

<sup>10</sup> Литература Средней Азии. 1933. 21 ноябрь.

<sup>11</sup> Китоб ва инчилоб. 1933. 7—8-сонлар.

<sup>12</sup> Ўзбекистон шўро адабиёти. 1933. 1-сон.

<sup>13</sup> Кизил Ўзбекистон. 1933. 17 август.

<sup>14</sup> Шу газета. 1934. 14 июнь.

<sup>15</sup> Ўзбек поэзиясида тил. Тошкент. 1933. 140-бет (О. Ҳошим таҳрири остида).

СССР Ёзувчиларининг Бутунитифоқ Биринчи съездига қизғин тайёргарлик жараёнида бу хил мақола ва тақризлар айниқса кўпайди. Танқидчиларимиз съездни «Адабиёт соҳасида илмий текширишлар» аталмиш икки китобдан иборат йирик мажмуа билан кутиб олдилар.

Шу жараён ичида профессионал ўзбек танқидчи ва адабиётшуносларининг сафи И. Султонов, Ҳ. Еқубов, Сайдғани Валиев, Буюк Каримий, Юсуф Султонов сингари қатор истеъоддли ёшлар ҳисобига анча кенгайди.

Ёшлар юқорида эслатиб ўтилган, устозлар томонидан йўлга қўйилмиш традициянинг энг илғор жиҳатларига жиддий эътибор бериб санъат намуналарини «турмуш дарслиги» сифатида тадқиқ эта бошладилар. «Турмуш дарслиги учун»<sup>16</sup> деб сарлавҳа қўяди Иззат Султонов ўзининг («Очилган қўриқ» романи ҳақида ёзган) биринчи тақризига. Шундан кейин унинг «Нега томошабин бепарво» (Собир Абдулланинг «Пўртана» пьесаси ҳақида)<sup>17</sup>, «Чеховнинг ҳикоячилиги»<sup>18</sup>, «Ийгрма йил бурунги «Ҳамлет»<sup>19</sup>, «Шоҳнома» спектакли тўғрисида», «Пишмаган ва оғизга тушмаган бир асар воқеаси» (Собир Абдулланинг «Ойхон» драмаси тўғрисида)<sup>20</sup>, «Номус ва муҳаббат» (Яшиннинг шу номли асари ҳақида)<sup>21</sup>, «Ёзувчи ва ўқувчи» (Уйғун ҳақида)<sup>22</sup> сингәри мақола ва тақризлари кетма-кет босилиб чиқа бошлайди. Бу мақола ва тақризларда Иззат Султон асосан ёзувчи ва драматургларимизни улуг рус адабиёти классиклари эриша олгани каби маҳоратга эга бўлиш учун чақирди. Санъат ҳаётни ҳаққоний, лекин шу билан бирга, қизиқарли бўлган сюжетлар, воқеа-ҳодисалар, образлар орқали акс эттириши лозимлигини, бунинг учун энг аввало асар конфликтлари ва унда тасвирланадиган характерлар ҳаққоний ва оригинал бўлиши лозимлигини уқтириб боришга интилди. Китобхон ёки томошабинни лоқайдлигича қолдирадиган, унга бирон бир янгилик, бирон бир жиддий маънавий озиқа беролмайдиган асарлар турмушни чуқур билиб ололмай қалам тебратавериш, ундаги муҳим нарсаларни номуҳим нарсалардан ажратиб олиб типиклаштира ва

<sup>16</sup> Қизил Ўзбекистон. 1933. 5 июль.

<sup>17</sup> Ўша газета. 1934. 6 апрель.

<sup>18</sup> Гулистон. 1935. 5-сон.

<sup>19</sup> Қизил Ўзбекистон. 1935. 5 март.

<sup>20</sup> Қизил Ўзбекистон. 1935. 7 сентябрь.

<sup>21</sup> Қизил Ўзбекистон. 1936. 12 май.

<sup>22</sup> Қизил Ўзбекистон. 1936. 9 июль.

индивидуаллаштира олмаслик оқибати эканлигини таъкидлади.

Ёшлар орасида назарий жиҳатдан анча бақувват фикр юритиши билан тезда танила бошлаган яна бир ёрқин истеъдод эгаси Ҳомил Ёқубов эди.

Ҳ. Ёқубов ўттизинчи йилларнинг биринчи яримларида ёқ «Faafur Fуломнинг ҳажвий ҳикоялари», З. Сайд ва Н. Сафаровларнинг «Тарих тилга кирди» драмаси, А. Фадеевнинг «Тор-мор»и таржимасига оид чиройли тақризлари, «Ўйғун ижодиёти», «Faafur Fулом ижодиёти», «Ҳамид Олимжоннинг ижодий йўли» сингари профессионал савияси хийла пишиқ илмий ишлари билан таниқли адабиётшунослар сафидан мустаҳкам ўрин эгаллаган эди. Кейинроқ у F. Fулом ва Ҳ. Олимжон ижодларига бағишлаб яна бир неча мақолалар ёзди, «Ўзбек болалар адабиёти», «Ўн беш йил ичida ўзбек поэзияси», «Ўзбек шоири Турди ижоди» номли тадқиқотлар яратиб, ниҳоятда истеъдодли адабиёт тарихчиси сифатида танилди.

Ўттизинчи йиллар ўзбек танқидчилигида янги социалистик лириканинг ўзига хос хусусиятлари ва олдидаги турган вазифаларни чуқур ёрита боришда Ойбек томонидан ёзилган «Социалистик лирика учун» (1934), «Ўзбек поэзиясида тил» (1934), «Сўнгги йиллар ўзбек поэзияси» (1934) номли ишлар алоҳида ўрин тутади.

Совет адабиётининг ривожи учун ўттизинчи йилларнинг иккинчи ярмига ўтилганда формализм кўришишларига қарши кураш олиб бориш ҳам муҳим эди. Бу соҳада ўзбек адабий танқидчилиги «Правда» газетасида босилиб чиққан «Музика ўрнига ғала-ғовур» номли мақоладан ўrnak олиб, илмий фикр юритишига ҳаракат қилди.

Ойбекнинг поэзияга доир, Иzzат Султоннинг пьесаларга доир, С. Валиев, А. Қаҳҳор ва А. Қодирийларнинг прозага доир мақолаларида ўзбек адабиётидаги баъзи бир натуралистик ва формалистик тенденцияларни чинакам бадиятга зид ҳодисалар деб топилди.

Лекин шунда ҳам ҳали бу давр адабий танқидчилигида бадиий сўз санъатининг специфик жиҳатларига баъзан камроқ эътибор бериш ва баъзан эса вульгар социологизмнинг янгича кўринишларига йўл қўйиш ҳолатлари сезилиб турди.

Ўттизинчи йиллар профессионал адабий танқидчилигининг дастлабки даврларда Иттифоқ миқёсида сезилиб турадиган биринчи камчилиги унинг ниҳоятда пассивлиги эди. Шу сабабданadirki, Совет Ёзувчилари

союзи Правлениесининг 1935 йил 7 марта бўлиб ўтган иккинчи пленумида бу масала маҳсус мұҳокама қилинди.

Пленумда А. М. Горький ҳам профессионал танқид тўғрисида қизғин фикр билдириб, қўйидагиларни айтган эди:

«Танқидчилик, ҳақиқатан ҳам, бизга кам ёрдам беради, асосан асарларимиздан камчиликлар ахтариш билан шуғулланади, бу камчиликларнинг манбани, уларнинг келиб чиқиш сабабларини жуда ёмон тушунади. Танқидчилик тил билан кам шуғулланади ёки деярли ва мутлақо шуғулланмайди, жумлаларнинг тўғри ёки нотўғри тузилганинги, асарнинг архитектоникасини, материалнинг тўғри жойлаштирилиши ва ҳоказоларни бизга кўрсатиб бермайди...

Танқидчилик ниманидир ўргатиши керак, у, ҳар ҳолда, адабиёт билан бирга қадам ташлаётгани йўқ, модомики, биз воқеликдан орқада қолаётган эканмиз, танқидчилик ҳам биздан орқада қолиб кетмоқда ва бизни асосан мафкуравий савод жиҳатидан саваламоқда, бу албатта, тўғри, бироқ танқидчиликнинг ўзи бирмунча заиф бўлганлиги туфайли бу иш ҳамма вақт ҳам етарлича ишонтиарли даражада бўлмаётir»<sup>23</sup>.

Пленумда адабий танқидчилик савиясини ўстириш йўлидаги қатор чора-тадбирлар ҳақида ҳам фикр юритилган<sup>24</sup> эди.

Пленум қарорлари бутуниттифоқ танқидчилиги қатори ўзбек адабий танқидчилигига ҳам ўзининг ижобий таъсирини кўрсата борди. Республика матбуотида танқидий чиқишлиарнинг кўпайишидан ташқари, замона адабий жараёнида актив иштирок этаётган ёзувчиларнинг ижодига бағишиланган илмий тўпламлар яратишга киришилди. Шуларнинг биринчиси F. Гулом, X. Олимжон ва Файратийларнинг ижодий йўли ва Абдулла Қаҳҳор ҳикояларининг хусусиятларини таҳлил этувчи мақолалар тўплами — «Ижодий ўсиш йўлида»<sup>24</sup> эди. Муаллифлар бу ёзувчиларнинг ижодидаги ижтимоий мазмун, совет халқининг ҳаёти билан чамбарчас боғлиқлик, партиявийлик ва халқиллик интилишларини жуда тўғри аниқлаб бердилар. Бу фазилатларнинг адабиётнинг бундан кейинги тараққиётидаги роли эса катта бўлди. Муаллифлар колективи ўзларининг илмий прогнозларида адашмадилар, чунки

<sup>23</sup> М. Горький адабиёт ҳақида. Тошкент. 1962. 330—331-бетлар.

<sup>24</sup> Ижодий ўсиш йўлида. Тошкент. 1936.

мазкур ёзувчилар кейинроқ ҳам ўзбек совет адабиётини бошлаб берувчилар ва актив ривожлантирувчилар ролини ўйнадилар.

Уттизинчи йиллар адабий танқидчилигининг тараққиёт йўллари ҳақида фикр юритар эканмиз, танқиднинг болалар адабиёти муносабати билан муҳокама этган масалалар ҳам унинг умумий савиясини кўп жиҳатдан тайин этишга имкон беради<sup>25</sup>.

1931 йил май ойида Ўзбекистон Компартияси Марказий Комитетининг маданий тарғибот шўъбаси маҳсус кенгаш ўтказди. Ушбу кенгашда ўзбек болалар адабиётининг аҳволи ва келажагига оид масала муҳокама қилинди ва муҳокама якуни «Ёш ленинчи» газетасида «Болалар адабиётига диққат қилингиз» сарлавҳаси остида эълон қилинди. Унда болалар адабиётини ривожлантириш юзасидан қатор тадбирлар белгиланган эди. Қарордан руҳланган ўзбек танқидчилиги болалар адабиётига алоҳида аҳамият беришга чақиравчи қатор мақолалар билан чиқдилар.

СССР Ёзувчиларининг I Бутуниттифоқ съездида ва ВЛКСМ Марказий Комитетининг 1936 йил 10 январь куни болалар адабиёти ҳақида ўтказган маҳсус кенгашида болалар адабиёти тараққиёти масалаларининг муҳокама этилиши адабий танқидда бу муҳим соҳа масалаларининг анча кенг ва чуқур муҳокама этилишига сабаб бўлди.

Бутуниттифоқ Ёзувчилар союзининг I съездида С. Маршак томонидан қилинган доклад болалар адабиёти ривожида янги йўналиш очди. Болалар адабиётининг ўзига хослиги, унинг қаҳрамонлари, асар тили ва персонажлар нутқи, юмор масалалари ҳақида мунозаралар, дискуссиялар бошланиб кетди. Марказий матбуотда К. Чуковский, С. Маршак, С. Михалков, А. Н. Гайдар асарлари таҳлили муносабати билан эълон қилинган мақолалар кўпайди. Масалан, «Литературный критик» журналида Т. Трифоновнинг «С. Я. Маршак», «Детская литература» журналида О. Селиванованинг «Сказки Чуковского», шу журналда А. Юрьевнинг «Проблемы образа в детской лите-

<sup>25</sup> Қасанова. Ўзбекистон пролетар болалар адабиёти учун кураш йўлида//Вожатий. 1931. 7—8-сонлар; Муҳаммадий Р. Болалар адабиёти ҳақида//Ёш ленинчи. 1931. 8 апрель; Ш. М. Болалар адабиётини яратиш жамоатчилик вазифаси//Қизил Ўзбекистон. 1932. 27 сентябрь; Қирғизбоев Ҳ. Соғлом болалар адабиёти учун//Маданий инқи lob. 1932. 12 декабрь; Санжар Тилла. Бадий юксак болалар адабиёти учун//Ёш ленинчи. 1934. 5 февраль ғаз. қ. лар.

ратуре» мақолаларида болалар адабиётига хос қаҳрамонлар характерини яратиш принциплари ва тил масалалари қамраб олинади. Бу мақолаларда ва улар билан бир вақтда ва кейинроқ ўзбек матбуотида пайдо бўлган мақолаларда кўтарилиган масалалар «катталар адабиётига» ҳам кўп жиҳатдан тааллуқли эди.

Ўзбек болалар адабиёти тўғрисида эълон қилинган мақолаларда ҳам шу масалаларга алоҳида эътибор бериш кучая борди. Кўлга киритилган ютуқ ва камчиликлар таҳлил қилиниб, умумлаштириб, айрим назарий хулосалар чиқаришга уринилди. Бу жиҳатдан Ҳ. Ёқубовнинг «Болалар адабиётининг сифатини кўтрайлилк»<sup>26</sup>, Ш. Сулаймоннинг «Болалар адабиёти тўғрисида»<sup>27</sup>, З. Диёрнинг «Болалар китоби ҳақида»<sup>28</sup>, Ю. Латифнинг «Зафарнинг ижоди ҳақида»<sup>29</sup>, Ш. Сулаймон, Ф. Каримовнинг «Болалар адабиёти тўғрисида»<sup>30</sup> номли мақолалари айниқса муҳим аҳамият касб этади.

Бу авторлар болалар адабиётида реалистик принципларнинг шаклланиши учун бирмунча жиддий кураш олиб бордилар. Маълумки, адабиётда реалистик принципларнинг шаклланиши масаласи ғоят зарур ва энг мураккаб процесс бўлиб, давр ўта бориши билан тобора шаклланиб, такомиллашиб, ривожланиб бораверади. Ўттизинчи йиллар адабиёти социалистик реализм методини назарий жиҳатдан англаб ва изчил қўллай олишнинг биринчи пиллапоясига қадам ташлади. Бу ҳол болалар адабиётида яққол кўзга ташланади. Бу қадамнинг ташланишида танқидчиликнинг роли шубҳасиз, катта бўлди. Аммо, танқидчилик бу катта масалани ҳар томонлама қамраб олишга қодир эмас эди. Бунинг учун ҳали етарли билим ва малакага эга эмасди. Шундай бўлса-да, энг асосий масала — реализмнинг зарур шартларидан бири — бадий адабиётнинг ҳаёт билан ҳамнафас бўлиши, унинг давр кўзгусига айланиши, бир сўз билан айтганда, ҳаётйлик масаласини ўзбек танқидчилиги ўз имконияти даражасида кўтариб чиқди.

Бу ҳол, айниқса қаҳрамон характерининг ҳаётйлиги учун бўлган курашда яққол кўзга ташланади.

Ўттизинчи йиллар ўзбек болалар адабиётида асо-

<sup>26</sup> Совет адабиёти. 1936. 2-сон.

<sup>27</sup> Ўша журнال. 1935. 6-сон.

<sup>28</sup> Қизил Ўзбекистон. 1938. 20 декабрь.

<sup>29</sup> Ёш ленинчн. 1938. 20 март.

<sup>30</sup> 15 йил ичida совет адабиёти. Тошкент. 1939.

сан ўрта ёшли ва ўспирин болалар характерига қўл урилади. Шу жиҳатдан Ш. Сулаймон, М. Файзий, Д. Оппоқова, Ойбек ижоди характерли. Бу ижодкорларнинг қаҳрамонлари даврнинг муҳим масаласи — синфий душманларга қарши кураш масаласини акс эттиради. Шу жиҳатдан бу қаҳрамонлар ғоят муҳим аҳамият касб этади. Аммо бадиий адабиётда қаҳрамон фақат муҳим мазмунни акс эттиришга хизмат қилиб қолмасдан, аввало инсон сифатида кенг китобхонга ўрнак бўлишлари керак. Улар ҳаётий, бадиий жиҳатдан мукаммал бўлсаларгина уларнинг бадиий таъсиричанилиги ортади, китобхонни ўз орқасидан эргаштириб кетади. Аммо, ўзбек болалар адабиётининг қўпчилик асарларида бу қаҳрамонлар схематик қобиқдан ҳаличиқа олмаган эдилар. Ижобий қаҳрамон фақат яхши хусусиятларни ўзида мужассамлаштирав, салбий қаҳрамон эса фақат салбий хусусиятларни ташир эди. Уларнинг маънавий дунёсидаги ранг-барангликлар, нозик товланишлар, мураккаб психологик ҳолатлар тасвирланмайди.

Бу каби камчиликлар билан курашиш танқидчиликнинг асосий темасига айланди. Ҳ. Ёқубов «Болалар адабиётининг сифатини кўтарайлик» номли мақоласида ва Ш. Сулаймон, Д. Оппоқованинг асарлари ҳақида фикр юритаркан, масалага шу жиҳатдан ёндашади. Ш. Сулаймон Д. Оппоқованинг «Кичик Бону» қиссасини таҳлил қилас, экан, уни «...биринчи маротаба ўтмишда ёш қизларнинг эзилганини кўрсатади. Бону типи орқали қисман бунга муваффақ бўлади. У баъзан бола характеридаги специфик нозикликларга ҳам яқинлашиб боради», деб ижодкорнинг қаҳрамон характерининг ҳаётий бўлишига интилганлигини таъкидлайди. Бироқ, юқорида эслатганимиздек, бу қиссада ҳам қаҳрамон тилини яратишда схематизмга йўл қўйиладики, мунаққид буни жиддий танқид қиласди: «Камбағал қизларнинг ҳаммаси чиройли, хушбичим, ювош, камгап, хушмуомалали, дарсни билатурғон бўлади ва отин ойидан кўп калтак ейди. Бой қизлари ҳамиша чўтири, хунук, маҳмадана, нозли, фийбатчи, жуда ёвуз ва такаббур қилиниб тасвирланади. Улар дарсларни билмайдилар, ўқимайдилар, тиришмайдилар ва отин ойидан ҳеч калтак емайдилар, шўхликларини қўймайдилар».

Дарҳақиқат, Д. Оппоқова фольклор традицияларига кўр-кўронга эргашиш натижасида бунга эриша олмаган эди.

М. Талас Д. Оппоқованинг «Душман» номли пьесасини таҳлил қиласар экан, масалага қаҳрамоннинг ҳаёттийлиги нуқтаи назаридан ёндашиб, асарнинг бош қаҳрамони тўлиқсиз ўрта мактабнинг 7-синф ўқувчиси Сафар характерини яратишдаги йўл қўйилган камчиликларни кўрсатади. Бундан ташқари, «болалар учун берилатурғон адабий маҳсулотлар қисқа, гўзал ва болаларга тушунарли бўлиши» кераклиги, чунки «болаларга мосланиб ёзилган бўлса, болалар ғоятда қизишиллари» ҳам танқидчи эътиборидан четда қолмайди.

Аммо бу айтилганлардан танқидчилар асарларга ҳамма вақт ҳам жуда тўғри, ҳаққоний баҳо берадилар, улар ҳеч қандай хато фикрламайдилар, деган хуласа чиқмаслиги керак. М. Талас шу мақоласида бош қаҳрамон Сафар ҳақида гапириб, «Оппоқова ўз асарида типик воқеани турмушга мослаб тасвирламаган. Масалан, бу бош типни (Сафар) нишондор оиласдан олган. Лекин ҳақиқатда нишондор оила болаларининг бу қадар бузилиб кетиши мумкин эмас<sup>31</sup> деган асоссиз фикрни илгари суради.

Бу сингари камчиликларни 30-йилларда яратилган кўпгина мақола ёки тақризларда учратиш мумкин. Жўмладан, Жўраев деган тақризчининг Таласнинг «Лагерь қўйнида»<sup>32</sup> ҳикоясига ёзган тақризида асар қаҳрамони характеридаги баъзи нуқсонларни ижодкор шахсӣ билан боғлашга интилади.

Бу хил камчиликларнинг мавжуд бўлишига қарамай, ҳар ҳолда, ўттизинчи йиллар адабий танқиди болалар адабиётининг ривожига сезиларли даражада таъсир кўрсатди. Партия МК ва Совет давлати раҳбарлиги ва йўлбошлиги туфайли адабий танқид бадний асарда реалистик принципларнинг шаклланиши, ёш авлод учун ҳар томонлама ўrnak бўладиган қаҳрамонлар яратилиши учун тинмай кураш олиб борди.

### АДАБИЁТДА ЯНГИ ИНСОН ТАСВИРИ УЧУН КУРАШ

Бутуниттифоқ Ёзувчиларининг I съездидаги А. Жданов доклади ва бошқа нотиқлар докладларида ҳам уқтирилганидек, янги, социалистик жамият учун курашиш шароитида шаклланадиган янги инсон образини адабиётда яратиш — адабиёт ва санъатнинг бош вазифа-

<sup>31</sup> Шермуҳамедов П. Давр қаҳрамон тақдирида. Тошкент. 1969. 204-бет.

<sup>32</sup> Маданий инқилоб. 1936. 24 январь.

си бўлиб қолган эди. Шу сабабли, ўттизинчи йиллар адабий танқидчилиги социалистик реализм эстетикаси билан қуроллана борар ва орттирган назарий билимларни амалиётга татбиқ этишга тиришар экан, биз танқидчилар фаолиятининг адабиётда давр «янги инсон»и типларининг тўғри ва мукаммал тасвиirlаниши учун олиб борилган курашларга қаратилганини кўрамиз.

Бу ишни у йигирманчи йиллардаёқ бошлаб юбора олган эди. «Масалан, К. Трифулов ўзининг «Нафис адабиёт жабҳамизни соғломлаш йўлида»<sup>33</sup> номли мақоласида санъаткорларни озодликка чиқсан ўзбек хотин-қизлари образини, совет ҳокимияти учун курашда жонбозлик кўрсатаётган қизил аскарлар қиёфасини ёрқин ва чуқур тасвиirlашга чақирди. Ойбек эса ўз ҳамкасб дўстларини ишли туйғуларини тараннум этишга чорлади. С. Ҳусайн даврнинг бош қаҳрамони — большевик образини яратишга даъват этди<sup>34</sup> ва ҳоказо.

Ўттизинчи йилларда эса беш йилликлар қурилиши, коллектив хўжаликлар, завод ва фабрикалар, фан ва маданият ўчоқларида етилган ҳамда етилаётган янги совет кишилари образини адабиётимизнинг бош қаҳрамонига айлантиromoқнинг аҳамияти яна ҳам ортган эди.

«Социализм жамияти қуриш процессида турмушнинг эски формалари йўқолиб, янги муносабатлар, янги қурашлар, янги типдаги одамлар пайдо бўлаётганини кўриб турамиз. Меҳнатга янги муносабат, меҳнатнинг социалистик формалари — зарбдорлик ва бошқаларнинг ҳаммаси янги турмуш самарасидир. Шунга ўхшаш турмушнинг янгиликларини, қурилишларини, омманинг ичидаги чуқур маданий ўзгаришлар ва бошқаларни адабиётда акс эттириш билан бирга, янги ҳаёт қандай бўлиши кераклигини схематизмга берилмай тасвиirlаш лозим. Биз қурилишнинг ҳар жабҳасида қаҳрамонларга учраймиз. Социализм учун курашда одамларнинг маънавий борлиги қандай ўзгараётганини биламиз. Бадий асарларда тубанлардан юксалган янги одамларни курашда кўрсатиш — шу кунги адабиётнинг улуғ вазифаларидандир»<sup>35</sup>, — деб ёзди бу ҳақда ўз мақолаларида Ойбек ва бунга мисоллар тариқасида Уйғуннинг «Жонтемир»ини, Ҳ. Олимжоннинг «Гриша»си, Ойдиннинг «Чечан қўллар» асарларини кўрсатиб ўтди.

<sup>33</sup> Қизил Узбекистон. 1928. 4—5 июль.

<sup>34</sup> Узбекистон шўро адабиёти. 1938. 1-сон.

<sup>35</sup> Қизил Узбекистон. 1933. 17 август.

Бироқ у даврларда бу соҳада муваффақиятли чиққан асарлар ҳали жуда кам эди. Шоир ва адилари миз социалистик қурилиш қаҳрамонларини кўпинча ташқи томондан кўрсатиш билантина чекланишар, муаллифларнинг диққат маркази кўпинча одамда эмас, балки нарсаларда, нарсаларни деталлаштириб тасвир қилишда бўларди. Воқеалар, ҳодисалар, нарсалар одамларнинг фаолияти натижаси сифатида эмас, ўз-ўзича олинарди... Гарчи баъзи достонларда шоир кишилар ҳақида гапирса-да, бу кишилар нарсалар, воқеалар орасида кўмилиб қоларди. Одам асарнинг ўзак суюгини ташкил этмас, тип даражасига юксала олмасди<sup>36</sup>.

Ойбек ўз мақолаларида қуруқ техникапарастлик, абстракт инқилобчилик ва конструктивизм сингари иллатлар билан боғлиқ бу каби камчиликларга аллақачон чек қўйиш пайти етилганлигини уқтира боради.

У F. Фулом яратган «Кўкан» поэмасини «қишлоқда социализмнинг ғалабасини, коллектив меҳнатнинг устунлигини, кечаги қашшоқни давлатли турмушга олиб чиққанлигини» куйлагани, шоир унда «кенг омманинг тушунчасига мувофиқ бадий ифода воситаларини топа олгани, унинг ўхшатишлари, сифатлашлари, метафоралари содда, пишиқ, ўткир, аниқ» бўлгани учун юксак қадрлайди.

Аммо шу аснода асар сюжетида «тирик чизгилар» этишмаслигини, «схематизм, юзакичилик» мавжудлигини ҳам Ойбек алоҳида эслатиб ўтадики, буларнинг ҳаммаси масалага маҳорат нуқтаи назаридан туриб ёндаша олиш натижалари эди.

Ойбек томонидан илгари сурилган мазкур фикр ва мулоҳазалар давр бадий тафаккури тараққиётида ҳам, танқидий қарашлари ривожида ҳам жуда катта ижобий роль ўйнади. Шу ижобий роль таъсиридандирки, 30-йилларнинг ўрталарига келиб ўзбек шоир, ёзувчи ва драматурглари «социалистик қурилишнинг донгдор қаҳрамонлари»<sup>37</sup> образларини кўпроқ олиб кириш учунгина эмас, балки бундай образларни тўлақонли тип, бадий характер даражасига кўтариб, ёрқин картиналар орқали, кенг планда ва ҳаётий-динамик ўсишида тасвирлаш учун ҳам астойдил тер тўка бошладилар. Ҳаётда «активлик ва меҳнат иштиёқининг бор-

<sup>36</sup> Уша жойда.

<sup>37</sup> Яшин К. Адабиётимизнинг ватан олдидаги бурчи. Тошкент. 1935.

ган сари ривожланаётганлиги, маънавий қувват ва ирода кучининг ўсаётганлиги» уларни «жасоратли, саботли, ҳар қандай тўсиқларни синдирувчи мард характер»<sup>38</sup> яратишга ундар эди (F. Гуломнинг «Ҳайдар ҷўққи», X. Олимжоннинг «Чол», Уйғуннинг «Бригадир Карим», «Назир отанинг ғазаби» сингари асарлари бунга жавоб тариқасида майдонга келган эди).

Мисол тариқасида ўттизинчى йилларнинг энг кучли адабиётшунос олими ва актив танқидчиларидан Олим Шарафиддиновнинг «Уйғун шеърияти» деган тўпламига сўз боши ўрнида ёзилган мақоласига мурожаат этайлик (1936).

Муаллиф Уйғуннинг ўша даврлардаги ижодини «ўзаро бир-бiri билан боғланган, лекин баъзи характерли хусусиятларга эга бўлган» уч босқичга бўлиб ўрганади:

1) 1925 йилдан 1928 йилгача («Баҳор севинчлари»);

2) 1929 йилдан 1931 йилгача («Март кунлари», «Колхозчи қизга» ва бошқалар);

3) Бундан кейинги йиллардаги ижоди.

«Бу босқичлар шоирнинг ички ўсишининг шохобчалари эмас, булар инқилобнинг умумий ўсиш процессидан келиб чиққанлар», деб ёзади муаллиф. О. Шарафиддинов ўз мақоласининг бошланишидаёқ Уйғун ижодиётидаги деярли барча муваффақиятларни социалистик воқеликдаги юксалишлар билан боғлиқ ҳолда текширишга ҳаракат қиласди.

Муаллиф фикрича, шоир ўз ижодий фаолиятининг учинчи босқичига қадар турмушга мумкин қадар ҳар томонлама яқинлаша билмаган, у билан барча жабҳаларда ҳамнафас бўлолмаган, айрим ҳолларда ундаги улкан воқеаларни, мураккаб ҳодисаларни, ўсиш, ўзгариш ва баркамолликка етишиш жараёнларини ичдан мукаммал ҳис этмай туриб қалам тебратаверган. Шунга кўра, унинг «келажак билан суғорилган, қайнок, тошқин лирикаси» тематик жиҳатдан ҳаёт ранг-баранглигига нисбатан жуда тор эди. Шоир шеърларида баъзан «юзакилик, асосий воқеани табиат лавҳалари билан ўраб йўқотиб юбориш», асар қаҳрамонларини умумлашма тип ҳолига келтирмай гавдалантиравериш сингари қусурлар учар, турмушни копия қилиш, уни очолмаслик, бадий қимматга эга бўлмаган тафсилот ва аломатларни санаш каби камчиликлар кўринарди.

<sup>38</sup> 15 йил ичидаги совет адабиёти. Тошкент. 1939. 63-бет.

Буларнинг ҳаммаси «асар ғоясининг төпчид турнишига тўсқинлик» қиласди. Ҳали у даврларда Уйғун ижодида «схематизмга бориш тамойили» ҳам йўқ эмасди-ки, бунинг салбий оқибатлари ҳақида О. Шарафиддинов қўйидагиларни ёзди: «Бу тамойил образни бутун турлилигида беришга йўл қўймайди. Қаҳрамоннинг қимматли шахсияти, унинг фикр-ҳисларидаги бутун турлилик асарнинг чегарасида қолади. Схематизм, процесслар ва шахсларнинг чуқур таҳлили ўрнига уларнинг ташқи томондан характеристикасини бериш, нарса ва кишиларни атаб қўя қолиш билан чегараланди; улар тўғрисида тасаввур бермайди. Замонамизнинг қаҳрамонларини, уларнинг янги муносабатларини очишга тўсқинлик қиласди»<sup>39</sup>.

Уйғун ўз ижодининг учинчи босқичида бундай камчиликларга йўл қўймаслик учун жиддий ва онгли равиша курашади. Натижада унинг лирикаси халқ ҳаёти билан, ишчи-дехқонлар синфининг «конкрет практикаси» билан яна ҳам негизли ва узвий боғланади. Уйғун шеърияти социализм қурилишларининг буюк вазифаларида фаоллик кўрсатувчи «янги тип кишиларини, уларнинг фикр-туйғуларини» юксак бадиийликда куйлай олиши мумкин эди.

Муаллиф «Жонтемир» поэмасида худди ана шундай бир жўшқин куй янграганлиги сабабини шундай изоҳлаб ўтади:

Ҳақиқатан, кечаги батрак бугун қишлоқ хўжалигининг йирик ташкилотини идора қилмоқда; кишиларни ташкил этиб, уларни социализмга томон етаклаётир. Кеча ўзининг кичик хўжалиги учун қайфирувчи, майдадовар ишлаб чиқарувчи бутун масалаларни умумий давлат нуқтаси назари билан ҳал қилаётир. Илгари нодонлик, маданиятсизлик қурбони бўлган кишилар орасидан социалистик жамият қурувчи активлар қаторига ўтувчи янги кадрлар юзага чиқди. Ишчилар, дехқонлар бутунлай ўзгарди, уларнинг турмуш фактларига муносабатлари ҳам бутунлай ўзгараётir. Шоир шу улуғ ҳодисани чуқур ҳис этди ва Жонтемир образи орқали буни бадинй умумлаштиргди».

О. Шарафиддинов худди шунга ўхшаш хулосаларни шоирнинг «Назир отанинг ғазаби», «Гуласал», «Куёш ўлкасига» ва «Бригадир Карим» сингари асарларини таҳлил этиш жараёнида ҳам илгари суради. Олимнинг

<sup>39</sup> Шарафиддинов О. Танланган асарлар. Тошкент. 1978. 218-бет.

таъкидлашича, бу асарларнинг барчасида ҳам юқори бадийликни таъминлаб турувчи яна бир омил — майдада тафсилотлар, нарсалар ва табиат лавҳалари тасвирига керагидан ортиқ берилмаслик, асосий эътиборни инсонга қаратиш, «ҳар нарсадан илгари янги тип киши ва унинг социал сифатини реалистик кўрсатишга интилиш» эди. «Шоирнинг ўзига хос приёмлари, бадий воситалари ана шу чизик билан мустаҳкам боғланган»,— деб ёзади у.

Ўттизинчи йилларда пахта мустақиллиги учун кураш республикамиз меҳнаткашларининг асосий шиорларидан бирига айланиб қолган эди. Ўзбек меҳнаткашларининг пахта учун курашда кўрсатган ва кўрсатётган қаҳрамонликлари, эришган ва эришаётган ғалабалари келажак авлодлар учун ибрат бўларли жуда катта ижтимоий мазмунга эга. Шунга кўра, О. Шарафиддинов: «Мамлакатимизнинг олдинги кишиларининг интилиши пахта мустақиллигида кўринаётир, бу кураш жуда кўп асарларнинг мавзуи бўлиши керак»,— деб уқтирди. Танқидчи шу нуқтаи назардан келиб чиқиб «Назир отанинг ғазаби» ва «Шунинг ишқи» каби шеърларга ниҳоятда юксак баҳо беради. Уларда янги одамнинг социализмга садоқати ва фидокорлиги ўз шеърий ифодасини топганини қадрлайди. «Бизнинг эстетикамизнинг мазмуни,— дейди у ўз мақоласини якунлашга ўтаркан,— социалистик меҳнат, социалистик қурилиш, ўтмишда ва ҳозирда социализм учун кураш, экономикада ва кишиларнинг онгида капиталистик унсурларни бутунлай тугатишдан иборатдир. Бизнинг лирика тўғрисидаги тасаввуримиз шу асосга қурилган. Бу лирика янги кишининг кечинмаларини, ҳаяжонларини бутун бадий кучи билан ифода қилувчи, социалистик фикрлашувчи ва ҳис қилувчи... лирикадир. Шоир Уйғун шу лирика учун курашаётир. Бу курашдаги мұваффақиятлар ва яқин ғалабаларнинг гарови — социалистик қурилишнинг актив иштироқчилари билан янада алоқани мустаҳкамлаш ва шулар сафида боришидир»<sup>40</sup>.

Олим Шарафиддинов томонидан ўртага ташланган бу ва бунга ўхшаш фикрлар ўттизинчи йиллар адабий танқидчилиги давр «янги инсон»ининг тасвири учун қурашда тўғри позицияда турганлигини кўрсатади. Масаланинг умумий томонларини ҳал этишда танқидчиклик ижодкорларга мана шундай раҳнамолик қилиш

<sup>40</sup> Шарафиддинов О. Танланган асарлар. 227-бет.

даражасига кўтарила олди. Бунга бир жиҳатдан илғор рус танқидчилигини пухта ўрганиш сабабчи бўлган эди. 30-йилларнинг ўрталарида рус танқидчилари совет адабиётининг янги, етакчи қаҳрамонлари кимлар ва улар қандай тасвирланиши керак, деган савол устида тўхтаб «Литературный критик»<sup>41</sup> журналида қатор баҳсли мақолалар эълон қилган эдилар. Улар шоир ва ёзувчилардан ишчи-колхозчиларнинг фақат меҳнатинигина эмас, балки шу меҳнат жараёнида кечаетган кечинмаларини, ҳис-туйғу, фикр ва мулоҳазаларини янгича онг, янгича инсоний ҳолат, янгича ижтимоий муносабатларни кўпроқ тасвирлаб беришни талаб эта бошлагандилар. Ўзбек адабий танқидчилигининг ижодкорларимиз олдига қўйган талаблари ҳам деярли шуларга ҳамоҳангдир.

Бироқ адабий маҳсулотнинг конкрет намуналарини таҳлил этганда ўттизинчи йиллар ўзбек адабий танқидчилиги ҳамма вақт бирдай савияда туролмади. Унинг янги адабий фактлар қаршисида эскича — консерватив мазмунда фикр юритган пайтлари ҳам бўлди.

Биз бундай ҳодисани А. Қодирийнинг «Обид кетмон» повести ва А. Қаҳҳорнинг «Сароб» романига билдирилган муносабатда учратамиз. А. Қодирий ўзининг «Обид кетмон» повестини қишлоқда колектив хўжаликлар тузилиши ва ғалабасини олқишлиш мақсадида яратган эди. Ёзувчи социалистик колективизмга асосланган хўжаликларнинг илгариги қолоқ якка хўжаликларга нисбатан афзаллик жиҳатларини кўрсатишда фақат ўзбек ёзувчилари ичida эмас, бутун Ўрта Осиё ва, қолаверса, Итифоқимиздаги бошқа кўпгина ёзувчilar ичida ҳам биринчилардан бири бўлди. «Обид кетмон»да ўрта деҳқоннинг колхоз тузумига хайриҳо бўла бошлиши, коллектив хўжаликка кириб келиши ва, ниҳоят, бу тузумда фаол кишига айланиши ишонарли тарзда, мантиқан асосли вазиятлар, деталь ва картиналар орқали мукаммал тасвирланиб кўрсатилади.

Бу — ёзувчи давр ҳаётининг илғор тенденцияларидан бирини ҳаққоний инъикос этди, демакдир. Чунки, ўша давр партия ҳужжатларида қайд этилганидек, колхоз тузумининг ғалабасида ўрта деҳқоннинг колхозга кириши жуда катта ижобий роль ўйнар эди.

А. Қодирий ҳам бутун эътиборини асосан шунга қаратиб повесть яратган эди, аммо ўттизинчи йиллар

<sup>41</sup> Литературный критик. Розенталь М. О времени и его героях. 1938; Юзовский Ю. Освобожденный прометей. 1934. 10; Усевич Е. Традиции писателя и литературный герой. 1936. 1.

танқидчилиги ёзувчининг йирик жанрда совет даврини тасвир этишга ҳаракатини табриклади, аммо бу муҳим асарни етарли қадрлай олмади.

Мулла Обид бир йил ичида каттагина ер-сув, иккинчи йили сигир-қўй ва бошқа моддий бойликлар ортиради. Агар у шу зайлда давом этаверса, учинчи, тўртинчи йилларга бориб муштумзўрга айланиши ҳеч гапмас. А. Қодирий деҳқонларимизнинг шу йўлдан боришини истайди, деган мутлақо субъектив, тенденциоз, саводсизларча бемантиқ даъволарни бир ёққа йиғишириб қўяйлик<sup>42</sup>. Ҳатто, Ойбекдек етук олим, шоир ва мунаққид томонидан яратилган «А. Қодирийнинг ижодий йўли» номли монографик тадқиқотда (1936) ҳам ёзувчининг «Обид кетмон»да замоннинг мусбат типларини яратиш йўлидаги муваффақиятларидан қаноатланмаганини изҳор этди. «Кўпинча воқеалар, ишлар хроникал формада, ёзувчининг ўзи томонидан қайд қилинади. Аммо ёзувчи пахта ишлаб чиқариш билан баравар янги одамлар «ишлаб чиқариш»ни, янги психика, янги онг, шуур, янги муносабатлар, қисқаси, одамларнинг ўзгаришини бадиий акс эттиришни анча унтулади»<sup>43</sup>. Бу бир ёқлама фикр эди, чунки ўрта деҳқон — Обид образи ўша вақт адабиётида яратилган энг ёрқин, реалистик образлардан бири бўлиб, фақат бир ёзувчининг эмас, бутун ўзбек совет адабиётининг ҳам ютуғи эди. Шу сабабли Ойбекнинг қўйидаги сўзларига қўшилиб бўлмайди: «Бизнингча, ёзувчи Обид кетмоннинг колхозга киргунча кечирган ҳаёти ва ҳаракати орқали ўрта деҳқоннинг турмуш шароитини ошириб кўрсатишида типик воқеаларни типик шароитда акс эттиrmайди. Ўқувчи Обид кетмон образида бутун хусусиятлари ила гавдаланган жонли бир тип кўра олмайди. Ибтидоий ишлаб чиқариш қуролларига молик бўлган ва ота-бободан қолган эски усуслар билан иш кўрувчи майда деҳқон хўжалигида учрайдиган қийинчиликлар ва етишмасликларни ёзувчи у қадар реалистик тасвир қилмайди. Хусусий меҳнатга, якка хўжалик манфаатига асосланган, тарқоқ хўжалик шароитининг картинаси равшан кўрилмайди»<sup>44</sup>.

<sup>42</sup> Бу каби даъволар ишнинг дастлабки қисмларида эслатиб ўтилган, назарий жиҳатдан ўта занф (аммо ёзувчиларни шаронтга қараб гоҳ сабабсиз кўкларга кўтариб мақташга ва гоҳ турли-туман сиёсий айблар тўнкаб сўкишга уста), ўткинчи танқиднинг маҳсулни эдилар.

<sup>43</sup> Ойбек. Муқаммал асарлар тўплами. 14-том. 179-бет.

<sup>44</sup> Ўша асар. Ўша том. 170—171-бетлар.

Шуни эсда тутиш керакки, башарти Абдулла Қодирий ўз навбатида аввал майда деҳқон хўжалигида учрайдиган қийинчиликлар ва етишмасликларни чуқур тасвирлаб бериб, Обид кетмоннинг колхозга кириш сабабларини шундан келтириб чиқарадиган бўлса, одатдаги асарларга ўхшаш бир повестни майдонга келтира оларди-ю, лекин ўз олдига қўйган бундан ҳам юксакроқ ва таъсирироқ мақсадига — ўрта деҳқоннинг колхозга келиши процессини психологик асослашга, реалистик тасвирлашга эриша олмаган бўлур эди.

Ёзувчининг «Обид кетмон»да совет кишиларини тасвирлашдаги катта ютуқларидан бири Берди татар образидир. Берди татар колхоз қурилишида етакчи бўлган коммунист Обиддинг раҳнамоси. Афсуски, 30-йиллар ўзбек адабиётининг ютуғи бўлган бу образни тушунишда ҳам танқидчилик бир ёқламаликка йўл қўйди. Масалан, Ойбек ёзувчининг бош мақсади — ўрта деҳқоннинг колхоз тузуми фалабасида ўйнаган ҳал этувчи ролини кўрсатиш эканини ва Берди татар образи ўрта деҳқон онгига ижобий таъсир этган, аммо амалий ишларда ташаббускорликни Обидга атайн бериб қўйган ақлли партия ходими тарзида тасвир этилганини эътиборга олмай, «чуқур ўйлаб кўрилса, Берди татар чинакам курашчиликдан узоқлаштирилади»<sup>45</sup>, деган асоссиз хуросага келди.

«Обид кетмон» ҳақида айтилган тўғри ва нотўғри фикрлар ҳаммаси бир нарсадан гувоҳлик беради: янги, совет даври одамининг образини яратиш танқидчилик тарафидан, ҳақли равишда, давр адабиётининг энг муҳим вазифаси тариқасида, даврнинг талаби сифатида майдонга қўйилади.

Бу жиҳатдан олганда, Абдулла Қаҳҳорнинг «Сароб» романи юзасидан бўлган оғзаки мунозара ҳам серса-боқдир.

1939 йилнинг 14 июнида Ўзбекистон ССР Халқ Комиссарлари Совети қошидаги Фанлар комитетида бошланган диспут (мунозара) қарийб уч кун давом этди. Диспутга Ўзбекистон Компартиясининг масъул ходимлари раҳбарлик қилдилар. Баҳсларда ёзувчи, шоир ва танқидчилардан Ш. Сулаймон, Уйғун, Ю. Султонов, Р. Мажидий, Ҳ. Ёқубов, Ҳ. Расул, Н. Охундий, Ҳ. Мусаевлар актив иштирок этдилар. Романин кенг таҳлил этувчи асосий доклад Ю. Султоновга топширилган эди. Ю. Султонов асарга умуман ижобий баҳо берди. Би-

<sup>45</sup> Ӯша асар. Ӯша том, 147-бет.

роқ унда салбий қаҳрамонлар ижобий қаҳрамонларга нисбатан кенгроқ ва чуқурроқ тасвирланганини таъкидлаб: «Ҳатто турмушдаги реакцион кучлар тасвирланганида ҳам уларнинг маълум прогрессив кучлар қаршисида қақшаётгани билиниб турсин ва у прогрессив, ривожланадиган, енгилмайтурган кучлар кўриниб турсин. Ӯшандагина турмушни тўғри ва тўла англай оламиз»<sup>46</sup>,— деган фикри илгари сурди.

Бу — Ю. Султонов позициясининг ожиз томони эди. Чунки у «Сароб»нинг муаллифи ўз олдига воқеликдаги салбий кучларни — мағлубиятга учраган миллатчилик идеологияси вакилларини тасвирлашини вазифа қилиб олганини эътиборга олмаган эди.

Қизифи шундаки, баҳснинг деярли барча иштирокчилари докладдаги бу камчиликни тушуниб етмай уни кетма-кет маъқулламоққа интилдилар. Натижада асарга ва айниқса ёзувчининг ғоявий-бадиий мақсадига мутлақо нотўғри баҳо беришлар ҳам бўлди. Жумладан, Ҳ. Мусаев романда ижобий қаҳрамонлар тасвирига етарли даражада ўрин берилмаган дейиш билан бирга ёзувчидан: «Мамлакатимизнинг иқтисодий ва сиёсий тараққиётини кўрсатиши»<sup>47</sup>ни... «Омманинг қаҳрамонлиги, фаолияти, тарихи, кураши, илфорлиги»<sup>48</sup>ни акс эттиришни талаб қилди, яъни ёзувчи ўз олдига қўймаган вазифа нуқтаи назаридан асарга яқинлашди.

Унинг таъкидларига кўра, А. Қаҳҳор гўё «Совет ҳукуматининг ўсишини ва кундан-кунга мустақил бўлиб боришини инкор этиш ва кўрмаслик» оқибатида ижобий қаҳрамонлар тасвирига кам эътибор берганмиш»<sup>49</sup>.

Ҳ. Мусаев нутқида баён этилган юқоридаги каби нотўғри хulosаларга диспутнинг деярли барча қатнашчилари яқдиллик билан қарши чиққанлигини алоҳида қайд этиб ўтмоқ керак. Зотан, бу муҳим факт 30-йилларнинг охирларига келиб ўзбек танқидчилигига қўппол вульгар социологик хатолар қарши зарбага ҳам учрар эди, дейиш учун асослик вазифасини ўтайди.

Ҳ. Мусаев қарашларига биринчи энг кучли ва ҳал этувчи зарбани Ҳ. Ёқубов беради. У, энг аввало, А. Қаҳҳор билан «Сароб»нинг бош қаҳрамони Саидий ўртасига «тенглиқ аломати қўйиш бемаънилилк экани-

<sup>46</sup> 1939 йил 14 июнда Фанлар комитетининг ёзги мажлис боргида орденли ёзувчи А. Қаҳҳорнинг «Сароб» романни устида очилган диспут. ЦГА УзССР. ф. 2856. Оп. 1. Ед. хр. 56. С. 18.

<sup>47</sup> Уша архив. 32-бет.

<sup>48</sup> Уша архив. 38-бет.

<sup>49</sup> Уша архив. 40-бет.

ни исботламоқча интилди»<sup>50</sup>. Асарнинг идеяси миллатчиликнинг ҳалокатга дучор бўлиши. Шунинг учун биз ёзувчининг ҳар бир майда нарсаларига тегишмасдан, тирноқ орасидан кир излагандек қилиб ёпишмасдан, унинг асосий фикрини топиб»<sup>51</sup> фикр юритмоғимиз лозим, деди у ва Ҳ. Мусаев йўл қўйгани каби хатоликлар шуни билмаслик оқибати эканлигини кўрсатиб ўтди.

Ҳ. Ёқубов ёзувчи асарнинг бош ғоясини асосан салбий образлар орқали ифодаламоқчи бўлганлигини ҳам биринчи бўлиб қайд этди. Бироқ, Ҳ. Ёқубов «асарнинг идеяси тўғри»лигини нечоғлик қайта-қайта таъкидламасин, ёзувчининг «шу идеяни салбий образлар орқали ифодалаши»ни хатоликка йўймоқчи бўларкан, ўзига ўзи қарши чиқаётганини сезмай ҳам қолади. «Ҳақиқатда,— дейди у мутлақо янгилиш фикрни илгари суриб,— ўшани яна бўрттириб кўрсатиш учун, бизни янглиштирмаслик учун халқнинг вакилларини, халқнинг бутун борлигини ифодаловчи кишиларни бериш керак эди»<sup>52</sup>.

Кўриниб турибдики, мунаққиднинг бу ўриндаги даъвоси назарий жиҳатдан ҳам, мантиқ жиҳатдан ҳам ҳеч қанақа тайнли бир асосга эга эмас. Ахир қандай қилиб миллатчилик ва миллатчиларнинг таназзулга юз тутишини халқ вакиллари образида ифодалаш мумкин? Асарнинг идеяси халқнинг бутун борлигини ифодалашдан иборат эмаску! Башарти ёзувчи мунаққид айтганларини бажармоқча ҳаракат қиласидан бўлса, мутлақо бошқа типдаги янги бир асарга қўл урган бўлмасмиди?

Демак, бу ўринда Ҳ. Ёқубов шаклнинг мазмунга мутаносиб эканлигини ҳисобга ололмаслик натижасида чалғиб кетади ва нотўғри хulosалар чиқаради.

Роман ўз олдига қўйган вазифасини асосан тўғри бажара олганлигини диспутда сўзга чиққан Н. Охундий ҳам таъкидлайди. «Ёзувчи миллатчилик инқизозини «Совет ҳукуматига қарши курашган контреволюцион ўзбек миллатчилари ва уларнинг Совет Ўзбекистонига қарши олиб борган курашлари орқали кўрсатмоқчи бўлади»<sup>53</sup>,— дейди у. Унинг бу фикрини Р. Мажидий ва Ўйғун ҳам жиддий қўллаб-қувватлайдилар.

Шуни алоҳида қайд этиб ўтиш керакки, асаддаги ижобий қаҳрамонлар масаласига ўтилганда кейинги

<sup>50</sup> Ўша архив. 48-бет.

<sup>51</sup> Ўша архив. 51-бет.

<sup>52</sup> Ўша жойда.

<sup>53</sup> Ўша архив. 54-бет.

нотиқлар Ҳ. Ёқубов томонидан йўл қўйилган хатони такрорламайдилар. Аксинча, романнинг асосий фояси билан бу фояни ифодаловчи бош қаҳрамонлар ўртасидаги ҳеч қандай номувофиқлик йўқ, бунинг устига асарда ижобий образлар ҳам мавжуд, аммо улар салбий образларга нисбатан бирмунча бўш чиқсан, деган фикрларни илгари сурадилар. Хусусан, Н. Охуцдин ўз нутқини худди шу тарзда яқунлайди.

Р. Мажидий бунинг баъзи бир сабабларини ҳам изоҳлаб ўтишга ҳаракат қиласди. Ёзувчи ўз олдига асосан салбий типларни фош этиш вазифасини қўйгани учун шулар муҳитига чуқур кира билган, ижобий қаҳрамонлар муҳитини етарли даражада ўргана олмаган ва шунга кўра уни яхши билмаслиги табиий, бу нарса романда ҳам акс этган, дейди у.

Юзаки қараганда дурустгина мантиғи бордай туюладиган бу фикр аслини олганда романнинг жанри талабларини тўла ҳисобга ололмаслик натижаси эди. «Сароб» сатирик йўналишдаги асар бўлгани учун ёзувчи унда ижобий қаҳрамонлар тасвирига чекланмаган меъёрда ўрин ажратса олмас эди.

Уйғун ўз нутқида шу масалага алоҳида тўхтаб, тасвири штрих билан бериш бадиий асарнинг приёми эканлигини таъкидлайди. Романда Совет ҳокимиятининг улуғворлиги ҳам, социализм қуриш йўлидаги буюқ одимлар ҳам ўз ифодасини топа олган, ёзувчининг асосий меҳри халқда, «буни гарчи у айrim каттакон типлар орқали тасвирлаб бермаса ҳам, айrim жойларда бу нарса жуда очиқ кўринади»<sup>54</sup>, — дейди. Уйғун романнинг ижобий қаҳрамондан камситилишига қатъян қарши чиқади.

Ниҳоят диспутнинг учинчи куни «Сароб» одатдаги романлардан эмаслигига тўла ишонч ҳосил қилинади. Унга одатдаги романлар андазаси билан ёндашишни нотўғри йўл деб топилади. Буни шу куни диспутга якун ясаган Сулаймон Азимов ҳам қайд этиб ўтади. «Қандай типларни марказий фигурага олиш — ёзувчининг ихтиёрида, ундан қаҳрамонлар албатта ижобий ёки салбий бўлишини талаб қилиб бўлмайди, чунки бундай қилиш «адабий асарни маълум бир рамкага солиш»<sup>55</sup> билан баробар, дейди у.

С. Азимов ўз нутқини «Сароб» ҳеч қанақа зарарли асар эмас, деган жуда тўғри хулоса билан яқунлайди.

<sup>54</sup> Уша архив. 114-бет.

<sup>55</sup> Уша архив. 128-бет.

Юқорида келтирилганлардан кўриниб турибдики, ўзбек адабий танқидчилиги ўттизинчى йилларнинг сўнгига чорагига ўтилганда савия жиҳатидан яна бир пофона юқори кўтарила олган. Бунда «Сароб» романи ўзига хос муҳим бир туртки вазифасини ўтайди. «Сароб» пайдо бўлгунига қадар танқидчилик социалистик реализм адабиётида воқелик гўзалликларини бевосита эмас, балки билвосита (социалистик идеалга суюнган ҳолда сатирик образлар орқали) тасдиқловчи асарлар ҳам учраши мумкинлигидан деярли бехабар эди. Шунга кўра, у адабиётда социализм қурувчи янги инсон типларининг юксак бадиий тасвиirlари учун курашар экан, буни баъзан социалистик реализмнинг бирдан-бир белгиси деб қабул қилиш даражасига яқинлашиб қолар эди. «Сароб» романи ўттизинчى йиллар ўзбек адабий танқидчилигига худди ана шу хато тушунчанинг ортиқча илдиз отишига йўл қўймади, дейиш мумкин.

Шундай қилиб, ўттизинчى йиллар ўзбек адабий танқидчилигига социалистик реализмнинг тасвир имкониятлари ниҳоятда чексиз эканлигига тўла ишонч ҳосил қилина бошланади.

Бундай ишонч 1941 йилнинг 19—20 февраль кунлари «Қутлуғ қон» романи юзасидан ўтказилган диспут<sup>56</sup>да яна бир бор бор ўзини оқлади.

Бу роман, ҳақли равишда, ўзбек социалистик реализм адабиётининг етук намунаси сифатида баҳо олдики, бу факт ўзбек адабий танқидчилигининг назарий асослари мустаҳкамланганидангина эмас, унинг назарий қоидаларни бадчий асар таҳлилига хизмат эттира олиш даражасига кўтарилганидан далолатdir.

### СОЦИАЛИСТИК РЕАЛИЗМ ЭСТЕТИКАСИНИ ЭГАЛЛАШ ИУЛИДАГИ ИЗЛANIШЛАР

Янги, совет адабиётини ривожлантириш йўлларини, унинг ютуқларини, камчиликларини ва истиқболини адабий танқид орқали англаш, ўттизинчى йилларда (аввал ҳам бўлганидек) адабиётнинг назарий масалаларини ишлаш билан баробар борди. Назарий тафаккур адабий танқиднинг асосини яратишга интилар эди.

Ўттизинчى йилларда назарий масалалар юзасидан матбуотда, турли доклад ва китобларда айтилган фикрларнинг батафсил таҳлили — адабиётшунослик тарихининг вазифасидир. Биз танқид тарихига бағищлан-

<sup>56</sup> ЦГА УзССР. Ф. 2356. Оп. 1. Д. 87. Л. 1—59.

ган бу «Очерклар»да назарий тафаккурнинг бевосита адабий танқиднинг илмий савиясини кўтаришга хизмат этган баъзи аспектларига тўхтаб ўтамиз.

Баъзи танқидчилар ўзларининг назарий савиялари жуда пастлиги туфайли адабий жараён, ёзувчилар ва уларнинг асарлари ҳақида асоссиз ва заарли фикрлар билан майдонга чиқишида давом этдилар. Чунончи, «Қизил Ўзбекистон» газетасининг 1930 йил 30 октябрь сонида бир танқидчининг «Ниқобли шоирлар» сарлавҳали мақоласи босилган. Унда муаллиф истеъдодли ёш ижодкорлардан Ҳамид Олимжон ва Миртемир шеърларини саводсизларча таҳлил этади. «Танқидчи»га шоирларнинг табиат манзараларини тасвир этганлари ёқмабди. Бундан у мана шундай хулоса чиқаради: «Бутун халқимиз социализм қуриш учун хормай-толмай курашаётганида булар ойга қараб суҳбат қуришади». Муаллиф қарашича, совет ёзувчиси табиат ҳақида ёзиши мумкин эмас, муҳаббат ҳақида ёзиш эса «парнография моментларига ўрин бериш» бўлар эмиш. Шундан кейин «танқидчи» Миртемирнинг «муштумзўр боласи», Ҳамид Олимжоннинг «савдогар ўғли» эканини даъво этади ва, бинобарин, улар бошқача ёзишлиари мумкин эмас эди, деган хулосага келади.

Бу каби саводсизона, юзаки мулоҳазалар вақтли матбуотда анча учрарди. Шу сабабли партия ва давлат арబблари ўзларининг санъат ва адабиётга оид ва ижодкорлар учун муҳим йўл-йўриқлар берган докладларида бундай руҳдаги чиқишларни тўхтатиш ва уларга зарба беришга мажбур бўлар эдилар. ЎзКомпартия Марказий Комитетининг биринчи секретари бир докладида: «Маннон Роиқ шеърларидан биридаги «иш тонги отди, ҳаёт иш билан қайнайди» деган сатрларга танқидчи... шундай эътиroz билдиради: «Бу сочма 1929 йилда, беш йиллик плannинг биринчи йилида ёзилган. Бундан кўринадики, шоир «фақат эндигина тонг отди. 1928 йилга қадар тонг отмаган эди»,— дейди. У 1928 йилгача ҳаёт гўё ўлган эди, деган диалектикага қарши мантиқни илгари суради»<sup>57</sup>,— деган эди.

Адабий танқидга назарий тайёргарликсиз, тасодифан кириб қолган баъзи кишилар бадиий ижоднинг методи ҳақида ҳам тутуриқсиз фикрлар билан матбуотда чиқдилар. Масалан, бир «танқидчи» ёзган эди: «Романтизм оқими, символизм оқими, реализм оқими —

<sup>57</sup> А. Икромов адабиёт ва санъат тўғрисида. Тошкент. 1935. 90—91-бетлар.

буржуа адабиётидан қолган мерос бўлгани учун бизнинг адабиётимиз учун асос бўла олмайди. Пролетар адабиётӣ ўзининг мундарижасига мувофиқ бир шакл ишлаб чиқиши керак»<sup>58</sup>.

Бу мақолада айтилишича, Уйғун «Олтин сози» шеърида гўё романтизмга жуда берилиб кетиб, ўзининг ижодида буржуа оқимини қўллаган»<sup>59</sup>.

Бунга ўхшаш «фикрлар» фақат саводсизликнинг натижасигина бўлмасдан, балки совет адабиётшунослиги ва танқидчилигига 20—30-йилларда анча тарқалган вуљгар социологизмнинг оқибатлари ҳам эди. Марксизм-ленинизм санъатшуносликда социологизмга суюнишга ўргатади. Санъатшуносликда социологизм — санъатнинг туғилиши ва ривожида ижтимоий ҳаёт, синфларнинг кураши ҳал этувчи роль ўйнашини тасдиқ этади. Аммо бу чуқур илмий қоидаларни санъатга (ва унинг бир тури бўлган адабиётга) уларнинг ўзига хос хусусиятларини кўзда тутмай, тўғридан-тўғри ва юзаки татбиқ этиш мумкин эмас. Вуљгар социологизм вакиллари санъатнинг мураккаб ҳодисаларини бузиб, гўё санъат асарида санъаткорнинг фақат синфий қарашлари ўз инъикосини топади, ёзувчи ёки рассом ўз синфий муҳити таъсиридан ҳеч қачон чиқолмайди, санъатнинг асосий хусусиятлари бевосита иқтисоднинг хусусиятлари билан тайин этилади деган файриилмий тезислар билан майдонга чиққан эдилар. Аввало рус адабиётшунослигига пайдо бўлган бу файриилмий қарашлар 20—30-йилларда илмий доираларда баъзан устунлик қилгани сабабли, ўзбек адабиётшунослиги ва танқидчилигига ҳам ўз таъсирини ўтказган эди. Миртемир, Ҳамид Олимжон, Уйғун каби ёзувчиларнинг таржимаи ҳолидан кир ахтариб, уларнинг эксплуататор синфлар муҳитидан чиққанини «исбот этиб», кейин уларнинг ижодини пролетариатга ёт синфлар идеологияси сифатида таърифлаш — ана шу вуљгар социологизм йўлидан бориш оқибати эди.

Адабиётда ва адабий танқидда мавжуд соғлом ва доимо марксизм-ленинизм таълимотини эгаллашга интилиб келган кадрлар ўттизинчи йилларда ҳам совет адабиётининг социалистик реализмни эгаллаш йўлларини изчил ўрганиб, танқид соҳасида ҳам етук фикрлар билан чиқар эдилар. Тўғри, бу кадрларнинг наза-

<sup>58</sup> Қурилиш. 1931. 3-сон.

<sup>59</sup> Ўша жойда.

рий қарашларида ҳам бугунги кун нуқтаи назаридан баъзи жиддий камчиликларни топиш ҳам мумкин.

Адабий кадрлар назарий савиясининг ошувида К. Маркс, Ф. Энгельс ва Б. И. Лениннинг идеология, санъат ва адабиётга оид асарларининг кўплаб эълон этилиши, етакчи рус адабиётшунослигига марксизм-ленинизмнинг санъат ва адабиёт ҳақидаги таълимотига оид кўпгина асарларининг эълон этилиши, айниқса А. В. Луначарскийнинг ўзбекчага таржима этилган «Ленин ва адабиётшунослик» асари, М. Лифшиц ва Ф. Шиллер тузган «К. Маркс ва Ф. Энгельс санъат ва адабиёт ҳақида» хрестоматияси, Б. И. Лениннинг Лев Толстой ижодига бағишлиланган мақолалари туркуми, «Партия ташкилоти ва партия адабиёти» асари каби принципиал характердаги ижобий фактлар ўзбек адабиётшунослиги ва танқидчилиги илмий асосининг мустаҳкамланишига хизмат этдилар. М. Горький, А. Фадеев ва бошқа совет адабиёти намояндлари томонидан социалистик реализм адабиётининг назарий масалаларига бағишилаб тез-тез мақолалар ёзиб турилганини назарий муваффақиятларига мадад берди.

Адабиётнинг ривож йўлларини тўғри тушуниш ва унинг ҳодисаларига тўғри баҳо бериш учун даставвал адабиётнинг санъат сифатидаги спецификасини тўғри тушуниш керак эди (адабиёт ҳақидаги айтилган кўпгина фикрларнинг нотўғрилигига ҳам сабаб унинг спецификасини тушунмаслик эди).

Бу масалага илк маротаба Ҳамид Олимжон диққатни тортди. Унинг муҳим мақолаларидан бирининг «Адабиётни англамасликка қарши»<sup>60</sup>, деб аталиши ҳам бејиз эмас эди. Бу мақолада Ҳамид Олимжон бадиий адабиётни идеологиянинг бошқа соҳаларидан фарқ эта билмасликнинг заарини тушуниради: «Бизнинг замонамиизда мафкуравий нуқтаи назардан соғлом ишланган ҳар бир нарса бадиий асар қаторига кира олмайди. Бу шунинг учунким, у асарнинг бадиий асар саналмасдан ҳам фойда етказиши кўриниб турган нарсадир. У бадиий асар бўлиши учун образлар воситаси билан ифода қилинган бўлиши матлубдир». «Санъаткор шу (халқимиз олдида турган — T. P.) улуғ вазифаларни нозиклик ва кишига ҳузур бериш йўли билан ўқувчига сингдира олгандагина санъаткор номини олишга ҳақли бўлади».

<sup>60</sup> Қизил Ўзбекистон. 1930. 30 март.

Ҳ. Олимжон давом этиб ўша йилларда танқидда тарқалган яна бир назарий хато фикрга зарба беради. Ҳ. Олимжон «Марксизм ниқоби остида меньшевизм» номли мақоласида асосан А. Саъдийнинг «Адабиёт масалалари ва Улуғ Октябрдан кейинги ўзбек адабиёти» деган китоби юзасидан марксча-ленинча назарияга амал қилиб фикр юритади.

А. Саъдий кўпгина мақолалари ва юқорида тилга олинган китобида пролетариат адабиёти ва унинг методига оид масалаларни тушунишда вуљгар социологлар изидан борган эди. Муҳими шундаки, Ҳ. Олимжон бунинг туб сабаблари, асл келиб чиқиш манбалари йигирманчи йилларда кенг тарқалган ва ўттизинчи йилларга ўтилганда ҳам ўз таъсир кучини ҳамон сақлаб келаётган ва ўша вақтда «Переверзев назарияси» оқимига боғланишини жуда тўғри кўрсатиб беролган.

«Переверзев ва переверзевчилар,— деб ёзади у.— Ёзувчи фақат ўзи яшаб турган, ўзи мансуб бўлган муҳит тўғрисидагина ёза олади, уларнинг бошқа муҳит ҳақида ёзишлари, ёхуд бошқа муҳитга ўтувлари мумкин эмас, деган фикрни илгари сурдилар... Бу фикр... пролетар адабиётининг попутчикларни (пролетариат орасидан чиқмаган, аммо пролетар революциясига хайриҳоҳ санъаткорларни — *T. P.*) тарбиялаш учун олиб борган курашини йўққа чиқарув учун майдонга ташлангандир»<sup>61</sup>.

А. Саъдий ўз китобида социализм идеяларини ташувчи адабиёт («пролетариат адабиёти») фақат пролетариат диктатураси даврида туғилади, деган фикрни олға суради. Ҳамид Олимжон пролетариат сиёсий ҳокимиятни қўлга олгунига қадар бир қатор тараққиёт босқичларидан ўтиши ана шу даврларда ҳоким синфларнинг мафкураси ҳоким мафкуралигича қолиши, лекин бу пролетариат маданияти туғилиб шакллана боришига имкон берувчи йўлларнинг буткул кесиб қўйилиши деган сўз эмаслигини уқтириб, ўз фикрига доҳиймиз В. И. Ленин асарларидан ва унинг А. М. Горький ижодига берган баҳосидан мисоллар келтириб ўтади<sup>62</sup>.

Ўзбек совет адабий танқидчилигида вуљгар социологизмга қарши дастлабки кучли зарбани Отажон Ҳошим қаламига мансуб «Ўзбек шўро адабиётининг бир неча ижодий масалалари» номли рисолада ҳам кузатиш мумкин.

<sup>61</sup> Олимжон Ҳ. Танланган асарлар. Уч томлик. З-том. Тошкент. 1960. 158-бет.

<sup>62</sup> Ўша жойда.

Отажон Ҳошим ўзининг бу рисоласида санъат ва адабиёт идеологиянинг бир тури эканлигини, шунга кўра, ўзбек совет адабиётининг тараққиёт жараёнлари социализм қурилиши билан, умумхалқ маданий савиясининг ўсиши ва синфий кураш процесслари билан бирга, аммо специфик равишда кечиши табиийлигини чуқур англай олган йирик тадқиқотчи сифатида намоён бўлади.

Рисолани у санъат ва адабиёт соҳасидаги идеология масалаларига ижодкорнинг дунёқараши, воқеликка муносабати билан боғлиқ равиша юзага чиқадиган ҳодиса деб тушуниши лозимлигини таъкидлашдан бошлайди.

У шу нуқтаи назари асосида давр бадиий тафаккури олдига қатор муҳим талаблар қўядики, бу талаблар ҳозирги кунда ҳам ўз аҳамиятини йўқотмаган.

«Ўзбек шўро ёзувчилари ўз позицияларини пролетариатнинг устидан туриб эмас, кузатувчи бўлиб эмас, балки унинг узвий бир бўлаги, онгли вакили бўлиб билдиришлари лозим»<sup>63</sup> (Тадқиқотчи В. И. Лениннинг «Партия ташкилоти ва партия адабиёти» асаридаги муҳим фикрлар моҳиятини ўзига қандай сингдириб ололганлигига аҳамият беринг — *T. P.*).

Лекин, бадиий адабиётда ялангоч ваъзхонликка берилиш, фикрни қуруқ, декларатив шаклларда баён этавериш ярамайди. Баъзи шоирлар ва ҳатто таңқидчилар ҳам бунга сира аҳамият бермай қўйишган эди. Хусусан, вульгар социологизм таъсиридан қутулолмаётганларга адабиётда воқелик идеологиянинг бошқа турларидағига нисбатан бошқача ёритилишини тушунириб бериш лозим эди. Шу сабабли О. Ҳошим юқоридаги фикрини қўйидагича ривожлантириб, санъатда синфийлик ва партиявийликка алоҳида урғу қиласи: «Турмушнинг адабиётда акс этиши жуда ҳам мураккаб процессдир... Турмуш адабиётда шоир — ёзувчи орқали акс қиласидир, турмушдан олган фикрларини, ҳисларини, туйғуларини ёзувчи бадиий шаклда, образлар билан берадир. Аммо бу процессда ташкил қилиш ролини ёзувчининг синфий қараши, синфий позицияси ўйнайдир»<sup>64</sup>.

О. Ҳошим ўзбек совет поэзияси ва умуман адабиётидаги ҳаётга муҳаббат, яшаш завқи, замонадан, Ва-

<sup>63</sup> Отажон Ҳошим. Ўзбек шўро адабиётининг бир неча муҳим масалалари. Тошкент—Самарқанд. 1933. 4-бет.

<sup>64</sup> Уша асар. 7-бет.

тандан, келажакка ишончдан ғуурланиш ҳислари кучилиги боисини жуда түғри изоҳлай олди. «Бунинг сабаби шўндақи,— деб ёзади у,— ўзбек шўро ёзувчилари шўро платформасида, социализм қурилиши платформасида турадилар, Октябрдан кейин Ўзбекистонда қурила бошлаган турмушни, янги тузумни ўзлариники ҳисоблайдилар. ...Мана шунинг учун уларнинг турмушга, табиат кўринишларига қарашларида бадбинлик йўқдир, уларнинг сезгилари, табиат кўринишларидан олган ҳислари, туйғулари ҳам умид билан тўлгандир»<sup>65</sup>.

О. Ҳошим совет адабиётининг мамлакатда рўй берәтган буюк ўзгаришлар билан доимий алоқадорликда такомиллашишини кучайтириш лозим деб ҳисоблайди.

Унинг фикрича, ёзувчи ўз асарини истаган мавзуда ёзиши мумкин. Танқидчилик томонидан у ё бу мавзуда ёзиш шарт деб ҳукм чиқариб қўйиш ўтакетган бемаънилиkdir. Муҳими — замонавий ҳаёт, революцион воқелик ижодкорларнинг, шу жумладан, адабиётнинг ҳам диққат марказида турса бас.

Олимнинг қўйидаги фикрлари ўз даврида қандай улкан аҳамият касб этган бўлса, бугунги кунда ҳам худди ўшандай — юксак қадрини йўқотмай келаётir. «Турмушни китоб, газета, журнал мақолаларидангина эмас, ғалки турмушда қайнаб туриб, турмушни тузиб туриб, турмушнинг ўзидан ўрганув керак. Чунки, конкрет турмуш мақолаларда, китобларда ёзилганидан мураккаброқ, конкретроқ, турли-туманлироқдир. Конкрет турмушимизни билиш ҳам ўрганиш билангина уни турли томонлардан, биринчи қарашда таҳлилсиз кўринмай турган томонларидан чуқурроқ бадний акс этув мумкиндир»<sup>66</sup>.

Олим адабиётнинг ҳаёт билан алоқаси аҳамиятини қайта-қайта таъкидлаш билан совет адабиёти юксак даражада бадний бўлиши учун ҳам курашди. Ҳаётни билмаслик, воқеликка четдан туриб муносабат билдиришга уриниш, халқ курашларини, интилишларини палапартиш ва жуда юзаки кузатиб ёритиш ҳамиша қуруқ ваъзхонлик, чучмал риторика, схематизм сингари иллатлар кўпайишига сабабчи бўлган ва сабабчи бўлаверади.

Танқидчи бундай иллатлар озаймаётганлигидан

<sup>65</sup> Уша асар. 9-бет.

<sup>66</sup> Уша асар. 11-бет.

қаттиқ ташвишга тушган эди. У бунга мисол тариқасида завод ва колхоз ҳаётини ёритишдаги камчиликларни кўрсатиб ўтади. «...Завод албатта зарбдор, бутун ишчилар, яъни масса меҳнатга бир хил — онги қарайди. Ҳаммалари ҳам план билан ишлайдилар, планни бутунлай бажарадилар ва шунинг қабилар. Қисқаси, ҳеч қандай камчилик, қийинчиликлар билан курашиш йўқ. Колхозда эса «ҳар колхозчи — толмас эр», ҳамма зўр меҳнат билан банд, баъзан ўрта деҳқон учраб қолади, унинг колхозга кириши осонгина кўчади — кўпчилик ана шу схема билан ёзади»<sup>67</sup>.

Ҳақиқатан ҳам, ўттизинчи йиллар аввалида пайдо бўлган қатор асарларда социалистик меҳнат ва турмуш тарзини ана шу тариқа юзаки ялтироқлаштириб, илгаридан белгилаб олинган гавдалантириш кўп учар, поэзияда декларативлик, мақтовбозлик, риторика кўп ўрин тутар эди.

О. Ҳошим бунга кескин қарши чиқар экан, ўттизинчи йиллар бадиий тафаккурини чуқурлаштириш ишига сўзсиз жуда катта ҳисса қўша олди.

Маълумки, адабиётнинг диққат марказида замонасининг энг илғор онгини ифодалай оладиган янги инсон бўлиши лозим. Бу фикр ҳозирги кунларда оддий аксиомага айланиб кетган. Лекин умумсовет адабиётшунослиги ва танқидчилигида ҳам, ўзбек совет адабий танқидчилигида ҳам шу аксиоманинг тасдиқ топиши бирданiga ва енгил бўлган ҳодиса эмас.

Отажон Ҳошим шу ҳақиқатни ўзбек адабий танқидчилигига илк маротаба олиб кирганлардан бири бўлди. «Ёзувчидан социализм қурилиши асосида янги социализм кишинининг пайдо бўлишини, унинг етилишини, социализм қурилиши асосида онг ҳам психологиясининг қайтадан тузилишининг ўзгаришини ўрганиш, текшириш орқали кўрсатиш талаб қилинади»<sup>68</sup>.

Мунаққид совет адабиётини янги, социализм қурилиши даврининг, янги дунёни барпо этәётган қаҳрамони халқнинг адабиёти деб билди ва шу сабабдан уни ўз даврига, халқига муносиб бўлиш учун курашишга чақириди.

Олим рисоласида ўзбек совет танқидчилигининг ўша даврлардаги аҳволи, вазифалари, йўл қўйиб келинган қатор ғоявий-методологик хатолар, ижодий-эстетик камчиликлар масаласи ҳам тегишли таҳлилини топа олди.

<sup>67</sup> Ўша асар. 23-бет.

<sup>68</sup> Ўша асар. 11-бет.

«Адабиёт билан машғул бўлган баъзи ўртоқлар орасида адабиётни шоир, ёзувчиларнинг кўз қаравишига (нуқтаи назарига демоқчи — T. P.) ...эмас, балки ижтимоий чиқишилари қандайлигига, нима тўғрисида ёзишлиарига, мавзуларига қараб белгилаш кўриладур»<sup>69</sup>, деб ёзади О. Ҳошим.

О. Ҳошим У. Исмоиловнинг «Ўзбек пролетар адабиётининг ижодий йўли учун кураш», Анқабойнинг «Пролетар ёзувчисининг ижодий юзи» мақолаларини ва «Дастгоҳ» тўпламига ЎзАПП томонидан ёзилган сўз бошини бунинг характерли мисоллари деб танқид қиласди. Энг муҳими шуки, О. Ҳошим ёзувчи воқееликни қайси идеологик нуқтаи назар билан, қайси синфнинг позициясида туриб акс эттиришга интилаётганини аниқлашга даъват этади. У, агар шу йўлдан борилмаса, қўпол хатоликларга йўл қўйиш муқаррардир, деган тезисни илгари суради.

О. Ҳошимнинг тўғри илмий платформада туриши унга ўзбек совет поэзиясининг қарийб ўн беш йиллик тараққиёт йўлини тўғри таҳлил этиш имконини берибгина қолмай, бутун ўзбек адабиётшунослиги ва танқидчилигининг вуљгар социологиям иллатларидан қутулиш йўлига ўтишини тезлатди. Танқидчилигимиз бу сабоқ таъсирида, ғоявийлик, бадиийлик, партиявийлик ва ижодий метод проблемалари юзасидан олиб бораётган текширишларини марксизм-ленинизм классиклари таълимоти ва совет адабиёти орттирган улкан тажрибалар асосида тамоман янги изда давом эттиришга киришди.

\* \* \*

ВКП(б) Марказий Комитетининг 1932 йил 23 апрель қарори ва ЎзКомпартия Марказий Комитетининг V Пленумидан кейин ўзбек совет танқидчилигини назарий жиҳатдан пухта қуроллантириш ишига жуда катта ҳисса қўша олган иккинчи муҳим ҳодиса Ҳ. Олимжон ва Ўйғун томонидан бадиий ижод масалаларига Маркс, Энгельс ва ленинча ёндашиш принципларнинг батафсил тушунтириб берилиши бўлди.

1932 йилнинг 29 октябрида «Литературная газета»да «Социалистик реализмни эгаллаш йўлида» деган мақола эълон қилинади. А. Фадеев қаламига мансуб бу мақола вуљгар социологиям намояндалари томонидан

<sup>69</sup> Ўша асар. 15-бет.

чигаллаштириб юборилган. Шубҳасиз, совет адабиётининг ижодий методига оид тўғри йўналишдаги илк назарий ишлардан бўлган бу мақола ўзбек ёзувчилари ва танқидчилари учун ҳам принципиал аҳамиятга эга эди. Чунки унда: «Совет адабиётининг етакчи оқими социалистик реализмдир. Нега десак, марксча-ленинча тушуниладиган ҳақиқий бадиий реализм шундай ижодни англатадики, у тарихий ҳақиқатга яқин, воқелик тараққиётининг эскилил кучлари билан курашишдаги асосий тенденцияларни кўра олиш иқтидорига эга бўлади. Бундай ҳақиқий реализм бизнинг кунларимизда нима учун социалистик реализмдир? Бунга сабаб, бизнинг мамлакатимиз ғалабалар кетидан ғалабага эришаётган социализм мамлакатидир, воқеликни бизнинг давримизга оид асосий тенденциялар нурида ҳаққоний тасвирловчи бугунги кун санъаткори уни социализм позициясидан туриб тасвирлайди».. деб ёзилган эди.

Ўзбек совет танқидчилигига бу тўғри фикрга ҳамоҳанг илк мулоҳазаларга «Социалистик реализмни эгаллаш йўлида» сарлавҳали мақолада дуч келамиз.

Ҳ. Олимжон Уйғун билан биргаликда К. Маркс вафотининг 50 йиллигига бағишлиб ёзилган бу мақола ўз вақтида ўзбек адабиётшунослиги ва адабий танқидининг шаклланишида принципиал аҳамиятга эга эди. Мақолада буржуазия даврида санъат ва адабиётда туғилган, ривож топган реализм ҳақидаги тушунча (демак, умуман реализм ҳақидаги тушунча) илк маротаба ўзбек адабиётшунослигига киритилади.

«Реализм методи тарих саҳнасига янгидан чиқиб келаётган ёки янгигина синфий ҳокимиятни ўз қўлига олиб, ўз мавқенини мустаҳкамлаш, гуллаш даврини кечираётган синфларнинг методи бўла кетгандир,— дейилади унда.— Буржуазия ҳам янгидан бош кўтариб келаётган ҳокимиятга кўтарилаётган ва тарих саҳнасида янги ғолиб куч сингари ҳаракат қилган даврида реалистик санъат яратди. Буржуазия бу даврда буюк реалистик санъаткорларни етиштириди. Аммо унинг реализми ўша даврда феодализмга нисбатан прогрессив роль ўйнаганига қарамасдан чекланган реализм эди. Негаки, буржуа реализми воқеликка, турмушга статик равишда яқинлашмасдан иложи йўқ эди. Негаки, буржуазия реализми буржуа материализмiga, механистик метафизик материализмга, турмушни тўғри англаш ва англатишда диалектик материализм даражасига кўтарила олмаган фалсафага асосланган реализм эди. Капитализм ишлаб чиқариш системаси, ишлаб чиқариши

муносабатлари, капитализм жамиятининг ички қарама-қаршиликлари буржуа реалистларига турмушни, воқеликни англашнинг энг баланд поғонасига кўтарилишга имкон бермас эди. Буюк талантлари соясида воқеликнинг моҳиятни тўғри ва чуқур равишда англай билган баъзи буржуа реалистлари эса қарама-қаршиликлар билан тўла асарлар яратишда ўзларини тия олмадилар. Буржуазиянинг баъзи буюк реалистлари ўз жамиятининг қарама-қаршиликларини, бўлаётган зулмларни, жабрларни, ярамасликларни кўра билдилар. Аммо бу даҳшатнинг асл сабабларини очиб бера олмадилар. Ҳодисаларга фетишим нуқтаи назаридан қарадилар. Шунинг натижасида улар бир жиҳатдан тасвир қилганлари ҳаётни кучли равишда танқид қилсалар-да, иккинчи жиҳатдан хусусий мулк, эксплуатацияга асосланган жамиятни сақлаб қолиш фикрини илгари сурдилар. Бир жиҳатдан капитализм даврида меҳнат эгаларининг зулм, эксплуатация остида қолганини ҳушёр реалистик асосда тасвирласалар, «ҳар хил ва ҳар қандай ниқобларни аямай йиртсалар», иккинчи жиҳатдан тақдирга бўйсуниш, сабр этиш, хўжаларга қарши чиқмаслик фикрларини талқин қилдилар.

Энгельс Бальзак ва Гёте ҳақида фикр юритганда, Ленин Толстой асарларини классик равишда таҳлил қилганда, эксплуатация қилувчи синфлар реализмнинг бу хусусиятни саботсиз, қарама-қаршилик билан тўлган эканини доҳиёна очиб кўрсатдилар»<sup>70</sup>.

Шундан кейин мақолада Бальзак тўғрисидаги Ф. Энгельс фикрларидан айрим парчалар келтирилиб, юқоридаги тезисларни бирма-бир исботлашга ҳаракат қилинади ва бунга эришилади ҳам.

Агар биз юқоридаги тезислар маълум даражада таҳрирга муҳтоҷ эканлигини ҳисобга олмасак, Ҳ. Олимжон ва Ўйғун марксизм-ленинизм классиклари меросидан ўтмиш адабиётлари реализми хусусиятларини белгилаб олишда деярли тўғри фойдаланганлар. Нима учун деярли? Бу шунинг учунки, К. Маркс ҳам, Ф. Энгельс ва В. И. Ленин ҳам ҳеч қаҷон эксплуатация қилувчи синфлар реализми бўлади, деб таълим беришмаган. Аксинча, эксплуатацияга асосланган тузумларда ҳам шу тузум манфаатларига зид позицияни эгалловчи реалист ёзувчилар бўлиши шак-шубҳасизлигини исботлаб беришган. Ҳ. Олимжон ва Ўйғун ўз мақолаларида

<sup>70</sup> Олимжон Ҳ. Танланган асарлар. Уч томлик. З-том. 178-бет. З-том. 178-бет.

буни тушуниб етганликлари натижасида буржуазиянинг ҳам реализми бўлар экан-да, деган холоса билан иш кўришади.

Мақолада яна бугунги илмий нуқтаи назардан но-тўғри фикрлар ҳам мавжуд. Аммо шуниси муҳимки, бу мақолада санъат ва адабиётнинг спецификасига оид жуда муҳим фикрлар бор. Масалан, «Шундай қилиб, Бальзак ўзининг баланд санъаткорлик поғонасига ўз синфий қарашларига қарши бориши билан эришди,— дейилади унда.— Агар Бальзак ўз синфининг дунёга қарashi рамкаси ичida ўралиб қолган бўлса эди, турмушга реалистик ёндашишда бу қадар буюк муваффақиятга эга бўла олмаган бўлар эди».

Санъаткорнинг ўз синфи нуқтаи назаридан юқори кўтарила билиши ва эксплуататор синфлар идеология-сининг санъатда ҳаққонийликка монелиги ҳақидаги бу фикрлар ўтизинчи йиллар адабиётшуносиги учун янгилик эди.

Муаллифлар Ф. Энгельснинг Гёте, В. И. Лениннинг Л. Толстой ижодига оид фикрларини таҳлил этишда ҳам ана шу фикрни олға сурадилар: «Лениннинг Толстой ҳақидаги бу очиқ, равshan, айни ҳолда чуқур, илмий таҳлили, Энгельснинг Бальзак, Гёте тўғрисидаги дохиёна мулоҳазалари, ...буржуазия синфининг мафкурачиси бўлиб турган ҳолда, баланд санъаткорона, дохиёна асарлар майдонга келтирган буюк талантларнинг ўз синфий мафкурасига қарши бориш мажбурияти остида қолганини исбот этди. ...

Маркс, ...буржуазия санъати, адабиёти, шоири, адаби, рассоми, артистларининг табиатини ҳам ўрганди. У, ўз навбатида, буларнинг ҳаммасини ҳам капиталга, бозорга боғланиб, қул бўлиб қолишларини фош қилди. Ниҳоят, Маркс «Қўшимча қўймат назариялари» деган асарининг биринчи жилдидаги: «Капиталистик ишлаб чиқариш санъат ва поэзия каби маънавий ишлаб чиқаришнинг баъзи соҳаларига душмандир»,— деган буюк холосага келди.

Шуниси диққатга сазоворки, муаллифлар социалистик реализм таърифига кўчганда А. Фадеев фикрларини ўзгаришсиз такрорлайдилар. «Нима учун шундай асл бўлган реализм бизнинг замонамиизда социалистик реализм деб аталади? Бу шунинг учунки, бизнинг мамлакатимиз ғолиб социализм мамлакатидир. Бу шунинг учунки, турмушни ҳаққоний равишда, бизнинг асримизнинг асосий тамойили руҳида шуълалантирувчи, тасвир

этувчи санъаткор бу турмушни социализм позициясида туриб тасвиirlайди».

Муаллифлар совет адабиёти ижодий методининг етакчи хусусиятлари нималарда намоён бўлишини белгилаб олишда марксизм-ленинизм классикларининг реализм проблемаларига оид фикрларига суюниб, бугунги кунда ҳам ўз аҳамиятини йўқотмай келаётган баъзи хулосаларга келадилар.

Шулардан биринчиси, бутун адабий методлар ичida реалистик методнинг мумтоз эканлиги ҳақидаги фикрдир. Иккинчиси, реализмнинг қандай йўсинда камолга етиши, бу камолга етишнинг шартлари тўғрисидаги хулосадир. «Ўз даврининг, ўз синфининг олдинги идеяси ни эгаллаб ололмаган ва шу идеяларни ифодалай билмаган санъаткор, албатта, узоқ умрли, тўлақонли, шоҳ асарлар яратиб бера олмайди»<sup>71</sup>.

Тадқиқотда бу жуда муҳим хулосани К. Маркснинг «Франс Фон Зикенген» номли Лассал асарига билдириган муносабатидан келтириб чиқарилади. Ф. Энгельс қаламига мансуб «Шеърда ҳам, насрда ҳам немис социализми» асаридаги айrim ёзувчилар талантининг юзага чиқа олмаслиги улар дунёқарашининг муайян эмаслигига боғлиқ, дейилган фикрдан эса қўйидаги якунга келинади: «Дарҳақиқат, ёзувчи... муайян дунёқараашга эга бўлмаса, у маълум синфининг позициясида туриб; ҳаётни тўла англай олмайди. У шу ҳолича ҳаётни юзаки, бўтқа ҳолида кўришга, турмушнинг сиртидан сирпанишга, воқеаларни, олиб борувчи тенденцияларни эмас, айrim тасодифларни қайд этишга мажбур бўладир»<sup>72</sup>.

Ниҳоят, учинчи хулоса — адабиётнинг спецификасига оид бўлиб, унда Ф. Энгельснинг адабиётда ҳаққоний деталлар орқали типик характерлар типик шароитда тасвиirlаниши ҳақидаги машҳур таърифdir. Муаллифлар типиклик проблемаси нуқтаи назаридан социалистик реализм адабиёти олдига ҳам принципиал вазифалар қўйилишига эътибор берадилар. Уларнинг фикрича, социалистик реализм, ҳақиқатан ҳам «воқеаларнинг устидан сирпанувчи», турмуш ҳақиқатларини бузиб кўрсатишга ёки кўрсата олмасликка олиб келадиган йўлларни инкор қиласди. Схематизм, юзакилик, шаблонбозлик хасталикларига мубтало бўлган ёзувчи турмушнинг, курашнинг асосий майларини, ички қарама-қар-

<sup>71</sup> Олимжон Ҳ. Ўша асар. Ўша том. 185-бет.

<sup>72</sup> Олимжон Ҳ. Ўша асар. Ўша том. 186-бет.

шиликларини диалектик материализм нуқтаи назаридан қараб тасвирлашдан ожиз қолади. Бинобарин, у социалистик реалист бўлолмайди.

«Социалистик реализм,— деб ёзадилар муаллифлар,—турмушни социализмнинг енгиш тенденцияси нуқтаи назаридан қараб туриб, ҳаққоний равишда, тўла сабот билан ифодалаб берувчи, давримизнинг талабига бирдан-бир мос бўлган ҳақиқий санъат методидир. У, фақат угина ҳаётга қобил, турмушнинг чин юрагига, энг ингичка бурчакларига қадар кира биладир... Тарихнинг ҳозирги поғонасида у, ёлғизгина у кишиликни илгарига қараб суро оладир, угина кишиликни асоратдан, қулликдан қутқаришда фаол ёрдам кўрсата биладир... Чунки у кишиликни юксалишга қараб етаклашда бирдан-бир саботли, бирдан-бир прогрессив, бирдан-бир инқилобий мафкура бўлган марксизм мафкурасининг бадиий ифодасидир»<sup>73</sup>.

Мақоланинг якунланувчи қисмларнда қайта-қайта таъкидланишича, социалистик реализм турмушни статик эмас, балки динамик равишда «қабул қила оладиган, ҳаракатнинг асосий кучи синфий кураш эканлигини» англаб етган, тақдирга тан бериб кетавериш кайфиятларидан бутунлай фориғ, ҳаётга актив таъсир ўтказа оловчи, курашчан санъаткорлар реализмидир.

Муаллифларнинг социалистик реализм санъатида ижод эркинлиги ҳақидаги фикрлари ҳам жуда муҳимдир. «Социалистик реализм ўтмиш асрнинг ҳодисалари, ҳозиргининг кескин курашларидан тортиб келгусининг эртанги кунга, ҳақиқатга айланадиган романтикаларига қадар, шўро воқелигидан тортиб капитализм дунёси, мустамлакалар ҳаётига қадар ўзига мавзу қилиб ола биладир»<sup>74</sup>.

Ҳ. Олимжон ва Уйғун социалистик реализмнинг романтизм кўринишларига муносабатини ҳам Иттифоқ адабиётшунослари ичida биринчилардан бўлиб жуда тўғри ёритиб беролдилар. «Маглуб синфларнинг бадбин, йиғлоқи, мистик романтизмига қарши пролетар синфининг қизил инқилобий романтизми мутлақо бошқа романтизмдир,— дейилади мақолада,— ...реакцион романтизм турмушга тескари таъсир кўрсатувчи метод бўлса, қизил инқилобий романтизм турмушга прогрессив, фаол таъсир ижро қилувчи социалистик методнинг таркибий қисмидир»<sup>75</sup>.

<sup>73</sup> Олимжон Ҳ. Уша асар. Уша том. 188—189-бетлар.

<sup>74</sup> Олимжон Ҳ. Уша асар. Уша том. 190-бет.

<sup>75</sup> Олимжон Ҳ. Уша жойда.

Бутуниттифоқ Совет ёзувчиларининг Биринчи съезди якунларидан илхомланиб, адабий танқидда назарий мақолалар билан чиққан яна бир йирик ёзувчи Ойбек бўлди. У шоир ва ёзувчиларимиз ижодининг революцион воқеаликдан, социализм қурилишларидан, совет халқлари ҳаётидан асло узоқлашмаган ҳолда тараққий топишини, жанр, услугуб ва тасвир воситалари, тил хусусиятлари жиҳатидан ранг-баранг бўлишилигини ҳамда метод бирлигини қизғин ҳимоя қилишга киришиб қатор мақолалар яратди.

Ойбекнинг муҳим мақолаларида бири «Қизил Ўзбекистон» газетасининг 1933 йил 17 август сонида эълон этилган. У «Сўнгги йилларда ўзбек поэзияси» деб аталади.

«Социалистик реализм,— деб ёзган эди Ойбек,— одамни, қаҳрамонни ижтимоий практикада, бутун муҳити доирасида, типик воқеаларда, индивидуал чизишлардан маҳрум қилмасдан, маълум коллектив ва табақани ифода қила била турғон йўсинда кўрсатади»<sup>76</sup>.

Мақолада совет адабиётининг асосий пафоси — қаҳрамонлик экани тасдиқ этилади: «Давримиз қаҳрамонлик давридир. Социализм учун курашда одамларнинг маънавий борлиги қандай ўзгараётганини биламиз. Курашда тубанлардан юксалган янги одамларни бадиий асарларда кўрсатиш бу кунги адабиётнинг улуғ вазифаларйандир»<sup>77</sup>.

Ойбек айрим шоирларнинг формал изланишларига берилиб кетишининг хатарли эканлигини таъкидлайди. Бир ёш шоирнинг:

Бу ўртоқ  
Қетаётир,  
Шундай қилиб,  
Фабриканинг  
Учқон кўмир  
Учқунидай  
яшин яратиб,  
Бир зарбдор  
ишлиб бўлиб  
Темир оқин  
жўшқинидай,  
шовқин таратиб... —

каби мисраларини юзаки, мазмунсизлиги учун қоралайди. Бундай мисралар одамни фақат ташқи томондан

<sup>76</sup> Ойбек. Сўнгги йилларда ўзбек поэзияси//Қизил Ўзбекистон. 1933. 17 август.

<sup>77</sup> Уша жойда.

зарбдор қаҳрамон қилиб гавдалантиromoққа уриниш натижасидир. Уларда «янги турмуш қуриш учун курашда инсон шуурида вужудга келган ўзгаришларни кўрсатиш йўқ»,— деб ёзади муаллиф.

Ойбек социалистик реализмнинг революцион романтизмга кенг йўл очишини ҳам мисоллар орқали тушунтира билади: «Инқилобнинг бутун азаматини, тарихда кўрилмаган қаҳрамонликларни яратувчи ишга миллионларча одамларнинг актив иштирокини, қурилиш, кураш, ғалаба нашъасини инқилобий романтизм синкретик образларда куйлаб бера олади».

Унинг фикрига кўра, инқилобий романтизм социализмоялари, коммунизм гулбоғларига етишиш орзулари билан чамбарчас боғланиб вужудга келиши учун ҳам социалистик реализм бағрига таркибий қисм бўлиб қўшилмоғи даркор.

Шунга алоҳида эътибор бермоқ лозимки, Ойбек тушунчасидаги «инқилобий романтизм» ўша даврларда А. М. Горький назарда тутган «революцион романтизм»нинг айнан ўзини англатмайди. Агар А. М. Горький уни социалистик реализмнинг бошқа бир номи, яъни «такаллуси» деб тушунтиrsa, Ойбек унга ўзига хос мустақил бир метод сифатида ёндашади.

Чунончи, у ёзади: «Санъат асари учун мавзу истаганча: социализм қурилишидаги ҳар бир кичик воқеа, ҳар бир факт, ҳар бир ютуқ тўла бадиий асар яратиш имкониятини беради. Социалистик реализм мана буни идрок қуриш, бадиий формага солиш қуролидирки, ҳар бир шоир бунга катта диққат қилиши керак. Лекин бизнинг қаҳрамонлар билан тўла, жўшқин давримиз инқилобий романтизм учун ҳам катта материал бера билади... Шўро даврида инқилобий романтизмни ҳам кучайтириш лозим. Ўзбек шўро адабиётида инқилобий романтизм эндигина кўриниб келаётир». Ойбек фикрича, Уйғуннинг «Коммунизмнинг гулбоғларига», М. Шайхзоданинг «Ҳаёт дафтаридан» сингари шеърлари инқилобий романтизм руҳи билан сугорилгандир. Ойбек «Социалистик реализм ва инқилобий романтизм байроғи остида шўро поэзиясининг янги варақларини очайлик» шиорини ўртага ташлайди.

Танқидда романтизм бобида 30-йиллар бошида бошланган фикр олишув шу ўн йиллик охирида Иззат Сultonнинг «Адабиёт назарияси» китобида бундай якунланиди: «Романтизм ёзувчининг турмушдан қаноатланмаганидан келиб чиқади. Ёзувчи турмушда ўзи истаган идеалларни, орзу қилган ҳодисаларини ва кишиларини

тополмайди, турмушда бўлган, лекин ёзувчига (турли-ча сабабларга биноан) ёқмайдиган, ёзувчининг синфий интилишларига қарама-қарши тушадиган ҳодисаларни тасвирлашни хоҳламайди. Ёзувчи шундай киши ва ҳодисаларни тасвирлайдики, улар аслида турмушда йўқ, аммо ёзувчи уларнинг турмушда бўлишини истайди...»<sup>78</sup>.

Муаллиф романтикларни икки группага бўлади: «Романтикларнинг бир хиллари турмушга, ундаги кишиларга ва ҳодисаларга шу турмушдан кўра мукаммалроқ, порлоқроқ бўлган бошқа турмушни, қаҳрамон шахсларни ва уларнинг порлоқ ишларини қарши қўядилар. Ҳаётни актив равишда қайта қуришга чақирадиган бундай романтизм — революцион романтизм деб аталади».

Иzzат Султон томонидан баён этилган мазкур фикрлар романтизм ва романтикларга муносабат масаласига аниқлик киритади. Иzzат Султон таърифларини бугунги фан нуқтai назаридан мукаммал деб ҳисоблаб бўлмайди, албатта. Уларнинг ижобий роли 30-йиллар таңқидчилигига романтизм тушунчасини киритиш билан тайин этилади. Ўз таърифларининг нуқсонини сезиб бўлса керак, муаллиф қўшимча қилади: «Романтизм совет адабиёти ижобий методининг бир элементидир...»<sup>79</sup>, совет адабиётидаги романтизм воқеликдан қочадиган, ўқувчини турмушдан узоқлаштириб, пуч хаёллар дунёсига олиб кетадиган реакцион романтизм бўлмасдан, бизнинг келажагимизни, келажакдаги янада порлоқ ҳаётимизни тасвирловчи ва шу порлоқ келажак ҳаққи учун бугун актив курашга чақирувчи революцион романтизмдир»<sup>80</sup>.

### МАРКСЧА-ЛЕНИНЧА АДАБИЁТШУНОСЛИКНИНГ ИЛК ҚАДАМЛАРИ

30-йиллар маданий ҳаётининг муҳим ҳодисаларидан бири — Ўзбекистонда марксча-ленинча методологияга асосланган адабиётшуносликнинг туғилиши<sup>81</sup> бўлди.

<sup>78</sup> Иzzат Султон. Адабиёт назарияси. Тошкент. 1939. 83-бет.

<sup>79</sup> Иzzат Султон. Ўша асар, 85-бет.

<sup>80</sup> Ўша жойда.

<sup>81</sup> Маълумки, «адабиётшунослик» термини фанда икки маънода ишлатилади. Кенг маънода ишлатилганда, «адабиётшунослик» термини умуман адабиёт ҳақидаги фан сифатида тушунилади ва бадий адабиёт ҳақидаги таълимотнинг уч асосий қисмини—адабий танқид, адабиёт назарияси ва адабиёт тарихини қамраб олади. Тор маънода «адабиётшунослик» (адабий танқид ва адабиёт назариясидан фарқли ўлароқ) «бадий адабиёт тарихи» демакдир. «Ўзбек адабий танқид тарихи очерки» китобида «адабиётшунослик» термини сўнгги, тор маънода ишлатилади.

Октябрь революциясидан аввалги ўзбек адабиётини ўрганиш 20-йилларда бошланган эди. Қадимий ўзбек адабиёти намуналарини эълон этиш, айрим ёзувчиларнинг ижодини ёритиш ёки адабиётнинг айрим жаирлари тараққиётига баҳо бериш борасида 20-йилларда Отажон Ҳошим, Соти Ҳусайн, Олим Шарафиддинов, Абдураҳмон Саъдийлар бაъзи ишлар қилган бўйсалар ҳам, том маънодаги маркесча-ленинчча адабиётшунослик ҳали юзага келмаганди, чунки марксизм-ленинизм асосчилигининг назарий мероси ҳали адабиётчилар томонидан етарли ўрганилмаган эди. А. Фитрат каби кекса авлодга мансуб олимларнинг ўтмиш адабиётига оид асарлари (масалан, «Бедил» тадқиқоти) марксизм-ленинизмдан жуда узоқ назарий мавқеда ёзилган бўлиб, уларнинг қиммати ўтмиш адабиётининг фактик материалини фанга киритиш билан чекланар эди.

Ўзбекистонда адабиётшуносликнинг туғилиши умуман жаҳонда адабиёт ҳақидаги фан туғилишининг бир қонуниятини акс эттириди ва тасдиқлади: адабиётшунослик адабий танқиднинг ривожи натижасида майдонга келди. Ўзбекистонда ҳам илк адабий танқидчилар адабиётшуносликни бошлаб берувчилар бўлиб қолди. С. Ҳусайн ўзининг «Ўтган кунлар» романига бағищланган ва кўп жиҳатдан мунозарали катта танқидий ишида илк маротаба жаҳон адабиёти тарихининг баъзи муҳим томонларини (романтизм ва реализмнинг туғилиши, ривожи, Европа адабиётининг Шарқ адабиётига таъсири масалаларини) ёритган эди. 30-йилларда замонанинг актив адабий танқидчиси Олим Шарафиддиновнинг Алишер Навоийга бағищланган биринчи йирик тадқиқоти (Алишер Навоий. 1939) босилиб чиқди. Ҳомил Ёқубов совет адабиёти масалаларига дикқатини камайтирумagan ҳолда ўзбек классик адабиётининг бир қанча кўзга кўринган вакиллари (Турди, Муқимий ва бошқалар) ҳақида мақола ва рисолалар ёзди.

Ўзбекистонда маркесча-ленинчча адабиётшуносликнинг туғилиши ва ривожида Коммунистик партия МКнинг кўрсатмаларида ўтмишни ўрганишнинг аҳамияти катта эканига илм аҳлининг дикқатини тортди. Халқларимизнинг Октябрь революциясидан аввалги ва кейинги тарихини ўрганиш янги, совет жамияти аъзоларини ватанпарварлик руҳида тарбиялашда катта роль ўйнаши, Совет жамияти ўтмиш маданиятидаги гуманизм, демократизм, халқчиллик анъаналарининг меросхўри ва ривожлантирувчиси бўлиши лозимлиги қайд этилди. Бу йўлдаги қадамлардан бири — СССР

халқлари адабиёти намояндалари (Пушкин, Руставели, Шевченко, Абай, Навоий ва бошқа буюк ёзувчилар) нинг юбилейларини ўтказиш ҳақидаги расмий қарорлар бўлди. Ўзбекистон партия матбуотида адабий меросни ўрганишга чақиравчи мақолалар пайдо бўлди.

К. Маркс, Ф. Энгельс ва В. И. Ленин асарларининг, шу жумладан, санъат ва адабиётга оид илмий мероснинг рус ва маҳаллий тилларда кенг эълон этилиши Ўзбекистонда адабиётшунослик илмининг марксизм-ленинизм методологияси билан қуролланган ҳақиқий фанга айланишида ҳал этувчи роль ўйнади. Ёш ўзбек адабиётшунослиги учун марксизм-ленинизм таълимотининг ўтмиш маданиятига оид икки қондаси айниқса етакчи йўлланма бўлиб қолди. Булар — янги, совет жамиятининг ўзидан аввалги ҳамма жамиятлар томонидан яратилган маданий бойликнинг қонуний меросхўри экани ҳақидаги ва ҳар бир миллий ўтмиш маданиятида икки маданият — эксплуататорлар маданияти ва эзилган меҳнаткаш оммаси маданияти мавжудлиги ҳақидаги қоидалар эди. Ёш ўзбек адабиётшунослиги ўтмиш адабиётида, эксплуататор синфлар идеологиясининг ҳукмронлигига қарамасдан, энг илфор ёзувчилар ижодида халқчиллик, гуманизм, демократизм, ҳурриятпарварлик ва маърифатпарварлик ғоялари ўзининг ёрқин ифодасини топганини кўра бошлади ва прогрессив адабиётнийг тарихда ўйнаган катта ижобий ролини ёритишига ўзининг асосий диққатини қаратди.

Бу йўлда қўйилган биринчи қадамлардан бири И. Султоннинг «Правда» газетасида босилган мақоласи бўлди<sup>82</sup>. Адабий меросни ўрганишга ёзувчилар (Гафур Ғулом, Ойбек, Ҳамид Олимжон, Уйғун ва бошқалар) катта ҳисса қўшдилар.

30-йилларда ўзбек халқининг адабий меросини ўрганиш ишларининг қандай боргани ва якуни ҳақида аниқ тасаввур берувчи бир ҳужжат бор. Бу — «Қизил Ўзбекистон»да 1937 йил 26 апрель сонида эълон этилган бош мақоладир\*. Газета бу «Адабий меросимизни ўрганайлик» сарлавҳали мақоласида ўзбек халқининг бой адабий ва маданий мероси борлигини кўрсатиб ўтгандан сўнг ёзади: «Ўтмиш маданий меросни, қисман

<sup>82</sup> Будем изучать литературное наследие. Правда. 1937. 20 апрель.

\* Бу мақола Иззат Султон қаламига мансубdir (Иззат Султон шу йилларда «Қизил Ўзбекистон» редакциясида санъат ва адабиёт бўлимининг мудири эди).

бадиий адабиётни, адабиёт классикларини ўрганиш ва улардаги ҳамма мусбат томонлардан фойдаланиш Совет ҳукумати ва партиямиз томонидан совет адабиёти ва фани олдига жуда муҳим вазифа қилиб қўйилади. Узбек адабиётшунослигига бу вазифа ҳали бажарилмаётир (сўз бу вазифанинг қаноатланарли бажарилмаётгани устида боради — *T. P.*). Адабиётшунослигимиз тарихида ўтган икки заарарли оқим — аксилинқилобий миллатчилик ва вулыгар социологизм бу вақтгача адабиётимиз тарихини тўғри ўрганишга ҳалал бериб келди». Газета бу заарарнинг нимадан иборат бўлганини ҳам тушунтиради: «Маълумки, ҳалқ душманлари — миллатчилар қадимги давр адабиётини астойдил «ўрганишга» киришган эдилар... Улар Шарқнинг ва Ўзбекистоннинг ўтмишини кўкларга кўтариб, идеаллаштириш билан, Шарқни Гарбга, Ўзбекистонни Қизил Москвага қарши қўймоқчи бўлдилар. Марксизмнинг Шарқقا тўғри келмаслиги ҳақидаги «назария» ҳам шу даврда майдонга келди..

Адабиётшунослигимизда сўнгги йилларгача ҳукмрон бўлиб келган вулыгар социологизм ҳам адабий меросимизни ўрганишга озмунча зарар етказмади. Ўзларини адабиётда синфийликнинг ягона баҳодир мудофаачиси қилиб кўрсатган социологлар аслида ҳалқимизни ўтмишнинг маданий меросидан маҳрум қилиш йўлига судрадилар. Бу «мактаб»нинг энг катта касалликларидан бири шу эдики, унда ҳеч қандай историзм йўқ эди, яъни ҳар ҳодиса ўз замонидаги тарихий шароитда қандай роль ўйнаганини эътиборга олмаслик ҳукмрон эди. Бундай қилганда, албатта, ўтмишдаги буюк ҳодисаларнинг ва шахсларнинг аҳамияти «йўқолиб кетар эди».

Адабиётшунослик мана шу ва бошқа жуда муҳим методологик масалаларни ёритиб берган бу редакцион мақола адабиётшунослик фанининг 30-йиллар охирига келиб янги, юқори босқичга кўтарила бошлаганини кўрсатиш билан бирга, бу фан соҳасида Ўзбекистонда бундан кейин эришиладиган ютуқларга ҳам асос бўлиб қолди.

30-йилларнинг катта ижобий ҳодисаларидан бири — совет даври адабиёти тарихининг яратила бошланиши бўлди. Ойбекнинг «Абдулла Қодирий ижоди» монографияси (1934) бу йўлдаги илк ва муваффақиятли қадамлардан бири бўлди. Бу асарда совет адабиёти йирик намояндасининг ёзувчилик маҳорати батафсил очиб берилди. Афсуски, 20—30-йилларда адабий танқид со-

ҳасида анча ўрин олган вульгар социологизм руҳидаги хатолар бу китобда ҳам бир даража тақрорланди. Аммо бу ҳол ўша даврнинг баъзи хусусиятлари билан изоҳланади ва Ойбек томонидан Абдулла Қодирийга ўша вақтда берилган баланд баҳонинг қимматини туширгайди<sup>83</sup>.

30-йилларда ёш ўзбек адабиётшунослиги томонидан эришилган принципиал ютуқлардан бири «Ўн беш йил ичида ўзбек адабиёти (1939)» асаридир. Бу асарни ҳам танқидчиликнинг, ҳам адабиётшуносликнинг маҳсулоти сифатида тавсифлаш мумкин. Аммо унинг асосий хусусияти — совет даври адабиёти материалини илк бор тарихий нуқтани назардан таҳлил этилганини эътиборга олиб, уни янги адабиётшунослик намунаси ҳисоблаш мумкин. Бу илмий тўпламга кирган мақолалар ичида О. Шарафиддинов ва С. Ҳусайнининг «Ўзбек адабиёти», Ҳ. Ёқубовнинг «Ўзбек совет поэзияси 15 йилда», Юсуф Султоновнинг «Ўзбек совет прозаси», С. Ҳусайнининг «Ўзбек совет драматургиямизга умумий бир қараш», Ш. Сулаймон ва F. Қаримовларнинг «Болалар адабиёти тўғрисида», М. Афзалов ва Б. Қаримовларнинг «Ўзбек фольклори» номли чинакам тадқиқот ишлари мавжуд эди. Унда янги, ўзбек совет адабиётининг совет жамияти ҳаёти ва кураши билан алоқаси, принципиал янги адабиёт сифатидаги хусусиятлари тавсифланди, унинг асос соловчилари ва яратувчилари ижодининг тараққиёт йўллари анча мукаммал очиб берилди.

30-йилларда адабиёт назариясига оид баъзи мақола ва китобларнинг пайдо бўлиши (И. Султоннинг «Адабиёт назарияси») Ўзбекистонда кенг маънодаги адабиётшунослик юзага келганини ва унинг учала асосий қисми (адабий танқид, адабиёт тарихи ва адабиёт назарияси) баравар ривожлана бошлаганини кўрсатади<sup>84</sup>.

---

<sup>83</sup> Уз асарининг сўнгги нашрида Ойбек бу хато фикрларни ундан чиқариб ташлаган (Ойбек. Муқаммал асарлар тўплами. Т. 19). Вульгар социологизм руҳидаги баъзи фикрлар 30-йилларда бошқа совет ёзувчилари асарларида ҳам (масалан, Ҳ. Олимжон, Ойдин ва Ўйғуннинг «Ўзбек буржуа адабиёти» китоби, 1933) учрар эди.

<sup>84</sup> Ўзбекистонда совет даврида адабиётшунослик тарихини ёритиш ушбу китобнинг вазифасига кирмайди. Аммо адабиётшуносликнинг адабий танқид билан ёнма-ён тараққий этганини эътиборга олиб, бу китобда адабиётшуносликнинг асосий ютуқларни қайд этиб борилади.

## ҚИСҚАЧА ХУЛОСАЛАР

Ўзбек совет адабий танқиди тарихида 30-йиллар алоҳида ўрин тутади.

ҚПСС Марказий Комитетининг 1932 йил апрель қароридан кейин ва Совет ёзувчиларининг I Бутунитти-фоқ съездида социализм қурилишига актив иштирок этишни ният этган ҳамма адабиётчиларнинг ташкилий ва ғоявий бирлиги юзага келди. Бу ҳол адабиёт ва адабий танқиднинг янги, аввал сира кўрилмаган босқичга кўтарилишида катта ижобий роль ўйнади.

Танқид соҳасига янги, ёш кучларнинг келиши — идеологик фронтдаги янги вазиятнинг биринчи ижобий самараси бўлди. Адабиёт соҳасида ишловчи кадрларнинг кучлари энди бир нуқтага — совет адабиётининг янги ижодий ютуқларини рӯёбга келтиришга қаратилган эди.

Марксизм-ленинизм асосчилари асарларининг кенг эълон этилиши ва ҳар тарафлама ўрганилиши натижасида адабий танқиднинг мустаҳкам ғоявий-методологик замини майдонга келди. Бунинг адабий танқид тарихининг бундан кейинги ҳамма босқичлари учун ҳам аҳамияти зўр эди.

Янги кучлар келиб қўшилган адабий танқид соҳасида ижодий активликнинг ўсгани, адабий-тарихий жараённинг кўп муҳим масалаларининг адабий танқидчиларнинг дикқат марказида тургани — даврнинг характерли хусусияти эди. Афсуски, 30-йилларнинг охирида шахсга сифиниш авж олгани натижасида бутун адабиётга маълум даражада путур етгани каби, танқид соҳасида ҳам ижодий активлик бир даражада пасайди.

30-йиллар адабий танқидининг катта ютуғи 20-йилларда йўл қўйилган вулғар социологик характердаги кўпгина назарий хатолардан қутула боришидир.

Адабий танқиднинг дикқат марказида янги, социалистик давр одамининг образини адабиётда яратиш масаласи турди. Адабий танқид адабиётининг дикқатини шу вазифага тортиш билан бирга, бу соҳадаги ютуқ ва камчиликларга асосан тўғри баҳо бера билди. Адабий танқид адабиётининг партиявийлиги ва халқчиллиги учун курашди.

Адабиётнинг санъат сифатидаги спецификасини чуқур илмий тушуниш ва адабий кадрларга тушунтириш — адабий танқиднинг бу даврдаги муҳим ютуқларидан биридир. Адабий танқидда ва назарияда илк бор адабиёт — характерлар яратиш соҳаси, ҳаётий ҳа-

қиқатни образлар орқали рўйрост инъикос этиш воситаси экани тасдиқ этилди.

Социалистик реализм ижодий методининг бир қанча муҳим аспектлари (партиявийлик, халқчиллик, бадиийлик, унда романтизм ва реализм синтезланиши каби масалалар) юзасидан кўпгина тўғри фикрлар олға сурилди.

Узоқ ва яқин ўтмишдаги адабий жараённинг бадиий маҳсулотини марксизм-ленинизмнинг маданий мерос ҳақидаги таълимоти асосида ўрганиш соҳасида илқ ютуқларга эришув ҳам 30-йиллар учун характерлидир. Ўзбекистонда маркса-ленинча адабиётшунослик шаклана бошлаган эди<sup>85</sup>.

---

<sup>85</sup> 30-йиллар танқидчилигининг бир қанча проблемалари Б. Назаровнинг «Ўзбек адабий танқидчилиги» (ғоявийлик, метод, қаҳрамон) асарида (Тошкент, 1979) батафсиъ ёритилган. Қизиқкан ўртоқларга шу китобни тавсия қиласиз.

УЛУФ ВАТАН  
УРУШИ ДАВРИ  
ЎЗБЕК АДАБИЙ  
ТАНҚИДИ  
(1941—1945)

ВАТАН МУДОФААСИ ВА АДАБИЁТ

1941—1945 йиллар СССР халқари тарихига «Улуф Ватан уруши даври» номи билан кирди.

«...модомики иш урушга бориб етган экан, ҳамма нарса уруш манфаатларига бўйсундирилиши лозим, мамлакатнинг бутун ички ҳаёти урушга бўйсундирилиши лозим... бунда заррача иккиланишга йўл қўйиш мумкин эмас»<sup>1</sup>, — деган эди В. И. Ленин.

Улуф Ватан уруши даврида бутун мамлакат сингари Ўзбекистон ҳам мана шу ленинча принципга қатъий амал қилди.

Улуф Ватан уруши фронтларида бутун совет халқи билан бир тан, бир жон бўлган Ўзбекистон фарзандлари ҳам қаҳрамонларча жанг қилдилар. Уруш йилларида Ўзбекистон бутун дунёга ўзининг интернационал ва инсонпарвар қиёфасини намойиш қилди: ҳавф остида қолган ерлардан кўчирилган 200 минг фарзандни ўз бағрига олди, уларни оқ ювиб, оқ таради. Республикага СССРнинг марказий районларидан эвакуация қилинган кўплаб саноат корхоналари бу ерда тез ишга тушириб юборилди.

Бу даврда Ўзбекистонда илмий, маданий ва адабий ҳаёт яна ҳам ривожланди. СССР ФАнинг тарих, жаҳон адабиёти, шарқшунослик институтлари ва бошқа бир қатор илмий-маданий марказларнинг эвакуация қилиниши бу жонланишга сабаб бўлди. Эвакуация этилган рус олимлари бу йилларда республикамиздаги фан ривожига, айниқса, филология ва шарқшунослик фанлари ривожига катта ҳисса қўшдилар. Ўрта Осиё Давлат университетининг филология ва шарқ факультетлари шу даврда очилди.

<sup>1</sup> Ленин В. И. Тўла асалар тўплами. 41-том. 129-бет.

1943 йили Узбекистонда Фанлар академияси ташкил этилиши республикамиз сиёсий, илмий ва маданий ҳаётида катта аҳамиятга эга бўлди. Бундан ташқари, 1943 йили эвакуация қилинган 12 олий ўқув юртини қўшиб ҳисоблаганда, Узбекистонда жами 41 олий ўқув юрти бўлганини назарга олсанк, республикамизда забардаст илмий ходимлар, олимлар, юқори малакали мутахассислар етишинб, камол топувига уруш йилларида асос солинди, деб хулоса чиқара оламиз.

Бу йилларда Узбекистонда маданий-оқартув ишлари ҳам сезиларли даражада ўси. Узбекистонга кўчиб келган 14 театрни қўшиб ҳисоблаганда, республикамизда 36 театр, ерлик киностудиядан ташқари, эвакуация қилинган бир неча киностудиялар ишлади. Улар сафида совет кино ва театр санъатининг машҳур арбоблари бор эди. 1944 йилнинг ўрталарида Қорақалпостон АССР Халқ Комиссарлари Совети қошида Тил, адабиёт ва тарих институти ташкил этилди.

Улуғ Ватан уруши бошланган биринчи кунларданоқ совет ёзувчилари ватанпарвар, гражданин ва санъаткор сифатидаги принципиал позицияларини белгилаб олдилар. 1941 йил 22 июнда Москва ёзувчиларининг шаҳар меҳнаткашлари иштирокидаги митинги бўлиб ўтди. «Ҳар бир совет ёзувчиси ўзининг бутун кучини, бутун тажриба ва талантини, агар керак бўлса, сўнгги томчи қонини ҳам Ватан душманларига қарши бўлган муқаддас умумхалқ урушига сафарбар этишга тайёр»<sup>2</sup>, — дейилади қабул қилинган резолюцияда.

Улуғ Ватан уруши бошланган ilk кунлардаёқ ўзбек адиллари ўзларининг юксак ватанпарварлик рухи билан йўғрилган қалб сўзларини эълон қилдилар. «Қизил Узбекистон» газетасининг 24 июнъ сонида F. Гулом, Ойбек, Уйғун, Шайхзода, И. Султон, Ҳ. Пўлат қаламига мансуб «Совет тупроғи даҳлсиз ва муқаддасдир» номли мақола босилиб чиқди.

1941 йилнинг 20 августида «Литературная газета» «Адабиётчининг Ватан урушидаги ўрни» номли редакцион мақола эълон қилди ва совет санъаткорларининг бу муқаддас йиллардаги вазифаларини белгилаб берди.

Улуғ Ватан урушида совет ёзувчилари қурол ва қалам билан қаҳрамонларча жанг қилдилар. С. Жўра, К. Имомов, П. Турсун, М. Бобоев, Н. Сафаров, З. Фатхуллин, И. Раҳим, А. Раҳмат, М. Муҳамедов,

<sup>2</sup> Литературная газета. 1941. 29 июня.

М. Исмоилий, Шухрат, А. Удалов, В. Костирия, И. Муслим, Назармат, Акбарий ва бошқа ўнлаб адиллар ҳаракатдаги армия сафида бўлдилар. Улар жангчи, журналист, бўлинмаларнинг сиёсий ходимлари сифатида шонли ғалабага ўзларининг муносиб ҳиссаларини қўшдилар.

Уруш даврида совет ёзувчилари барча жабҳаларда — қўлда қурол билан, қалам билан, мамлакат ичкарисида меҳнат вахтасидаги фидойилик билан, кези келганда, иқтисодий жиҳатдан шахсий жамғармаларини Ватан мудофаасига бериш билан жонбозлик кўрсатдилар. Бу — социалистик системадагина рўй бериши мумкин бўлган жонбозлик эди. Бундай ватанпарварлик ҳаракати бутун мамлакат миқёсида оммавий тус олди.

Уруш даврида ўзбек адабиёти, бутун совет адабиётидек, ҳеч муболағасиз айтиш мумкинки, шу давргача бўлган тарихий тараққиёт йўлида ўзининг янги, юқори босқичига кўтарилиди. Ўзбек адабиёти бу даврга келиб Иттифоқ миқёсига чиқа олди. Бу ишда ўзбек адилларининг асарларини рус тилига таржима қилган Н. Ивашев, С. Сомова, Салье, Л. Пеньковский, В. Державин, В. Липко, Н. Ушаков, В. Луговской ва бошқаларнинг хизмати катта бўлди. Уруш даврида замонавий мавзуга бағишлиланган йирик асар — Ойбекнинг «Қуёш қораймас» романидан парчалар эълон қилинди. Ф. Гуломнинг «Сен етим эмассан», «Мен яхудий», «Софиниш», Ҳ. Олимжоннинг «Россия», «Қўлинга қурол ол», «Роксананинг кўз ёшлари», Абдулла Қаҳҳорнинг «Хотинлар», «Асрор бобо», «Дардақдан чиққан қаҳрамон», «Олтин юлдуз», Ойбекнинг «Навоий» асарлари, Яшиннинг «Ўлим босқинчиларга», Шайхзоданинг «Жалолиддин Мангуберди», Ҳ. Олимжоннинг «Муқанна», Ойбекнинг «Маҳмуд Торобий», И. Султоновнинг «Бургутнинг парвози» сингари драмалари бу даврда саҳнага қўйилиб, фақат уруш даври ўзбек адабиёти эмас, умуман, ўзбек совет адабиёти тарихидан мустаҳкам ўрин эгаллади.

Ойдиннинг бу даврда эълон қилинган «Қизларжон» ва «Ширин келди» номли тўпламларидағи ҳикояларда ҳалқимизнинг мамлакат ичкарисидаги меҳнат жасоратлари тасвирланди. Ойбекнинг «Халқ — қаҳрамон», С. Аҳмаднинг «Фарҳод тоғининг этакларида», Ойдиннинг «Менинг қаҳрамоним», П. Турсуннинг «Оқ олтин» очеркларида даврнинг конкрет қаҳрамонлари қиёфаси акс эттирилди. Бу йилларда адабиётнинг халқа ни-

ҳоятда яқинлашиши, ёзувчи ва китобхон ўртасидаги масофа қисқаргани, бутун халқнинг жангчига, катта-кичикнинг бирдек меҳнат қаҳрамонига айланиши — давр адабиётининг характерли хусусияти даражасига кўтарилиди.

Уруш даври очерклари, публицистикасидаги конкрет фактнинг, конкрет қаҳрамоннинг қиммати янада ошди, кўргазмали агитациянинг, плакатларнинг салмоғи, тарбиявий аҳамияти янада чуқурроқ аҳамият касб этди. Халқнинг ўзи билан ўзи юзма-юз учрашувида намоён бўлувчи ўткир ғоявий-бадиий ва сиёсий таъсирчанлик драматик асарларга эҳтиёжни янада кучайтириди. Замонавий мавзудаги асарлар билан бир қаторда тарихий асарлар ҳам бу масалада катта роль ўйнади.

Айниқса, шеърий номалар, шеърий мактублар уруш даври ўзбек адабиётида муҳим ўрин тутади. Масалан, Ҳ. Олимжон, Ф. Ғулом ва Чустий қаламига мансуб ўзбек халқнинг ўзбек жангчиларига йўллаган шеърий мактуби 1942 йил 31 октябрда «Правда» газетасида рус ва ўзбек тилларида босилиб чиқди. Бундай йўналишдаги асарлар фронт ва мамлакат ичкарисининг, партия ва халқнинг монолит бирлигини бадиий тараннум этиши жиҳатидан, миллионлар онгига фаол таъсир кўрсатиши жиҳатидан муҳим аҳамият касб этди.

## АДАБИЙ ТАНҚИДДА ДАВР ВА ЯНГИ ҚАҲРАМОН ОБРАЗИ

Республика партия ташкилоти уруш йиллари адабиёт ва санъат ходимларига алоҳида ғамхўрлик кўрсатди, адабиёт ва санъат масалаларига катта эътибор берди. 1941 йилнинг 28 нояброда Ўзбекистон Компартияси Марказий Комитетида санъат ва театр ходимларининг кенгashi бўлиб ўtdи. Марказий Комитетда 1942 йилнинг 10 апрелида бўлиб ўтган навбатдаги йиғилиш шоир ва ёзувчиларимиз ижодини янада юксалтириш масалаларига қаратилди. Худди шу масала 40 кун ўтгач, Ўзбекистон Компартияси Марказий Комитети бюросида яна маҳсус муҳокама қилинди.

Бу тадбирларнинг ҳаммаси, мамлакатдаги умумий сафарбарлик руҳи билан қўшилиб, адабиёт кадрларининг ижодий активлигини ошириди. Адабий ҳаётнинг ажralmas таркиби қисми ҳисобланувчи адабий танқидчилик ҳам бу умумий жараёндан мустасно эмас эди. Профессионал танқидчилар билан бир қаторда адабий танқид билан санъаткорларнинг ўzlari ҳам шуғулландилар. Уруш даври тақозоси билан матбуот-

да адабий танқид учун аввалгидан анча кам жой ажратилса ҳам, бу камчилик оғзаки муҳокамалар ва мунозаралар билан бир даража тўлдирилди.

Ўзбек танқидчилиги уруш йилларида бадиий адабиётда ўзининг чуқур ифодасини топган халқлар дўстлиги масаласига алоҳида эътибор билан қаради.

Танқидчилик, хусусан, бу даврда урушдан аввалги босқич адабиётида кўринган советлар юртининг барча республикалари, унинг барча миллат ва әлатлари дўстлигини умумий планда мадҳ этишдан фарқли ўлароқ, ҳаётнинг ҳар бир жабҳасида жанг майдони-ю фронт ичкарисида, ҳар қадамда, ҳар сонияда конкрет намоён бўлаётган, тарих кўрмаган, инсоният билмаган дўстликни бадиий тасвирлашда сифат жиҳатдан янги босқичга кўтарилганини англаб етди. Бутун куч-эътиборини мана шундай ҳаётий ҳодисалар ўз ифодасини топган асарларни яратишга чорлашга, борларини таҳлил қилишга, уларни халқ ичида кенг тарғиб ва ташвиқ этиб, бу дўстлик кучини янада мустаҳкамлаш ва оламга кўз-кўз қилишга, совет тузумининг қудратли асоси бўлган бу фазилатдан фашизмга қарши курашда том маънодаги қурол сифатида фойдаланишга қаратди.

Ҳ. Олимжоннинг «Роксананинг кўз ёшлари», «Шарққа кетганда», «Шарқдан Фарбга кетаётган дўстга» сингари шеърларида ана шу буюк дўстлик ўзининг ёрқин бадиий ифодасини топди. Бундай шеърларда баъзан шоирнинг «мен»и унинг ўзидан чиқиб, лирик қаҳрамон томон силжиди, ундан қайтиб, яна шоирнинг ўзига айланди. Шоир ижодининг бу хусусиятини танқид қўллаб-қувватлади. Ҳамид Олимжон «Украинанинг ёнган ҳар бир боғи учун, Белоруссиянинг емирилган қишлоғи учун дард чекди, она юрти хароб бўлгандек қайғурди. Шунинг учун шоир бутун ижоди, бутун фикри билан қардош халқларга кўмаклашиш учун интилди...»<sup>3</sup>, — деб ёзди Ўйғун «Шодлик ва баҳт куйчиси» (1944) номли мақоласида.

Уруш даври ўзбек танқидчилиги кўпроқ шу босқич адабий жараёнини тадқиқ этиш билан машғул бўлсада, умуман, ҳар бир санъаткорнинг аввалги босқичлар билан мустаҳкам бирликда намоён бўлувчи маҳорати масаласини ўрганишни унутмади. Ўйғуннинг юқоридағи мақоласи ана шулар сирасига киради. Ўйғун мулоҳазаларидан шундай хулоса чиқариш мумкин: Ҳ. Олим-

<sup>3</sup> Ўйғун. Танланган асарлар. Икки томлиқ . II том. Тошкент. 1958. 369-бет.

жоннинг инсон ва ижодкор сифатидаги шахсида доимо уч муҳим фазилат ажралмас бирликда ҳукм суради. Булар: мавзуда ранг-баранглик — хаёлда кенглиқ — фикрда теранлиқ; ўтмиш — бугун — келажакни бир фокусга жамлай олиш; табиат — жамият — шахсни муштарак акс эттириш; англамоқ — сезмоқ — тасвирламоқ гармонияси; шоир — драматург — олим; жамоат арбоби — талантли раҳбар — меҳрибон инсон.

Чиндан ҳам, Ҳ. Олимжон мана шу фазилатлари билан ўзбек халқининг сўнмас юлдузларидан бири бўлиб қолди.

Улуғ Ватан уруши йилларида давр ўта машақатли бўлишига қарамай, мамлакат кун тартибида турган энг муҳим масала — фашизм устидан ғалаба қозониш эканига қарамай, совет кишилари инсон учун энг мўътабар бўлган баҳт ва иқбол тушунчасини назар-эътиборларидан қочирганлари йўқ. Янада аниқроқ қилиб айтганда, бу мураккаб вазиятда баҳт ва иқбол тушунчасининг каноралари янада кенгайди. Ўзбек шоирлари янги инсон ва баҳт тушунчасини ўтмиш, бугун ва келажак билан алоқадорликда, кенг миқёсда тасвирлаш принципига мурожаат қилдилар. Бинобарин, танқидчиликда ҳам давр ва янги қаҳрамон тушунчаси аввалги даврларга нисбатан кенг миқёсда талқин қилина бошлади.

Ўйғуннинг юқоридаги мақоласи ўзбек танқидчилигидаги бундай қарашларнинг ёрқин тимсоли бўла олади.

30-йилларда бадиий асарлар таҳлил қилинар экан, баҳт тушунчаси кўпроқ Ватан фаровонлиги, озод ва баҳтиёр меҳнат, эркин муҳаббат сифатида талқин этилган бўлса, уруш даврига келиб булар ёнига Ватан озодлиги, фашизмни тор-мор қилиш, ғалаба иштиёқи, катта ва умумхалқ миқёсидаги висол, она бағрига музaffer қайтиш масалалари ҳам келиб қўшилди. Буларнинг барчаси давр қаҳрамони талқинида янгича сифат-белгиларни келтириб чиқарди.

Ўйғун юқорида кўрсатилган мақолада Ҳ. Олимжоннинг деярли йигирма йил давомидаги асарларига назар ташлар экан, шоир услубидаги барча фазилатларни бир фокусда жамлаган ҳолда, унинг ижодида бўртиб кўринувчи хусусият — социализм даврида ўзбек халқи қўлга киритган баҳт ва шодликни, шу баҳт ва шодликка мұяссар бўлган янги давр кишинин тараннум этишдан иборатdir, деган холосага келади.

Бу — бир жиҳатдан тарихий ҳақиқат, иккинчи томондан эса давр талаб қилган муҳим замонавий масалага адабий танқидчиликнинг эътибор бериши эди. Уруш даврида бу масалаларга алоҳида урғу берилишининг сабаби бор эди, албатта. Бу — ўзига хос йўсинда халқни ўзининг ана шу бахтини англашга, уни асраш учун курашишга чорлашдан иборат эди.

Совет халқи, шу жумладан, ўзбек халқи ҳам Улуғ Октябрь инқилоби туфайли тарихда мисли кўрилмаган бахт ва шодликка мусассар бўлди, мудҳиш фашизм халқни ана шу буюк иқболдан яна бенасиб қилмоқчи. Ўзбек танқидчилиги мана шундай вазиятда шоирларимиз томонидан мадҳ этилган бахт, бахтиёр Ватан, бахтили Инсон тушунчаларини янада кенг ва чуқур маънода таҳлил қилиб берди, санъаткорларимизни бу муқаддас тушунчани ўз бадний асарларида янада тे-ранроқ тасвирлашга чорлади, халқни ўз мўътабар бахтини кўз қорачигидек асрашга даъват этди.

Ўйғун Ҳ. Олимжоннинг «Бахтлар водийси» шеърини таҳлил қиласар экан, шеър талқинидаги бахтили водий — бу фақат булбуллар сайраган тенги йўқ гўзал водийгина эмас, озод ва фаровон Ватанга муҳаббат билан социализм тушунчалари бирикиб кетувидан ташкил топган идеал эканлигини таъкидлади. Гўзал Фарғона-нинг бахтлар водийсига айланишини таъминлаган факторлар — водий ўз елкасида тарих билмаган ғалабаларни ортиб бораётганида, истиқболнинг ишқи билан ёнаётганлигига, томирлари кучга тўлиб бораётганидадир.

Уруш даврида Ватан тушунчасининг ҳам маъноси кенгайди. Ўйғун Ҳ. Олимжон шеърини, хусусан, ундаги:

Мен дунёга келган кунданоқ  
Ватаним деб сени танидим.  
Одам бахти биргина сенда  
Бўлурига чукаммал қондим,—

мисраларини таҳлил қилиб шундай дейди: «Шоир бу мисраларни ёзар экан, шубҳасиз, унинг назарида ёлғиз Ўзбекистонгина эмас, балки бахтлар ўлкаси бўлган улуғ СССР тураг эди. Чунки у ҳеч қачон Ўзбекистонни СССРдан ажратиб қарамас эди. У Ватан сўзининг ичига бутун СССР мағҳумини жойлар эди»<sup>4</sup>. Бу фикрлар нафақат адабий-эстетик жиҳатдан, балки ўз даврида халқга таъсир кўрсатиши жиҳатидан ҳам муҳим замонавий аҳамиятга эга эди.

<sup>4</sup> Ўйғун. Уша асар. Ўша том. 355-бет.

Уруш даврида янги қиёфадаги ватанпарвар образи барча совет шоирлари қатори ўзбек санъаткорлари, шу жумладан, Ҳ. Олимжон ижодида ҳам асосий ўрин эгаллади. Ватанпарварлик тушунчаси, ўз навбатида халқлар дўстлиги тушунчаси билан бирикиб кетади. Ўзбек танқидчилиги бадиий асарларни, адабий жараённи таҳлил қилас экан, бу масалага алоҳида эътибор билан қаради. Уйғун юқоридаги мақоласида Ҳ. Олимжоннинг «Россия», «Москвани мен биламан» шеърларини таҳлил қилиб, бу асарлардаги шоирнинг ватанпарварлик туйғуси умумлашган даражадаги лирик қаҳрамон — халқ туйғуси даражасига кўтарилади, деган фикрга келади. Совет халқларининг ажралмас бирлиги тараннуми эса даврнинг «жанговар нидоси» бўлиб жаранглади, деган хулоса чиқаради. «...Бизга ҳозир қарсаклар билан олқишилангич шеърлар эмас, эшитганда муштумлар янада қаттиқроқ тугиладиган, йиғлагинг келадиган ёки тишларингни гижирлатиб юборадиган шеърлар керак. Олқишилар эса топиладиган нарса. Мулойимлик ва хурсандчилик билан олқишиланувчи шеърдан кўра ватандошингнинг ғамнокликдан яраланиб турган юрагига малҳам бўлувчи асарлар яратиш қийинроқдир»<sup>5</sup>, — деган эди А. Сурков 1942 йил 22 майда Москва ёзувчиларининг партия мажлисида.

А. Сурков бу фикр билан аслида бутун совет халқининг, совет санъаткорларининг дилидаги гапни айтган эди. Уруш айрим санъаткорлар ижодий принципида ўзгариш ясади. Бу даврга келиб, масалан, ижобий қаҳрамон Абдулла Қаҳҳор ижодида етакчи образга айланди. Зотан, Уйғуннинг уруш даври Ҳ. Олимжон шеърияти ҳақида айтган қўйидаги муроҳазалари А. Сурковнинг юқоридаги фикрларига ҳамоҳанг эди: «Уруш даврининг талабларига кўра шоирнинг мавзулари, товуши ўзгарди, — деган эди Уйғун. — Шоир ижодини ватан ҳимояси, халққа садоқат, душманга нафрат, ғазаб, мардлик ва жасорат, жанг ва ғалаба мотивлари қоплади. Севги қўшиқлари ғазаб наърасига айланди. Тинч табиат тасвиirlари қонли жанг лавҳалари билан алмашинди. Бутун ижод социалистик ватанини ҳимоя қилиб, қонхўр ёвни юртдан ҳайдаб чиқиш ва тор-мор этишга қаратилди»<sup>6</sup>. Хусусан, Ҳ. Олимжон ижоди ҳақида айтилган бу фикр умуман уруш даври

<sup>5</sup> Қаранг: Живая память поколений. М., 1965. С. 26.

<sup>6</sup> Уйғун. Үша асар. Үша том. 365-бет.

ўзбек адабиётининг барча тур ва жанрлари, барча ижодкорлари учун характерли хусусият ҳақида тасаввур бера олади.

Даврга монанд шоирларимизнинг бадиий образлари системасида ҳам ўзгариш, янгиланиш вужудга келди. Масалан, бу даврда Она, Ота, Фарзанд, Жангчи, Ёр образларининг талқини янада бойиди. Уруш муҳаббат мавзуини ҳам бойитди, даврга монанд янгилади. Бу янгиланиш танқидчиликнинг назар-эътиборидан четда қолмади. Муҳаббат ватан озодлиги, ватан манфаати, унинг қисмати ва тақдирни, келажаги ва идеаллари билан бирикиб кетди. Чунки муҳаббат тақдирини ҳам ғалаба, фақат ғалабагина ҳал қилиши ҳақиқат эди. Шунинг учунки, муҳаббат мавзуи куйланганда унинг томирида аслида Ватан ва ғалабага ишонч руҳи гупуриб турди. Уйғун Ҳ. Олимжон шеърияти ҳақида гапириб: «У ҳатто, севги масаласига ҳам ватан манфаати нуқтаи назаридан қаради. У йигитлар, қызлар севгисининг қисмати ҳам ватан манфаатига боғлиқ эканини яхши англади»<sup>7</sup>, — деганида уруш даври ўзбек адабиётининггина эмас, умуман, совет адабиётининг новаторлик белгиларидан бирини мухтасар равишда ифодалаған эди.

Уруш шеъриятдаги бадиий тасвир воситаларини бойитди, образлар системасини янгилади. Чунончи, 30-йиллар учун характерли бўлган трактор, гудок, вагранка, формула, фабрика ўрнини бу йилларда Ватан, фронт, ғалаба, висол, шинель образлари эгаллади. «Шинель шоир учун жанговарлик, жасурлик ва сергакликнинг тимсоли бўлиб қолди»<sup>8</sup>, — деганда Уйғун уруш даври шеъриятидаги янги инсоннинг — янги қаҳрамоннинг рамзини назарда тутган эди.

1943 йилнинг декабрида Москвада ўзбек адабиёти ва санъати кунлари бўлиб ўтди. Бу ҳодиса партия ва ҳукуматимизнинг миллий адабиётлар тараққиётига ғамхўрлигининг ажойиб намунаси бўлди.

Декада ўзбек танқидчилигига ҳам муносиб из қолдирди. Ҳ. Олимжон, Ойбек, И. Султоновларнинг «Ўзбек ҳалқининг адабиёти», «Ўзбек адабиёти», «Катта имтиҳон»<sup>9</sup> сингари мақолаларида, бир томондаи, ўзбек

<sup>7</sup> Уйғун. Уша асар. Уша том. 370-бет.

<sup>8</sup> Уйғун. Уша асар. Уша том. 366-бет.

<sup>9</sup> Бу йўналишида бошқа миллий ҳалқлар танқидчилигига ҳам бир қатор мақолалар эълон қилинди. Қаранг: Вургун С. Литература Азербайджана и Отечественная война//Литература и искусство. 1942. 28 марта; Тоқомбаев А. Киргизская литература

адабиётининг 25 йил ичида босиб ўтган йўлига қисқача якун ясалди, иккинчи томондан, ўзбек адабиётининг уруш даврیدаги аҳволи таҳлил қилиб берилди.

Шуниси характерлики, танқидчилик бу давр ўзбек шеъриятидаги юксак парвозни, унинг Иттифоқ миқёсидаги илфор поэзия билан бир сафда турал олиш даражасига кўтарилиганини англаб етди. Масалан, И. Султонов декадада қатнашиб, ўзбек шеъриятининг пойтахтда катта олқишига сазовор бўлиши муносабати билан ёзилган «Катта имтиҳон» (1943) мақоласида шундай деган эди: «...поэзиямиз бу даврда жиддий ютуқларга эриши; ўз тараққиётида бирданига бир неча погона юқори кўтарилиди (таяқид бизники — Б. Н.); фақат республикамиздагина эмас, балки ундан кўп узоқларда ҳам миллион-миллион ўқувчиларга манзур тушган асарлар яратди»<sup>10</sup>.

Муаллифнинг бу фикри асосли эдими? Фикр юритиляётган босқичда, яъни урушнинг дастлабки икки йилида ёқ ўзбек поэзияси бирданига бир неча босқичга кўтарила олдими?

Агар шеъриятимиз тарихига, хусусан, 1941—1943 йиллар маҳсулотига назар ташласак, бу давр асарларидағи ғоявий-бадиий ва сиёсий-ижтимоий тақомилни аввалги босқичлар билан қиёсласак, И. С. Султоновнинг уруш даврида ёқ, адабий жараён билан изма-из бориб, йнада тўғрироғи, унинг ичида туриб у ҳақда билдирган юқоридаги фикри ва дадил хуносаси одил ва тўғри эди, дея оламиз.

И. О. Султоновнинг бу фикрни айтишга чуқур асоси бор эди. F. Гуломнинг «Сен етим эмассан», «Мен яҳудий», X. Олимжоннинг «Қўлингга қурол ол», «Она ва ўғил», M. Шайхзоданинг «Жанг ва қўшиқ», «Кураш нечун», Уйғуннинг «Фазаб ва муҳаббат», «Ватан жангчиларига», Миртемирнинг «Бу менинг Ватаним», Зулфиянинг «Уни Фарҳод дер эдилар», A. Умарийнинг «Қасамёд» сингари асарлари ва яна бошқа ўнлаб шеърлар, балладалар И. Султоновга юқоридаги хуносани чиқаришга тўла хуқуқ берар эди.

И. Султоновнинг «Катта имтиҳон» мақоласида илгари сурилган бир қатор фикрлар шу даврда яратилган

в дни войны//Литература и искусство. 1944. 11 марта; Жгенти Б. Грузинская литература в Отечественной войне//Литература и искусство. 1942. 25 июля.

<sup>10</sup> Султонов И. О. Пьесалар, мақолалар. Тошкент. 1959. 168-бет.

Ойбекнинг «Ўзбек адабиёти»<sup>11</sup> ва Ҳ. Олимжоннинг «Ўзбек ҳалқининг адабиёти»<sup>12</sup> каби мақолаларида кўтарилиган масалаларга ҳамоҳангдир.

Хусусан, Ҳ. Олимжон уруш даври ўзбек адабиёти эпик қаҳрамонлар яратиш масаласида жиддий ютуқларни қўлга киритганини эътироф этади. И. Султонов ҳам бу ҳақда гапириб, тарихий ва эпик темаларни бадиий тадқиқ этишда намоён бўлаётган ютуқларимиз умуман адабиётимиз ўз тараққиёти йўлида «муҳим этап»га ўтганлигини кўрсатади, дейди. Ўнинг фикрича, Ойбекнинг «Навоий» романи, Яшин ва А. Умарийнинг «Ҳамза» (бу драма 1943 йилги декада кунларида Москва Давлат яхудий театри томонидан намойиш этилган эди), С. Абдулланинг «Тоҳир ва Зухра» сингарни драмалари тарихий жанр ва эпик мавзу ўзбек адабиётида чуқур ўзлаштирила бошланишини кўрсатади. Бу асарлар ёнига биз яна Уйғун ва И. Султоннинг «Алишер Навоий», Ҳ. Олимжоннинг «Муқанна», Шайхзоданинг «Жалолиддин», Ойбекнинг «Маҳмуд Торобий», И. Султоннинг «Бургутнинг парвози» драмаларини қўядиган бўлсақ, тарихий жанр ва эпик мавзуни эгаллаш масаласида ўзбек адабиёти бу даврда уруш йилларигина эмас, умуман ўзбек совет адабиёти тарихий тараққиётида эътиборли ютуқларни қўлга киритди, дея оламиз. Адабиётдаги бу силжиши танқид маъқуллади ва унга мадад берди.

Мазкур асарларнинг тарихий аҳамиятидан ташқари, замонавий қиммати ҳам бор эдики, И. Султонов бу нарсага алоҳида урғу беради. Уруш даври адабиётимизнинг айрим мумтоз намуналарида мавзу ва материал тарихдан олинаётган бўлса-да, дейди И. Султонов, улар аслида «Хозирги замон проблемаларига тарихдан жавоб»дир, яъни бу асарлар даставвал замонавий моҳияти ва замонавий аҳамияти билан қимматлидир. Улар шу кунги ҳаётимиз ва курашимизга кучли таъсир кўрсатадилар, фашизм устидан ғалабани тезлаштиришга кўмаклашадилар, «тарихий материаллар воситаси билан ҳалқимизни тарбиялашга ёрдам беради»лар.

Шу тариқа И. Султонов «Каттис имтиҳон» номли мўъжазгина мақоласида замонавийлик проблемасини кўтариб чиқади. И. Султонов мазкур масалада шунга яқин қарашларни илгари сурган Ойбек позициясида туради. Бу, хусусан, ҳозирги замон тематикасини иш-

<sup>11</sup> Қизил Ўзбекистон. 1943. 4 ноябрь.

<sup>12</sup> Литература и искусство. 1943. 11 декабря.

лашга тааллуқли бўлган фикрлардир. Уруш даври ўзбек адабиётининг жиддий ютуқларини эътироф этиш билан бир қаторда И. Султонов ёзади: «Аммо Ватан уруши эпопеясининг моҳияти ва улуғворлигини бадиий воситаларда ифода этиб берадиган катта асарлар яратиш ҳали ўзбек адабиётининг қарзи ва тез бажарилиши лозим бўлган вазифаси бўлиб турибди. Бу вазифа, аслида, ҳозирги замонамизни, совет даврини адабиётимизда акс эттириш бобида олдимизда кўпдан бери турган умумвазифанинг энг муҳим қисмидир»<sup>13</sup>.

Шунга яқин бўлган фикрларни Ойбек ҳам ўзининг 1945 йилда ёзилган «Бугунги вазифалар»<sup>14</sup>, «Ўзбек совет адабиётининг тараққиёти ва галдаги вазифалари»<sup>15</sup> номли мақолаларида алоҳида уқтириб ўтган эди.

«Катта имтиҳон» номли мақолада И. Султонов юқоридаги масалалардан ташқари, замонавийлик проблемаси билан мустаҳкам алоқадор бўлган яна бир масалани кўтариб чиқади. Бу — кўп миллатли совет халқлари дўстлигини, бу дўстликнинг тарихда ҳали шу вақтгача мисли кўрилмаган қудратини, яъни «совет тузумининг энг мустаҳкам маънавий тиргагини» бадиий полотноларда акс эттириш масаласидир. Бу мавзуни И. Султонов замонавий мавзулар ва замонавийлик масалалари ичидаги «энг нодир» ва «эҳтимолки... энг муҳим»и деб атайди.

Бу, аслида, давр ҳаётидаги муҳим тенденциялардан бирининг танқидчиликда кўтариб чиқилиши, ўзбек танқидчилигининг бу масалага конкрет муносабати ҳиди, у илмий моҳиятдан ташқари, катта амалий аҳамиятга эга эди.

И. Султон юқоридаги мақоласида уруш даври адабиётининг характерли фазилатларини ва келгусидаги вазифаларни кўрсатса, Ҳ. Олимжон «Ўзбек халқининг адабиёти» мақоласида шу адабиётнинг асосий ҳусусиятларидан ташқари, унинг аввалги босқичлардан фарқланиб турувчи ўзига хос белгиларини ҳам кўрсатиб берди. Бу давр ўзбек адабиёти ривожи аввалги босқичдан фарқли ўлароқ «эпик қаҳрамонлар образини яратиш»да намоён бўлмоқда, дер экан, Ҳ. Олимжон бундай фикрни илгари суришга тўла ҳақли эди. Чунки, «Бургутнинг парвози», «Улим босқичиларга», «Махмуд Торобий», «Жалолиддин», «Ўзбекистон қиличи»

<sup>13</sup> Султонов И. О. Уша асар. 168—169-бетлар.

<sup>14</sup> Қизил Ўзбекистон. 1945. 26 август.

<sup>15</sup> Қизил Ўзбекистон. 1945. 29 август.

сингари катта жанрдаги асарлардагина эмас, ҳатто «Мен яҳудий», «Сен етим эмассан», «Қўлингга қурол ол» сингари лирик асарлардаги эпик қалам, эпик миқёс ҳам ўзининг янги фазилатлари билан ажралиб турар эди. «Сен етим эмассан»даги ота-онасидан жудо бўлган гўдак образи нечоғлик лирика жанрининг чегаралари доирасида тасвирланган бўлмасин, унинг тасвирида масштаблилик, серкўламлилик, эпик тасвир элементлари катта ўрин тутади. «Кузатиш»даги ота ва фарзанд образлари ҳам нечоғлик лирик шеър имкониятлари даражасида тасвирланган бўлмасинлар, улар ўз моҳиятига юклangan фалсафий юкниг аҳамиятига кўра айни вақтда эпик қиммат касб этадилар. «Мен яҳудий» тасвиридаги лирик қаҳрамоннинг эпик кўлами эса ундан ҳам кенгроқдир. Бу асар лирик қаҳрамоннинг дарди шу даврда ер куррасининг турли қисмида фашизм қабоҳатидан қирғинга дучор бўлаётган бегуноҳ кишилар дардининг бадиий ифодасидир.

Шунинг учун ҳам уруш даври ўзбек адабиёти эпик қаҳрамон образини яратиш асосида ривожланиб бормоқда, деганда, Ҳ. Олимжон давр адабиёти тараққиётидаги муҳим тенденцияни илғаб олган эди. Агар юқоридаги асарлар ёнига «Навоий» ва «Қуёш қораймас» (шу йилларда яратила бошлаган)ни, «Жалолиддин» ва «Бургутнинг парвози», «Дардақдан чиққан қаҳрамон» ва «Роксананинг кўз ёшлари»ни қўядиган, ўзбек халқи номидан жангчиларга йўлланган қатор шеърий ва насрый хатларни эътиборга оладиган бўлсак, Ҳ. Олимжон чиқарган илмий хulosанинг теран ва чуқур бўлганига яна бир карра ишонч ҳосил қиласиз. Ана шу хусусиятлар ва бошқа бир қатор фазилатлар Ҳ. Олимжонни уруш даврида майдонга келган поэтик асарлар ўзбек шеъриятининг янги тараққиёт босқичига ўтганлигини кўрсатади, деган фикрни илгари суришга олиб келди.

Ҳ. Олимжон ўз танқидий мақолаларида «Сен етим эмассан» ва «Мен яҳудий» сингари шеърлар мисолида шоирнинг маҳорат қирраларини ҳам очишга эътибор беради. Юқоридаги шеърларда намоён бўлган маҳорат қирраларидан бирини Ҳ. Олимжон асар хulosасининг «фалсафий символ даражасига кўтариливид» деб билади. Зоро, шеър хulosаларининг фалсафий символ даражасига кўтариливи F. Ғулом ижодининг 20—30-йиллар босқичи учун у қадар характерли эмас. Бу йиллар F. Ғулом шеърияти хulosаларида кўпроқ публицистик руҳ ва патетек пафос устунлик қиласи.

даври ижодиётида эса бу хусусиятлар ўрнини кўпроқ фалсафий символ эгаллайди ва сўнгги йилларда янада чуқурлашиб, умуман F. Фулом ижодининг характерли белгисига, услубининг ўзига хос хусусиятларидан бирита айланади.

И. Султоновнинг «Қатта имтиҳон», X. Олимжоннинг «Ўзбек халқининг адабиёти» номли мақолалари сингари декада муносабати билан ёзилган Ойбекнинг мўъжазгина «Ўзбек адабиёти» (1943) номли мақоласида ҳам шу давр адабий жараёнининг, айниқса, шеъриятининг ўзига хос хусусиятлари очиб берилди. Вужудга келган шароит, дейди Ойбек, ниҳотда ҳозиржавоблик ва фаолликни, фашизмни foш этувчи асарлар яратилишини талаб қиласр эди. Натижада, фашизмга кучли нафрат билан йўғрилган кичик-кичик шеърлар майдонга кела бошлади. Улар жуда тезлик билан ёзилди. Мана шу оперативлик туфайли уларда баъзан чуқур лиризм ва психологизм етишмай қолади. Лекин бундан қатъи назар, улар «қизғин, самимий, ўткир, оратор нутқига яқин, таъсири, агитацион асарлар»<sup>16</sup> бўлдикни, бу хусусиятлар мазкур давр учун ниҳоятда зарур эди.

Бу хусусиятлар уруш даври шеъриятида доим бирдай, ўзгармас ҳолатда тургани йўқ. Ҳарбий мавзуни ўзлаштиришдаги маҳорат чуқурлаша боргани сари, фронтдаги вазият ўзгара боргани сари воқеликнинг таъсири натижаси ўлароқ, шеъриятдаги бу хусусиятлар ҳам ўсиб, ўзгариб борди. Совет жангчиларининг мардона ғалабаларига монанд катта-катта қасидалар майдонга кела бошлади. Булар ўзбек адабиёти тарихида мавжуд бўлган қасидалардан тамоман фарқли ўлароқ, янгиҳа характерга эга эди. Лекин бундай характердаги асарлар нечоғлик зарур ва жиддий аҳамиятга эга эканидан қатъи назар, адабий жараён фақат қасидалардангина иборат бўлиб қолиши мумкин эди, албатта. Жангчиларнинг қалбини, маънавий дунёсини, орзу-умид ва соғинчларини, нафрату муҳаббатларини, бу туйғуларнинг ижтимоий ва шахсий асосларини очиб берувчи лирикага талаб кучли эди. Ойбек кузатишича, ўзбек шеърияти шу тариқа лирикада ҳам жиддий муваффақиятларни қўлга кирита бошлади. Натижада, лиризм билан ораторлик, агитацион руҳ билан психологизм, қасидачилик билан чуқур ўйчанлик бир-бирига сингишиб кетди ва халқقا, унинг қалб шу-

<sup>16</sup> Қизил Ўзбекистон. 1943. 4 ноябрь.

урига бирдан кучли таъсир кўрсата оладиган лирика намуналари майдонга келди.

Ҳ. Олимжоннинг «Кўлингга қурол ол», «Ингитларни фронтга жўнатиш», «Россия», Шайхзоданинг «Берлинда суд бўлғуси», «Қондошлик», Уйғуннинг «Ленинград», «Очиловга», F. Гуломнинг «Қиши» ва бошқа шеърлари ана шундай характерга эга эди.

Давр адабиётдан оперативликни, ҳозиржавобликни кучли талаб қилишига қарамай, танқидчилик ёзувчи, шоирларга жиддий талаблар қўйишни унугани йўқ.

1943 йилнинг 24 апрелида «Литература и искусство» (Москва) газетаси «Бадий танқид ҳақида» номли редакцион мақола эълон қилди. Мақолада бу даврдаги совет танқидчилигининг аҳволи кўнгилдагидек эмаслиги, дуч келган асарлар пала-партиш тақриз қилиниши, конкрет ва зарур проблемаларга бағишлиланган мақолалар ниҳоятда оз экани танқид остига олиниди. Мақола, айни вақтда, танқидчиликда талабчанлик сусайиб бораётганини, камчилик ва етишмовчиликларни кечириш тенденцияси кўзга ташланаётганини таъкидлаб ўтди. Айрим матбуот органлари адабий-танқидий материалга менсимаслик позициясини тутиб, бу йўналишдаги мақола, тақризларни фақат «хўжа кўрсин» учунгина эълон қилишларини ҳам танқид қилди.

Бош мақолада айтилган фикрлар ўзбек танқидчилиги учун ҳам безз ўтмади, албатта. Бу йиллар адабий жараёнидаги камчиликларни принципиаллик билан кўрсатган мунаққидлардан бири Ойбек бўлди. Уруш давридаги адабий маҳсулот бизни сифат жиҳатидан ва, айниқса, проза жанрида миқдор жиҳатидан «унча қаноатлантирумайди», деб ёзди Ойбек «Ўзбек адабиёти» (1943) мақоласида. Хусусан, у фронт ичкарисидаги «мўъжизакор қаҳрамонлар ҳақида» кўнгилдагидек асарлар ниҳоятда оз эканлигини таъкидлади. Бундан ташқари, қаҳрамон жангчиларининг «умумлаштирилган ёрқин образларини» яратиш галдаги муҳим вазифа эканлигини, бу йўналишда ҳали ютуқлар кўнгилдагидек эмаслигини алоҳида қайд этди.

Ойбек «Бугунги вазифалар» (1945) номли мақоласида уруш даври асарларидаги ҳаётий ҳақиқат масаласига алоҳида аҳамият берди. Фронт ҳаёти, жангчи сиймоси тасвиirlанган аксар асарларда ҳаётийлик етишмаслигини, юзакилик ҳукм сурәётганини таъкидлади: «...Шоирнинг асарида землянка бор, блиндаж ва окоп бор, лекин фронт ҳаёти йўқ, жангчи бор, лекин жанг

йўқ, қаҳрамоннинг номи бор, лекин ўзи йўқ»<sup>17</sup>. Бу фронт ҳаётини чуқур билмаслик ва етарлича ўрганмаслик оқибатидир.

Уруш даври ўзбек шеъриятига фольклор асарларининг таъсири ҳар қачонгидан кучли бўлди. Бу таъсир ўзининг муносаб самараларини берганига кўплаб мисоллар келтириш мумкин. Бироқ баъзан фольклорни ижодий ва танқидий эмас, тақлидий ўзлаштириш ҳоллари ҳам кўзга ташланадики, бу масалага Ойбек адабий жамоатчилик эътиборини тортган эди. Айрим шоиrlаримизнинг шеърларида совет жангилари афсонавий Алпомиш, Гўрўғли, Аваzхонларга тенглаштирилиб «үйдирма баҳодирларга» айлантирилади, дейди Ойбек. Натижада ғолиб совет жангисининг — шу давр техникаси билан қуролланган, давр билан нафае олаётган совет қишисининг қиёфаси сезилмай қолади. Бу эса асарнинг ҳаётий асосларини реалликдан узоқлаштиришга, ҳаётийликдан маҳрум қилишга олиб келади.

Юқоридаги икки масала: фронт ҳаёти ва жангчи образи тасвирланганда, ҳаққонийликни чуқур ўзлаштириш, бу борада реализмга алоҳида эътибор бериш ҳамда уруш қаҳрамонлари образи яратилганда фольклор анъаналарига меъёр билан ижодий ёндашув лозимлиги ҳақидаги Ойбек фикрлари кейинги босқич ўзбек адабиёти тараққиётида муҳим роль ўйнади.

Танқидчилик бу давр бадиий асарларига уларнинг ҳаётга таъсир кўрсатиши нуқтаи назаридан эътибор беришга интилди. Баъзан бадиий асарнинг эстетик талқинида ўз даври танқидчилиги учун кашфиёт даражасидаги фикрларни илгари сурди. Мана бир мисол. «Жангчи Турсун» балладасининг қаҳрамони Турсун жангда қаҳрамонларча ҳалок бўлади. Ҳ. Олимжон бу ҳолатни қуидагича тасвирлайди:

Эркаланиб ётади  
У Ватан тупроғида,  
Еш бола ётган каби  
Онанинг қучоғида.

Ойбек ўзининг «Оташин ватанпарвар ва талантли шоир» мақоласида Ҳ. Олимжоннинг бу асарига юқори баҳо берар экан, шоирнинг юқоридаги тўртлигида ўз ифодасини топган қаҳрамон ўлимни ҳақида шундай хулоса чиқаради: «Шу ўлим ҳақиқатан гўзал». Қандай қилиб, ахир, ўлим ҳам гўзал бўладими? Ахир, ўлим

<sup>17</sup> Қизил Узбекистон. 1945. 27 август.

Одамзод учун энг даҳшатли, энг хунук ҳодиса эмасми? Ҳа, шундай, бироқ танқидчининг конкрет шу асар юзасидан чиқараётган фикри ҳам тўғри эканига ишонч ҳосил қиласиз. Чунки, жангчи Турсуннинг ўлими оддий ўлим эмас, фидойиларча ўлим эди, у Ватан баҳти учун, желажак авлодлар сарвати учун фидойилик қилди. Шунинг учун ҳам у, танқидчи айтганидек, гўзал ўлим эди.

Бу фикрлар муҳим замонавий аҳамиятга эга эди. У адабий-эстетик моҳият доирасидан чиқиб, ҳаётга, ҳалқа, жангчиларга кўрсатажак таъсир кучи жиҳатидан ҳам қимматли эди. Бу — уруш даври танқидий фикрининг бевосита ҳаётга фаол таъсир кўрсатувидан нишона эди. «Ҳозир, уруш у ёки бу шоир ижодига қандай таъсир кўрсатади, деган масала устида гаплашадиган вақт эмас. Ёзувчи ижоди жангчига қандай таъсир кўрсатаётганини аниқлаш кўп бор муҳимроқдир»<sup>18</sup>, — деган эди И. Эренбург.

Ойбек ҳам, И. Эренбург айтганидек, Ҳ. Олимжон асарларининг жангчиларга, ҳалқа таъсир кўрсатувчи фазилатларига эътибор бериш билан танқидчиликнинг давр олдидаги муҳим миссияларидан бирини диққат марказида тутди.

Ойбек Ҳ. Олимжон асарларининг жангчиларга таъсир кўрсатувчи фазилатига эътибор берса, Ҳ. Олимжоннинг ўзи бошқа шоирлар ижоди хусусида фикр юритганди, худди шу масаланинг бошқа бир қиррасига аҳамият беради. У Ватан учун жанг қилишни баҳт деб тушунади. Ислом шоир, Уйғун, Амин Умарий, Темур Фаттоҳ, Ҳасан Пўлат, Зулфияларнинг совет жангчилари га бағишлиланган асарларини «Ватан учун жант қилиш баҳти ҳақида ёзилган шеърлар»<sup>19</sup>, деб таърифлайди. Шу хусусиятига кўра, уларнинг шеърлари ўқувчини «зўр ҳаяжонга» солади. Аслида бундай шеърлар оддий шеър эмас, жангчи шеърлар эди, уларнинг муаллифлари ҳам оддийгина шоир эмас, жангчи-шоир эдилар. Ислом шоир Ҳамид Олимжонга шундай деган: «Уруш даврида жуда кўп қўшиқлар ёздим, кечани-кеча, кундузни-кундуз демай, ҳориш-чарчаш нималигини билмай ишлайман. Хаёлимда мен ҳам фронтга бориб, душманларни қираётганга ўхтайман». Кекса ҳалқ баҳшисининг бу юрак сўzlари остига уруш йиллари мамлакат

<sup>18</sup> Литература и искусство. 1942. 3 февраля.

<sup>19</sup> Ҳамид Олимжон. Танланган асарлар. Уч томлик. III том. 426-бет.

ичкарисида шараф билан меҳнат қилган ҳар бир совет шоири изҳори дил сингари имзо чека олади. Чунки бу сўзлар уруш йилларидаги бенстисно ҳар бир совет санъаткорининг ҳам дилидаги гапни ифодалай олади.

Бу босқич ўзбек танқидчилиги давр ва қаҳрамон масаласига муносабатда шоирлар ижодида кўриниш берган услубий ўзгаришларни аниқлашга ҳам алоҳида аҳамият берди.

1945 йили Амин Умарийнинг «Танланган асарлар»-ига ёзган сўз бошисида Уйғун шундай дейди: «Шонрининг майин қўшиғи жанговар чақириққа айланди»<sup>20</sup>. Бу услубий янгиланиш барча ўзбек шоирлари учун характерли бўлган хусусият эди. Ҳ. Олимжоннинг «Кўлингга қурол ол», Г. Фуломнинг «Мен яҳудий», Ойбекнинг «Ёвга ўлим», Уйғуннинг «Хайрлашув» ва булардан бошқа ўнлаб-юзлаб шеърларда даврнинг жанговар чақириғи асарнинг услубий тузилишини белгилади. Бу услуб ҳатто интим, муҳаббат лирикасига ҳам кириб келди. «Фашистни қирмасам, муҳаббат ҳаром» деб ёзар экан, 30-йиллардаги айрим сиёсий-гражданлик лирикасида ҳам майин ифода услуги билан ажралиб турувчи А. Умарий бу даврга келиб ҳатто муҳаббат лирикасида ҳам жанговар услугуга ўтганлигини кўрсатди.

Юқоридаги мисоллардан кўриниб турибдики, уруш даври ўзбек танқидчилигида ёзувчи ва шоирларнинг ўзлари етакчи мунаққидлик вазифасини бажардилар. Бу йилларда Ҳ. Олимжон, Ойбек, Яшин, Шайхзода, Уйғун билан бир сафда Зафар Диёр, А. Умарий, Т. Фаттоҳ, Ҳ. Фулом сингари иккинчи бўғин вакиллари ҳам адабий танқидчиликда фаол иштирок этдилар.

Бу даврда, айниқса, Ҳамид Фуломнинг адабий-танқидий фаолияти сербарака бўлди. Ҳамид Фулом шу йиллар «Қизил Ўзбекистон» газетасида эълон қилинган «Меҳр-вафо мисралари», «Жанг илҳомлари», «Шеърий мактублар», «Фронт поэзияси», «Жанг қўшиқлари» сингари мақола ва тақризларида жангчи шоирлар шеърларига обзор бериш, улардаги ютуқ ва камчиликларни таҳлил қилишдек ўзбек танқидчилиги учун янги бўлган бир тенденциясини бошлаб бердики, у рус танқидчилигидаги мана шу ўйналишдаги тенденцияга ҳамоҳанг эди. Шайхзоданинг «Биз Ўзбекистон ўғлонлари», «Хуҷумчиларнинг ҳужум ҳақидаги тароналари» сингари шу ўйналишдаги мақолаларига ҳамнафаслик касб этган.

<sup>20</sup> Амин Умарий. Танланган асарлар. Тошкент. 1945. 15-бет.

Бу фаолияти билан Ҳ. Ғулом, бир тарафдан, ҳаракатдаги армияда бўлган ёш ҳаваскор шоирларнинг ватанпарварлик билан йўғрилган илҳомига мадад берди, иккинчи томондан, ўз сафдошларининг шеърлари танқидчиликда муносаб баҳо олаётганини кўрган ва ўқиган жангчиларни ғалабага янада илҳомлантириди. Булардан ташқари, Ҳ. Ғулом Уйғуннинг уруш даври шеъронияти таҳлил қилинган «Уйғун шеърлари» мақоласи. Яшиннинг «Офтобхон» драмасига, Шайхзоданинг «Жанг ва қўшиқ», З. Диёрнинг «Совға» тўпламларига ёзган тақризлари билан бу давр адабий жарёнини таҳлил қилишда фаоллик кўрсатди. Жараёнга назар ташласак, А. Умарий ва З. Диёрнинг адабий-танқидий ижоди уруш йилларида худди мана шу даражада фаол бўлганини кўрамиз.

«...мамлакат ичкарисидан туриб қизил аскарларга кўрсатилган ҳар қандай ёрдам дарҳол Қизил Армияга куч-қувват беради, уларнинг руҳини кўтаради»<sup>21</sup>, — деган эди В. И. Ленин. Шунга ўхшаб, Улуғ Ватан уруши йилларида, жангчи-шоирларнинг шеърлари мамлакат ичкарисидаги адабий танқидчилик томонидан оперативлик билан ёритиб турилиши, В. И. Ленин айтганидек, шонли Қизил Армиянинг муайян ячейкаларида ғолиб кайфият уйғотинида, унинг ҳужумкор руҳини мустаҳкамлашда, шубҳасиз, катта аҳамиятга эга бўлди. Яъни танқидчилик уруш даврида фақат профессионал ижодкорларгина эмас, фронтда жон олиб-жон берадиган, ҳаракатдаги армияда бўла туриб, шеъриятда машқ қилишни ҳам унутмаган айрим ҳаваскор шоирларнинг ва қаламлари шу йилларда чархлана бошлаган ёш шоирларнинг асарларига ҳам фаол муносабат билдириб, ўз ижтимоий функциясидаги муҳим ишни амалга ошириди.

Танқидчилик фронтдан она Ўзбекистондаги газета редакцияларига келиб тушган шеърларни обзор тариқасида матбуот саҳифаларида ёритиш йўли билан ана шу вазифани бажарди. Бу — бошқа барча соҳаларда бўлгани каби фронт ва мамлакат ичкариси бирлигининг, ажралмас алоқадорлигининг адабиёт ва танқидчиликдаги кўриниши эди.

Уруш даврида жангчиларнинг қалб ҳарорати билан йўғрилган шеърларидан махсус тўпламлар тузилди. Бу тўпламларга сўз бошилар ёзилди ва уларда жангчи-

<sup>21</sup> Ленин В. И. Тўла асарлар тўплами. 41-том. 371-бет.

шоирларнинг шеърлари атрофлича таҳлил қилинди, бу асарларнинг давр шеъниятидаги ўрни баҳоланди.

Ана шундай тўпламлардан бири 1943 йилда нашр этилган «Жангчиларнинг шеърлари» номли мажмудадир. Шонли Қизил Армиянинг 25 йиллигига бағишиланган бу тўпламга кичик лейтенант Аҳмад Бобожонов, лейтенант Неъмат Тошпўлат, лейтенант Аширмат Назар, Комил Қулжонов, Назармат, Т. Эрназар, старший сержант Ёнгин Мирзо, Маҳмуджон Юсуф, С. Акбарий, Акрам Қодирий, лейтенант Жалил Қодирий, Ниёз Акрам ва бошқаларнинг шеърлари киритилган.

Тўпламга илова қилинган Уйғуннинг «Қилич ва қалам билан» номли сўз бошисида юқоридаги шоирларнинг асарлари таҳлил килинади. «Буларнинг бир қўлида қалам, бир қўлида қурол,— деб ёзди Уйғун,— Булар ҳам сўз билан, ҳам қурол билан ёвни урган шоирлар. Қурол шеърга куч, шеър қуролга кескинлик бағишилади. Қурол билан шеър бу шоирларда ғоят яқин бир муносабат пайдо қиласди. Бу тўпламга шеъри кирган шоирлар халқига, ота-онасига, ёрига хитобан «хайр, жангга кетдим» дер экан, ёвни тор-мор келтириш, юртдан ҳайдаб чиқариш учун онт ичдим, ё душманни қиличимдан ўтказдим, дер экан, биз бунга ишонамиз, чунки бу сўзлар шеърий тасаввур эмас, балки реал тушунчаларнинг ифодасидир. Чунки буларнинг жангга кетганлари рост, ашаддий ёвни тор-мор қилишда иштирок этмоқда бўлганлари ҳақиқат, уларнинг онти чин онт... Шу учун ҳам бу шеърлар алоҳида самимият ва алоҳида куч билан жаранглайди»<sup>22</sup>.

Тўпламдаги шеърларнинг мотивлари бу давр умумисовет адабиётининг магистрал йўналишига ҳамоҳанг бўлиб, улар ичida Ватан образи алоҳида ажralиб туради. Бинобарин, тўпламда Ватан мавзууга бағишиланган шеърлар ҳам асосий ўринни ишғол қиласди. Неъмат Тошпўлатнинг «Ватан», А. Бобожоннинг «Ватанга рапорт», Назарматнинг «Ватан ишқи», М. Юсуфнинг «Ватан шеърлари», С. Акбарийнинг «Ватан» асарида ҳар бир қалбдан ўтган тасаввур орқали она диёр тушунчасининг турли қирралари тараннум этилса-да, уларнинг барчаси яхлит ҳолда Советлар мамлакатининг муҳташам образини гавдалантиради.

Уйғун тўпламдаги Ватан ҳақидаги шеърларни таҳлил қилиб қўйидагича хulosha чиқаради: «Бу шоирлар Ватани конкрет ҳис этадилар. Буларнинг тушунчасида

<sup>22</sup> Жангчиларнинг шеърлари. Тошкент. 1943. 3—4-бетлар.

Ватан ўзлари туғилган, ўзлари ўйнаб ўсган уйдан, маҳалладан бошланади ва бутун советлар тупрогини ўз ичига олади. Буларнинг тушунчасида уларнинг Ватани фақат Ўзбекистонгина эмас, балки Совет ўлкаси-дир»<sup>23</sup>. Бу сўзлар урушдан анча кейин яратилган «Қилич ва қалқон» фильмидаги машҳур қўшиқ сўзларига нақадар яқин эканлиги билан бизни ҳаяжонга солади.

Ўйғуннинг «Қилич ва қалам билан» номли мақоласи уруш даври танқидчилиги учун энг характерли хусусият — кучли публицистик руҳ билан ажralиб туради. «Босқинчи устидан ғалаба қозонишимизга бўлган ишонч шеъримизнинг энг шарафли мавзуларидан бирни бўлиб қолди. Бу китоб ҳам ғалабага бўлган ишончимиздан сўзлайди»<sup>24</sup>, — дер экан, Ўйғун ҳалқ қалбидаги ғалабага бўлган ишончни янада мустаҳкамлайди. Бунинг учун бутун мақола давомида кучли публицистик патетикадан фойдаланади. Мақоладаги ғалаба, Ватан, фашизмни фош этиш ҳақидаги умумий фикрлар бир қараганда тўпламнинг сўз бошиси учун зарур эмасдек, улар асарлар таҳлилига алоқадор эмасдек туюлади, лекин аслида бу мулоҳазалар жуда зарур ва керак эди. Чунки бу фикрлар шу тўпламдаги асарларнинг ғоявийбадий руҳи ва уларни ўқняжак ҳалқ қалбига уйғун эди. Асосий мақсад ҳалқ қалбидаги ғалабага бўлган ишончни мустаҳкамлаш экан, Ўйғун ҳам мақоланинг руҳини даврнинг ана шу умумий руҳига бўйсундиради. «Бу қўшиқлар жангчиларимизнинг кучига куч, ишончига ишонч қўшади. Бу қўшиқлар қаҳрамонларни жангга отлантиради. Бу қўшиқлар жангчиларимиз билан бирга душманга қарши қадам ташлайди. Бу қўшиқлар окопларга, блиндажларга киради, жангчиларимизнинг ҳамкори сифатида яшайди. Бу китобнинг ҳам аҳамияти шунда»<sup>25</sup>, — деб хулоса чиқаради Ўйғун.

Шеърлар билан бир қаторда улар ҳақида фикр айтилаётган мазкур адабий-танқидий қарашлар ҳам мамлакат ичкарисидаги китобхонлар қалбидан жой олишдан, адабий жараёнга муайян таъсир ўтказувдан ташқари, фронтга, окопларга, блиндажларга кириб борар эди (фронтга мамлакат ичкарисида чиққан газета ва кичик шеърий китоблар юбориб турилган). Бундай мақолаларнинг адабий-эстетик аҳамиятидан ташқари, практик аҳамияти ва қиммати шунда эди.

<sup>23</sup> Уша асар. 5—6-бетлар.

<sup>24</sup> Уша асар. 9-бет.

<sup>25</sup> Уша асар. 12-бет.

## АДАБИЙ ТАНҚИДДА ЗАМОНАВИЙЛИК ВА ЖАНГОВАРЛИК

Бу давр адабиёти ва санъати билан бир қаторда адабий танқид зиммасида ҳар даврдагидек, бадиий-эстетик, айни вақтда, масъул ижтимоий-сиёсий вазифалар туриши ҳам шубҳасиз эди.

1942 йилнинг 26 августида Москвада бўлиб ўтган СССР Ёзувчилар союзидаги кенгаш худди шу масалага бағишиланди. Унда уруш давридаги адабий танқид вазифалари муҳокама қилинди. Кенгашда сўзга чиққан А. Фадеев, Г. Лебедев-Полянский, В. Перцов, Г. Федосеев, Н. Гусев ва бошқалар адабий танқид сифати учун астойдил кураш олиб бориш кераклиги, у фашизм устидан қозонилажак ғалабага ўзининг муносиб ҳиссасини қўшиши мумкин ва лозимлиги ҳақида ганирдилар.

Демак, бадиий асарларда давр ва замон руҳи чуқур акс этиши учун кураш олиб бориши билан, янада аниқроқ айтганда, замонавийлик учун курашиши билан танқидчилик ўзининг асосий ижтимоий функциясини бажариши зарур эди. Тарихий жанр ва мавзудаги асарларнинг қиммати ҳам, энг аввало, уларнинг замонавий аҳамиятида, шу куннинг вазифаларига, ғалабага бўйсундирилишида эди.

Уруш даври ўзбек адабиётида халқчиллик руҳи аввалги йилларга нисбатан янада мустаҳкамлашган ва янада чуқурлашган бир босқич бўлди.

Ҳ. Олимжон «Правда Востока» газетасининг 1942 йил 30 август сонида эълон қилган мақоласида уруш даври ўзбек шеъриятида камол топган тенденциялардан бирини халқчилликнинг чуқурлашувидир, деб белгилайди<sup>26</sup>. Унинг фикрича, халқчиллик бадиий асарнинг ғояси, мундарижаси, қаҳрамон характеридагина эмас, буткул ғоявий-бадиий структурасининг барча компонентларида ўз ифодасини топади. Чунончи, кўтаринки қаҳрамонлик ва майин лиризмнинг чирмашиб кетуви бу давр ўзбек шеъриятининг етакчи белгиларидан бири бўлиб, у халқ қалбини ифодалашдаги энг қулай усуллардан биридир ва, бинобарин, ҳозирги вазиятда асар халқчиллигини таъминловчи зарур компонентлардир. Лекин бу фазилатлар ўзбек шеъриятида дабдурустдан пайдо бўлган янгилик эмас, у ўзининг узоқ ўтмишига, илғор анъаналарига эгадир. «Қаҳрамонлик пафоси лиризм билан муштарак равишда ўзбек шеъриятининг барча даврлари

<sup>26</sup> Алимджан Ҳ. Искусство Узбекистана зовет к победе / Правда Востока. 1942. 30 августа.

учун бош хусусият бўлиб келган»,— дейди муаллиф. Мана шу қаҳрамонлик ва лирик асосларнинг чирманиш кетувидан туғилувчи хусусият ўзбек шоирларининг уруш давридаги етук асарларида замонавийлик масаласини муваффақиятли ҳал этишларида асосий омил бўлди. Мана шу фазилатлар X. Олимжонни Ислом шоирнинг «Жангнома», «Қаҳрамоннома» ва «Страна боевая» тўпламларига кирган термаларини, F. Гуломнинг «Сен етим эмассан» ва «Мен яхудий»сини, Шайхзоданинг тўпчи Муҳаммадга бағишлаган шеърини, А. Умарийнинг Тихвин замини ва булбуллари мадҳ этилган шеърларини («Булбул» ва «Ёр» назарда тутилади), Т. Фаттоҳнинг жасур чавандоз Аҳмад Далиев ҳақидаги шеърини чуқур ҳалқчил асарлардир, деб холоса чиқаришга олиб келади.

X. Олимжон бу давр ўзбек шеъриятидаги ютуқ ва муваффақиятларни эътироф этиш билан бир қаторда, фақат давр эмас, тарих синовига дош бера оладиган асарлар яратишга чақириш лозимлигини унутмади. Шу маънода, ўз ҳамкасб дўстлари олдига катта-катта талаблар қўйди.

Инқиlobдан сўнг камол топган янги ўзбек кишиси қиёфасининг бутун бўй-басти ва салобати билан чуқур ва атрофлича кўрсатиб берилишини у биринчи даражали вазифа, деб тушунди. Бу масалада ўзбек адабиёти ҳали жуда кўп ишлар қилиши лозимлигини айтди. «Хозирча ўзбек адабиётида янги инсон қиёфасининг айрим қирраларигина ўз ифодасини топди,— деб ёзади у мақолаларидан бирида.— Социалистик мамлакат кишисининг умумлаштирилган қиёфаси ҳанузгача етарлича чуқур яратилгани йўқ»<sup>27</sup>.

X. Олимжон одил, ҳақгўй ва талабчан мунаққид эди. У замонавий мавзудаги драмаларга бу давр ниҳоятда ташна эканлигини эътироф этса-да, майдонга келган ана шундай асарларни улардаги мавзуларнинг замонавий бўлганлиги учунгина ижобий баҳолашга, юқори қиймат беришга шошилмайди. Фоявий-бадиий мезон унинг талабларида доим бир бутунликни ташкил қиласди. Унинг «Даврон ота» ва «Ўзбекистон қиличи» драмаларида шошилинчлик муҳри ўз изини қолдирган, дейишининг ҳам боиси шундадир.

Адабий танқидчилик бу даврда яратилаётган асарларнинг интернационал моҳиятига алоҳида эътибор

<sup>27</sup> Алимджан X. Четверть века узбекской советской литературы//Правда Востока. 1942. 27 декабря.

билин қаради. Зеро, бу масалага эътибор — адабиётнинг замонавийлиги проблемасига аҳамият берининг муҳим шартларидан бири эди. Танқидчилик F. Ғулом, X. Олимжон, Шайхзода ва бошқаларнинг шу йилларда босилиб чиққан шеърларини, тўпламларини таҳлил қиласар экан, уларда давр ҳаёти, интернационал пафос қай даражада ўз ифодасини топгани масаласини ҳам доимо диққат марказида тутди.

Уруш даври ўзбек адабиётидаги интернационал пафос, интернационал руҳ фақат ижтимоий асоснинг ифодасигина эмас, айни вақтда, у билан узвий боғланишда бўлган шахсий ва маънавий асоснинг ҳам намоён бўлиши эди. Шу маънода бадиий асарларда акс эттирилган ижтимоий ғоя интернацоналлиги билан қаҳрамон маънавий дунёсидаги интернацоналликка алоҳида эътибор берилиши, бу аслида, давр адабиётидаги бир етакчи масаланинг икки муҳим қиррасига аҳамият берилиши демакдир.

Ойбек бу йилларда совет кишиси, совет жангчисининг маънавий дунёсини тасвирлаш муҳим аҳамиятга эга эканини таъкидлади. Унинг «Совет одамининг маънавий дунёси ғоят кучли ўси ва ривожланди. У энди ҳаётга, дўстликка, ишқ, муҳаббатга, меҳнатга ва ҳоказага бошқача қарайди — унинг фикрлари, туйғулари жуда гўзал ва инсонийдир»<sup>28</sup>, — деган фикри Алексей Толстойнинг фикрига ҳамоҳанг эди. А. Толстой ёзади: «Бу урушда ғалабани омад, тасодиф ва саркарда талантини таъминламайди; мотори кўп ва халқининг иродаси, маънавий дунёси мустаҳкам бўлган томонгина ғолиб чиқади. Маънавийлик мезонлари бу урушда ҳалқилувчи аҳамиятга эга бўлади»<sup>29</sup>.

Демак, кўринадики, Ойбек ўз мақоласида маънавийлик проблемасига алоҳида урғу бериш билан уруш даври нафақат ўзбек адабиёти, балки умуман, кўп миллатли совет адабиёти учун ҳам муҳим ва зарур бўлган масалалардан бирини кўтариб чиқди.

Зеро, бу даврда ўзбек халқининг бой маънавий дунёсини кўрсатувчи ажойиб асарлар майдонга келган эди. Абдулла Қаҳҳорнинг «Қампирлар сим қоқди», «Асрор бобо», «Хотинлар» ҳикояларида, F. Ғуломнинг «Кузатиш» ва Ойбекнинг «Ойша хола» шеърларида, X. Олимжоннинг «Роксананинг кўз ёшлари» ва Шайхзо-

<sup>28</sup> Қизил Ўзбекистон. 1945. 27 август.

<sup>29</sup> Толстой А. Четверть века советской литературы. М., 1943. С. 3.

данинг «Оқсоқол» балладаларида халқ қалби ва маънавий дунёси, унинг конкрет қаҳрамонлари руҳий олами ўз ифодасини топди.

\* \* \*

Уруш даврида адабиётнинг барча тур ва жанрлари қатори, айниқса, халқнинг ўзини-ўзи билан юзма-юз учраширадиган драматургия жанрларига эҳтиёж кучайди.

Бу йиллар матбуоти хабарларига кўра, биргина 1941 йилнинг июнь — июль ойларида ўзбекистонлик адаб ва драматургларнинг мудофаа мавзуидаги 30 дан ортиқ бир ва икки пардали пьесалари майдонга келди.

Тўғри, уларнинг барчаси адабиёт тарихида қоларли даражада муваффақиятли эмас эди. Давр барча жабхаларда ҳозиржавобликни, жанговарлик ва шиддатни талаб қилас, бинобарин, адабий асарлар ҳам ниҳоятда тезлик билан яратилар эди. Шунга кўра, уларнинг бадиий қувватида талай етишмовчиликлар бўлиши ҳам табиий ҳол эди. Бироқ, бундан қатъи назар, улар ўз даври учун тарбиявий жиҳатдан муайян қимматга эга эдилар. Уруш даври адабий жараёни ва бадиий асарлари ҳақида фикр юритганда мана шу хусусиятни эътиборда тутиш лозим бўлади.

Урушнинг дастлабки 2—3 ҳафтаси ичидәёқ С. Абдулла ва Чустийнинг «Жасур оила», Туйғуннинг «Ватан кизи», Юрий Арбат ва Николай Звёздиннинг «Душманнинг парашютчи-диверсантларига қарши кураш», Михаил Яновскийнинг «Хужумнинг биринчи куни» сингари бир ва икки пардали кичик пьесалари яратилди, ижодий колективларда ўқиб муҳокама қилинди, республика-нинг турли театрларида саҳналаштириш учун тавсия этилди.

Урушнинг дастлабки 2—3 ҳафтаси ичидаги республикадаги ўзбек ва рус композиторлари мудофаа мавзуига оид 30 дан ортиқ шеър ва қўшиққа куй басталадилар. Оқшом басталанган бу қўшиқлар эрта тонгдан радио тўлқинлари орқали халқ ичига кириб борар эди.

Йигирмадан ортиқ шеър ва қўшиқни ўз ичига олган «Ўлим ёвга» номли тўплам 1941 йил июлининг бошида 5 минг нусхада босилиб чиқди. 10 кун ичидаги Тошкент киностудиясининг мудофаа мавзуидаги биринчи маҳсулоти экран юзини кўрди. Бу — Наби Фаниев ва Е. В. Брюнчугин режиссёrlигидаги Мирзакалон Исмоилий ва Е. И. Смирнова сценарийси асосида қўйилган

«Биз енгамиз» номли қисқа метражли бадиий фильм эди.

Энг асосийси — танқидчилик адабий жараёндаги бу фаолликни, жанговарликни унинг ўзига монанд ҳозиржавоблик билан ёритиб борди. Чунончи, Зафар Диёрнинг «Ижодчилар амалий ишда» («Қизил Ўзбекистон», 1941 йил 13 июль) номли мақоласида Ўзбекистон адиларининг уруш бошланганидан сўнгги дастлабки уч ҳафта ичидаги фаолиятлари ёритилди. Қ. Пўлатовнинг «Биз енгамиз» («Қизил Ўзбекистон», 1941 йил 6 август) тақризида юқоридаги қисқа метражли бадиий фильм ҳозиржавоблик билан таҳлил қилинди. Муаллиф бу тақризида: «фильм бошидан охиригача ўзбек халқининг ғалабага ишонганлигини, Гитлер газандалари ўзлари қазиган гўрга кўмилажагини, халқимиздаги руҳий кўтаринкиликни (таъкид бизники — Б. Н.) ифодалайди», — деб ёзади. Ўзбек санъатининг бутун уруш давомида юз кўрсатажак фазилати урушнинг дастлабки кунларидаёқ аниқ ва конкрет ифодасини топган бу фикрда халқимиздаги руҳий кўтаринкилик, оптимизмга алоҳида ургу берилётгани, айниқса, диққатга сазовордир. Халқимиз бошига тушган бу оғир кунларда руҳий тетиклик, руҳий кўтаринкилик масаласи биринчи даражали масала эди. Тақризчи фильмдаги ана шу асосий фазилатни илғаб олади ва унга юқори баҳо беради, бу фазилатни тарғиб ва ташвиқ қиласи. Бу иши билан танқидчилик халқимиз руҳий кўтаринкилигини мустаҳкамлаш ва камол топтиришга ҳисса қўшишга бел боғлаганини урушнинг илк кунларидаёқ кўрсатди.

Уруш йилларида партия ва хукуматимиз драматургия ривожига, бу жанрдаги асарлар қиммати ва аҳамиятига, таъсир кучига алоҳида эътибор билан қаради.

1942 йилнинг 14 февралида «Правда» газетасида «Искусство на службу Красной Армии» номли мақола эълон қилинди. Ўнда, хусусан, совет драматурглари халқ ва Қизил Армия талабларига жавоб бера оладиган асарлар яратишга даъват этилди. Совет жангчиларини жасоратларга ундовчи пьесалар яратиш давр адиёти олдидаги муҳим вазифа эканлиги таъкидланди.

Тўғри, урушнинг дастлабки йилида жангчиларимиз жасорати ва ғалаба мавзунга бағишлиланган бир қатор драматик асарлар пайдо бўлган эди. 1941 йилнинг сентябррида Собир Абдулла ва Чустийнинг «Қурбон Умаров» номли музикали драмаси саҳналаштирилди. Шу йилнинг ноябррида Қ. Яшин, С. Абдулланинг Чустий либреттоси асосидаги «Даврон ота» номли музикали

драмаси А. Навоий номли театрда саҳна юзини кўрди. 1942 йил январида Н. Погодин, С. Абдулла, Уйғун, Ҳ. Олимжон ҳамкорлигида ёзилган «Ўзбекистон қиличи» музикали драмасидан парчалар эълон қилина бошлиди.

1942 йилнинг январида А. Навоий театрида Ҳ. Ғулом ва Б. Халилов либреттоси асосидаги «Шерали» музикали драмасининг премьераси бўлди. Лекин, булардан қатъи назар, уруш даври ўзбек драматургиясидаги кескин бурилиш, айтиш мумкинки, «Правда» газетасидаги ана шу редакцион мақола эълон қилинишидан сўнг бошланди. 1942 йил апрель ойининг сўнгги кунларида «Ўзбекистон қиличи» саҳна юзини кўрди. Шу йилнинг сентябрида Ҳамза театрида Яшиннинг «Улим босқинчиларга» драмасининг премьераси бўлиб ўтди. Ўзбек маданияти ва саҳна санъати инқилобнинг 25 йиллик тўйини И. Султоннинг «Бургутнинг парвози» драмасини саҳналаштириш билан кутиб олди. Шу йилнинг декабрида Яшиннинг «Нурхон»и саҳнага қўйилди ва ҳоказо.

1943—1944 йиллар давомида «Муқанна» (Ҳ. Олимжон), «Жалолиддин Мангуберди» (Шайхзода), «Маҳмуд Торобий» (Ойбек), «Она» (Уйғун), «Алпомиши» (С. Абдулла), «Қалтис ҳазил» (Уйғун), «Офтобхон» (Яшин) драмалари майдонга келди.

1945 йилнинг 1 апрелида ўзбек совет драматургиясининг салкам 30 йил ичидаги босиб ўтган йўлининг синтези сифатидаги ва Ҳамзанинг «Бой ила хизматчи»сидан сўнг саҳна санъатимиздаги энг мумтоз асарлардан бирі бўлиб қолажак «Алишер Навоий» драмасининг премьераси бўлди.

Уруш даври ўзбек драматургияси жанр ва мавзу жиҳатидан қай даражада ранг-баранг бўлмасин, асар воқеаси қайси даврдан олиб ёзилмасин, унинг бутун йўналиши замонавийлик мақсадига бўйсундирилди, фашизм устидан қозонилажак галабага ҳисса қўшишга йўналтирилди.

Фашизмга нафрат ва ватанпарварлик туйғуларини ифодаловчи даврнинг етакчи тенденциясидан ҳатто қўйирчоқ театри ҳам четда тургани йўқ.

Уруш бошлангандан сўнг уч ой ўтар-ўтмас Республика қўйирчоқ театри қисқа пардали пьеса ва якка номерлар мажмуудан иборат «Найза» спектаклини тайёрлади ва намойиш қилди. Унда Гитлернинг инсоният иқболига зид бўлган манфур гоялари болалар онги ва тушунчасига мос равища талқин қилинди.

Адабий-маданий ҳаётдаги бу ҳодиса ҳам адабий танқидчилик эътиборидан четда қолмади. Танқидчилик ҳозиржавоблик билан бу ҳодисага ўзининг муносабатини билдири ва қўғирчоқ театрининг фаолиятини олқишлади. «Найза»га «Қизил Ўзбекистон» газетасининг 1941 йил 19 сентябрь сонида маҳсус тақриз эълон қилган Зафар Диёр, бу асар болаларимизнинг ватанпарварлик туйғуларини тарбиялашда катта аҳамиятга эга бўлди, деб чиқди.

Танқидчилик шу даражада оператив бўлдикни, масалан, «Алишер Навоий» фильмни ҳали экранга чиқмасдан, асар ҳали суратга олинмасиданоқ, унинг сценарийси ҳақида (бу ҳодисага ҳозирги танқидчилик ҳам ҳавас қилса арзийди) матбуотда ўз фикрини билдири. Фильм сценарийсига ёзилган тақризлардан бири «Алишер Навоий ҳақида кинофильм яратамиз» номи остида «Қизил Ўзбекистон» газетасининг 1941 йил 23 ноябрь сонида босилиб чиқди. Маълумки, В. Шкловский, Уйғун, Иззат Султон сценарийси асосида суратга олни бошлаган бу фильмга «Мўгулистон фарзанди», «Кўк экспресс» фильмларини қўйган И. Трауберг билан К. Ёрматов режиссёrlик қилган эдилар<sup>30</sup>. Тақриз муаллифи режиссура ҳақида фикр юритмайди, чунки ҳали фильмнинг ўзи йўқ эди. У, асосан, фильм сценарийси ҳақидағи мулоҳазалари билан ўртоқлашади: «Навоий ҳақидағи сценарий билан танишиб чиқсангиз, авторларнинг тўғри йўлдан борганиларини, яъни шоирнинг таржимаи ҳолини қайд қилиш билангина қаноатланмай, балки унинг шахсий ҳаётини ўша даврдаги ижтимоий ҳаёт билан, жамиятнинг тараққиёт қонуниятлари билан боғлаганларини кўрасиз». Тақриз муаллифи «Алишер Навоий» фильмни сценарийсининг рационал мағзини тўғри илғаб олганлиги кўриниб турибди.

Кўп ўтмай, «Қизил Ўзбекистон» газетасининг 1941 йил 28 декабрь сонида фильм режиссёrlари И. Трауберг ва К. Ёрматовларнинг «Кинода Навоий образи» номли мақоласи босилиб чиқади. Муаллифлар мақолада Навоий образини яратишдаги ўз ижодий принципларини баён қиладилар. Фильм тарихий жанрда яратилаётган бўлса-да, бош қаҳрамон тарихий шахс эса-да, унда буюк тарихий фигуранинг нусхаси эмас, балки санъат қонуниятларига суянган ҳолда бадиий образи яратилади, дейилади мақолада. Чунки, тарихий жанрда конкрет

<sup>30</sup> «Навоий» фильмни урушдан сўнг К. Ёрматов томонидан мустақил равишда охирига етказилган.

тариҳий шахс образини яратиш типиклик қонунияти асосида индивидуал қаҳрамон қиёфасини яратишга монелик қилмайди. Шунга кўра, «Навоий образини унинг замондошлари айтганидан кўра чуқурроқ, мураккаброқ ва ўткирроқ» қилиб тасвирлаш билангина унинг том маънодаги бадиий образини гавдалантириш мумкин. Шундагина Навоийнинг етук реалистик образи — социал ва бадиий қиёфаси яратилган бўлади. Бироқ, бу масалани Навоий фазилатида аслида бўлмаган хусусиятларни бўрттириш, борларига «қош қўйиш» ҳисобига эмас, аксинча, уни «ўз давридаги жамият тарзи ҳаёти» билан чамбарчас алоқадорликда кўрсатиш билангина ҳал қилиш мумкин. Бунинг учун эса фильмда қонуний равишда Навоий билан бир қаторда ҳалқ образи ҳам марказий ўринни эгалламоғи лозим.

И. Трауберг ва К. Ёрматов фильм финалидаги Навоийнинг саройдан чиқиб, ҳалқ ичига кириб кетиши эпизодига катта символик маъно юклайжакларини, бу эпизод «Навоий поэзиясининг асл маъноси ва қиммати»-ни ифода этажагини айтадилар.

Режиссёrlарнинг бу мақоласидан бўлажак фильм қайси услубда яратилаётганидан ҳам воқиф бўламиз. Бу услубни тайин этган асосий фактор режиссёrlарнинг ўз олдига қўйган мақсадлари ёки сценарийгина эмас, балки асарга асос бўлган тариҳий материал, Навоий шахси ва унинг поэзияси ҳамdir. Яъни «фильм ўз характеристери жиҳатидан Навоий поэзияси сингари романтик бўлиши керак».

«Навоий» фильмининг яратилиши пайтида матбуотда айтилган фикрлар уруш даври танқидчилигида тариҳий жанрнинг асосий хусусиятлари ҳақида тўғри тасаввур мавжуд бўлганини кўрсатади.

Уруш даврида замонавий мавзуда ёзилган асарлардан бири Н. Погодин, С. Абдулла, Уйғун, Ҳ. Олимжоннинг «Ўзбекистон қиличи» номли драмасидир.

Уйғуннинг «Қалтис ҳазил» драмасида замонавий мавзу уруш арафаларида мамлакат ичкарисидаги қишлоқ ҳаётини акс эттириш асосига қурилган бўлса, «Ўзбекистон қиличи»да бу масала бевосита фронт ҳаётини, маълум даражада мамлакат ичкарисидаги ҳаётни ҳамда уларнинг узвий бирлигини бадиий талқин этиш заминига қурилди.

Асар ўз вақтида ёқ танқидчиликнинг эътиборини тортди. Шайхзода «Ўзбекистон қиличи» драмасига ёзган тақризида асардаги ҳалқчиллик ва замонавийлик масаласига алоҳида эътибор беради.

...Юнус ота фарзанди Арслонга ўзи ясаган қилични тутқазади ва жигаргўшасини жангга жўнатади. Тарихий ҳақиқат нуқтаи назаридан шундай воқеа эҳтимол бўлгандир, балки бўлмагандир. Бироқ асарда бу ҳодиса, энг асосийси, бадиий ҳақиқат даражасига кўтарилади. Бу деталь ва эпизод асарда чуқур символик аҳамият касб этади. Шайхзода драмадаги мана шу нуқтага алоҳида эътибор беради ва ёзади: «Қилич халқда рицарлик (жувонмардлик — Б. Н.) ва мардлик символи бўлиб қолган. «Ўзбекистон қиличи» бу нуқтаи назардан халқчил асардир». Қилич — бир символика. Демак, аслида қилич бу асарда Ўзбекистон, янада аниқроғи, ўзбек халқидир. Ватан меҳри, ғалабага ишонч, қаҳрамонлик белгисидир. Фронтга кетаётган ўзбек йигитларининг мана шу шамшир учун ичган қасамлари, онтлари ҳам аслида Ватан шарафи учун, халқ номуси учун ичилган қасамдир.

Драмани таҳлил қилган сари Шайхзода унинг халқчил ва замонавий қатламларини оча боради.

...Жангда қўрқоқлик қилган Тошматни Арслон отишга буюради.

Қилич ёнида ичилган онт қани, қасам қани? Бироқ, ҳамма гап шундаки, драма муаллифлари асарда социалистик реализм принципига содиқликларини кўрсатадилар. Агар, қилич олдида қасам ичилди-ку деб, ҳар бир жангчи фақат қаҳрамон, ботир ва шунқор сифатида тасвиirlанганида, бу — шубҳасиз, бир ёқламалик бўлур эди. Жон олиб-жон берилувчи жангда ботир ҳам, қўрқоқ ҳам, иккиланувчи ҳам бўлиши шубҳасиз. Бу — ҳаётий ҳақиқат. Асар муаллифлари мана шу ҳаққонийлик позициясида бўладилар.

Лекин бу эпизод қўрқоқлик қилган Тошматнинг отилиши билан тугаса, масала мантиғи тугалланмаган, очиқлигича қолган бўлур эди. Шунинг учун ҳам асар муаллифлари бу эпизодни мантиқий якунига, бадиий интиҳосига етказадилар. Номус — ўлимдан кучли. Халқ шундай дейди. Фарзанди нобакорлигидан унинг падари Одил ота қанча азият чекмасин, ватан, халқ олдидаги бурч бу мудҳиш мусибатдан ғолиб чиқади. Ота ўғли ўрнини босиши учун жангга отланади.

Шайхзода драмадаги мана шу линия моҳиятидан сизиб чиқувчи асар халқчиллигига, бу халқчилликка асос бўлган традицияга ва шу эпизоднинг жавҳари (рационал мағзи) да намоён бўлувчи замонавийликка алоҳида эътибор беради. Ҳатто халқимиз ҳаётни ва адабиёти тарихидан драманинг шу эпизодига қиёс бўлувчи аналог-

ларни келтиради. У ёзади: «Қўрқоққа нафрат туйғуси ҳам чуқур халқчил илдизлардан ва тарихий анъаналардан келиб чиқади. Бу туйғу гуманистик нафратга зид эмас. Буюк шоир ва саркарда Бобур инсонпарвар бўлгани ҳолда ҳинд сафарида энг яқин саркардасини (Тошмат ҳам Арслоннинг энг яқин дўстларидан бири эди — Б. Н.) қўрқоқлиги учун жазолаши ёки Гўрўғли қўрқоқ шеригини нафрат билан ҳайдашни бунга яққол мисолдир. Бу қадимги фазилатлар бугунги кунда янги мундарижага эга бўлиб, мардни номарддан ажратишда ботирларнинг маънавий ўлчовидир»<sup>31</sup>.

Шу тариқа Шайхзода «Ўзбекистон қиличи»нинг замонавий мундарижасинигина эмас, мундарижадаги асл замонавийликни ҳам муваффақият билан очиб беради. Бироқ тақризнинг қиммати асар замонавийлигини очиб беришдагина эмас, ўзидағи замонавийликнинг, замонавий руҳ ва пафоснинг юксаклигига ҳамдир. Тақриз адабий жараёнга, санъаткорларга кўрсатажак илмий-эстетик таъсир қучи билангина эмас, шу асар таҳлили мисолида бевосита ҳаётга, халққа, фронтдаги жангчиларга кўрсатувчи таъсир кучи билан ҳам қимматли эди. Бу уруш даври ўзбек танқидчилигидаги оперативлик, жанговарлик, практик аҳамиятнинг муштарак кўринишларидан бири эди<sup>32</sup>.

Бу давр адабиётида Ватан ва ватанпарварлик, баҳт ва муҳаббат, нафрат ва садоқат мавзуларининг талқини аввалги даврларга нисбатан анча чуқурлашгани ва кенгайгани сингари, танқидчилик томонидан замонавийлик проблемасининг идрок этилиши ҳам анча чуқурлашди ва бойиди.

Бу фикрга Р. Саҳибоев ва Зафар Диёрнинг «Нурхон» драмасига ёзган тақриз («Қизил Ўзбекистон», 1943 йил 10 январь) мисол бўла олади. Маълумки, бу асарнинг замонавийлиги масаласи ҳақида гап боргандা, ҳатто

<sup>31</sup> Шайхзода. «Ўзбекистон қиличи» драмаси ҳақида // Қизил Ўзбекистон. 1942. 7 май.

<sup>32</sup> Н. Погодин, С. Абдулла, Уйғун, Ҳ. Олимжон ҳамкорлигига яратилган «Ўзбекистон қиличи» пьесасининг тўлиқ тексти матбуотда эълон қилинмаган ва нашр этилмаган. Унинг қўллэзмаси А. Каюмов томонидан 1985 йили топилди. Пьесанинг нисбатан тўлиқ мазмунни архив материаллари, эълон қилинган баъзи парчалар, айrim музаллифларнинг қўллэзма нусхалари, драма режиссёри (М. Муҳамедов) билан қилинган сұхбат асосида илк бор адабиётшунос, филология фанлари доктори, проф. Т. Ҳ. Ҳамидова томонидан тикланди. Қаранг: Ҳамидова Т. Ҳ. Русско-узбекские литературные связи в годы Великой Отечественной войны. Ташкент. 1973. С. 233—276. Биз «Ўзбекистон қиличи» ҳақида фикр юритганимизда асосан шу манбага ва уруш йилларни матбуотида эълон қилинган тақризларга суюндик.

ҳозирги адабиётшунослик ҳам, аксар ўрииларда, асар таъсири туфайли туғилувчи ўтмишга нафрат, ҳозирги замонга муҳаббат масаласини эътироф этиш билангина чекланади.

Р. Саҳибоев ва З. Диёр асарни таҳлил қилиб, драманинг давр билан алоқадорликда намоён бўлувчи замонавий қимматини алоҳида уқтириб ўтадилар. Яъни, улар фикрича, драмада прогрессив, тараққийпарвар кучларнинг жаҳолат, разолат ва реакцион кучлар устидан ғалаба қозониши кўрсатилар экан ва бу ғалабанинг амалга ошиши шубҳасиз эканлиги тасвирлаб берилар экан, «шу жиҳатдан «Нурхон» асари гитлеризмга қарши кураш олиб борилаётган давримиз билан ҳамоҳангдир». Унинг уруш даври учун зарур бўлган замонавий аҳамияти ва қиммати мана шундадир.

Тақриз муаллифлари драмага юқори баҳо бериш билан бирга, ундаги айрим камчиликларни ҳам кўрсатиб ўтадилар. Чунончи, Мамат ўз синглиси Нурхонни аввалига ўлдиришга рози бўлмайди, ҳатто отасидан ҳимоя ҳам қиласди. Ахир, Нурхон ўз синглиси, жигари. Бироқ, «номус кучи» устунлик қилиб, ниҳоят, ўз синглисини ўлдиради. Бу эпизод жуда катта психолигик тайёргарликни, асослашни талаб қиласди. Ҳолбуки, пьесада «ана шу психолигик момент ёрқин эмас. Натижада Нурхоннинг акаси томонидан ўлдирилиши ғайритабиий бўлиб чиқади». Психолигик асослашни талаб этиш — тақризчининг жуда муҳим масалага етарли аҳамият берганини кўрсатади. Р. Саҳибоев ва З. Диёр «Нурхон»ни «Гулсара» билан қиёс қилиб муҳим бир фикрни айтадилар. «Нурхон» билан «Гулсара» қатор фазилатлари билан бир-бирига яқин туради. Гулсарада озодликка интилиш, фаоллик яққолроқ сезилади. Нурхонда эса шу фазилат этишмайди. Ваҳолонки, Нурхон учун ҳам бу фазилат зарур эди. Чунки, биринчидан, асар учун асос бўлган тарихий шахс Нурхон Йўлдошхўжаевада шу хусусиятлар мавжуд эди. Иккинчидан, драмадаги Нурхон ўз даврида озодлик ва эрк учун фаол кураша олган ўзбек санъаткор қизларининг типик намояндаси даражасига кўтарилиши лозим эди. Бу хусусият «Нурхон»да тўлиқ кўринмай қолади.

Демак, юқоридагилардан маълум бўладики, ўзбек танқидчилиги уруш даврининг мураккаб вазиятларида ҳам бадиий асарлар олдига қўйилувчи кучли талабларни сусайтиргани йўқ. Бундай талаблар шу давр ва ундан сўнгги босқич ўзбек адабиёти ривожи учун муносиб аҳамиятга эга бўлди. Ўзбек танқидчилиги уруш йилла-

рида ҳам адабий жараёнга таъсир этишнинг ибратли намуналарини кўрсатди.

Уруш йиллари ўзбек адабиёти ва тарихий жанрнинг бу босқичгача кечган тараққиёт йўлида гуллаган бир давр бўлди. «Навоий» романни шу даврда тугалланди. «Муқанна», «Жалолиддин», «Маҳмуд Торобий», «Алишер Навоий»лар шу йилларда саҳнага қўйилди. Асосан, 1940 йилда ёзиб тугатилган бўлса-да, 1942 йил кузида саҳналаштирилган «Бургутнинг парвози» туфайли ўзбек драматургиясидаги тарихий-инқилобий жанр ва тарихий мавзу ишланилиши янада салмоқли аҳамият касб этди.

Танқидчилик бу асарларни ўз вақтида, ҳозиржавоблик билан баҳолаб борди, таҳлил қилди. Рус мунаққидлари ҳам бу асарларга қизғин муносабат билдирилар.

Уруш давридаги драматик асарлар таҳлил этилган гўзал ишлардан бири Ойбек ва Fafur Fуломнинг «Жалолиддин» драмаси ҳақида» номли мақоласи бўлди. Мақола, аслида, «Жалолиддин»нинг саҳналаштирилиши муносабати билан тақриз жанрида ёзилган бўлишига қарамай, драматургиянинг, хусусан, тарихий жанрдаги драманинг бир қатор муҳим проблемаларини кўтариб чиқиши жиҳатидан, наинки уруш даври танқидчилиги, балки умуман ўзбек танқидчилиги тарихида муҳим аҳамиятга эгадир.

«...Ватан ўғилларининг эрк, мустақиллик, номус ва шараф учун бошлиган кураши ёрқин маънодор драматизм билан тўла ҳаяжонли картиналарда гавдаланади»<sup>33</sup>.

Мазкур фикр билан муаллифлар, биринчидан, бу тарихий драманинг асосий қимматини — замонавий мөҳияти ва аҳамиятини белгилаб берадилар. Яъни, узоқ ўтмиш материали асос қилиб олинган драма замирида ватан фарзандларининг эрк, мустақиллик, номус ва шараф учун кураши ётади. Бу эса, аслида шу куннинг вазифаси ҳамdir. Бу кунги Ватан фарзандлари олдида турган бирдан-бир асосий бурч ҳам Ватан эрки, мустақиллиги, номуси, шарафи учун курашмоқдан иборатdir.

«...Ёрқин маънодор драматизм билан тўла ҳаяжонли картиналар». Бу мўъжаз, фикрларга тифиз, қисқа ва ихчам мулоҳазада драма жанрининг характерли хусусиятлари ифодаланган дейиш мумкин. Эътибор берайлик: драма оддий картиналар эмас, ҳаяжонли картиналар асосига қурилмоғи лозим. Бироқ, бунинг ўзигина

<sup>33</sup> Кизил Узбекистон. 1944. 18 февраль.

етарли эмас. Улар чуқур драматизм билан сүфорилган бўлиши керак. Ойбек ва F. Гулом назарида бу фикр ҳам бир оз кемтикроқдек. Ҳаяжонли картиналарнинг шунчаки драматизм билан сүфорилиши озлик қиласи, у маънодорлик касб этмоғи лозим. Лекин маънодор драматизм проза учун ҳам, бошқа жанрлар учун ҳам хоску. Унинг драматик асар учун характерли бўлган фазилати-чи? «Ёрқинлик». Ҳа, драма маънодор драматизмгина эмас, ёрқин маънодор драматизм асосига қурилмоғи керак, шундагина у тўла ҳаяжонли картиналар томиридаги ҳаётни жунбушга келтира олади..

Ойбек ва F. Гулом Шайхзоданинг «Жалолиддин» драмасида худди мана шу фазилатларни кўрадилар. Асарнинг жанр фазилатларини шу тариқа белгилаган муаллифлар секин-аста унинг бош қаҳрамони таҳлилига ўтадилар.

Асарнинг бош қаҳрамони тарихий шахс — Хоразм шоҳининг фарзанди Жалолиддин. У Ватанини мўғул босқинчиларидан ҳимоя қилишга отланган. Бироқ асарда у жисмоний жиҳатдангина баҳодир, қуролни ишлатиш жиҳатидангина паҳлавон қилиб тасвирланган тақдирда бир ёқламаликка йўл қўйилган бўлур эди. Унинг қалбини, маънавиятини, ақл-заковатини ҳам кўрсатиш керак эдики, драматург ҳам шу йўлдан боради. Бу, айни вактда, тарихий ҳақиқатнинг бадиий ифодаси ҳам демакдир. Танқидчилар Шайхзоданинг шу масаладаги маҳоратини алоҳида эътироф этадилар. Жалолиддин «ўз сиймосининг маънавий гўзаллиги билан томошабинни сеҳрлайди», у «баҳодирликни ўткир ақл билан безаган ажойиб йигит...».

Ойбек ва F. Гулом Жалолиддин сиймосида кўраётган маънавий гўзаллик бу қаҳрамоннинг замонавийлиги, замонавий аҳамияти ва қимматидан келиб чиқиб айтилаётган фикрлар эди. Адабий танқид доирасида айтилаётган бу фикрнинг ҳам, ўз навбатида, замонавий аҳамияти кучли эди. Бу фикр тарихий шахснинг тарихий жанрда тасвири ҳолида бутуниттифоқ танқидчилигига айтилган фикрларга ҳамоҳангдир.

Уруш даврида рус адабиётида ва бошқа қардош халқлар адабиётида ҳам тарихий жанрда ёзилган бир қатор муваффақиятли асарлар майдонга келди. А. Н. Толстойнинг «Иван Грозний», И. Сельвинскийнинг «Ливон мұхорабаси», О. Литовскийнинг «Александр Невский» сингари асарлари шулар сирасига киради. С. Голубовнинг «Багратион» помли тарихий романни ҳам уруш даврида тарихий жанрда яратилган муваффақиятли

асарлардан биридир. Унда 1812 йилги Ватан урушида рус халқининг француз армияси устидан қозонган тарихий ғалабаси акс эттирилган. Адабиётшунослар Г. А. Белая, Ю. Б. Борев, В. М. Пискунов романдаги Кутузов образи «ҳам буюк лашкарбоши, ҳам миллатнинг маънавий доҳийси»<sup>34</sup> сифатида тасвирланганини таъкидлаб ўтадилар. Демак, халқ озодлиги, Ватан эркин йўлида умумхалқ курашига раҳбарлик қилувчи тарихий шахс бадиий асарда тасвирланар экан, у ўзида халқнинг маънавий дунёсини чуқур мужассамлантириши лозимлиги тарихий жанрнинг муҳим шартларидан биридир.

Шайхзода ўз драмасида мана шу шартга амал қилиди. Асарни таҳлил этган Ойбек ва F. Fулом ҳам ундаги шу фазилатни алоҳида таъкидлаб кўрсатдилар. Ёзувчи тарихий жанрга мурожаат этганда муҳим бир қийинчиликни енгиги ўтиши лозим. Бу — тарихий қаҳрамон ва тарихий ҳодисалар акс эттирилар экан, давр учун хизмат қилувчи замонавий аҳамиятини кўрсатаман деб, уларни модернизациялаштириб қўйишдан эҳтиёт бўлишнинг қийинлигидир. Зоро, уруш даврида тарихий жанрда ёзилган айрим асарларда ана шундай камчиликка ўйл қўйилган эди. Айрим тарихий асарлардаги муштарак камчиликлардан бирини академик А. Панкратова шундай деб кўрсатган эди: «Тарихий қаҳрамонларнинг образлари ва уларнинг ғоялари баъзи ҳолларда модернизациялаштирилди»<sup>35</sup>.

Айтиш лозимки, уруш даврида тарихий қаҳрамонларга, тарихий мавзуларга мурожаат этган ўзбек адиллари бу камчиликни, асосан, четлаб ўтишга интиладилар. Ойбек, Ҳ. Олимжон, Шайхзода, Уйғун, Яшин, Иззат Султон сингари адилларимиз ўзларининг тарихий жанрдаги асарларида узоқ ва яқин тарихий сиймоларга уларни модернизациялаштириш эмас, замонавий нуқтаи назардан аҳамиятли бўлган фазилатларини тасвирлаш нуқтаи назаридан ёндашдилар.

«Жалолиддин Мангуберди»да тарихий воқеалар Шайхзода томонидан бадиий ижод қонуниятлари доирасида, шу куннинг маънавий талабларига яқин томонидан ёритилади.

«Жалолиддин Мангуберди» драмасининг романтик йўналишини ҳам мана шу хусусият белгилаб беради, дейиш мумкин. Ойбек ва F. Fулом томонидан Жалолид-

<sup>34</sup> История русской советской литературы. Т. III. М., 1968. С. 62.

<sup>35</sup> Театр. Сб. статей и материалов. М., 1944. С. 8.

дин образи таҳлил қилинар ва баҳо берилар экан, «у шунқорнинг қанотлари эркдан, инсон учун ҳамма эҳтиёжлардан эрк баланд ва гўзалдир», «унинг ватан-парварлиги тожу тахт, мансаб дағдағасидан озод, асл ватан ўғлиниң фидокорлигидир», «Жалолиддин учун курашда ягона куч манбай ҳалқ оммасидир» дейилган фикрларнинг илгари сурилиши ҳам, асосан, икки фактор: биринчisi, асарнинг романтик йўналиши, иккинчи-си, асар қаҳрамон характерида намоён бўлган бу фази-латларнинг замонавий аҳамияти ва қиммати билан бел-гиланади.

Юқоридағи тақризда тарихий жанрга оид бир қатор эътиборли фикрларга ҳам дуч келамиз. Муаллифлар фикрича, тарихий жанрда ижод қилувчи санъаткор, тарихни қандай бўлса, айнан шундайлигича бериши керак эмас, яъни тарихий васиқачи даражасида қолиши керак эмас, балки унинг ички оқимида ўз ифодасини топган ҳаққоний моҳиятни бадиий гавдалантириб бермоғи лозим. Шундагина тасвирланаётган даврни унинг тарихан бўлган ҳолатидан кўра ҳам чуқурроқ очиб бериш мумкин бўлади. Хусусан, Шайхзода драмасида шунга интилади, натижада ёзувчи ватанпарвар, ўз юртини босқинчилардан асраш йўлида қаҳрамонликлар кўрсатган жасур Жалолиддин қиёфасинигина эмас, балки у мансуб бўлган салтанатнинг ичдан емирилишини таъминлаган сабабларни ҳам кўрсатишга муваффақ бўлади.

Ойбек ва F. Ғуломнинг тарихий жанр хусусидаги бу фикрлари ёзувчилар ва мунаққидлар учун мазкур жанрнинг ўзига хосликларини бадиий-илмий ўзлаштириш борасида беиз ўтмади, албатта.

Бунга мисол Р. Саҳибоев ва Т. Фаттоҳнинг «Муқанна» драмасига ёзилган тақризидир. Тақризда тарихий драманинг ўзига хос хусусиятлари ҳақида фикр юритилади. Уларнинг фикрича, тарихий драманинг моҳияти ва кучи ундаги фактларнинг тарих ҳақиқатига мос келишида ёки ҳодисаларнинг худди бўлиб ўтгандай тасвирланишидагина эмас, балки шўлар билан бир қаторда, эҳтимол бўлмаган, лекин кечиши шубҳасиз мумкин бўлган ҳодисаларнинг ҳам акс эттирилишидадир. Энг асосийси шуки, тарихий ҳодисалар тарихнинг ҳаққонийлигини кўрсатиш учунгина эмас, улар орқали бугунги тарих ҳодисаларидан чиқариладиган хуносаларнинг ҳам ҳаққонийлигини тасдиқлаш нуқтаи назаридан кўрсатилмоғи керак.

Шунга кўра, «Муқанна»даги образлар ҳам жанр табиатига адекватдир. Масалан, Гулойин узоқ мозийда

Ўрта Осиё халқларининг босқинчиларга қарши курашида озодликка интилган аёлгина эмас, то инқиlobга қадар Шарқда озодликка талпиниб келган аёлнинг бир қанча хусусиятларини мужассамлантирган образдир.

Маълумки, ватан ҳимояси ва халқ озодлиги идеяси жаҳондаги жуда кўп халқлар тақдирининг муайян тарихий тараққиёти босқичида бири иккинчисининг узвий ва ажralмас қисми сифатида зуҳур топади. Хусусан, совет халқининг Улуғ Ватан уруши давридаги тақдирида ҳам бу икки тушунча узвий бирликда бўлди. Р. Саҳибоев ва Т. Фаттоҳ фикрича, «Муқанна» драмасида Ҳ. Олимжон худди шу фикрни мозий материалини акс эттириш замарида муваффақият билан ифода этади. Чунки «Муқанна» замонида ҳам халқ озодлик идеясини ватан ҳимояси билан чамбарчас боғлаган эди<sup>36</sup>. Драма замонавийлигининг асосий қирраларидан бирини тақриз муаллифлари мана шу хусусиятда кўрадилар.

«Муқанна» драмасини ўзбек танқидчилиги билан бир қаторда, атоқли рус адаблари ва мунаққидлари ҳам юқори баҳоладилар. Улар ҳам асарнинг замонавийлигига намоён бўлувчи фазилатни алоҳида таъкидлаб кўрсатдилар. Тасвирланган воқеалар бундан минг йил аввалги ҳаётни акс эттиришидан қатъи назар «Муқанна» драмаси ниҳоятда замонавийдир,— деган эди Ю. Арбат асарга ёзган тақризида<sup>37</sup>.

«Халқ йўлбошчиси Муқанна ва ўзбек халқининг ўзига хос Жанна д’Арки бўлмиш Гулойин образи Ҳ. Олимжоннинг катта бадиий ютуғидир»<sup>38</sup>,— деган эди А. Фадеев. В. Ян эса, асарни етук миллий трагедиялардан бири сифатида баҳолайди<sup>39</sup>. Саккизинчи аср билан йигирманчи аср воқеалари ўртасида қандай боғланиш бўлиши мумкин, деб ёзади К. Зелинский ва ўзи жавоб қайтаради: «Автор тарихни замонавийлаштириш учунгина ёзмайди», у тарих ҳодисаларини замон хизматига бўйсундиришда катта маҳорат кўрсатади<sup>40</sup>.

Уруш даври ўзбек ва рус танқидчилигида юқори баҳога сазовор бўлган асарлардан бири Иzzат Султоннинг «Бургутнинг парвози» номли драмаси бўлди. «Ўз-

<sup>36</sup> Саҳибоев Р., Фаттоҳ Т. Муқанна//Қизил Ўзбекистон. 1943. 19 сентябрь.

<sup>37</sup> Қаранг: Арбат Ю. Муқанна//Литература и искусство. 1943. 13 декабря.

<sup>38</sup> А. Фадеев. Гордость узбекского народа. В кн.: За 30 лет. М., С. 324.

<sup>39</sup> Ян В. Муқанна//Правда. 1943. 27 декабря.

<sup>40</sup> Зелинский К. Искусство Узбекистана сегодня//Литература и искусство. 1943. 22 мая.

бекистон санъати ғалабага чорлайди» номли мақоласида Ҳ. Олимжон 1942 йилнинг кузигача яратилган «Энг талантли» драмалар қаторида Яшиннинг «Ўлим босқинчиларгá», Ойбекнинг «Маҳмуд Торобий»лари билан бир сафда Иззат Султоннинг «Бургутнинг парвози» номли драмасини ҳам кўрсатиб ўтади.

Ўзбек драматургияси уруш йилларида жадаллик билан ривожланганини «Ўзбек адабиёти» (1943) мақоласида Ойбек ҳам таъкидлайди ва Иззат Султон асарини баҳолашда Ҳ. Олимжон билан хамфикр эканини кўрсатади. «Яқин замонларгача ўзбек драматургиясининг ягона йирик намояндаси Яшин эди,— деб ёзади Ойбек.— Энди бу соҳа янги кучлар, янги асарлар билан бойимоқда. Иззат Султон ўзининг «Бургутнинг парвози» номли пьесаси билан драматик талантини очиқ кўрсатди».

Икки йилдан сўнг ёзилган мақолаларидан бирида Ойбек юқоридаги фикрини янада ривожлантиради. «Бунгунги вазифалар» (1945) номли мақоласида у «Бургутнинг парвози», «Ҳамза», «Муқанна», «Жалолиддин», «Алишер Навоий» сингари асарлар мисолида ўзбек адабиётида «катта, юксак драматургия даври» бошланди деган фикрни айтади.

Лекин бу холис ва одил фикр ўзбек драматургиясининг мазкур босқичида ҳамон жиiddий камчиликлар мавжуд эканини айтишга монелик қилмайди. Юқоридаги мақоласида Ойбек ёзади: «...Ўзбек драматургияси ибтидоий натурализм ва шовқинли, тумтароқли ташқи ҳаяжондор, юзаки романтизм касалидан соғайиши, соғлом, чуқур, тўлақонли, кучли реализм мактабини эгаллашини орзу қилар эдик. Драматургияда ҳам бошқа жанрлардаги сингари бутун диққатни замонамизнинг қаҳрамони, ажойиб совет одами ва давримизнинг катта проблемаларига жалб этмоқ зарур»<sup>41</sup>.

Ойбек орзу сифатида айтаётган бу фикрини талаб сифатида қўйишга ҳақли эди, албатта. Чунки уруш даври ўзбек драматургияси миқдор жиҳатидан анчагина бойиган бўлса-да, замонавий мавзудаги миқёс жиҳатидан анчагина камчиликка эга эди. Замонавий мавзудаги асарларнинг айримлари, хусусан «Она» (Миртемир, В. Смирнов), «Синов кунларида» (З. Фатхуллин), «Даврон ота» (Яшин, С. Абдулла) Ойбек айтгандаги каби камчиликлардан ҳоли эмас эди.

Бу йилларда асарларимизнинг аксарияти рус тилига таржима қилиниб борди. Танқидчилик ҳам уларга фаол

<sup>41</sup> Қизил Ўзбекистон. 1945. 26 август.

муносабат билдириди. Айтиш мумкинки, бу даврда танқидчилик ҳеч қайси бир босқичда кўрилмаган даражадаги ҳозиржавоблик фазилатини намойиш қилди.

Масалан, бу даврда «Бургутнинг парвози» драмасидан айрим парчаларгина рус тилига таржима қилинган бўлишига қарамай, асар рус танқидчилигининг эътиборини жалб қилди ва юксак баҳосига сазовор бўлди. Хусусан, 1943 йилнинг қишида Москвада бўлиб ўтган ўзбек адабиёти ва санъати декадасида «Бургутнинг парвози» драмаси фақат ўзбек адабиётидагина эмас, гражданлар уруши мавзунинг худди шу масаласи акс эттирилган умумитифоқ драматургиясидаги муваффақиятли асар эканлиги эътироф этилди. Декада муносабати билан босилиб чиқсан мақоласида К. Зелинский шундай ёзади: «Мен Иззат Султоннинг М. В. Фрунзега бағищланган «Бургутнинг парвози» пьесасидан айрим парчаларни ўқиганман. Уни бошқа драматургларнинг худди шу мавзуга оид ўқиганим асарларидан чандон юқори савияда деб биламан»<sup>42</sup>.

Узоқ йиллар давомида ўзбек адаблари билан ҳамкорлик қилган ва ўзбек адабиётини чуқур билган А. Дейч «Бургутнинг парвози» саҳналаштирилиши муносабати билан ёзган тақризида асар қаҳрамонлари характеристери эволюциясидаги тарихий ва бадиий мантиққа юқори баҳо беради. Рус ва ўзбек халқлари дўстлигининг реалистик ифодаси, инқилобни амалга ошириш ва мустаҳкамлашдаги ҳамжиҳатликнинг теран ва реалистик акс эттирилиши уруши йилларида бу асарнинг замонавий қиммати ва аҳамиятини янада оширади<sup>43</sup>, дейди у.

«Бургутнинг парвози»ни баҳолашда К. Зелинский ҳам А. Дейчга яқин позицияда туради. У драманинг ғоявий мундарижасидаги кўлам ва салмоққа юқори баҳо беради. Қаҳрамон «Рус саркардаси (М. В. Фрунзе — Б. Н). Урта Осиёнинг инқилобий жангоҳларида она бургут ўз полапонларини парвозга шайлаган янглиғ ўзбек биродарларини нурли уфқларга олиб чиқади»<sup>44</sup>, деб ёзади у.

Фақат уруш йилларигина эмас, умуман ўзбек совет адабиёти тарихининг гултож асарларидан бири — шу даврда яратилган «Навоий» романининг айрим парчала-

<sup>42</sup> Литература и искусство. 1943. 4 декабря.

<sup>43</sup> Правда Востока. 1942. 26 ноября.

<sup>44</sup> Зелинский К. Искусство Узбекистана сегодня. Письмо первое//Литература и искусство. 1943. 24 апреля.

ри матбуотда 1941 йилнинг июнь ойидан кўрина бошлади. Асар тўла ҳолда 1944 йилда босилиб чиқди.

Роман китоб ҳолида эълон қилинганидан сўнг кўп ўтмай, 1945 йилнинг февралида Ўзбекистон Ёзувчилари союзида адабий жамоатчилик ва мутахассислар томонидан атрофлича муҳокама қилинди. Асар ҳақида доклад қилган Е. Э. Бертельс унга баланд баҳо берди. «Романинг энг катта муваффақияти шундаки,— деган эди у,— Навоий образи ўзининг бутун тўлалиги билан, ортиқча бўёқларсиз тасвирланган»<sup>45</sup>. Бу — Навоий даври, унинг ижтимоий-иқтисодий, сиёсий-маданий ҳаётининг чуқур билимдони, шоир сиймоси ва ижодининг ҳассос тадқиқотчиси томонидан берилган баҳо эди. Е. Э. Бертельс диспутда ўз фикрини давом эттириб, ундаги тарихий ҳақиқат билан бадиий қимматнинг мустаҳкам гармониясини ҳам алоҳида таъкидлаб ўтади.

Асар марказида Навоий шахси ва сиймоси турса ҳам, у ўз давридан ажralган ҳолда тасвирланиши мумкин эмас эди, албатта. Асарнинг муваффақиятини белгиловчи муҳим масалалардан бири Навоийнинг ўз даври фарзанди эканлигини нечоғлик тўғри акс эттириб бера олишга боғлиқ эди. Бунинг учун эса тарихий давр ва шароитни марксистик позициядан идрок эта билмоқ ва бу масалани асарда бадиий жиҳатдан ҳаққоний тасвирлаб бермоқ лозим эди.

Е. Э. Бертельс шу масалаларга ҳам алоҳида эътибор беради ва «романда Навоий даври тўлақонли тасвирланган, Навоий сиймоси реалистик акс эттирилган»<sup>46</sup> деган хulosага келади.

Романдаги муваффақиятлар замирида Ойбекнинг санъаткор сифатидаги маҳорати билан бир қаторда Навоий даври, ҳаёти, ижоди, дунёқараши хусусида олиб борган чуқур тадқиқотчилик истеъоди ҳам ётади. Ойбек «Навоий» романини ёзишга киришгунча бу улуғ сиймо ҳаёти, ижоди ва дунёқараши ҳақида бир қатор илмий тадқиқотлар ёзган эди. Унинг «Навоий ҳақида» номли катта ҳажмдаги илмий асари, «Навоийнинг таржимаи ҳоли», «Хамса»нинг асосий образлари», «Навоийнинг дунёқараши масаласига доир», «Навоийнинг «Мажолисун-нафоис» асари ҳақида» сингари тадқиқот ва мақолалари ҳамда «Навоий» поэмасининг ҳар бири мустақил илмий ва бадиий асар бўлиши би-

<sup>45</sup> Қизил Ўзбекистон. 1945. 11 февраль.

<sup>46</sup> Правда Востока. 1945. 18 февраля.

лан бир қаторда, бўлажак «Навоий» романни учун жиддий тайёргарлик босқичи бўлиб хизмат қилди.

Юқоридагиларнинг барчаси «Навоий» романини ёзишдан аввал адаб тарихий ҳужжатларни ниҳоятда синчковлик билан ўрганиб чиққанини ва Е. Э. Бертельс айтганидек, асарни яратишда, асосан, ҳужжатларга суюнганини кўрсатади.

1945 йилнинг февралида бўлиб ўтган диспутда Навоийнинг шахсий муҳаббати масаласи асарда етарлича ифодасини тоғмаган, деган фикрлар ҳам бўлган эди. Бу масалага муносабат билдирган Е. Э. Бертельс Ойбек танлаган йўлни тўғрироқ деб ҳисоблаганини бундай ифода этди: «Ойбек ҳар хил афсоналарга асосланмай, ҳақиқий ҳаёт ва тарихни кўрсатишни» ўз олдига мақсад қилиб қўйган<sup>47</sup>.

«Навоий» романига ўзбек танқидчилиги ўз вақтида катта баҳо берди. Мақсад Шайхзода романга бағишиланган «Тирик Алишер» номли тақризида уни ўзбек совет прозасининг шу давргача яратилган энг муваффақиятли асарлардан бири сифатида баҳолади.

Диспутда сўзга чиққан Иззат Султон фикрлари Е. Э. Бертельс, Шайхзода фикрларини янада тўлдирди ва ривожлантиради. И. Султон романнинг шу вақтгача яратилган асарлар ичидагина эмас, умуман ўзбек халқи адабиёти тарихида алоҳида ўрин ишғол қиласхагини таъкидлайди. «Бу асар,— деган эди олим,— ўзбек халқи тарихида ўлмайдиган роман бўлиши билан бир қаторда, йирик сиёсий ҳужжат ҳамдир»<sup>48</sup>. Муаллифнинг бу ўринда романни сиёсий ҳужжат сифатида эътироф этиши эътиборни жалб қиласи. Гитлернинг «идеологик машинаси» СССРдаги турли миллатларни, хусусан Ўрта Осиё халқларини ирқий камситиб турган бир пайтда, уларни ёввойи ва дағал, на ўтмиш ва на келажаги бор халқлар деб айюҳаннос солиб турган бир пайтда «Навоий» романининг майдонга келиши ва ўзбек халқи узоқ ўтмишдаёқ Навоий каби буюк мутафаккирларга эга эканлигининг кўрсатилиши, ҳозир эса бу халқ ўз ўтмишига муҳаббат билан қараётгани, революция туфайли, социализм туфайли ўтмишда забун бўлган халқ ичидан ўз ота-боболари ҳаётини шу қадар муваффақиятли акс эттириб бера олувчи Ойбек каби улкан ёзувчилар этишиб чиққанлиги ва буларнинг барчасини конкрет мисолда

<sup>47</sup> Қизил Ўзбекистон. 1945. 11 февраль.

<sup>48</sup> Ўша жойда.

кўрсатиб турган «Навоий» романни чиндан ҳам, Иzzат Султон айтганидек, «йирик сиёсий ҳужжат» эди ва бу сиёсий ҳужжат узоқ Ўзбекистонда туриб Гитлер идеологиясига туширилган бир тарсаки эди.

«Навоий» романни пайдо бўлиши биланоқ бир овоздан ижобий баҳолангани йўқ. Романнинг биринчи муҳокамасидаёқ у ҳақда, юқоридагидек, ижобий фикрлар билан бир қаторда, турли савиядаги танқидий фикрлар ҳам айтилди. Масалан, романда Навоий образи эволюцияда, ўсишда кўрсатилмайди, «болалигидан то кексалигигача, бутун умр давомида» тасвирланмайди, «Навоий камчиликсиз, заиф томонсиз чизиб берилган»<sup>49</sup> каби фикрлар ҳам илгари сурилди. 40-йилларнинг ўрталарида айтилган бу сингари янгилиш қарашлар адабиётшунослигимизда 50-йилларнинг ўрталаригача ҳукм суриб келди. Бироқ адабиётшунослик ва танқидчилигимиз марксистик эстетикадаги тарихий ҳақиқат ва бадиий ҳақиқат ҳамда уларнинг ўзаро муносабати масалаларини чуқурроқ ўзлаштира боришлари натижасида тараққиётнинг сўнгги босқичларида, хусусан, 50-йилларнинг охири ва 60-йилларга келиб, танқидчиликдаги бу камчиликларни бартараф этдилар. Бу борада М. Қўшжонов тадқиқотлари муҳим аҳамиятга эга бўлди.

Умуман эса, «Навоий» романни у ҳақдаги 1945 йили бўлиб ўтган диспутга раислик қилувчи Комил Яшиннинг холосавий фикри билан айтганда, «ССРР халқлари адабиёти хазинасига қўшилган дурдона» бўлиб қолди.

«Тарихий роман, энг аввало қаҳрамонликни ўргатувчи муаллим бўлиши керак»<sup>50</sup> деб ёзди В. Ян. В. Яннинг юқоридаги фикрларида «Уруш йилларида ўтмишга мурожаат этган адабларнинг эстетик программаси ўз ифодасини топган»<sup>51</sup>, дейилади «Кўп миллатли совет адабиёти тарихи» номли тадқиқотда. Ойбек ўзининг «Навоий» романни билан уруш даври совет адабларнинг бу йўналишдаги эстетик программасини ўзига хос равишда ҳал этади. Алишер Навоийнинг қаҳрамонлиги унинг зулм ҳукмрон замонда адолат учун, маърифат учун жонбозлик қилишида кўринади.

<sup>49</sup> Уша жойда.

<sup>50</sup> Ян В. Проблема исторического романа//Литература и искусство. 1943. 15 мая.

<sup>51</sup> История советской многонациональной литературы. Т. III. М., 1970. С. 101.

Юқоридаги тадқиқотда яна шундай фикрга дуч келамиз: «...Уруш йилларида кўп миллатли совет драматургияси бадиӣ проза публицистика ва поэзияга нисбатан суст ривожланди»<sup>52</sup>. Бу масалада ҳам ўзбек адабиёти уруш даврида ўзига хос ижодий юзини на-мойиш қила олди, яъни бу давр ўзбек адабиётида шеърият, драматургия, публицистика прозага нисбатан фаолроқ ривожланди. «Сен етим эмассан», «Мен яҳудий», «Роксананинг кўз ёшлари», «Капитан Гастелло», «Қўлингга қурол ол!» сингари асарлар мисолида шеърият; «Жалолиддин», «Муқанна», «Маҳмуд Торо-бий», «Бургутнинг парвози», «Алишер Навоий», «Ўзбекистон қиличи» мисолида драматургия; Ҳ. Олимжон-нинг «Мен ўзбек халқи номидан гапираман», «Дўстли-гимиз ҳақида», А. Қаҳҳорнинг «Немисларнинг офати», «Бобоқул Афзалов», Уйғуннинг «Майор Малла Абдуллаев», Ойбекнинг «Халқ — қаҳрамон»и, Ф. Ғуломнинг «Макайлик дўст», С. Аҳмаднинг «Фарҳод тоғининг этакларида» асарлари мисолида публицистикамиз бу даврга келиб бир босқич юқорига кўтарилди.

«Навоий» романи, «Олтин юлдуз» повести, «Асрор бобо», «Кампирлар сим қоқди», «Хотинлар» сингари прозамизнинг ажойиб намуналари яратилган бўлса-да, уруш даврида наср бошқа жанрларга нисбатан бир-мунча сустроқ ривожланди. Бироқ, бундан қатъи на-зар, уруш даври ўзбек адабиёти деярли барча жанр-ларда ажойиб асарлар ҳисобига бойиди ва ўз тарихий тараққиётининг янги босқичи бўлиб қолди. Бу ижобий ҳодисада адабий танқид ҳам катта роль ўйнади.

Улуғ Ватан уруши даври Ўзбекистон адабий тан-қидчилиги ҳақида гап борар экан, унинг давр билан белгиланувчи яна бир муҳим фазилатини таъкидлаб ўтмоқ лозим. Бу характер мазкур йилларда адабий тан-қиднинг ёзма шакли билан параллел равишда оғзаки шаклининг гуркираб ўсишида намоён бўлади. Бу даврда бир жиҳатдан газета ва журналларни чиқаришдаги, ил-мий тўплам ва монографияларни напр этишдаги муайян чекланганлик адабий танқиднинг оғзаки шаклига му- рожаат этишни тақозо қилди. Иккинчидан, давр адабий танқиддан ҳам ниҳоятда оперативликни, ҳозир-жавоблик ва жадалликни талаб қилди. Танқиднинг оғзаки шакли бу талабга лаббай деб жавоб берувчи

<sup>52</sup> Уша асар. 109-бет.

энг қулай йўл эди. «Навоий» романни юзасидан бўлган диспут (мунозара), жонли фикр олишувлар адабиётнинг ва театрнинг деярли ҳар бир муҳим асари муносабати билан бўлиб турар эди.

Бу йилларда деярли ҳар ҳафта, ҳар ойда Тошкентда ва республиканинг бошқа шаҳарларида, завод-фабрикаларда, колхоз далаларида ёзувчиларнинг халқ билан учрашувлари ҳам бўлиб турди. Бу учрашувларда шоирларнинг ўзлари ҳамкасб дўстларининг мунаққидлари сифатида минбарга чиқдилар. Халқ вакиллари эса ҳозиргина минбардан эшитган асарларининг баҳоловчилари сифатида шу ернинг ўзидаёқ тўлқинланиб гапирдилар. Шонр, танқидчи ва китобхон бир вақтнинг ўзида бир аудиторияда туриб юзма-юз учрашиш ва муайян асарларнинг баҳосини бериш имкониятига эга бўлди ва бундай имкониятлардан кенг фойдаланилди. Танқиднинг оғзаки шаклидан фойдаланиш мамлакат ичкиарисидагина эмас, фронтда, жанг майдонларида, скоп ва блиндажларда ҳам бўлиб ўтди. Масалан, фронтга совфа элтган делегация составида бўлган Ҳ. Олимжон ва Ойбек жангчиларга ўз шеърларини ўқиб бериш баробарида, бошқа қаламкаш дўстларининг қаҳрамон совет жангчиси ҳақида ёзилган асарларини кенг тарғиб қилдилар. Жангчилар учрашувларда бундай асарларга ўзларининг фаол муносабатларини намойиш этдилар.

Оғзаки адабий танқид муваффақиятли бадиий асарларнинг халқ оммаси ичига жадаллик билан кириб боришида ва уларининг ватанпарварлик туйғуларини ўстиришда, фашист босқинчиларига бўлган нафратни кучайтиришда ва меҳнат ғалабаларига илҳомлантиришда катта аҳамиятга эга бўлди.

\* \* \*

Уруш даврида фақат замонавий адабий жараёнги-на эмас, классик адабиёт ва фольклор намуналари тадқиқ этилган ишларда ҳам замонавийлик масаласи, шу куннинг талаби масаласи, яъни асарлардаги халқлар дўстлиги, ватанпарварлик, қаҳрамонлик мотивларининг акс эттирилиши масалаларини ўрганишга катта эътибор билан қаради.

Атоқли фольклоршунос олим Ҳоди Зарифовнинг «Ўзбек фольклорида қаҳрамонлик ва ватанпарварлик» мақоласи бунга мисолдир.

Ҳ. Зарифов Эргаш Жуманбулбул ўғлидан ёзиб олинган «Ойсулув» достонини таҳлил қилас әкан, ундағи ватанпарварлик ва қаҳрамонлик ғояларига алоҳида урғу беради. Ойсулув фақат чексиз гўзаллиги билангина эмас, дейди олим, юксак ватанпарварлиги, ватан босқинчиларига бўлган чексиз нафрати ва уларни ватан тупроғидан улоқтириб ташлашдаги қаҳрамонлиги туфайли халқ меҳрига сазовор бўлган қаҳрамондир. Унинг фарзанди Кунботирни ҳам халқ шу фазилатлари учун ардоқлаб келади.

Ҳ. Зарифов ёзади: «Юксак ватанпарварлик туйғулари, халққа муҳаббат, дўстлик, қардошлиқ, жасорат ўзбек халқининг эпик достонлари, эртаги ва маталларида доимо марказий ўрин ишғол қилиб келган»<sup>53</sup>. Муаллиф фикрича, қаҳрамонлик ва ватанпарварликкина эмас, халқлар дўстлиги масаласи ҳам Гўрӯғли циклидаги деярли барча достонларининг асосий мотивини ташкил этади. Масалан, Гўрӯғлиниң ўзи — туркман, фарзанд қилиб олганлари Авазхон — гуржи, Ҳасанхон — форс, Хидирали Элбеги — қорақалпоқ, Тўлак ботир — тоҷик, Юсуф маҳрам — қозоқ ва бошқалар. Умуман, унинг қирқ йигитининг деярли барчаси турли миллатга мансуб паҳлавонлардир.

Ҳоди Зариф юқоридаги мақоласида халқ достонларидаги бу фазилатларга эътибор берар әкан, халқимиз дўстлик ва қардошлиқдек муқаддас заруратни фақат шу уруш кунларидагина эмас, балки қадим даврларданоқ қадрлаб, ўлмас обидаларда муҳрлаб келганини айтади. Бу асарлар ҳозирги кунимиз билан ҳам жондош эканлигини, бу кунларда эса янада чуқур замонавий аҳамият касб этишларини таъкидлайди.

Ҳ. Зарифов халқ достонларидағи қаҳрамонлар системасини ўрганиб, ундағи ҳозирги давр учун ҳам муҳим ва актуал бўлган масалани таъкидлаб ўтади. Ватан ҳимояси эркаклар билан бир қаторда аёлларнинг ҳам инсоний бурчи бўлганлиги деярли барча достонларда ўз ифодасини топган асосий йўналишлардан биридир. Бу масала, хусусан, «Чамбил қамали» достонининг асосий мотивини ташкил этади. Гўрӯғли йўқлигига шаҳарни босқинчилардан ҳимоя қилишини ташкил этган, барча аёлларни эркакча кийинтириб, жанг майдонига олиб тушган Гўрӯғлиниң аёли Юнус

<sup>53</sup> Зарифов Ҳ. Героизм и патриотизм в узбекском фольклоре / Алманах «Дар». Ташкент. 1944. С. 160.

пари том маънодаги халқ қаҳрамони даражасида тасвирланади.

Ҳ. Зарифовнинг бу мақоласи типидаги тадқиқотлар 20—30-йиллар ёхуд урушдан сўнгги даврда кўпроқ тарихий ва адабий-бадиий қимматга эга бўлган фольклоршунослик ишлари сифатида баҳоланиши тўғри бўлса, уруш йилларида эса улар (шартли маънода) адабий танқид намунаси сифатида баҳоланиши тўғрироқдир. Агар адабий танқид моҳиятини, унинг замонавий адабий жараённи таҳлил этишдаги фазилатигина эмас, айни вақтда, унда шу даврдаги замонавий адабий жараён ва шу даврдаги ижтимоий ҳаёт учун зарур бўлган масалаларнинг кўтарилиб чиқиши ва, бинобарини, уларга фаол таъсир этиши жиҳатидан ҳам баҳолаш лозим ва мумкин эканини назарда тутсак, юқоридаги фикр ўзини оқлай билади.

Демак, бу даврда классик адабиёт ва фольклор асарлари тадқиқ этилган аксар ишлар адабиётшунослик ва фольклоршуносликкина эмас, айни вақтда, адабий танқидга ҳам мансуб эканлиги уруш даври танқидчилигининг ўзига хос хусусиятларидан биридир.

Ҳ. Зарифов ўзбек достонларида адолат ва ҳақиқат учун кураш ва бу курашнинг пировардида ғолиб келиши душманни таслим қилибгина қолмай, уни дўстга ҳам айлантириши мумкин деган ғоя мухим ўрин тутишини, кўрсатиб ўтади. Масалан, «Алномиш» достонидаги Қоражон ҳақиқат ва адолат тантанаси, дўстлик ва қардошликтининг ғалабаси туфайли душмандан Алномишнинг қадрдан дўстига айланади. Умуман, «Алномиш» достонида, дейди Ҳ. Зарифов, дўстлик ва қардошликтининг ғояси етакчилик қиласи. Бу мотив ўзбек Алномиш, қалмиқ Қоражон ва чинлик Кайқубодларни дўстлик ва биродарлик асосида бирлашиб, душманга қарши жанг қилишлари ва ғолиб чиқишиларида ўзининг ёрқин ифодасини топган.

Ҳ. Зарифов таъкидлаётган бу масалалар уруш даврида чуқур замонавий аҳамиятга эга эди.

Қаҳрамонлик давр кун тартибидаги асосий масала экан, уруш йилларидағи ўзбек фольклоршунослиги ҳам давр билан ҳамқадам бўлишга интилди. Фольклор асарларини умуман эмас, уларда қаҳрамонлик мотивларининг акс этиши нуқтai назаридан ўрганишга ҳаракат қилди. Ана шундай фундаментал тадқиқотлардан бири Жирмунский ва Ҳ. Зарифовнинг ҳамкорлиги

натижасида майдонга келган «Ўзбек халқ қаҳрамонлик эпоси» бўлди. Бу асар урушдан кейин босилиб чиқди<sup>54</sup>.

Уруш даврида фольклор асарларини ўрганган адабиётшунослик бир тарафдан соғ филологик мақсадларни назарда тутди. Яъни, халқ оғзаки ижодининг машҳур намуналари тадқиқ этилиб, фольклоршунослик фанига муҳим ҳисса қўшилди. Иккинчи тарафдан эса, фольклор намуналарини ўрганиш иши бу йилларда давр мақсадларига бўйсундирилди, даврнинг асосий руҳига ўйғунлаштирилди. Яъни, фольклор асарларидағи қаҳрамонларнинг юксак ватанпарварлик фазилатларини, юрт босқинчилариға қарши омонсиз жанглардаги шижаот ва ботирликларини кўрсатиш, таҳлил қилиш, очиб бериш орқали жангчиларимизни фашизмга қарши курашга янада илҳомлантирилди, халқимизни она-Ватанини кўз қорачигидек асрашда достон қаҳрамонларидан ўрнак олишга чорлади. Учинчидан эса, фольклор ёзувчи ва шоирларимизга бу жанговар йилларда Ватан ўғлонларининг қаҳрамон қиёфасини яратишида, асарлардаги халқчил ва гуманистик фазилатларни теранлаштиришда, халқ оғзаки ижодининг илфор анъаналарини чуқурроқ ўзлаштиришда яқиндан кўмакка келди.

Фольклор намуналарини ўрганган ўзбек адабиётшунослиги ва танқидчилиги мана шу уч фазилатни на мойиш қилиш орқали бу даврда замон билан ҳамқадам боришга интилди, замонавийлик учун кураш олиб борди.

Бу йиллардаги ана шундай ишлардан бири Мақсуд Шайхзоданинг Фозил Йўлдош ўғлидан ёзиб олинган «Ширин ва Шакар» достонига битган сўз боши — мақоласидир.

Мақолада Шайхзода ҳам «Ширин билан Шакар» достонининг замонавий аҳамиятини очишга алоҳида эътибор беради. «Бизнинг социалистик революциямиз фақат феодал қўёнқиларнигина эмас, умуман ҳар хил эксплуатация қўрғонларини ер билан яксон қилиб, меҳнаткашларга ҳур ва кенг бир ватан яратди. Ҳақиқий ватанпарварлик энди ўзининг лойиқ ўрнини ва гуллаш замонини топди. Ана шу чинакам ватанини ҳар хил тажовузлардан сақлашга қасам ичган ўзбек халқи уни ўзининг яратган афсонавий достон қаҳрамонлари каби

<sup>54</sup> Пўлкан шоир ҳақида. Тошкент. 1976. 98-бет. Ҳоди Зарифовнинг фольклоршунос олим Тўра Мирзаевга берган маълумотига кўра, «Ўзбек халқ қаҳрамонлик эпоси» номли тадқиқот аслида 1943 йили ёзиб тугатилган.

шерона ва фидокорона курашиб яшнатажак»<sup>55</sup>, дейди Шайхзода.

Бироқ бу даврда фольклор масалаларига донр жиддий тадқиқот ва мақолалар билан бир қаторда, илмий жиҳатдан янглиш қарашлар ҳам учраб қолади. Чунончи, Эргаш Жуманбулбул ўғлидан ёзиб олинган «Далли» достонига У. Исмоилов битган сўз бошида қўйидаги фикрларга дуч келамиз. Достоннинг «...ижобий ва салбий типлари яққол, бутун воқеалар, образлар тиник шаронтдаги типик характерлардан иборатдир»<sup>56</sup>.

Бу ўринда, Арзум вилоятининг подшоҳи Кубодшоҳнинг гўзал қизи Даллини Гўрўғлиниң асранди ўғли Авазхон олиб қочиб келиши, сўнг ўз юртини Кубодшоҳдан ҳимоя қилиши, ярадор бўлганда унинг кийимини кийиб, Даллиниң жангга кириши воқеалари тасвирланган фольклор асарига етук реалистик ёзма адабиёт учун хос бўлган хусусиятлар тиркалмоқдаки, бу фикрларга қўшилиш қийин.

### УЗБЕКИСТОНДАГИ РУС ТАНҚИДЧИЛИГИ

Уруш йиллари республикамизда ўзбек танқидчилиги билан ёнма-ён рус танқидчилиги ҳам ривожланди ва тараққий этди. Бу танқидчиликни, умуман урушгача бўлган давр республикамиздаги рус танқидчилигидан фарқли ўлароқ, Иттифоқ миқёсидаги ва Иттифоқ аҳамиятига эга бўлган рус танқидчилигининг Ўзбекистондаги тараққиёти сифатида қараш тўғри бўлади. Чунки бу хусусият бир қатор объектив ва субъектив факторлар билан изоҳланади.

Уруш йиллари Ўзбекистонда А. Толстой, Н. Погодин, Б. Лавренев, К. Чуковский, Якуб Колас, И. Уткин, В. Луговской сингари атоқли совет шоирлари, ёзувчи ва драматурглари меҳнат қилдилар.

А. Толстой, К. Чуковский, И. Лежнев, Л. Пеньковский, А. Тихоновлар эса Республика Ёзувчилар союзи Президиуми составига киритилдилар.

Е. Э. Бертельс, Б. В. Шишмарёв, В. М. Жирмунский, Е. Э. Якубовский, Н. Л. Бродский, Н. К. Пиксанов, Д. Д. Благой, Л. И. Климович, Б. С. Мейлах, А. М. Эфрос, К. И. Зелинский, К. Л. Эйхенгольц, А. М. Векслер, В. Я. Кирпотин, Б. В. Михайловский, Е. Б. Тагор ва

<sup>55</sup> Фозил Пўлдош ўғли. Ширин билан Шакар. Тошкент. 1941. 18-бет. Шайхзода сўз бошиси.

<sup>56</sup> Эргаш Жуманбулбул ўғли. Далли. Тошкент. 1942. IV бет.

бошқалардан иборат атоқли олимлар уруш йиллари Узбекистонда яшадилар ва ижод қилдилар. Бу фактор Ўрта Осиё Давлат университетида филология факультетининг ва кўп ўтмай, шарқ факультетининг очилишига туртки берди. Рус олимлари республикамизда малакали адабиётшунос ва танқидчиларни тарбиялаш ишнга, адабий жараён ва конкрет санъаткорлар ижодини ўрганишга, Иттифоқ миқёсида уларни кенг оммалаштиришга катта ҳисса қўшидилар, ўзбек ҳамкасб дўстлари билан бирга муҳим ишларни амалга оширидилар. Социалистик система ўзига хослиги ва буюклигининг адабий-маданий ҳаётда ўз ифодасини топган бу ҳамкорлик ва унинг натижаларини Н. Пиксанов «катта тарихий-маданий аҳамиятга эга»<sup>57</sup> бўлган ҳодиса сифатида баҳолаганда ҳақ эди.

Бу давр Тошкент адабий муҳитидаги танқидчилик фақат у ёки бу санъаткор ижоди ҳақида мақола ёзиш, кечалар уюштириш билангина кифояланиб қолмади. Катта масштабдаги адабиётшунослик ишлари, муҳим назарий ва амалий аҳамиятга молик кенгашлар ҳам назардан четда қолгани йўқ. Хусусан, уруш йиллари Тошкентда Горький номидаги Жаҳон адабиёти институти, Ўрта Осиё Давлат университети ва Узбекистон Ёзувчилар союзи ҳамкорлигига уюштирилган «Рус-инглиз ва рус-америка адабий алоқалари» масаласига бағишлиланган катта кенгаш\* (бу кенгашда В. М. Жирмунский, К. Л. Бродский, Н. К. Пиксанов, К. И. Чуковский сингари атоқли олимларнинг докладлари тингланди) Пушкин, Лермонтов ижодининг айrim масалалари, Ренессанс даври ва адабиёт, Шарқ Ренессанси проблемаларига бағишлиланган (бу кенгашларда Д. Д. Благой, Н. К. Пиксанов, К. Л. Бродский, В. В. Михайловский, В. П. Чепелев ва бошқалар доклад қилдилар) илмий сессиялар бўлиб ўтди. Доклад текстлари бу олимларнинг кейинги йилларда шу масалаларга бағишлиланган тадқиқотларнига таркибий қисм бўлиб қўшилди.

Бу давр республикамиздаги рус, қардош халқлар ва Узбекистон адаблари, мунаққидларининг ҳамкорлиги ўзбек бадиий адабиёти, таржима санъати ва танқидчилигининг шу йиллар ва сўнгги босқичлар тараққиётида муҳим роль ўйнади.

<sup>57</sup> Пиксанов Н. Уруш йилларида турли миллат ёзувчилари Тошкентда. Шарқ юлдузи. 1946. 4—5-сонлар. 143-бет.

\* Уша жойда.

Уруш даври матбуоти саҳифалари уруш даври Ўзбекистон Ёзувчилари союзининг катта ишларни амалга ошириш билан бир қаторда, амалга оширишга мўлжаллангай улкан режалар билан ҳам яшаганидан шаҳодат беради.

Масалан, 1942 йилнинг 29 апрелида Ўзбекистон Ёзувчилар союзида театр ва адабий танқидчиларнинг йигилиши бўлиб ўтди. «Правда Востока» газетасининг 7 май сонидаги хабар ушбу мажлис ярим йил ичida қуйидаги тадқиқотларни яратишни мўлжаллагани ҳақида маълумот беради: а) Ибн Сино, Навоий, Машраб ҳақида монографиялар; б) Ҳамза ҳақида биографик очерк; в) Фурқат ҳақида тарихий-биографик очерк; г) ўзбек-рус адабий алоқалари ҳақида очерк. Буларни ёзишда ўзбек олимлари билан бир қаторда Бродский, Дейч, Жирмунский, Благой, Пиксанов, Эйхенгольц сингари атоқли рус олимларини ҳам жалб этиш назарда тутилади. Ўзбек театри тарихини ёзишга эса Эфрос, Эйхенгольц, Волькенштейн, Модель, Живов, Янковский-ларнинг иштирок этажаклари ҳақида хабар берилади.

Тўғри, ўша даврнинг оғир шароитлари бу режаларнинг тўлиқ амалга ошувига имкон бермади. Давр адабиётшунослик характеристидаги бундай фундаментал тадқиқотлардан кўра кўпроқ шу куннинг ҳаракатдаги ҳаётига таъсир кўрсатажак замонавий адабий жараён билан шуғулланишни талаб қилди.

Бу йилларда Ўзбекистонда яшаган рус адабиётшунослари ва танқидчилари ўз эътиборларини кўпроқ ҳаракатдаги адабий жараён ҳақида мақолалар ёзишга, ўзбек шоирларининг шу йилларда рус тилида чиқсан тўпламларини муфассал сўз бошилар билан таъмин этишга ва уларнинг ютуқларини Иттироқ миқёсидаги китобхонлар ичida оммалаштиришга қаратдилар. Иттироқ ва республика миқёсидаги матбуот саҳифаларида эълон қилинган К. Зелинский, Л. Бать, М. Живов, А. Дейч, К. Чуковский, В. Кирпотин, В. Жирмунский, Ю. Арбат, С. Липкин, Л. Клинович, П. Скосирев ва бошқаларнинг мақолалари бунга мисол бўла олади. Булардан ташқари, Зулфиянинг «Верность» тўпламига Луговской, Шайхзоданинг «Сааз» тўпламига Эфрос, Ҳ. Олимжоннинг «Зайнаб ва Омон» поэмасига К. Зелинский, «Стихи о любимой земле» тўпламига А. Н. Тихонов, «Избранное»сига Жирмунский, F. Гуломнинг «Иду с Востока» тўпламига К. Зелинский ёзган сўз бошилар, биринчидан, Иттироқ ўқувчиси назарига бу ижодкорлар бўй-бастини кўрсатишда муҳим аҳамиятга

эга бўлди. Иккинчидан, адабий танқид ҳам худди бадиий адабиёт сингари бу иши билан ўзининг интернационал мөдиятини намойиш қилди. Учинчидан, ўзбек шеъриятининг катта майдонга чиқишида, умумсовет адабиётида ўзининг ҳақли ва мустаҳкам ўрнини эгаллай бошлишида, кўп миллатли совет адабиётининг илғор оқимларидан бирига айланганини кўрсатишда жиддий аҳамият касб этди.

1942 йил апрелида Ўзбекистон Ёзувчилар союзида бўлиб ўтган кенгаш томонидан мўлжалланган ишларнинг аксари давр шароитига кўра бажарилмай қолишига қарамай, режалар бесамар кетмади. Улар кўп ўтмай, тинч қурилиш йилларида бажарила бошлаган ва тугатилган ишларга асос бўлди. Хусусан, Н. Пиксановнинг «Горький ва миллий адабиётлар» (1946), В. Жирмунский ва Ҳ. Зарифовнинг «Ўзбек халқ қаҳрамонлик эпоси» (1947) номли фундаментал тадқиқотлари монография сифатида босилиб чиқди.

М. Горький номидаги Жаҳон адабиёти институтининг Тошкентга эвакуация қилинган олимлари ташаббуси билан 1942 йилда «Ўзбек совет адабиёти тарихидан очерклар» яратиш устида иш бошланди. Ўз вақтида тугалланмай қолган бу иш муаллифлари қаторида тахминан йигирма йилдан сўнг шу йўналишида яратилган фундаментал тадқиқот муаллифларидан И. О. Султонов ва Ҳ. И. Ёқубов ҳам бор эдилар.

Уруш даврига келиб айрим ўзбек шоирлари салобат жиҳатидан рус ва бошқа қардош халқларнинг атоқли шоирлари билан бир сафда тура олиш даражасига кўтарилиб етди. Бу ҳодиса ўша вақтдаёқ ёзувчи ва танқидчилар томонидан эътироф этилди.

И. Уткин ёзади: «Садоқат мавзуи К. Симонов, А. Сурков, Е. Долматовский сингари ёзувчилар ижодида муваффақият билан тасвиirlанмоқда. Миллий ўз ўзини англамоқ масаласи Л. Первомайский ижодида ижобий ҳал этилмоқда. Тишларини палидона ғижирлатиб турган фашизм қаршисидаги миллий қон-қардошлик мавзуи ўзбек шоири Рафур Гулом томонидан юксак савияда акс эттирилмоқда»<sup>58</sup>.

Шуниси эътиборли-ки, таниқли рус адаблари ва танқидчилари F. Гулом ижодига унда халқлар дўстлиги ва интернационализм мавзун қўйилишигагина эмас (бу масала ижодида акс этмаган совет шоири йўқ дейиш

<sup>58</sup> Уткин И. Писатель и чувство народа//Литература и искусство. 1943. 17 апреля.

мумкин), балки унинг санъаткорона бадиий ҳал этилишига, яъни бадиий маҳоратига жиддий эътибор бера бошладилар.

Урӯш даври танқидчилиги F. Гулом буюклигининг, маҳоратининг сирларидан бири — унинг асарларида халқлар дўстлиги ва интернационализм мавзуи, гояси халқчил, миллий, ўзбекона шаклда новаторлик билан ифодаланишидадир деган холоса чиқарди. Шундай фикрни айтганлардан бири K. Чуковский бўлди. Гафур Гулом интернационализми шунинг учун ҳам таъсирчан ва қудратлики, шунинг учун ҳам, ўзига хос ва бетакорки, дейди у, бу интернационализм ифодаланмоқда бўлмиш шакл халқчилдир, қолаверса, миллий ва ўзбеконадир<sup>59</sup>.

K. Чуковский шу мақоласида F. Гулом ижодига хос бўлган яна бир қанча хусусиятларни очиб беради. Унинг таъкидлашича, F. Гулом кўп услубли («много-стильный») шоирдир. Айниқса халқ туйғуларини ифодалаш, фикриятнинг ҳиссийлиги («сердечность мыслей») шоир ижодининг етакчи белгисидир. У сермиқёс, серкўлам, умумлашма ҳолдаги титаник масалаларни кўтариб чиқса-да, бу масалаларни инсон қалбининг назокатларини кўрсатиш билан уйғулиқда бера олади. Назскат эса, шеъриятнинг энг мураккаб соҳаларидан биридир. Унинг ўзбек оиласи томонидан рус боласининг тарбияга олиниши тасвирланган асари, фарзандини фронгта жўнатиш акс эттирилган шеъри халқ туйғуларини ифодалашдан заррача чекингани тақдирда сентименталликка айланиб қолиши турган гап эди. Бироқ бу шеърлардан сентименталлик эмас, аксинча, буюк ҳаётий қудрат уфуриб туради, чунки уларда халқнинг юксак ва талабчан диди, халқ қатъяти маҳорат билан тасвирланган<sup>60</sup>.

1943 йилнинг декабрида Москвада ўзбек адабиёти ва санъати кунлари ўтиши муносабати билан улкан рус адилари ўзбек халқининг ўтмиши ва бугуни, маданияти ва санъати, тарихи ва адабиёти ҳақида чуқур интернационал пафос билан йўғрилган фикрларни айтдилар. Масалан, И. Эренбург шундай деган эди: «Бу (ўзбек — Б. Н.) халқнинг санъати юксакдир. Бу санъат кечагина вужудга келган эмас. Ўзингиз ўйлаб кўринг, ахир. (Босқинчи) немис ёввойилар: ўзбеклар кўчманчи халқ бўлиб, бу халқни герман маданияти

<sup>59</sup> Литература и искусство. 1944. 24 декабря.

<sup>60</sup> Уша жойда.

билан суғориш керак, деб гапиряптилар-а. Гитлернинг қадимги замон боболари ҳайвон кийимиға бурканиб, ўрмонда дайдиб юрган вақтларида ўзбеклар ғазаллар яратар ва шафтоли етиштирас эдилар»<sup>61</sup>.

Ўз фикрини давом эттира бориб И. Эренбург ўзбек шоирларининг уруш даврида ёзган ва ёзаётган асарларига, хусусан, улардаги интернационал пафосга юқори баҳо беради. «Гитлер яҳудийларни мўлжалга олиб отаётган бир пайтда совет мамлакатида бир шоир чиқиб, у қонхўр аҳмоқнинг башарасига қараб: «Мен яҳудийман» дейди. Бу -- ўзбек шоири Fafur Fулом эди».

Москвадаги ўзбек адабиёти ва санъати кунларида ижодкорларимиз талабчан санъат шинавандалари ва мутахассисларининг имтиҳонидан муваффақият билан ўтдилар. Ўзбек адабларининг асарлари кенг муҳокама қилинди ва юқори баҳога сазовор бўлди. Марказий матбуот саҳифаларида ўзбек адабиётининг мамлакатимиздаги илфор адабиётлардан бири даражасига кўтарилигани ҳақида мақолалар босилди. Кенг халқ оммаси билан учрашувлар ўтказилди. Масалан, 1943 йил 13 декабрда Ленин комсомоли номли Москва театридаги учрашувда И. Н. Берсенев ва Олег Фрейлих X. Олимжоннинг «Муқанна» драмасидан, шу театр артисти В. В. Всеволодов И. Султоннинг «Бургутнинг парвози» драмасидан парчалар ўқидилар. Москва томошибинлари бу асарларни олқиши билан кутиб олди.

Декада катта уюшқоқлик билан ўтди. Унда фақат Ўзбекистондан борган иждокорларгина эмас, фронт линиясидан етиб келган ўзбек қаламкашлари ҳам иштирок этдилар. Масалан, 1943 йил 19 декабрда Москва консерваторияси залидаги учрашувга капитан Мирзакалон Исмоилий ва лейтенант Адҳам Раҳмат фронтдан етиб келдилар. Рус адаблари ва танқидчилари ўзбек қаламкаш дўстларининг барча жанрдаги — поэтик, прозаик ва драматик асарларига ўзларининг муносабатларини билдирилар.

Александр Дейч «Муқанна» драмасининг қатор фазилатлари ҳақида фикр юритар экан, муаллифнинг замонавийлик масаласида намоён бўлувчи маҳоратини алоҳида таъкидлаб ўтади. Шоир ўз драмасида узоқ мозийга алоқадор даврдаги ҳаётдан олинган ватанга муҳаббат ва эрк масаласини талқин этса-да, аслида,

<sup>61</sup> Москвада ўзбек адабиёти кечалари//Қизил Ўзбекистон. 1943. 17 декабрь.

ҳозирда бутун совет ҳалқининг юрагида қайнаб турган мұхим муаммони акс эттиради<sup>62</sup>, дейди у. Бу масала асарнинг буткул моҳиятини қамраб олади. Яъни, А. Дейч талқинича, Ватанга мұхаббат ва эрк масаласи драманинг асосий линиясини ташкил этган, Муқанна ва унинг сафдошларининг Ватан озодлиги учун олиб борган қаҳрамонона курашларидағына әмас, балки асарнинг бошқа барча ёрдамчи линияларыда ҳам ўз ифодасини топади. Масалан, Муқанна ва Гулойининг ўзаро мұхаббати, бир-бирига етмоқ истагын икки дил түйғуларининг интилишигина әмас, ундан чуқурроқ ва теранроқ маънога эга. Муқанна ва Гулойин севгиси ҳалқ баҳти ва орзуси билан чуқур боғланған мұхаббатдир. Бу баҳтни эса, фақат қурол билан, фақат Ватанин босқинчилардан озод қилиш биланғина қўлга киритиш мумкин. Щу тариқа, икки қалб мұхаббатининг талқини ҳам Ватан озодлиги билан чамбарчас алоқадорликда белгиланадики, бу талқин асар яратилган давр учун чуқур замонавий аҳамият касб этади.

Умуман, мұхаббатни кўпинча Ватан тақдири, Ватан баҳти билан ажралмас бирлиқда тасвирлаш Ҳ. Олимжон услубининг ўзига хос хусусиятларидан биридир. Чунончи, Ал. Дейчнинг юқоридаги фикрига яқин бўлган фикрни бошқа бир рус танқидчиси Ҳ. Олимжоннинг бошқа бир асари таҳлили мисолида ҳам илгари суради. Л. Бать шоирнинг «Севимли диёр тараннуми» (1944; рус тилида) номли китобига ёзган тақризида «Зайнаб ва Омон» достонидаги икки ёш қалбнинг мұхаббати, баҳти бамисоли бутун озод бўлган юрт баҳтини тажассум этгандай бўлади<sup>63</sup>, деган фикрни айтади.

Умуман, бу даврда рус танқидчилиги Ҳ. Олимжон маҳорати қирраларини, унинг ўзига хос бўлган ижодий услубини, шоир ижодидаги реализм ва романтизмнинг синкетик бирлигига намоён бўлувчи ҳаққонийлигини очишга алоҳида аҳамият берди. Хусусан, Жирмунскийни Ҳ. Олимжон ижодидаги романтика товланишлари ўзига жалб қиласи. «Романтизм Ҳамид Олимжон поэзияси учун чуқур ва бокира шеърий илҳом булоғи

<sup>62</sup> Қаранг: Дейч А.л. «Муқанна» — драма Алимджана//Оғонек. 1943. № 36. С. 13.

<sup>63</sup> Бать Л. Стихи о любимой земле. Оғонек. 1944. № 52. С. 10.

бўлди»<sup>64</sup>, — деб ёзган В. Жирмунский, айни вақтда, Ҳ. Олимжон шеъриятидаги романтик тенденцияга асос бўлган сабабни ҳам белгилашга интилади. Ўхшиши йўқ она Ватан, она халқ ва унинг тенгсиз табиатига бўлган чексиз муҳаббат шоир романтикасини озиқлантирган асосий омиллардир, дейди у.

В. Жирмунский Ҳ. Олимжон ижодини синчковлик билан кузатар экан, унинг таланти шаклланиши ва маҳоратининг барг ёзувида илфор рус адабиёти ва Шарқ классик шеъриятининг ҳаётбахш анъаналари катта роль ўйнади деган хуносага келади ва бу фикрини конкрет мисоллар асосида кўрсатиб беради. Масалан, «Зайнаб ва Омон» достонидаги Зайнабнинг Омонга ёзган мактубида намоён бўлувчи шоир маҳоратида Жирмунский, бир томондан, Татьянанинг Онегинга, иккинчи томондан, Ширин ва Лайлиларнинг севганларига йўллаган мактубларида зоҳир бўлувчи шоирлар маҳоратининг таъсирини кўради.

Ҳ. Олимжон бу масалада ўз салафларини такрорламайди, мактуб приёмдаги улар маҳоратини ижодий ўзлаштиради. Ўз олдига қўйган ғоявий ниятини ҳал қилишда социалистик реализм методида ижод этаётган янги давр, янги жамият санъаткорига хос бўлган ижодий принципларга амал қиласди. Яъни, Навоий ва Пушкин ўз асарларида муҳаббат масаласини марказга қўйган ҳолда, фақат севги, оила муаммосинигина эмас, у билан алоқадор бўлган жамиятнинг, даврнинг бир кўп бошқа ижтимоий проблемаларини бадиий акс эттирган бўлсалар, Ҳ. Олимжон ўз даври, ўз халқи ҳаётининг долзарб масалаларини бадиий гавдалантириб беради. Яқин-яқиндагина тақдирли, оиласи ва муҳаббатини хоҳишича ҳал қилолмаган, меҳнати самараларига ўзи эга бўлолмаган ўзбек халқи совет жамияти туфайли буларнинг барчасини ўзи ҳал қила оладиган даражага кўтарилиб етувни акс эттириди.

Уруш даври республикамиизда яшаб ижод этган рус адабиётшунослари, танқидчилари ўзбек шоирлари, ёзувчилари ижодида мана шу жараённинг нечоғлиқ тўлақонли акс эттирилгани ва эттирилаётгани масаласига эътибор бердилар.

Эскилиқ қолдиқлари, яқин-яқиндагина енгиг бўлмас тўсиқлар ҳисобланган муҳаббат муаммолари энди Ўзбекистонда янги ҳаётнинг азamat одимлари туфайли

<sup>64</sup> Ҳамид Алимджан. Избранное. Ташкент. 1944. С. 6.  
В. Жирмунский ёзган сўз бошидан.

бамисоли қуёш нури ва ёмғир таъсирида нураб, қулаб тушаётган эски деворлардек емирилиб бормоқда. Ўзбек адилари, хусусан, Ҳ. Олимжон ижодида бу масала ўзининг равшан бадий ифодасини топмоқда<sup>65</sup>, деган К. Зелинский ҳам худди ана шу масалага эътиборни қаратган эди.

Рус танқидчилиги ўзбек адабиётининг, хусусан, шеъриятининг, шу — Улуғ Ватан уруши даврида том маънодаги камолот босқичига кўтарилиб етганини бир овоздан эътироф этди. А. Фадеев ва И. Эренбург ҳам, Тихонов ва И. Уткин ҳам, К. Зелинский ва В. Луговской ҳам, Л. Бать ҳам шу фикрни илгари сурдилар.

Хусусан, С. Бородин F. Ғуломнинг «Иду с Востока» тўпламига ёзган тақризида («Правда», 1943 йил 13 деқабрь) шоир ўзининг камолот босқичига Улуғ Ватан урушининг энг оғир йилларида кўтарилиб етди, деган фикрни айтса, В. Луговской Зулфиянинг «Верность» тўпламига (1943) ёзган сўз бошисида: биз уруш даврида ўзбек шеъриятига ниҳоятда ҳурмат билан ёндашиш лозимлигига ўрганиб қолдик, чунки ўзбек шоирлари умуман совет адабиётидаги Улуғ Ватан уруши мавзунинг ишланиши масаласига ўзларига хос бўлган жўшқинлик, тиниқлик ва патетикани олиб кирдилар, деган эди. Бу, шубҳасиз, ўзбек адабиётига бўндан 40 йил илгариёқ берилган юқори баҳо эди.

В. Луговской Зулфиянинг юқоридаги тўпламига ёзган сўз бошисида, шоиранинг бу даврга келиб аниқ шакл ола бошлаган ва сўнгги босқичларда янада чуқурлашажак ўзига хос услубини кўрсатиб берган эди. «Уни Фарҳод дер эдилар» асари Зулфия ижодида муҳим ўрин ишғол қиласи ва шоиранинг воқеликни ҳис этиши, дунёқарашини белгилашда жиддий аҳамият касб этади, дейди В. Луговской. Шоиранинг қайси бир шеърида замин, муҳаббат, уруш ҳақида гапирилмасин, доимо некбинлик ва ҳаёт боқийлигини тасдиқловчи оҳанг баралла жаранглашини кўрамиз. У уруш даҳшати, андухи ва фожиасини хаспўшлаб, камайтириб эмас, қандай бўлса, шундайлигича — ҳаққоний тасвирлайди. Зулфия ғалабанинг баайни ҳаётдаги кўклам сингари, албатта, келажагига комил ишонч билан боқади, деб ёзади В. Луговской.

Бу — кейинчалик Зулфия ижодида мустаҳкам қарор топадиган индивидуал услубининг, ўзига хос мане-

<sup>65</sup> Ҳамид Алимджан. Зейнаб и Аман. Ташкент. 1943. Китобга К. Зелинский ёзган сўз бошидан.

ранинг шу даври асарлари мисолидаёқ зийраклик билан илғаб олиниши эди. Бу Зулфия ижоди мисолида намоён бўлаётган уруш даври ўзбек шеъриятининг некбин фазилатларига ишора эди.

Ўзбек шоирларининг маҳоратини, ўзига хослигини очишга интилиш Шайхзоданинг «Сааз» (рус тилида, 1943) тўпламига Абрам Эфрос сўз боисининг ҳам асосини ташкил қиласиди.

Шайхзода ўзининг дастлабки китобларида, дейди А. Эфрос, бирданига ҳам тарихчи-мутафаккир, ҳам лирик-социолог сифатида намоён бўлишга интиларди. Шайхзода ижодининг илк босқичида куртак ҳолида кўринган бу фазилатлар йиллар ўтгач, тинимсиз меҳнат туфайли шаклланган услугуб даражасига кўтарилид. Шайхзода шеърларида давр ҳаёти акс эттирилар экан, бу ҳаёт тарих бағрида яшириниб ётган ўқ илдизлари билан алоқадорликда тасвирланади, мозий ҳаёти ва ҳодисалари қаламга олинар экан, уларнинг бугунгача етиб келган нурлари билан алоқадорликда бадиий жонлантира олиш етакчилик қиласиди. Қатор шеърларида эса бу икки фактор бир бутунликни ташкил этади. Абрам Эфрос кузатишича, бу услугуб шоир ижодининг лугатини ҳам, образлар оламини ҳам, мавзу диапазонини ҳам тайнинлайди. Шайхзоданинг Ўрта Осиё шеърияти учун хос бўлган барча жанр ва шаклларда қалам тебратга олиши, шунингдек, унга совет шеъриятининг Маяковский, Багрицкий, Пастернак сингари лирикларидан ўтган шеъриятнинг деярли барча жанр ва шаклларида эркин ижод қила билиш салоҳиятини ҳам унинг услуби тайин этади. «Сааз» тўпламига кирган «Киров хотираси», «Ўртоқ Навоий», «Кремль соати», «Қисмат», «Октябрь» каби шеър ва балладалар танқидчига юқоридаги фикрларни илгари суришга асос бўлади.

Уруш даври рус танқидчилиги Шайхзода ҳақидаги фикрда, унинг услубини белгилашда якдил бўлди дейиш мумкин. 1944 йили Москвада ОГИЗ нашриётида Павел Антакольский таҳрири остида «Поэты Узбекистана — фронту» номли тўплам чиқди. Тўплам ниҳоясида унга асарлари кирган шоирлар ҳақида қисқача маълумот берилади. Бу ерда Шайхзода ҳақида қуйидаги фикрларни ўқиймиз: «Шоир Шайхзодада фикр биринчи ўринда туради. Унинг аксар шеърлари асосини фалсафий мундарижа ташкил этади... Мазкур шеърлар Шарқ ва Фарб маданияти чорраҳасида туғил-

ганким, бу хусусият уларга айрича ўзига хослик бағишилайды»<sup>66</sup>.

Бироқ, бу фазилатлар Шайхзода ижодининг характерли хусусияти экани фақат уруш давригагина келиб аниқланди дейиш, бир ёқламалик бўлур эди. Шайхзода ижодининг фалсафий йўналиши, унинг сиймосидаги мутафаккирлик белгилари, асарларидағи Шарқ ва Farb маданиятининг синкретлашуви каби хусусиятлар X. Олимжон, Ойбек, X. Ёқубов ва бошқалар томонидан ҳам 30-йиллар ва 40-йилларнинг аввалида эътироф этилган эди. Юқоридаги фикрлар мана шу қарашларнинг асосли эканлигини кўрсатди.

Барча даврларда бўлгани каби, асарларда ҳам мавзу ўхшашлиги, мавзу яқинлиги бўлиши табиий бир ҳолдир. Масалан, Ватан, муҳаббат, халқлар дўстлиги, қаҳрамонлик, Москва, фашизмга нафрат ва бошқалар. Лекин, бундан қатъий назар, бу мавзуларни ёритишида ҳар бир шоир ўз йўлидан борди, ўзига хослигини намойиш қилишга интилди. Бу масалалар X. Олимжон ижодида, масалан, романтик кўтаринкилик билан ёритилса, F. Ғуломда кўпроқ даъват, чақириқ, патетика устунлик қиласи. Шайхзодада фалсафий фикрлашга тамойил кучли бўлса, Миртемир ва Темур Фаттоҳда халқ оғзаки ижоди анъаналаридан, унинг традицион образлари, шеърий шаклларидан баракали фойдаланиш бўртиб кўринади. Уруш даври Темур Фаттоҳ ижоди учун замонавий Гўрўғли ва Алномишларни куйлаш характерли хусусиятдир, деганда Ал. Дейч ҳақ эди. Темур Фаттоҳ ўз асарларида фольклор анъаналаридан фойдаланаар экан, бу масалага ижодий ёндашишни унутмади, жанг майдонларида Ватанини ҳимоя қилаётган қаҳрамонларнинг совет кишиисига хос бўлган индивидуал белгиларини бўрттириб кўрсатишни диққат марказида тутди. Немис офицерини ўз саманига ўтқазиб, асир олиб келган жасур чавандоз Аҳмад Далиевга бағишланган «Йигит» шеъри ҳам, тарихий шахслар — Кўчқор Турдиев, Муҳаммад Иброҳимовлар акс эттирилган асарлар ҳам ана шу фазилатларига кўра Ал. Дейчининг ижобий баҳосига сазовор бўлди.

Маълумки, урушдан аввалги даврда лирикага турлича янгилиш қарашлар кўринган, яъни лирика қаҳрамоннинг фақат ички туйғуларини тасвирлашдан иборат экан, бу — реал воқеликни акс эттиришдан қочиш демакдир, бу эса, ўз навбатида «романтизмга чекиниш»

<sup>66</sup> Поэты Узбекистана — фронту. М., 1944. С. 71.

бўлади, деган нотўғри қараашлар бўлган эди. Бундай қараашларга урушдан илгариёқ тегишли зарба берилган эди, уруш йилларига келиб бу зарбанинг нақадар тўғри экани яна бир карра аён бўлди. Уруш даври совет поэзиясида лирика жаҳон адабиёти тарихида ҳеч қаҷон кўрилмаган миқёсда ва мисли кўрилмаган даражада муҳим аҳамият касб этди. Сиёсий, гражданлик, фалсафий лирикадан ташқари, масалан, интим ва муҳаббат лирикаси халқнинг ватанпарварлик туйғуларини жунбишга келтиришда, фашизмга қарши нафратни оловлантиришда катта роль ўйнади.

Шунинг учун ҳам Ҳ. Олимжон, Ойбек, Ғ. Ғулом, Уйғун, Шайхзода, Миртемир, Зулфия, А. Умарий, Зифар Диёр, Т. Фаттоҳ ва бошқаларнинг уруш даври интим ва муҳаббат лирикаси мамлакат ичкарисида ҳам, фронтда ҳам бирдек катта муваффақият қозонди. Шахсий туйғулар уларнинг асарларида гражданлик туйғулари билан уйғунлашиб кетди.

Темур Фаттоҳ шеърлари ҳақида гапира туриб Ал. Дейч: «Шоирнинг шахсий, интим ҳиссиётларида кўп ҳолларда гражданлик туйғулари ўз ифодасини топади. Чунки, ваҳшийлик, босқинчилик, фашизмга қарши кураш, айни вақтда муҳаббат, садоқат, дўстликни ўзида мужассам этувчи буюк инсоний ғурур учун ҳам кураш эканлигини шоир жуда яхши тушунади»<sup>67</sup>, — деганда шу нарсани назарда тутган эди. Зотан, Темур Фаттоҳнинг бу китобига кирган «Қасос қўшиғи», «Дүтор», «Сен келдинг», «Она мактуби» сингари шеърлари юқоридаги фикрга ёрқин иллюстрация бўла олади.

Бу йилларда ўзбек адабиёти ҳақида энг кўп мақола ёзган рус танқидчиларидан бири Корнелий Зелинский бўлди. Унинг «Узбекская литература в дни войны», «Искусство Узбекистана — сегодня», «Лейли и Меджнун», «Мукими», «Поэт — полководец», «Памяти поэта Хамида Алимджана», «Узбекские поэты и Война», «Поэты Узбекистана» мақолаларида Ҳ. Олимжоннинг «Зайнаб ва Омон» (1943), Ғ. Ғуломнинг «Иду с Востока» (1943) китобларига ёзилган сўз бошиларда уруш даври ўзбек шеъриятининг ҳамда классик адабиётининг қатор муҳим масалалари ёритилди.

«Совет шеъриятининг асосий фазилати, — деб ёзади К. Зелинский, — унинг оптимизмидадир, ижодий такомилнинг кўтаринки руҳидадир. Бу хусусият ҳозирги

<sup>67</sup> Фаттаҳ Тимур. Серп молодого месяца. 1943. С. 9.

ўзбек шеъриятида икки-уч ҳисса кучлироқ жарангламоқда»<sup>68</sup>.

К. Зелинский, айниқса, F. Ғулом асарларида ҳалқлар дўстлиги мотивларининг куйланишига юксак баҳо берди. «Ҳеч муболағасиз айтиш мумкинки, совет ва жаҳон поэзиясиданFaфур Гулом бажараётган ишларга ўхшаган бирор ҳодисани топиш амримаҳолдир. Сўзларнинг фавқулодда темпераментлилиги, ўзбек шеърияти қонун-қоидаларини бузиб чиқувчи (бу хусусияти билан у рус шеъриятидаги Маяковский новаторлиги билан ҳамнафасдир), куйдай қўйилиб келувчи оловкор сиёсий фикрият бу ўзбек шоирини чиндан ҳам жаҳон адабиётининг улкан вакиллари билан бир сафга қўяди»<sup>69</sup>.

К. Зелинский бу давр ўзбек шеъриятидаги инсон концепциясида Горький принципларига яқинлик қўради. F. Ғуломнинг «Мен яҳудий» шеърида фашизмга нафратдан ташқари, Горький кредитсига яқин бўлган инсон буюклигидан мағрурлана олиш ҳисси уфуриб туради, дейди у. К. Зелинский А. Умарий шеърларидан биридаги лирик қаҳрамоннинг «юрагимни юлиб олиб, гранатадек улоқтиргум босқинчининг пойига томон» деган фикрига (бу фикр шеърининг рус тилидаги таржима вариантига оид кўринади — Б. Н.) юқори баҳо беради ва бу асар қаҳрамонини Горькийнинг Данкосига қиёс қиласи.

К. Зелинский А. Умарийнинг урушгача бўлган шеърларини уруши даври шеърларига қиёслар экан, унинг бадиий структурасида кучли ўзгариш содир бўлди, деган хulosага келади. Аввалги босқич асарларига хос бўлган дунёнинг нурга, табассумга йўғрилганини ифодаловчи қаҳр образи билан алмашинди. Бу умумсовет адабиёти меҳр образи, энди фашизмга нафратни ифодаловчи бадиий структурасидаги ўзгаришнинг А. Умарий ижодидаги акс садоси эди.

К. Зелинский кузатишича, уруш ўзбек шеъриятига давр тақозо этган янгича бадиий образларни ҳам олиб кирди. Масалан, Қиши образи. Бу образ ўзбек шеърияти учун мутлақо бегона эмас, албатта. Бироқ, F. Ғулом бу даврда ёзган «Қиши» шеърида қишини, совуқни символ даражасига кўтаради ва рус қишини «қадрдон қиши» деб атайди. Чунки бу қиши фашизмнинг бошига балолар солган ва ғалабани яқинлаштирган қишидир.

<sup>68</sup> Ташкентский альманах. Ташкент. 1942. С. 246.

<sup>69</sup> Ўша жойда. 248-бет.

Шеърларида ўзига яқин бўлган табиатни, жазирама оташларни куйлаган Ўйғун ҳам қишини мадҳ этади.

Зелинский бу давр адабиётимиз учун характерли бўлган шеърий номаларга ҳам юқори баҳо беради. Бу йўналишдаги асарлар, дейди у, халқни ва жангчиларни илҳомлантиришда катта роль ўйнади.

Танқидчи уруш даври ўзбек шеъриятидаги ютуқлар билан бир қаторда, унинг камчиликларини ҳам кўрса-тишни унутмади. Чунончи, қаҳрамонлик, ватанпарвар-лик, халқлар дўстлиги, муҳаббат мавзуларига алоҳида эътибор берилгани ҳолда, даврнинг муҳим масалала-ридан бири — меҳнат мавзуига ўзбек шоирлари етарли даражада эътибор бермаётирлар, дейди у. Ҳолбуки, уруш даври ҳаётининг реалистик тасвири, шубҳасиз, бу мавзуни ҳам чуқур ва атрофлича ёритишни тақозо қилди. Меҳнат мавзуи ва меҳнат қаҳрамонларисиз даврнинг типик манзарасини тасаввур этиш мумкин эмас. Ахир, фронтдаги ғалабаларга ӯларни моддий жиҳатдан таъминлаб турган мамлакат ичкарисидаги меҳнат қаҳрамонлари асос бўлмоқда.

Танқидчиликдаги бу каби фикрлар адабий жараёнга таъсир кўрсатмаслиги мумкин эмас эди, албатта.

Рус танқидчилари бу даврда нашрдан чиқсан асарлар ҳақида фикр юритар экан, у хоҳ шу давр шоир ижоди бўлсин, хоҳ классик адабиёт намуналари бўлсин, энг аввало, уларнинг замонавийликда намоён бў-лувчи қиммати ва моҳиятини очишга эътибор бердилар. Масалан, 1943 йили Тошкентда Лев Пеньковский таржимасида Навонйнинг «Фарҳод ва Ширин» достони рус тилида босилиб чиқсан эди. Унга Е. Э. Бертельс сўз боши ёзган, таржимон ҳам асар ҳақида, унинг рус тилига ўғирилиши хусусида ўз фикрларини баён қилган Лев Пеньковский, достондаги Фарҳод, Ширин, Шопурлар сиймосида халқлар дўстлигининг ажойиб тажассумини кўради ва фашизм халқлар ўртасига нифоқ солиб, немис миллатидан бошқаларни ерга уриб турган бир пайтда, асардаги бу мотив муҳим замона-вий аҳамият касб этади, деган фикрни илгари суради. «Фарҳод ва Ширин» достони ҳозир манфур немис фашизмiga қарши курашда бир қурол бўлиб хизмат қи-лади. Бу асар бамисли Фарҳод томонидан Хусрав га-зандаларига итқитилган тошдек фашизмни аниқ ни-шонга олиб отилган ўқдир»<sup>70</sup>, — деб ёзади Лев Пеньковский.

<sup>70</sup> Алишер Навон. Фарҳад и Ширин. Ташкент. 1943. С. 40.

Классик адабиётимиз намуналарининг замонавий аҳамияти ҳақидаги жицдий фикр 1943 йили рус тилида нашр этилган «Лайли ва Мажнун» хусусида ҳам айтилди. Китоб Е. Э. Бертельснинг сўз бошиси билан очилади. «Фарҳод ва Ширин» достонидаги замонавийлик ҳақидаги фикр асарнинг халқлар дўстлиги акс эттирилган линияси хусусида билдирилган бўлса, «Лайли ва Мажнун» достони нашр этилиш муносабати билан нашриёт билдирган фикрда бошқа бир масалага урғу берилади. Бу — мазкур даврда классик адабиётнинг ўлмас намуналарини нашр этишининг қиммати ва аҳамиятига доир фикрdir. Яъни, инсониятнинг ақлидроқи яратган барча гўзалликларга, санъат ва маданият обидаларига фашизм қирон келтириб турган бир пайтда Совет Иттифоқи бошқа эркесвар халқлар билан бир қаторда ўзининг фақат шон-шарафигина эмас, маданиятини ҳам сақлаб қолиш учун курашмоқда. «Буюк муҳаббат ва қардошлиқ туйғулари билан суғорилган «Лайли ва Мажнун»нинг нашр этилиши ҳозирги кунда айни замонавийдир»<sup>71</sup>.

Биз Навоий ҳаёти ва ижоди ҳақида умумий маълумотлар берувчи Петр Скосиревнинг «Алишер Навои — великий узбекский поэт-гуманист XV века» (Москва, 1945; китобча асосида муаллифнинг 1945 йил 30 июлда Москвадаги Союзлар уйида ўқилган доклади ётади) номли рисоласини, Уйғун сўз бошиси билан босилиб чиққан Муқимийнинг «Танланган асарлари»ни (Т., 1942) ҳам ана шундай баҳолай оламиз. Муқимийнинг Уйғун ва Н. Ушаков сўз бошиси билан эълон қилинган рус тилидаги «Лирика и сатира» номли тўплами (Т., 1948) ҳам, Уйғуннинг «Жангчи кутубхонаси» серияси остида чиққан «Алишер Навоий» номли рисоласи ҳам (Т., 1942) шундай баҳога сазовордир.

Умуман, бу даврда рус танқидчиларини классик ва замонавий ўзбек адабиётидаги инсон концепцияси кўпроқ қизиқтиради. Корнелий Зелинский инсон концепциясида замонавийлик масаласига кўпроқ аҳамият беради. Бугун, немис фашистлари инсон тушунчаси билан алоқадор бўлган барча нарсаларни оёқ ости қилиб турган бир пайтда, — дейди К. Зелинский, — ўқувчи ажойиб ва бокира инсоний муҳаббат туйғулари тараннум этилган Ҳ. Олимжоннинг «Зайнаб ва Омон» достонини алоҳида меҳр ва ифтихор билан қўлга ола-

<sup>71</sup> Алишер Навои. Лейли и Меджнун. Ташкент. 1943. С. 3.

ди<sup>72</sup>. К. Зелинский Зайнаб ва Омонни Фарбнинг мислсиз қаҳрамонлари Ромео ва Жульеттага қиёс қиласди. Бироқ замонавий ўзбек Ромео ва Жульеттаси ҳақидағи қисса баҳтли тақдирнинг бадиий ифодасидир, деб хулоса чиқаради К. Зелинский. Бу достон инсонийликни мадҳ этиш билан ҳам айниқса қимматлидирки, у фашизмнинг зўравонлик сиёсатига қарши муносиб зарба бўлиб туша олади.

Юқоридагилардан маълум бўладики, рус танқидчилари ва адабиётшунослари бу даврда ўзбек адабиётидаги замонавийлик проблемасини таҳлил этишга алоҳида аҳамият бердилар, бу масаланинг тарихий ва замонавий асарлар мисолида кўринувчи турли қирраларини очишга ҳаракат қилдилар. Танқидчиликдаги бу фикрлар адабий жараён ва халққа жиддий амалий таъсир кўрсатди.

Бу давр Ўзбекистондаги рус танқидчилиги ва адабиётшунослиги фақат ўзбек адабиёти масалалари билангина эмас, рус ва қардош халқлар адабиёти билан ҳам шуғулланди, умуман Иттифоқ адабиётшунослиги ривожига муносиб ҳисса қўшди. 1942 йили Тошкентда рус тилида Иосиф Уткин таҳрири остида «Мы победим» номли адабий-бадиий альманах босилиб чиқди. Бу альманаҳдаги проф. М. Цявловскийнинг Пушкин ҳақидаги «Великий поэт — патриот», проф. Н. Бродскийнинг Лермонтов ҳақидаги «Поэт — воин», М. Живовнинг «Адам Мицкевич — поэт славянства и борец за свободу народов» сингари адабий мақолалари бу давр Ўзбекистондаги рус танқидчилигининг, бир томондан, улкан классиклар ижодини тадқиқ этишни сусайтирумсанликларини, иккинчи томондан эса, ўз эътиборларини классиклар шахси ва ижодининг шу давр учун қимматли бўлган фазилатларини тадқиқ этишга қаратганликларини кўрсатади.

Жангу жадал йилларида халқ тарихини, маданий меросни ўрганишга эътибор берилди. Бунинг сабаби классикларнинг ватанпарварлик, гуманизм руҳи билан йўғрилган асарларини замон хизматига бўйсундириш, улар шахси ва ижоди орқали даврнинг муҳим масалаларини илгари суриш билан изоҳланади. Бундан ташқари, халқ тарихи, адабиёти ва маданияти тарихини ўрганиш иши, шубҳасиз, шу халқнинг ватанпарварлик туйғуларини мустаҳкамлашда катта аҳамиятга эга эди.

Классик адабиёт масалаларини ўрганишга ҳамда

<sup>72</sup> Хамид Алимджан. Зейнаб и Аман. СП. 1943. С. 3.

ўзбек халқи тарихи, маданияти генезисини ўрганиш ишига бу даврда рус олимлари катта ҳисса қўшдилар. А. Ю. Якубовскийнинг «К вопросу об этногенезе узбекского народа» (1941), С. П. Толстовнинг «Древняя культура Узбекистана» (1943), Е. Э. Бертельснинг «Навои и Джами» (1945), «Навои и литература Востока» (1941), «Узбекский поэт Дурбек и его поэма о Иосифе Прекрасном» (1944), «Хибат-ал-Хакайик» Ахмеда Югнаки» (1945), В. Жирмунскийнинг «Узбекский народный героический эпос» (1943, мақола) сингари тадқиқотлари, Е. Э. Бертельс, Пеньковский, В. Кирпотин, Л. Клинович, С. Липкин, П. Скосирев, К. Зелинскийларнинг Навоий достонлари ҳақидаги мақола ва тақризлари ўзбек классик адабиётининг бу даврда чуқур ўрганила бошлиши билан бир қаторда, келажакда унинг мураккаб проблематик масалаларини ҳал этишга замин ҳозирлади.

Уруш даврида фақат танқидчиликкина эмас, ҳатто адабиётшунослик ҳам имконият даражасида замонавийлик учун курашдаги жанговар фазилатларни на-мойиш қилишга интилди. Шундай ҳоллардан бири классик адабларнинг шу давр учун муҳим замонавий аҳамият касб этувчи хусусиятларини очиб беришда намоён бўлди. Масалан, Алишер Навоийнинг Пеньковский таржимасида босилиб чиққан (1943) «Фарҳод ва Ширин» достонига ёзган сўз бошисида Е. Э. Бертельс замон талабидан келиб чиқиб Фарҳод сиймосидаги шу давргача очилмаган янги қирраларини очиб беради. Шаҳзода бўлишига қарамай илм ва санъат сирларига шахсан ўзи кириб бориши, халқа чексиз муҳаббати, унинг оғирини енгил қилишга интилиши Фарҳодни эртакнамо шаҳзода образларидан кескин ажратиб туради, дейди Е. Э. Бертельс. Шуниси эътиборлики, Фарҳод душман жангчиларини ўзича тўғри тушунишга уринади, ҳатто маълум даражада уларга ачинади ҳам. Чунки улар ўз хоҳишлари билан жанг қиласётгандари йўқ. Арман элига мусибат келтирган ҳам аслида уларнинг ўзларигина эмас, балки улар қарам бўлган ҳукмдорлардир... Шу тариқа Е. Э. Бертельс Навоий Фарҳодининг замонавийлиги қирраларидан бирини очиб беради.

Уруш даврида Навоий шахси, ҳаёти ва ижодига муносабат, айниқса қамалдаги Ленинградда рус адаблари ва олимлари томонидан Навоий сиймосига кўрсатилган меҳр ва муҳаббат совет халқлари дўстлиги ва интернационализмининг бетимсол намунаси бўлди.

Навоий таваллудининг 500 йиллигига бағишиланган илмий сессиялардан бири (1941 йил 10—12 декабрь) қамал қилинган Ленинградда — Давлат Эрмитажида фашист газандалари шу бинони бомбардимон қилиб турган бир шароитда ўтказилди.

Навбатдаги илмий йиғилишлардан бири СССР ФА Шарқшунослик институти илмий советида шу йилнинг 29 декабряда бўлиб ўтди. Ҳар икки сессияда номлари жаҳонга машҳур бўлган И. Ю. Крачковский, Е. Э. Бертельс, И. А. Орбели, А. Н. Болдирев, Б. Б. Пиотровский сингари шарқшунос алломалар Навоий ҳаёти ва ижоди ҳақида доклад қилдилар, нутқ сўзладилар. «Кишиларнинг бир қисми бинонинг ён-атрофида ва тепа қисмида навбатчиликда туриб, илмий совет давом этабётган жойни душман ташлаган ёндирувчи бомбалардан тозалаб турганларини унутиб бўладими»<sup>73</sup>.

Юқоридагилардан кўринадики, уруш йилларида Ўзбекистонда яшаб ижод этган рус олимлари замонавий адабий жараённи ўрганиш ишига ҳам, адабий меросни ўрганиш ишига ҳам катта улуш қўшдилар.

Шу ўринда адабиётшунос Н. И. Дикушинанинг бир фикрига муносабат билдириб ўтиш ўринли кўринади.

Н. И. Дикушина уруш даври совет танқидчилигининг катта ютуқларини белгилаш билан бир қаторда, унинг айрим оқсан сабабларини ҳам кўрсатиб ўтади. Шундай камчиликлардан бири, дейди у, эвакуациядаги танқидчиларнинг адабий фаолиятга дарҳол киришиб кета олмаганликларида намоён бўлди<sup>74</sup>.

Ўзбекистонга эвакуация қилинган таниқли рус адабиётшунослари ва танқидчиларига нисбатан олганда, бу фикрни бирмунча шартли маънода тушуниш тӯғри бўлади. Чунки, уруш даврида Ўзбекистонга кўчирилган рус танқидчилари ва адабиётшунослари республикализга келишлари биланоқ адабий жараёнда фаол иштирок эта бошладилар. Бу давр ўзбек совет адабиётининг жадал суръатлар билан тараққий этишига, умумиттифоқ миқёсига чиқишига актив таъсир кўрсатдилар.

Қисқача назар ташлаганимиз уруш даврида Ўзбекистонда яшаб ижод этган рус олимларининг фаолиятлари бу фикрининг далилидир.

<sup>73</sup> Муродов М. Навоийшунослар жасорати. Тошкент. 1972. 22-бет.

<sup>74</sup> История русской советской литературы. Т. III. М., 1968. С. 462.

## ҚИСҚАЧА ХУЛОСАЛАР

Ўзбек адабий танқидчилиги уруш йилларининг оғир шароитларига қарамай, ўз зиммасидаги вазифаларини шараф билан бажарди, ёзувчиларимиз маҳоратининг ўсишига, уларнинг асарлари кенг халқ оммаси ичига кириб боришига баракали таъсир кўрсатди.

Шу сабабдан уруш даври ўзбек адабиётида «Навоий», «Жалолиддин», «Муқанна», «Маҳмуд Торобий», «Алишер Навоий», «Роксананинг кўз ёшлари», «Сен етим эмассан», «Мен яҳудий», «Капитан Гастелло» сингари асарларнинг майдонга келишида давр талаби, ёзувчиларнинг ўз ижодларига масъулият билан қарашлари, рус ва қардош халқлар адабиётлари улкан вакиллари билан ёнма-ён яшаб ижод этишдаги ҳамкорлик ва ўзаро ёрдам билан бир қаторда, бу давр ёзма ва оғзаки кўринишдаги адабий танқиднинг ҳам ўзига хос ўрни бор, деб қараш тўғри бўлади.

Бу даврда проблематик мақолалар, умумлаштирувчи тадқиқотларнинг нисбатан озлигидан қатъи назар, адабий танқидчилик кўпроқ тақриз характеристида бўлганига қарамай, уруш йиллари ўзбек танқидчилиги ўз тараққиётининг бошқа босқичларига нисбатан пасайди, деб эмас, давр белгилаб берган йўллар билан ўзига хос, равишда ривожланди деб хулоса чиқара оламиз. Бу уруш даври ўзбек танқидчилиги ҳар жиҳатдан бекаму кўст бўлди, деган маънони англатмайди, албатта. Бу йиллар танқидчилиги баъзан асарни унинг пафоси, мазмуни ва ғояси, ҳозиржавоблиги нуқтаи назаридан баҳолашга берилиб кетиб, бу масалаларни асарнинг умумий бадиий фазилатлари, характер яратиш санъати сингари проблемалар билан доим ҳам чамбарчас боғланишда талқин қилмади. Бу камчиликлар кейинги йилларда тадрижий равишда бартараф қилиниб борди.

Уруш даврида Ўзбекистонда бир қатор рус танқидчилари ва адабиётшуносларининг яшаб ижод этганлиги, наинки шу давр бадиий адабиётимиз ва адабий танқидчилигимиз, балки шу соҳаларнинг келгусидаги ривожида ҳам муҳим роль ўйнади. Рус танқидчилари бу йилларда ўзбек адиллари ижодини таҳлил қила бориб, адабиётимизнинг умумиттифоқ миқёсига кўтарилишига катта улуш қўшдилар.

Бу йилларда ўзбек танқидчилиги ўзининг ҳозиржавоблик ва жанговарликда зоҳир бўлувчи фазилатлари-

ни намойиш қилди, бадий асарларни пешма-пеш, оперативлик билан таҳлил қила борди. Шу даврда танқидчилигимизда публицистик руҳ аввалги йилларга нисбатан ўзининг юксалган босқичига кўтарилиди.

Жангу жадал йилларида ўзбек танқидчилигининг давр ва ҳаёт билан алоқадорлиги янада мустаҳкамланди. Унда замонавийлик учун кураш янада чуқурлашди. Халқимизнинг ватанпарварлик, қаҳрамонлик тийғуларини тоблашда, халқлар дўстлигини мустаҳкамлаш ишида адабий танқид ҳам ўзининг интернационал ва гуманистик бурчини муваффақият билан адодетди, буюк ғалабани тезлаштиришга ўзининг муносиб ҳиссасини қўшди.

УЛУФ ВАТАН  
УРУШИДАН КЕЙИНГИ  
ДАВР ЎЗБЕК  
ТАНҚИДЧИЛИГИ  
(1945—1956)

Улуф Ватан уруши совет халқининг оламшумул ғалабаси билан тугади. Коммунистик партия раҳбарлигига фашизмнинг ёвуз кучларини ва япон тажовузкорларини тор-мор келтирдик. Совет Иттифоқининг Улуф Ватан урушида қозонган ғалабаси адабиёт ва санъатнинг бундан кейинги ривожланиши учун янги шароит яратилишини таъмин этди.

Улуф Ватан урушидан кейин жаҳон социалистик системаси таркиб топди, бу ҳол жаҳон майдонида капитализм билан социализм ўртасидаги кучлар иисбатини социализм фойдасига тубдан ўзгартириб юборди. Натижада бутун инсониятнинг учдан биридан кўпроғи капитализм билан узил-кесил алоқани узиб, социалистик лагерга бирлашди. СССРнинг халқаро майдонда обрў-эътибори янада ошди.

Урушдан кейин партия ва совет халқининг вазифаси жуда қисқа мuddатда халқ хўжалигини қайта тиклаш ва уни янада ривожлантиришдан иборат эди. Партия ва ҳукуматимиз ўзининг бутун диққат-эътиборини урушда вайрон бўлган халқ хўжалигини тиклаш ва ривожлантиришга қаратди. Вазифа ниҳоятда оғир эди. Чунки уруш даврида йигирма миллиондан ортиқ совет кишилари ҳалок бўлган, у ёки бу даражада ярадор бўлган улардан кам эмас эди. Издан чиққан халқ хўжалигини қайта тиклаш, қайта қуриш санъатини эгаллаш зарур эди.

Бутун дунё халқлари урушдан кейинги фаровонликни, тинч-тотув яшашни орзиқиб кутган эди. Бироқ, кўп вақт ўтмасдан, халқаро вазият яна кескинлашди. СССРга тазийқ ўтказиш мақсадида Япониянинг Хиросима ва Нагасаки шаҳарларига Америка атом бомбалари ташланди. Бу совет давлатига қарши атом шантажининг бошланиши эди. Фашизмга қарши бир сафда туриб жанг қилган Катта Учлик мамлакатлари — Со-

вет Иттифоқи, АҚШ ва Англия ўртасидаги иттифоққа птур етди. Бунинг асосий айборлари Англия ва Американинг ҳукмрон доиралари эдилар. Худди шу тарзда узоқ йиллар давом этган совуқ уруш даври бошланди. Бу капиталистик давлатларнинг бизнинг қийинчиликларимизга умид боғлаб, ўзларининг иродаларини бизга ўтказиш, ички ишларимизга аралашиш учун қилган уринишларидан бири эди. Уларнинг нияти Совет Иттифоқини сиёсий ва иқтисодий жиҳатдан тиз чўқтириш эди. Лекин бу хом хаёл бўлиб, океан ортидаги донишмандлар ўз сиёсатларида хато қилишди.

Коммунистик партия урушдан кейинги даврда социалистик қурилишнинг умумий талаб-эҳтиёжларини ҳисобга олган ҳолда идеология фронтидаги фаолиятни кучайтиришга алоҳида эътибор берди. Бу даврга келиб ҳалқни коммунистик руҳда тарбиялаш, кишилар онги ва хулқ-авторидаги эскилиқ, капиталистик сарқитларга қарши кураш вазифаси биринчи даражали аҳамият касб этди. Чунки уруш даврида эскилиқ сарқитлари бирмунча кучайган эди. Бундан бошқа, фашистлар босиб олган жойларда асирга тушган, сургун қилиб олиб кетилган кишилар онигига буржуа ва антисоветизм таъсирини ўтказишга фаол ҳаракат этилган эди. Буржуа пропагандасининг таъсири Болтиқбўйи республикалари, Фарбий Украина ва Фарбий Белоруссия областларининг аҳолиси ўртасида анча кучли эди. Урушдан кейинги дастлабки йилларда буржуа фарбининг реакцион идеологиясига бефарқ қараш тенденциялари юзага келди.

Партиямиз идеологик ишларни яхшилаш учун борчораларни амалга ошира бошлади. 1946 йили Коммунистик партия Марказий Комитети ҳузурида Ижтимоий Фанлар академияси ташкил этилди, 1947 йили Бутуниттифоқ «Билим» жамияти тузилди, 1948 йили Москва ва Ленинградда, сўнгра тез орада бошқа шаҳарларда ҳам мунтазам телевизион эшииттиришлар бошланиб кетди. «Билим» жамияти оммавий ташкилотга айланиб қолди, телевидение эса ҳалқни тарбиялашнинг қудратли воситаси бўлиб қолди... Фаннинг ривожланишига фавқулодда катта аҳамият берилди. Ядро проблемалири, радио-техника ва электроника, аниқ механик ва ҳисоблаш техникаси, амалий геофизика, физика химияси, юқори молекуляр бирикмалар юзасидан тезда кўплаб янги илмий текшириш институтлари вужудга келди. Тожикистон, Литва, Эстония ва бошқа республикаларда Фанлар академияси ташкил этилди. Илмий

ходимлар тайёрлаш учун кенг миқёсда ишлар олиб борилди. 1947 йили Й. В. Курчатов раҳбарлигига олимларимиз атом энергиясини забт этди...

Адабиёт ва санъатни ривожлантиришга ҳам маҳсус эътибор берилди. Партия адабиёт ва санъат масалалири юзасидан қабул қилинган қарорларда совет маданиятининг муваффақиятлари қайд қилинди, айни вақтда, янги шаронтда адабиёт ва санъатни ривожлантиришнинг асосий вазифалари белгилаб берилди, Марказий Комитет совет ёзувчиларини, драматургларини, театр ва кино ходимларини халққа хизмат қилишдек буюк миссиясига содиқ бўлишга, санъатнинг юксак ижтимоий ролини янада оширишга, бутун куч-кудратини замонавий воқеликнинг актуал проблемаларини кўтариб чиқишга сарф қилишга, совет кишиси ҳақида ёрқин, тўлқинлантирувчи, бадиий жиҳатдан мукаммал, Ватанга муҳаббат руҳида тарбиялайдиган ажойиб асарлар яратишга даъват этди.

«Звезда» ва «Ленинград» журналлари ҳақида»ги қарорида дунёда энг илгор адабиёт бўлган совет адабиётининг халқ манфаатларидан, давлат манфаатларидан бошқа манфаатлари йўқ ва бўлиши ҳам мумкин эмаслиги маҳсус таъкидланди ва унинг вазифалари шундай белгиланди: «Совет адабиётининг вазифаси ёшларни тўғри тарбиялашда давлатга ёрдамлашиш, уларнинг талабларини қондириш, янги авлодни тетик, ўз йишига ишонадиган, тўсиқлардан қўрқмайдиган, ҳар қандай тўсиқларни енгишга тайёр турадиган қилиб тарбиялашдан иборатдир»<sup>1</sup>. Айни вақтда, партия Марказий Комитетининг қарорларида ижодий соҳада гоясизлик ва сиёсатдан четда туриш тарафдорлари кескин танқид қилинди.

Марказий Комитетнинг қарорлари матбуот органдари ва ижодий ташкилотларда, область ва шаҳар партия комитетлари кенгашларида муҳокама қилинди ҳамда санъат ходимларига нисбатан улкан талаблар қўйилди. Тўғри, баъзан бадиий проблемаларни ижодий муҳокама қилишда маъмуриятчиликка берилиш ҳоллари, адабиёт, музика ва кино асарларини баҳолашда баъзан субъективизмга йўл қўйилган пайтлар ҳам бўлди. Айрим асарлар асосиз танқид қилинса, айримлари асосиз мақталди. Шу билан бирга, КПСС Марка-

<sup>1</sup> КПСС съездлар, конференциялар ва Марказий Комитет Пленумларининг резолюция ва қарорларида. III қисм. Тошкент. 1954. 552-бет.

зий Комитетининг 1958 йил 28 майдаги «Буюк дўстлик», «Богдан Хмельницкий» ва «Чин юракдан» номли операларни баҳолашда йўл қўйилган хатоларни тузатиш ҳақида» номли қарорида улкан композиторларнинг асарлари қайта баҳоланди. Д. Шостакович, С. Прокофьев, А. Хачатурян ва бошқа композиторларни халққа қарши формалистик оқим намояндалари деб талқин этишлар, К. Данькевич ва Г. Жуковскийнинг асарларига ғаразгўйлик ва бир ёқлама баҳо беришлар қораланди. Рус совет ёзувчиларидан А. Аҳматова, М. Зошченко, ўзбек адаблари Хуршид, Охундий, Гайратий СССР Ёзувчилари союзи аъзолигига қайта тикланди.

\* \* \*

Галабадан кейинги дастлабки йилларда социалистик реализм адабиётининг қатор яхши асарлари яратилиши билан бир вақтда, айрим ёзувчиларда бу даврдаги мураккабликларни ва шу мураккаб вазиятга боғлиқ ҳолда ижодий чекиниш ҳоллари рўй берди. Айрим шоир ва ёзувчилар ўзларининг ижодий масъулиятини чуқур ҳис этмадилар, баъзи ўринларда буржуа идеологиясига лоқайд қараш ҳоллари юз берди. Уруш йилларида совет халқининг бошига тушган оғир қулфатлар, жудолик ва йўқотишлар муносабати билан айрим шоир ва ёзувчилар ижодида тушкунлик кайфиятларига берилиш аломатлари ҳам бўлди. Баъзи ижодкорлар фашизм устидан ғалабага эришганимиздан кейин совет адабиётининг аввалги ғоявий мезонларига риоя қилиш шарт эмас, энди кўнгил очадиган санъат асарлари яратишмиз лозим, деб чиқдилар. Партиямиз бундай нотўғри тенденцияларга бефарқ қараб туриши мумкин эмас эди. Демак, биринчидан, коммунистик қурилишнинг тарихий шароитдаги конкрет талаблари ҳисобга олинини жуда зарур эди, иккинчидан, маданий-адабий ҳаётда вужудга келган бу аҳволни яхшилаш талаб қилинарди.

Шуни ҳам айтиш керакки, партиямизнинг идеология соҳасидаги қарорлари фақат камчиликларни тузатишдан иборат эмас эди. Бу қарорларда, аввало, совет адабиёти ва санъати эришган ютуқлар, социалистик реализм совет адабиётининг асосий методи бўлиб қолганлиги ҳамда бу ижодий методнинг муайян самаралари маҳсус кўрсатилди, унга катта баҳо берилди. Бу қарорларда адабиёт ва санъат партия ва халқ қўлида кўп қатламли воқеликни билишнинг қудратли қуроли бўлиб келганлиги маҳсус таъкидланди. Айни

вақтда, рўй берган айрим хато ва камчиликларни тугатиш янги-янги ютуқларга эришишнинг гарови эканлиги кўрсатилди.

Коммунистик партия санъаткорларни замонавий воқеиликни чинакам ҳаққоний тасвирлашга, кучли foявий ва юксак бадиий асарлар яратишга қизғин даъват этиши билан бирга, бадииятга хилоф бўлган примитив, палапартиш, юзаки асарларнинг ҳаммасига қарши муросасиз кураш олиб бориш зарурлигини маҳсус қайд қилди.

КПСС Марказий Комитетининг Совет ёзувчилари II съездига йўллаган табрик хати бу қарорларнинг якуни сифатида кўзга ташланади. Унда: «Социалистик реализм вазифалари савиясида бўлмоқ кишиларнинг ҳақиқий ҳаётини, уларнинг ҳисларини ва фикрларини чуқур билиш демакдир, уларнинг кечинмаларига нисбатан ўткир сезигрлик кўрсатиш ва буларни қизиқарли, тушунарли қилиб, реалистик адабиётнинг ҳақиқий намуналарига муносиб бадиий шаклда тасвирлай билиш демакдир. Социалистик реализм методи ҳозирги шароитда ёзувчидан бизнинг мамлакатимизда социалистик қурилишни тугаллаш ва социализмдан астасекин коммунизмга кўчишнинг вазифаларини яхши тушунишни талаб этади»<sup>2</sup>, дейилади.

Замонавийлик ва партиявиийлик, ҳаққонийлик ва foявийлик масалалари ёзувчиларнинг съезд ва Пленумларида кенг муҳокама қилинди. М. Шолоховнинг «Ҳар биримиз қалбимизнинг амри билан ёзамиз, қалбимиз эса партия ва халқникидир»<sup>3</sup>, деган ажойиб сўzlари худди шу съезд минбаридан жаранглаб эшитилди ва совет санъаткорларининг қалб даъватини ifода этди.

Шундай қилиб, Коммунистик партия Улуф Ватан урушидан кейинги дастлабки йилларданоқ адабиёт ва санъатга алоҳида ғамхўрлик қилди ва уни янада халқ ҳаётига яқинлаштириш учун фаол кураш олиб борди. Булар ўз самараларини бера бошлади.

Рус совет адабиётида, бошқа қардош халқлар адабиётида кўпдан-кўп йирик бадиий асарлар яратилди. М. Шолоховнинг «Улар Ватан учун жанг қилдилар», А. Фадеевнинг «Ёш гвардия», И. Эренбургнинг «Бўйрон», В. Ажаевнинг «Москвадан узоқда», В. Кочетовнинг «Журбиналар», Г. Николаевнинг «Ўрим», Л. Леонидовнинг «Донбас», А. Солженицыннинг «Архипелаг ГУЛАГ», А. Гайдарнинг «Любовь и вино» ва башка шахарийларни тушунишни талаб этади.

<sup>2</sup> Второй Всесоюзный съезд советских писателей. Стенографический отчет. М., 1956. С. 9.

<sup>3</sup> Уша жойда. 377-бет.

новнинг «Рус ўрмони», В. Лациснинг «Бўрон», Б. Қербобоевнинг «Дадил қадам» асарлари вужудга келди. М. Аvezов «Абай» эпопеясини, С. Айний тўрт томлик «Эсадаликлар»ини ёзиб битирди.

Улуғ Ватан урушидан кейинги ўзбек адабиётида умумсовет адабиётида бўлгани каби совет халқларининг уруш йилларидағи қаҳрамонлиги ва фидокорлиги, халқ хўжалигини тиклаш ва ривожлантириш, халқлар дўстлиги темалари, онг ва маиший турмушдаги феодализм ва капитализм сарқитларига, халқаро империалистик реакция ва агрессияга қарши тинчлик учун кураш темалари кенг ўрин олди.

Бу ўринда икки нарсани алоҳида таъкидлаб ўтиш керак. Улардан бири — бу даврда С. Айний, Ойбек, А. Қаҳҳор, Ойдин, П. Турсун каби адиллар фаолияти янада активлашди, прозанинг деярли барча жанрларида кўплаб асарлар вужудга келди. Ўзбек прозаси автобиографик, мемуар характеристидаги бадиий асарлар билан бойиди. Иккинчиси, бу даврда умуман ўзбек адабиётига, шу жумладан, проза соҳасига кўплаб янги кучлар кириб келиши билан изоҳланади. Совет воқеилиги унинг асосий тасвир обьекти бўлиб қолди. Лекин бу даврдаги адабий танқидчиликда ғоявий-бадиий жиҳатдан анча бақувват асарларни камситиш, айни вақтда, бадиий жиҳатдан анча кучсиз асарларга ортиқча баҳо бериш ҳоллари учраб турди. Бундан ташқари, адабий танқидчилик адабиётда, хусусан, прозада замонавий ҳаётни бадиий тадқиқ этишга интилиш аввалиги даврларга нисбатан бекиёс кучайганлигига керакли даражада эътибор бермади. Эллигинчи йилларнинг иккинчи ярмидан кейин замонавийликка катта эътибор берилиши муносабати билан урушдан кейинги дастлабки ўн йилликдаги адабий танқидчиликка замонавий мавзудаги қатор проза асарларига муносабатда рўй берган бундай жиддий нуқсонлар тузатилди. Айни вақтда, бу даврга келиб, ўзбек прозаси ўз тарихий тараққиётининг янги бир босқичига кўтарилганини тўғри кўрсатиш билан бирга, баъзи танқидчи ва адабиётшунослар бу даврга қадар, яъни 1945—1956 йилларгача проза ўзбек совет адабиётида «иккинчи даражали» ўринда эди<sup>4</sup> деган тезис билан майдонга чиқ-

<sup>4</sup> «Ўзбек совет адабиёти тарихи очерки»да ҳам то Улуғ Ватан урушидан кейинги биринчи ўн йилликка қадар ўзбек совет прозаси адабиётимизда «иккинчи даражали ўринда келаётган эди» деган тезисга дуч келамиз. Қаранг: Ўзбек совет адабиёти тарихи очерки. I том, Тошкент, 1961, 291-бет.

дилар. Бунга қўшилиш қийин. Агар масалага бадиий-ликнинг асосий мезонлари нуқтаи назаридан қарайдиган бўлсак, бу даврга қадар ҳам А. Қодирий, С. Айний, Ойбек, А. Қаҳҳорнинг ажойиб романлари, повестлари, ҳикоялари мисолида ўзбек прозаси катта тараққиёт босқичида эканини кўриш мумкин. Худди шу адибларнинг етук асарлари ўзбек прозасининг Иттифоқ миқёсида ва жаҳонда шуҳрат топишини таъмин этди. Улуғ Ватан урушидан кейинги биринчи ўн йилликда ўзбек прозасида янги воқеликни, ижодкорларни фаол ҳаракатда кўрсатиш тенденцияси ҳам фавқулодда кучайди. Унинг тематикаси ранг-баранглашди, проблематик кўлами бойиди, Октябрь революциясидан кейинги дастлабки мураккаб даврга эътибор бериши кучайди. Янги ўзбек ишчилари, хотин-қизларининг энг оғир шароитдаги шиддатли кураши Асқад Мухторнинг «Опа-сингиллар» романида кенг планда тасвирланди. Ўзбек зиёлиларининг машаққатли кураши ва ҳаёт йўли ҳақида ёзилган Парда Турсуннинг «Ўқитувчи» романи вужудга келди. Бошқача қилиб айтганда, бу даврга қадар яратилган романларнинг кўпчилигида, асосан, узоқ ва яқин ўтмишдаги тарихий воқеалар акс этган бўлса, энди замонавий ҳаёт, социалистик воқелик тасвирнинг марказига чиқди — янги ҳаёт қурувчилари, ижодкорлари бадиий тасвирнинг марказини ташкил этди.

Бу давр ўзбек прозасининг характерли хусусиятларидан яна бири — унда Улуғ Ватан уруши йилларida совет халқининг қаҳрамонлигини, ўзбек халқи вакилларининг зўр шижоатини эпик планда кенгроқ акс эттириш тенденциясининг бошланишидир. Айрим қисса ва романларда жангу жадал йилларидаги қаҳрамонликларни, ўзбек жангчиларининг катта синов давридаги тобланишини кўрсатишга эътибор берилди.

Янги характерли хусусиятлардан бири урушидан кейинги дастлабки даврдаги социалистик воқеликни ва совет кишиларининг қаҳрамонона турмушини тўлалигича бадиий тадқиқ этишга интилишидир. Ойбекнинг «Олтин водийдан шабадалар» романи ана шундай асарлардан бири эди. Ойбекнинг бу романи шу даврга келиб янги замон қаҳрамонлари — энди ўзбек романларида асосий қаҳрамон сифатида тасвирнинг марказига чиққанлиги ва талқин этилганлигини намоён этди.

Улуғ Ватан урушидан кейинги даврда яратилган повестларда совет воқелигининг турли-туман жабҳала-

ри, бадний картиналари намоён бўлди. Яъни, деярли ҳамма повестларда замонавий ҳаёт ва унинг бош йўналишининг хилма-хил картиналари, ижодкор, яратувчи қаҳрамонлар образи галереяси вужудга келди. Чўлқуварлар, пахтакор дэҳқонлар, пўлат қуювчи ишчилар, жангчи қаҳрамонлар, чорвадорлар, янги раҳбарлар, ўқувчи ёшлар...

Улуф Ватан урушидан кейинги даврда ўзбек поэзияси ҳам тез суръатлар билан ривожланиб борди. Бу давр ўзбек поэзиясида социалистик меҳнат, Ватан, Коммунистик партия, ҳалқлар дўстлиги, тинчлик учун кураш мавзулари кенг ўрин олди, биринчи планга чиқди. Бу борада F. Фулом, Ойбек, Уйғун, Шайхзода, Зулфия, Миртемир, А. Мухтор, М. Бобоев, Хамид Фулом, Мирмуҳсин, Р. Бобоҷон, Т. Тўла, Шукрулло, С. Акбарий каби ижодкорларнинг қатор шеърий тўпламлари, балладалари, поэмалари вужудга келди. Ғафур Фуломнинг «Мен Шарқдан келаётирман» шеърий тўплами СССР Давлат мукофотига сазовор бўлди.

Бу давр ўзбек поэзиясида ҳам прозада бўлгани каби замонавий ҳаётни акс эттириш ва янги фидокор қаҳрамонлар образини яратиш тенденцияси кучайди. Бу қаҳрамон фақат ўзбек тупроғида, ўз уйидаган воқеалар билан чекланмасдан, жаҳоннинг ҳамма бурчакларида рўй берадиган ўзгариш ва янгиликлар моҳияти билан қизиқади. Лирик қаҳрамоннинг фикрлаш доираси кенгайди, воқеа-ҳодисаларга Иттифоқ ва дунё миқёсидан қараб баҳо беришга интилиш тенденцияси авж олди.

Проза ва поэзия соҳасидаги ижодий тенденциялар драматургияда ҳам намоён бўлди. Улуф Ватан урушида қозонилган тарихий ғалабадан кейин ўзбек драматурглари социалистик воқеликни ва рўй берадиган янги воқеа-ҳодисаларни ҳақоний акс эттиришга ҳаракат қилди. Натижада «конфликтсизлик назарияси» кучайган бир даврда ўзбек драматургиясида бир қатор ғоявий-бадний салмоқли асарлар, яъни А. Қаҳҳорнинг «Шоҳи сўзана», К. Яшиннинг «Генерал Раҳимов», Уйғуннинг «Олтии кўл», «Қалтис ҳазил», «Навбаҳор», Назир Сафаровнинг «Шарқ тонги», Баҳром Раҳмоннинг «Юрак сирлари» каби қатор пьесалар вужудга келди. А. Қаҳҳорнинг «Шоҳи сўзана» асари СССР Давлат мукофотига сазовор бўлди. Хуллас, Ойбек маҳсус таъкидлаганидек, «Ўзбек совет адабиётининг тараққиёт йўлига кўз ташласак, борган сари инқилобий совет воқелигини чуқурроқ акс эттиришга, жонли ҳаёт-

га борган сари активроқ таъсир этишга интилганини кўрамиз<sup>5</sup>.

## ИРИК ТАДҚИҚОТЛАР ИУЛИДАГИ ИЛК ҚАДАМЛАР

Бу давр ўзбек адабиётшунослиги ва танқидчилигининг ривожи ҳам адабиётимизда рўй берадиган мана шу силжишларга боғлиқ эди.

Танқидчиликнинг бу даврдаги муҳим хусусияти — унинг адабиётшунослик билан чамбарчас боғланиб, биргаликда ривож топишидир. Шу сабабли ушбу «Очерклар»нинг бу бобида танқидчилик билан бир қаторда адабиётшуносликка катта ўрин берилади.

Ўзбек танқидчилари биринчи навбатда Коммунистик партияянинг тарихий қарорларини амалга оширишда, юксак ғоявий-бадиий асарларнинг яратилишида, адабий жараён ва унинг ривожланишини таҳлил қилишда фаоллик кўрсатишга интилди. Айни пайтда, ўзбек классик адабиёти тарихини, унинг атоқли нағояндлари ижодини ўрганиш, айрим нуқталарини қайта баҳолаш, баъзи хатоларни тузатишга интилиш жонланиб кетди. Алишер Навоийнинг 500 йиллик юбилейи 1948 йилда кенг нишонланди.

Мазкур юбилей муносабати билан Алишер Навоий ҳақида бир қатор мақолалар эълон қилинди. Алишер Навоий ҳаёти ва ижоди ҳақида Ойбек таҳрири остида ўзбек ва рус тилларида «Ўлуф ўзбек шоири» номли (Тошкент, 1948 йил) тўплам нашр этилди. Ундан аввалроқ, 1946 йилда Ленинград шарқшунослари томонидан тайёрланган «Алишер Навоий» тўплами чоп этилган эди. Олим Шарафиддиновнинг «Алишер Навоий» номли тадқиқоти (1939) И. Султонов таҳрири остида қайта босилиб чиқди. Е. Э. Бертельснинг «Навоий» монографияси, Абдураҳмон Саъдийнинг «Навоий ижоди — ўзбек классик адабиёти тараққиётининг олий босқичи» номли илмий иши вужудга келди. Уларда шоир яшаган давр, ўша даврдаги сиёсий-иқтисодий ҳаёт, шоирнинг асарлари, уларнинг давримиз учун аҳамияти кўрсатилди. Булардан ташқари, С. Айнининг «Алишер Навоий» (Салинобод, 1948), В. Абдулаевнинг «Алишер Самарқандда» (Самарқанд, 1948), Ҳ. Зарифовнинг «Навоий замондошлари» (Тошкент, 1948) китоблари чоп этилди. Бу даврда Алишер Навоийнинг тадқиқотлари тарихий-литературни охшашларни тушунишади.

<sup>5</sup> Ойбек. Баъзи вазифалар ҳақида икки оғиз гап//Шарқ юлдузи. 1946. № 1—2. 18—19-бетлар.

вой ижоди ҳақида қатор докторлик ва кандидатлик диссертациялари ҳимоя қилинди. Умуман, адабиёт илми тез суръатлар билан тараққий эта бошлади. В. Зоҳидов, В. Абдуллаев, А. Саъдий, И. Султоновлар фан докторлари бўлиб етишдилар.

Ўзбек адабиётшунослигида ва танқидчилигига классик меросни атрофлича ўрганиш ва текшириш ишларининг жонланишида объектив ва субъектив сабаблар мавжуд эди. Бу даврда ўзбек адабиётшунослари ва танқидчилари марксча-ленинча методологияни янада чуқурроқ эгалладилар. Уларда тадқиқот тажрибалари анча кучайди, илмий кадрлар етишди. С. Айний, Ойбек, F. Гулом, Шайхзода, А. Саъдий, Воҳид Зоҳидов, И. Султонов, X. Ёқубов, Гулом Қаримов, Ҳоди Зарифов каби ўзбек адабиёти тарихининг билимдонлари сафига Азиз Қаюмов, Н. Маллаев, М. Юнусов, X. Расул, С. Қосимов, X. Раззоқов, С. Алиев, А. Иброҳимов ва бошқа истеъодди ёш кучлар келиб қўшилди. Авваллари кўпроқ ўзбек совет адабиёти билан шуғулланниб келган тадқиқотчи ва танқидчилар ҳам классик адабиётимизга алоҳида эътибор бердилар. А. Саъдий, Шайхзода, И. Султоновнинг қатор мақолаларидан ташқари X. Ёқубовнинг «Алишер Навоий «Хамса»си» (Ёш ленинчи, 1948, 9 май), «Сабъая сайёр»да шаҳар қатламлари вакилининг образи» (Ёш ленинчи, 1948. 15 май), «Навоийнинг «Сабъая сайёр» достони» (Шарқ юлдузи, 1948, № 5) номли қатор мақолалари босилиб чиқди. Ҳомил Ёқубов бу йилларда ўзбек классик адабиётининг таниқли вакили шоир Турди ижодиётига алоҳида эътибор берди ва қатор илмий мақолалар эълон қилди. Ниҳоят, 1947 йили «Турди ва унинг адабий муҳити» номли илмий ишини якунлади.

Ойбек, Ҳамид Олимжои, Faфур Гулом, Уйғуннинг шоир Муқимий ҳаёти ва ижодиёти ҳақидаги мақолаларидан кейин қирқинчи ва эллигинчи йилларнинг бошларида вужудга келган Ҳомил Ёқубовнинг «Халқпарвар шоир Муқимий» (1949), «Ўзбек демократ шоiri Муқимий» (1953) рисолалари, X. Зарифовнинг «Муқимий ҳаёти ва ижодига оид материаллар» (1955) китоби, Гулом Қаримовнинг қатор илмий тадқиқотлари шоир адабий меросини ўрганишда эришилган жиддий ютуқлар сирасига мансуб.

Адабиётшунос Маҳмудали Юнусов узоқ йиллар мобайнида ўзбек классик адабиётининг таниқли намояндаларидан бўлган Комил Хоразмий ҳаёти ва ижодини тадқиқ этди ва 1948 йили бу шоир ижоди ҳақидаги

илмий ишини якунлади. 1950 йили С. Қосимовнинг «Хоразмий ижоди» номли иши вужудга келди ва илмий тадқиқот иши сифатида тан олинди. Холид Расулнинг «Фурқат — маърифатпарвар демократ шоир» (1954) рисоласи, «Зокиржон Фурқат ижоди» (1954) китоби, Ҳошимжон Рассоқовнинг «Завқий ҳаёти ва ижоди» (1955) номли монографияси босилиб чиқди. Азизхон Қаюмов шоир Махмур ҳаёти ва ижоди ҳақида илмий ижодий изланиш ишлари олиб борди ва, ниҳоят, 1956 йилда «Махмур. Танқидий-биографик очерк ва асарларидан намуналар» китоби босмадан чиқди. 1948 йили Р. Муқимов «Гулханийнинг ҳаёти ва адабий фаолияти» номли илмий ишини тугатди. Бу иш ҳам биринчи маҳсус тадқиқот ҳисобланарди.

Бу даврда ўзбек адабиётшунослари ва танқидчилари ўзбек халқ оғзаки ижодини тадқиқ этиш борасида ҳам жиддий муваффақиятларга эришдилар. Бу соҳада Ҳоди Зарифов, Мансур Афзалов, Музайяна Алавиянинг хизматлари алоҳида таҳсинга сазовор. Ҳоди Зарифов ва В. М. Жирмунскийнинг «Узбекский героический эпос» номли йирик илмий тадқиқоти Москвада (1947) чоп этилди. Ҳоди Зарифов бу йилларда «Фозил Йўлдош ўғли», «Кунтуғмиш» достони ҳақида» каби қатор илмий тадқиқотларни яратди ва кўплаб халқ достонларини нашр эттириди. Музайяна Алавиянинг «Янги қўшиқлар» (1949), «Ўзбек халқ қўшиқлари» (1954), «Гражданлар уруши, халқ хўжалигини тиклаш ва социалистик индустрлаш даври ўзбек халқ поэтик ижоди» (1955) китоблари чоп этилди. Мансур Афзалов бу йилларда улуғ шоир Алишер Навоийнинг «Фарҳод ва Ширин» достонининг халқ варианти ҳақида тадқиқот ишлари олиб борди ҳамда ўзбек халқ эртакларини тўплаш, нашр этиш ва илмий таҳлил қилишга алоҳида эътибор берди.

1940 йилнинг иккинчи ярмидан бошлаб адабиётшунослигимиз ва танқидчилигимизда ўзбек совет адабиёти, унинг улкан намояндалари ижодини монографик планда чуқур ўрганиш, хилма-хил ҳаётий проблемалар бўйича тадқиқот ишлари олиб бориши кенг ўрин ола бошлади. Натижада атоқли санъаткорларнинг ижодига бағишлиган адабий-биографик очерклари вужудга келди<sup>6</sup>. Ўзбек совет адабиётининг кейинги намоянда-

<sup>6</sup> Юсуф Султоннинг «Ҳамза Ҳакимзода ҳаёти ва ижодиёти» (1949), И. С. Брагинскийнинг «Садриддин Айни. Материалы к биографии и творческой характеристике» (1948), «Садриддин Айни.

лари ижоди ҳақида ҳам ўнга яқин танқидий-биографик рисолалар босилиб чиқди<sup>7</sup>. Авторлар бу шоир ва ёзувчилар ҳаёти ва ижодий йўлиниң турли даврларини, асарларининг асосан ғоявий-тематик йўналишини кўрсатиб беришга ҳаракат қилдилар.

Адабиётшуносларимиз ўша даврларда алоҳида шоир ё адилларимиз ижодларини ўрганишда катта ишларни амалга оширидилар. Бироқ ҳаёт илм-фанинг тараққиети жиддий умумлашма даражасига кўтарилиган кўламли тадқиқотларни талаб қиласар эди. Маълум даврлар адабий ҳаракатчиликни, адабий жараённи умумлаштириш керак эди. 50-йилларга келиб бу масала кун тартибига қўйилди. Сарвар Азимовнинг «Ўзбекистонда адабий танқидчиликнинг ривожланишига доир баъзи масалалар»<sup>8</sup> мақоласида ҳам, Абдулла Қаҳҳорнинг «Совет ёзувчилари Бутунитифоқ иккинчи съездининг якунлари ва Ўзбекистон ёзувчиларининг вазифалари» докладида ҳам ҳаётнинг бу талабига эътибор берилди. А. Қаҳҳор шундай деган эди: «Совет адабиёти, украин ва белорус совет адабиётлари тўғрисида... нашр қилинган очерклардан ўрнак олиб, бизнинг адабиётшуносларимиз яқин фурсатларда ўзбек совет адабиёти очеркини яратишлари лозим»<sup>9</sup>.

«Улуғ Ватан урушигача бўлган беш йилликлар даврида ўзбек совет адабиёти» (Ҳомил Ёқубов) ва «Улуғ Ватан уруши даврида ўзбек совет адабиёти» (Турсун Собиров томонидан) номли обзорлар яратилиб, 1953—1955 йилларда босилиб чиқдики, булар даврлар бўйича адабий жараённи ўрганиш соҳасидаги биринчи қадамлар эди. Тўғри, ёзувчиларимиз ҳаёти ва ижоди ҳақида ёзилган танқидий-биографик очеркларнинг ҳам, муайян даврлар бўйича ёзилган адабий обзорларнинг ҳам савиаси бир хил эмас. Бир қатор танқидий-биографик очеркларда муайян ёзувчи ҳаёти ва ижодига онд материалларни йиғиши ва шу асосда

---

Очерк о жизни и творчестве» (1954), З. Ражабовнинг «С. Айни — историк таджикского народа. Краткий исторический очерк» (1951), Ҳомил Ёқубовнинг «Гафур Фулом. Танқидий-биографик очерк» (1953), «Ойбек. Танқидий-биографик очерк» (1955). Сарвар Азимовнинг «Ҳамид Олимжон ҳаёти ва ижоди ҳақида» (1955) китоблари юзага келди.

<sup>7</sup> Абдулла Олимжоннинг «Шоира Зулфия» (1953), «Амин Умарий» (1954), Н. Владимированинг «Ойдии ижоди» (1954), А. Ҳайитметовнинг «Ҳасан Пўлат» (1954), Н. Раҳимовнинг «Султон Жўра» (1954) рисолалари шулар жумласидандир.

<sup>8</sup> Шарқ юлдзузи. 1954. № 3.

<sup>9</sup> Шарқ юлдзузи. 1955. № 4. 117-бет.

уларнинг ғоявий-тематик йўналишини баён қилиш, бадий асарларни эса кўпроқ тематик планда текшириш билан олиб борилди, фикр-мулоҳазалар баъзан умумий тарзда ифода қилинди.

КПСС Марказий Комитетининг адабиёт ва санъат ҳақидаги тарихий қарорларини амалга оширишда, ёт идеологиянинг ҳар қандай кўринишларига шафқатсиз бўлиш ҳамда гоясизликка, конфликтсизликка қарши шиддатли кураш авж олган йилларда баъзи адабиётчilar ва танқидчilar танқидни шовқин-суронли «пўстак қоқиш» (А. Сурков) кампаниясига айлантиришга, танқиднинг ўтини адабиётимиздаги баъзи бир яхши асарларга қаратишга интилиш ҳоллари ҳам рўй берди. Абдулла Олимжон шоира Зулфия ҳақида ёзилган рисоласида унинг урушдан кейинги дастлабки шеърларидаги ижодига гўё совет санъаткорига ёт бўлган маслаксиз бир неча шеър оралаб қолганини баён қиласди. Унинг фикрича, шеърларда абстракт, ноаниқ фикрлар илгари сурилган. Масалан, у 1946 йилнинг бошида ёзилган «Хаёллар» шеърида шоирани аллақандай хаёллар етаклаб юргани, шу хаёллар унга гоҳ қувонч, гоҳ ғам-алам келтириши тўғрисида пессимистик мулоҳазалар юритгани, ҳатто шу «сехргар, ғаддор» хаёллар шоирани ўзига мафтун этгани, қандайдир «чўл чечагини» тутқизгани — илҳом бергани, «салқин кеча камол топтирган қирғоқ» эса шоирдан шеър талаб қилгани ҳақида ёzádi. Адабий жамоатчилик кейинчалик бу хилдаги ўринсиз танқидларга тўғри жавоб берди. Қисман Озод Шарафиддинов Абдулла Олимжонов рисоласига муносабат билдириб бу хилдаги асоссиз танқидларни назарда тутиб ёzádi: «Мен бу ўринда «тўқмоқлик танқид»дан мисол келтирас эканман, яна бир марта Зулфиянинг ижодий ўсиш йўлида қанчалик мураккаб ғовлардан ўтганини эслатмоқчи эдим. Бундай танқид Зулфияни поэзиянинг осон, беозор, тикансиз йўлига бошлади. Бундай танқид учун силлиқкина шеърлар керак эди. У шеърларда инсоний ва ҳаётий мазмун бўлиши шарт эмас, одам — мода дўконларидағи совуқ қўғирчоқлардек ҳамиша ишшайиб туриши зарур эди. Шеърлардан ғоявийлик талаб қилинар, бироқ бу ғоявийлик ғоят бир ёқлама тушунилган, «яшасин», «ура» сўзларини қўшиш йўли билан ҳосил бўладиган ғоявийлик эди. Бундай шеърларни ёзиш учун на талант, на қалб, на ақл талаб қилинади, фақат ҳунар

керак, холос. Зулфия бу енгил йўлга учмади, талантига, қалбининг буйруғига содиқ қолди»<sup>10</sup>.

Афсуски, Абдулла Олимжон рисоласидагидек ижодга, бадний ҳодисаларга бир томонлама ёндашишлар, ғоявийлик масаласини тор тушуниб, тор талқин қилишлар, ўзбек тилининг бой имкониятларидан ижодий фойдаланишга интилишларга асоссиз қарши чиқишлиар бошқа танқидчилар асарларида ҳам учраб турар эди.

## ДИҚҚАТ МАРҚАЗИДА — АДАБИЁТШУНОСЛИК ВА ТАНҚИДЧИЛИК РИВОЖИ

ВКП(б) Марказий Комитетининг идеология масалалари юзасидан чиқарган қарорлари муносабати билан совет адабиётининг энг муҳим вазифалари ва актуал проблемалари ҳақида марказий газета ва журнallарда ўйлаб редакцион ва бош мақолалар бериб борилди.

«Литературная газета»да «Совет адабиётининг ғоявий вазифалари» (1946. 24 август) номли бош мақола босилиб чиқди. Шундан сўнг мазкур газетада А. Деев<sup>11</sup>, В. Лацис<sup>12</sup>, И. Семпер<sup>13</sup>, К. Корсакас<sup>14</sup> ва бошқаларнинг қатор мақолалари эълон қилинди.

Бу даврда ўзбек адабиётшунослари ва танқидчилари бошқа миллий адабиётларда бўлгани каби марказий газета ва журнallарда босилган бундай мақолаларга тез-тез мурожаат қилиб борди. «Правда» газетасида эълон килинган А. Фадеев<sup>15</sup>, Н. Грибачев<sup>16</sup>, В. Фролов ва В. Ситов<sup>17</sup>, С. Шипачев<sup>18</sup>, В. Фролов<sup>19</sup>, В. Озеров<sup>20</sup>, В. Ермилов<sup>21</sup>, К. Симонов<sup>22</sup>, Н. Тихонов<sup>23</sup>, К. Федин<sup>24</sup>,

<sup>10</sup> Шарафиддинов Озод. Адабий этюдлар. Тошкент. 1968. 98—99-бетлар.

<sup>11</sup> Деев А. Украин адабиётшуносларининг хатолари. 1946. Сентябрь.

<sup>12</sup> Лацис В. Латиш совет адабиётининг вазифалари. 1946. 28 сентябрь.

<sup>13</sup> Семпер И. Эстон совет адабиёти. 1946. 19 октябрь.

<sup>14</sup> Корсакас К. Литва совет адабиёти. 1946. 16 ноябрь.

<sup>15</sup> Адабий-бадний журнallар ҳақида. 1947. 2 февраль; Адабиёт ва адабий танқид ҳақида. 1949. 7 август.

<sup>16</sup> Поэзияда космополитизм ва формализмга қарши. 1949. 16 февраль.

<sup>17</sup> Ёзувчиларнинг ижодий ўсишлари ҳақида кўпроқ ғамхўрлик қилинсин. 1952. 21 июль.

<sup>18</sup> Юксак поэзия учун. 1952. 13 декабрь.

<sup>19</sup> Фош қилиш санъати. 1953. 8 февраль.

<sup>20</sup> Бош масаладан четда. 1953. 8 май.

<sup>21</sup> Социалистик реализм учун. 1954. 3 июнь.

<sup>22</sup> Ҳаётнинг асоси — драматургиянинг асосидир. 1954. 4 июль.

Б. Рюриков<sup>25</sup>ларнинг мақолалари ўзбек адабий танқидчилигига фаол таъсир кўрсатди.

Бошқа республикаларда бўлганидек, Ўзбекистонда ҳам адабий танқидни ривожлантириш масалалари кенг муҳокама қилинди. 1946 йили (26 августда) Тошкентда ВКП(б) МҚнинг «Звезда» ва «Ленинград» журналлари ҳақида», «Драматик театрлар репертуари ва уни яхшилаш тадбирлари тўғрисида»ги қарорлари ва галдаги вазифалар муҳокама қилиниб, тегишли тадбирлар белгиланди.

1949 йили Ўзбекистон Ёзувчилари союзи танқид ва адабиётшунослик секциясини очишга қарор қилди. Шу йили Ўзбекистон Ёзувчилари союзи ва Ўзбекистон ССР Министрлар Совети ҳузуридаги санъат ходимлари ижодий активининг Тошкент шаҳар йиғилиши ўтказилди.

Шу йили Ўзбекистон К(б)П Марказий Комитети Ўзбекистон Ёзувчилар союзининг иши тўғрисида маҳсус қарор қабул қилди. Бу қарор муносабати билан Ўзбекистон Ёзувчилари союзининг (1949 йил 9—10 июлда бўлган) III Пленумида Ўзбекистон К(б)П Марказий Комитетининг секретари М. Ваҳобов доклад қилди ва кенг муҳокама этилди. Унда ўзбек совет адабиётининг аҳволи ҳақида қилинган доклад ҳамда Н. Тихоновнинг қўшимча докладида адабий танқидга жиддий эътибор берилди.

Ўзбекистон Ёзувчилари союзининг IV Пленумида (1950. 15 март) ўзбек адабий танқидчилигини ривожлантириш масалалари маҳсус муҳокама қилинди. Унда ўзбек совет адабиёти ва адабий танқиднинг аҳволи ва уни ривожланиш тенденцияларидаги қатор жиддий нуқсонларни кўрсатди. Пленум материалларида ўша йиллар адабий танқидчиликда анча кучайган қатор зарарли тенденциялардан иккитасига тўхталиб, шундай дейилади: «Булардан бири шуки, баъзи танқидчилар асарнинг ғоявий мазмунини чуқур текширмасдан, унинг бадиий формасига тегишли баҳо бермасдан, факат унинг мавзуи яхши бўлгани учун мақтайдилар, асарнинг мундарижасини айтиб бериш билан кифояланадилар.

Иккинчи зарарли ҳол шуки, баъзи танқидчилар асардаги яхши томонларнинг қадрига етмайдилар, унга тўғри баҳо бера олмайдилар, чуқур текширмасдан ту-

<sup>23</sup> Кўп миллатли совет адабиётининг янги босыичи учун. 1954. 17 июль.

<sup>24</sup> Юксак поғонага. 1954. 15 декабрь.

<sup>25</sup> Адабиёт ва ҳаёт. 1956. 26 август.

риб сўкаверадилар, айрим камчиликларини топиб, уни юлиб олиб асарни бутунлай «остин-устун қилиб юборадилар»<sup>26</sup>.

Худди шу йили «Культура и жизнь» газетаси «Звезда Востока» журнали ҳақида «Ўз қиёфасига эга бўлмаган журнал» редакцион мақоласини (1950. 20 август) эълон қилди. Мақолада «Звезда Востока» журналида Ҳамид Фуломнинг «Олмос қизи», «Ёзёвон қиссанси», А. Удаловнинг «Яккама-якка» повести, В. Липконинг «Синов кузда бошләнади» номли пьесаси, Ю. Арбатнинг «Тунги жанг», И. Матюшиннинг «Мирсаиднинг бахти», «Ердаги юлдузлар» сингари ғоявий савияси паст ва бадиий заиф асарлари босилгани алоҳида таъкидланди. Мақола Ўзбекистон Совет Ёзувчилари союзи Президиуми йиғилишида муҳокама қилинди. Йиғилиш қатнашчилари журналининг таңқид ва библиография бўлими ишидаги камчиликларни ҳам кўрсатдилар. Шу йиғилиш хulosаларига бағищланган материалда: «Бу бўлим Ўзбекистон адабиёти ва санъати ҳақида дурустроқ материал бермади. 1949 йилда берилган 12 та тақриз ва мақоланинг фақат иккитаси Ўзбекистон ёзувчиларининг асарларига доир бўлиб, уларнинг ҳар бири — Ойбекнинг «Қизлар» достони ҳақидаги хато ва чалкаш тақриз, иккинчиси эса «Ёшлик дафтари» номли альманах тўғрисида саёз мулоҳазалар билан тўлиб-тошган мақоладир»<sup>27</sup>, дейилган эди.

Муҳокамада «Звезда Востока» журналидаги нуқсонлар «Шарқ юлдузи»га ҳам тааллуқлик эканлиги махсус таъкидланди. Бу ўринда «Ўзбекистон коммунисти» журналида (1953. № 12) босилган «Шарқ юлдузи» журналининг юксак ғоявий-бадиийлиги учун курашайлик» номли мақолани алоҳида таъкидлаб ўтиш керак. Мақолада журнал саҳифаларида муайян даражада яхши асарлар босилгани қайд этилгач, асосан ундаги камчилик ва нуқсонлар очиб ташланади. Журнал Иброҳим Раҳимнинг «Ҳаёт булоқлари» романини босиб чиқарганда ундаги жиддий нуқсонларга аҳамиятсизлик билан қарагани, унда «ғоясиз, тузсиз асарлар» эълон қилинаётгани кескин қораланди. «Журнал ва унинг редактори Мирмуҳсин... ўз ишига бепарволик билан қараган. Натижада журнал саҳифасида ғоясиз, сиёсий жиҳатдан бўш асарлар ўрин олган». Мақолада М. Бобоев, Ўйғун, Эгам Раҳим, Жуманиёз Жабборов, Мир-

<sup>26</sup> Шарқ юлдузи. 1950. № 5. 105—106-бетлар.

<sup>27</sup> Шарқ юлдузи. 1950. № 10. 169-бет.

муҳсин, Асқад Мухтор, Адҳам Раҳмат, Холид Расул, С. Абдуқаҳорнинг баъзи бир асарларидаги нуқсонлар кўрсатилди. Айни вақтда, журналда босилаётган мақола ва тақризларда қатор қусурлар очиб ташланди. Б. Файзиевнинг «Қуёш болалари» тўплами ҳақида», С. Лейкиннинг «Атоқли актриса ҳақида китоб» тақризларидаги фикрий саёзлик, М. Юнусовнинг «Ойдиннинг ижодий йўли» мақоласи «шошмашошарлик билан ёзилгани» таъкидланади ва Г. Марьяновскийнинг «Шукур Бурхоннинг артистик маҳорати» тақризидан шундай мисол келтирилади: «...К. Яшиннинг «Номус ва муҳаббат» пьесасидагиFaфур ролини ижро этиши Шукур Бурхоннинг биринчи ютуғидир». Ахир «Номус ва муҳаббат» драмасида Faфур образи йўқ-ку» (43-бет). Мақолада «Шарқ ўлдузи» журналининг 1952—1953 йиллардаги сонларида ўзбек совет адабиёти материаллари асосида ёзилган ҳамда «проблематик масалаларга бағишлиланган бирорта ҳам мақоланинг йўқлиги», «адабиёт назариясига оид масалалар ёритилмаётгани» танқид қилинди.

1951 йил ноябрда Москвада ўзбек адабиёти декадаси очилиши муносабати билан Ўзбекистон К(б)П Марказий Комитетининг Биринчи секретари А. Э. Ниёзовнинг «Ўзбек совет адабиёти ва санъати юксалишда» мақоласи «Правда» газетасида (1951. 17 ноябрь) босилиб чиқди. Мақолада Ойбекнинг «Олтин водийдан шабадалар», А. Қаҳҳорнинг «Қўшчинор чироқлари», П. Турсуннинг «Ўқитувчи» ва бошқа асарлар ўзбек адабиётининг муваффақиятлари сифатида кўрсатилди. Ўткир Рашиднинг «Йиллар ва одамлар», Р. Аҳмадийнинг «Қамолот», С. Абдулланинг «Тоҳир ва Зухра», «Алномиш» асарларининг камчиликлари кўрсатилди<sup>28</sup>.

Ўзбек ёзувчиларининг бир қатор асарларига декада вақтида рус адилари юқори баҳо бердилар. Ёзувчи ва танқидчиларимизнинг пойтахт адабий жамоатчилиги билан учрашувини машҳур шоир А. Сурков очди<sup>29</sup> ва адабиётимизнинг ютуқларига юксак баҳо берди. Н. Погодиннинг ёзувчи А. Қаҳҳорнинг «Шоҳи сўзана» асари ҳақида «Талантли комедия»<sup>30</sup>, Вера Инбернинг «Одамлар ва китоблар ҳақида»<sup>31</sup> ва танқидчи К. Зе-

<sup>28</sup> Шарқ ўлдузи. 1951. № 11.

<sup>29</sup> Ўзбек санъати ва адабиёти декадаси очилишида сўзланган нутқ//Қизил Узбекистон. 1951. 20 ноябрь.

<sup>30</sup> Литературная газета. 1951. 20 ноября.

<sup>31</sup> Уша жойда.

линский «Ўзбек адабиётининг гуллаб-яшнаши»<sup>32</sup> мақолаларида ўзбек совет адабиётининг юксалаётгани анча кенг кўрсатилди. Москва танқидчиларининг F. Фулом, Уйғун, Мирмуҳсин, А. Мухтор, Зулфия, Р. Бобоҷон, Э. Раҳим, М. Бобоев ҳамда бошқа шоир ва ёзувчиларимиз асарларини муҳокама қилиши ўзбек танқидчиларига ҳам ижобий таъсир этди. Шу билан бирга, «Ўзбек совет адабиётида адабий танқидчилик ва адабиётшунослик ҳали жуда орқада қолган соҳа эканлиги декада вақтида жуда аниқ кўрингани» махсус таъкидланди: «Адабиётшунослар ва танқидчилар декадага биронта катта мукаммал асар олиб боролмадилар. Танқидчиларимизнинг кундалик матбуотда чиқаётган танқидий мақолалари эса кўпинча юксак савияга эга эмас, талабга тўла жавоб бермайди»<sup>33</sup>. Шу боисдан Ўзбекистон совет ёзувчиларининг VII Пленумида Уйғуннинг «Ўзбекистон Совет Ёзувчилари союзининг ўзбек совет адабиётини ривожлантиришдаги вазифалари» (1952, март), «Ўзбекистон К(б)П Марказий Комитетининг X Пленуми якунлари ва ўзбек совет адабиётини ривожлантиришдаги вазифалар» (1952 йил, апрель) ҳақида қилган докладларида ва сўзга чиққан нотиқлар адабиётшунослик ва адабий танқидчиликни ривожлантириш масалаларига айрича аҳамият бердилар. Натижада Ўзбекистон Ёзувчилари союзида адабиётшунос ва танқидчиларнинг республика кенгаши (1954, февраль) бўлди. Кенгашда адабиётшунослик ва танқидчиликнинг муҳим, актуал вазифалари атрофлича, кенг муҳокама қилинди, ютуқ ва нуқсонлар таҳлил этилди.

1954 йил 13 августда бўлиб ўтган Ўзбекистон Ёзувчиларининг III съездига ва Уйғуннинг «Ўзбек совет адабиётининг аҳволи ва вазифалари» номли докладида ўзбек адабиётшунослиги ва танқидчилигига ижобий тенденциялар махсус таъкидланди.

1954 йилда Совет ёзувчиларининг Бутуниттифоқ II съездига КПСС Марказий Комитети табрик йўллаб, унда танқид ва адабиётшуносликнинг юксак миссияси ва камчилиги қайд этилди. «Жуда бой классик меросни ишлаб чиқиши ва совет адабиётининг тажрибалари ни умумлаштириб бериши, адабиётимизнинг ғоявий-бадий ўсишига кўмаклашуви лозим бўлган адабий тан-

<sup>32</sup> Учительская газета. 1951. 21 ноября.

<sup>33</sup> Декада якунларига доир//Шарқ юлдузи. 1951. № 12. 6—7-бетлар.

қидчилик ва адабиётшунослик ҳали ҳам жиддий ра-  
вишда кейинда қолмоқда»<sup>34</sup>, дейилади ўша табрикда.

Съездда А. Сурков «Совет адабиётининг аҳволи ва  
вазифалари тўғрисида» доклад, К. Симонов «Прозани  
ривожлантириш проблемалари», Самад Вурғун «Совет  
поэзияси», Н. Тихонов «Ҳозирги замон жаҳон прогрес-  
сив адабиёти», А. Корнейчук «Совет драматургияси»,  
Б. Полевой «Болалар ва ёшлар учун совет адабиёти»  
ва Б. С. Рюриков «Совет адабий танқидчилигининг  
асосий проблемалари» ҳақида қўшимча доклад қилди-  
лар. Деярли ҳар бир докладда адабиётшунослик ва ада-  
бий танқид масалаларига тўхтаб ўтилди. Махсус док-  
ладда эса адабиётшунослик ва танқидчиликнинг ғоявий  
принциплари, танқидчилик ва ҳаёт, танқидчиликда ма-  
ҳорат масалалари ҳар тарафлама муҳокама этилди.  
Бундан ташқари, докладда совет танқидчилиги методо-  
логиясининг баъзи томонлари белгилаб берилди.

Бутуниттироқ ёзувчиларининг II съездида адабий  
танқидчиликка тегишли кўрилган қатор масалалар Ўз-  
бекистон Ёзувчилар союзи фаолиятида ҳам ўз аксини  
топди. Ўзбекистон Совет Ёзувчилари союзи правление-  
сининг II Пленумида (1955. 7—8 март) А. Қаҳҳор «Бу-  
тиниттироқ совет ёзувчилари II съездининг якунлари  
ва Ўзбекистон ёзувчиларининг вазифалари» ҳақида  
доклад қилди ва қатор ёзувчиларининг замонавий воқе-  
лик билан жонли алоқалари кучли эмаслиги, бу ҳол  
уларнинг ҳозирги замон мавзуларида чуқур мазмунли,  
бадиий гўзал асарлар яратишига халақит бераётгани-  
ни махсус таъкидлadi.

Абдулла Қаҳҳор адабиётшунослик ва танқидчилик-  
нинг актуал масалалари ҳақида гапириб, илмий кадр-  
лар тайёрлашга жиддий эътибор бериш зарурлигини  
махсус таъкидлadi ва адабиёт илмига тегишли баъзи  
бир юзакиличларни Я. Д. Пинхасовнинг кандидатлик  
диссертациясига ёзилган автореферат мисолида кўрса-  
тиб берди.

Ўзбекистон Ёзувчилар союзининг III Пленумида  
(1956. 6—7 июль) адабиётшунослик ва адабий танқид  
масалаларига алоҳида эътибор қилиниб, адабий тан-  
қидчилигимиздаги юзакиличкниң умумадабиётимиз рав-  
нақи учун салбий таъсир этгани, бу ҳол ҳаётни бўяб  
тасвирлашда намоён бўлганини қатор асарлар мисоли-  
да кўрсатиб берилди. Кейинги пайтларда шеъриятда

<sup>34</sup> Шары юлдузи. 1954. № 12. 6-бет.

риторика ва мадҳиябозликнинг кучайгани ҳақида далилли фикрлар айтилди.

Бироқ шу билан баробар адабиётшунослик ва адабий танқидчилик соҳасида олга силжишлар қизғин тус олаётгани мамнуният билан қайд этилди ва бу борада ҳал қилиниши зарур масалалар жиддий қўйилди. Пленумда сўзга чиққан бошқа нотиқлар ҳам адабий танқидни янада ривожлантириш масалалари ҳақида фикр-мулоҳазаларини билдиришди.

Ўзбекистон партия ташкилотининг съездларида бадиий адабиёт, хусусан, танқид ва адабиётшуносликка муттасил эътибор берилди. Ўзбекистон КП XI съезди (1952 йил, сентябрь) резолюциясида «Ўзбек миллый ижодий кадрларини кўтариш ва тарбиялаш ишини яхшилаш, асосий диққат-эътиборни ёш ўзбек ёзувчи ва шоирлари, драматург ва композиторлари, музика ва адабий танқидчилари, кино санъати ходимларига ғоявий-назарий ва ижодий ўсишлари борасида ҳар томонлама ёрдам кўрсатиш зарурлиги таъкидланди. Худди шу ерда «уларнинг бадиий маҳоратини оширишга эришув»<sup>35</sup> зарур масала сифатида қайд этилди.

Қисқаси, СССР ва Ўзбекистон Ёзувчилар союзининг съездлари, Пленумлари адабиётшунослик ва адабий танқид масалаларига жиддий эътибор бериб келди ва бу ҳол ўзбек адабиётшунослиги ва танқидчилигининг кейинги камолотида муҳим омил бўлди. Буни поэзия, проза ва драматургия соҳасида босилган юзлаб тақризлар ва мақолалар ҳам исбот қиласи.

### ТАҚРИЗ — АДАБИЁТНИНГ ОЙНАСИ

Улуғ Ватан урушидан кейинги биринчи ўн йилликдаги ўзбек адабий танқидчилиги ҳақида умумий тасаввурга эга бўлиш учун ўша даврда босилиб чиққан тақризларга бир назар ташлаб ўтмоқ лозим. Бу яна шунинг учун ҳам зарурки, уларда ижодкорларнинг кузатган ва кўрган-кечирганлари, давр руҳи, адабий жараённинг муайян хусусиятлари бутун мураккаблиги билан намоён бўлади.

Бу даврдаги адабий танқидчиликда энг аввало поэтик асарлар ҳақида битилган тақризлар кўпчиликни ташкил қиласи. Бу соҳада энг актив тақризчилар Ҳ. Ёқубов ва А. Олимжоновлар эди. Коллектив автор-

<sup>35</sup> Резолюции и решения съездов Коммунистической партии Узбекистана. Ташкент. 1957. С. 423.

ларнинг шеърий тўпламлари ҳақида қатор тақризлар босилиб чиқди.

Бу даврда ўттиздан ортиқ поэма яратилди. Уларнинг ҳар бири ҳақида тақризлар эълон қилинди. А. Алимұхамедовнинг «Уста Фиёс» поэмаси ҳақида баъзи мулоҳазалар» тақризи узоқ йиллар мобайнида мунозараларга сабаб бўлиб келди. Тўғри, бу мақола нуқсонлардан ҳоли эмас. Лекин ундаги баъзи ижобий тенденциялар, асарга бадиият нуқтани назаридан ёндашиш жиҳатидан ибратлидир.

Маълумки, бу даврда ўзбек поэзиясида риторика ва мадҳиябозлик хийла кучайган эди. Таңқид ҳам буни маҳсус таъкидлади: «Поэзиямизда эпик ва лирик жанрларнинг кўп хилдаги ранг-баранг турлари ўрнини риторика ва мадҳиябозлик эгаллаб олди... Сўнгги йилларда беташвиш идиллия, баландпарвоз дифирамблар билан тўла шеърлар кўпайиб қолди.

Кейинги икки йил ичида йигирмага яқин шеърлар тўплами чиқди-ю, буларнинг анчагинаси дарров унтиб юборилди... Бу шеърий тўпламлар... поэзиямизни янги, юқори босқичга кўтара олмади»<sup>36</sup>.

Юқорида келтирилганлардан ташқари, бу давр ўзбек поэмалари ҳақида босилган тақризлар тўғрисида гап боргандা М. Бобоев<sup>37</sup>, И. Расулов ва Т. Фозибоев<sup>38</sup>, Ш. Шоабдураҳмонов<sup>39</sup>, С. Анорбоев<sup>40</sup>, Ҳ. Муҳамадхонов ва У. Бурҳоннинг<sup>41</sup> тақриз ва мақолаларини эслаб ўтишга тўғри келади.

Янги шеърий тўплам ёхуд поэмаларга битта тақриз бериш билан чекланиб қолинмаган. Қатор асарларга журнал ва газеталарда бир неча тақриз ва мақолалар бериб борилган. Бир асар ҳақида ҳам вақтли матбуотда хилма-хил тақризлар босилиб чиқсан. Баъзан тақризчилар бир-бирлари билан мунозара қилишга интилдилар. Масалан, С. Анорбоев «Қадрдон дўстлар» поэмасини батафсил таҳлил қиласар экан, А. Олимжоннинг бу асар ҳақида ёзган тақризига (Қизил Ўзбекистон. 1948. 30 октябрь) муносабат билдиради, баъзи фикрларига қўшилади, айримларини рад қиласади. А. Олим-

<sup>36</sup> Бадиий ва ғоявий юксаклик сари//Шарқ юлдузи. 1956. № 8. 9-бет.

<sup>37</sup> «Пўлат қуювчи» поэмаси ҳақида//Шарқ юлдузи. 1948. № 3.

<sup>38</sup> «Боғбон» поэмаси ҳақида//Шарқ юлдузи. 1948. № 4.

<sup>39</sup> «Пўлат қуювчи» поэмасининг тили ҳақида баъзи мулоҳазалар//Шарқ юлдузи. 1948. № 4.

<sup>40</sup> «Қадрдон дўстлар» поэмаси ҳақида//Шарқ юлдузи. 1949. № 2.

<sup>41</sup> Қатта ижодий йўлда//Шарқ юлдузи. 1950. № 2.

жон поэмадан бир парча келтириб, унда «шеърий шавқ, бадиият йўқ», улар «ибтидоий форма», «оддий насрой иборалардир» дейди. С. Анербоев тақризчининг бундай фикрларига қўшилмайди. Учинчи тақризчи С. И. Лиходзиевский эса поэмада шоир ғоявий ниятини шундай талқин қиласди: «Рамз Бобожоннинг... қаҳрамони А. Твардовскийнинг машҳур поэмаси қаҳрамони Василий Тёркиннинг ҳамполки ва яқин дўсти бўлган ўзбек жангчиси Аҳмаддир. Шоир ўз зиммасига анча мураккаб вазифани — Тёркиннинг қандайдир даражадаги адекват образини, унинг ўзбекча вариантини яратишни олган. А. Твардовский билан мусобақалашишга Рамз Бобожоннинг қурби етмади. «Қадрдан дўстлар» қаҳрамонининг машҳур Тёркинга олиб бориб боғланishi фирт механик ва шартлидир»<sup>42</sup>.

Бу хилдаги танқидлар, яъни баъзан ортиқ даражада кўтариб юбориш ёки, аксинча, асарларни инкор этиб, йўққа чиқаришга интилишлар бу давр адабиёт-шунослиги ва танқидчилигига тез-тез учраб турадиган ҳодисалардан бири эди. Кўпинча, бадиий асарлар темасининг муҳимлиги, актуаллиги қайта-қайта таъкидланар, ижодкор маҳоратига, асарларнинг бадиий қимматига эса жиддий эътибор берилмасди.

Бу даврда қатор шеърий тўпламлар тўғрисида вақтли матбуотда савияси хилма-хил, бир-бирига зид келадиган фикрлар баён қилинган жуда кўп тақризлар босилиб чиқди. Биргина «Шарқ юлдузи» журналининг ўзидаFaфур Ғулом, Мирмуҳсин, Зулфия, Туроб Тўла, Саида Зуннунова, Мамарасул Бобоев, Султон Акбарий, Ҳамид Ғулом, Жуманиёз Жабборов, Шуҳрат, Назарматларнинг поэма ва тўпламларига қатор тақризлар эълон қилинди.

Бу тақризларда адабий танқидчилик ўзбек поэзиясида замонавий ҳаёт воқеаларини акс эттириш кучайиб ва чуқурлашиб бораётганлигини кўрсатишга алоҳида эътибор берди. Бу хислат ўша даврда яратилган тақризларнинг бош фазилатидир. Бироқ тақризларда замонавийликни баъзан бир томонлама, юзаки талқин этишлар ҳам кўзга ташланди. Айрим пайтларда поэтик асарларда эришилган ютуқлар умумий тарзда, кўпроқ ғоявий-тематик планда кўрсатилди; социалистик реализм методи эса аввалдан тайёр бўлган муайян қонун-қоидаларнинг оддий йиғиндиси сифатида талқин қилинди. Натижада фикрий теранликтан, жўшқин ва

<sup>42</sup> Звезда Востока. 1954. № 8. С. 97—98.

жонли ҳиссиётдан маҳрум бўлган риторик, декларатив, баландпарвоз ва мадҳиябозлиқдан иборат асарларни асоссиз мақташ ҳоллари бўлди.

\* \* \*

Тадқиқ қилинаётган даврда ўзбек адабиёти тарақ-қиётида поэзияга қараганда прозанинг салмоғи камроқ кўринар эди. Шу сабабдан бўлса керак, прозаик асарлар ҳақида ёзилган тақриз ва мақолалар унча кўп эмас эди. Лекин бундан адабий танқидчилик проза асарларига бутундай эътиборсизлик билан қараган деган бир томонлама холоса чиқариш мумкин эмас, албатта. Энг муҳими, бу давр адабий танқидчилиги-даги юксалиш руҳи, айни пайтда, ундаги қатор қийинчаликлар, мураккаблик ва қарама-қаршиликларни енгib ўтиш прозаик асарларга муносабатда ҳам яққол кўринди. Буни тасаввур этиш учун биргина «Шарқ юлдузи» журналида эълон қилинган тақризларни эслаб ўтишнинг ўзи кифоя. Тақриз воситасида адабий танқидчилика қатор янги кучлар кириб келди.

Адабий танқидчилик атоқли санъаткор ёзувчиларимиз замонавий ҳаётни акс эттиришга фавқулодда жиддий эътибор берганлигини, ўзбек прозаиклари сафи А. Мухтор, Р. Файзий, С. Аҳмад, О. Ёқубов, П. Қодиров каби талантли ижодкорлар билан кенгайланлигини, даврнинг илфор қаҳрамонлари образини яратишга, ҳаётимиздаги иллатларни, кишилар онгидаги эскилил сарқитларини аёвсиз фош этишга киришганликларини махсус таъкидлаб адабиётимизда рўй бераётгани бу тенденцияларни қўллаб-қувватлаб бордилар.

Темир Фаттоҳ ўзининг «Коммунизм сари»<sup>43</sup> номли тақризида махсус альманаҳда эълон қилинган ўзбек хотин-қизларидаги фидокорона ватанпарварлик руҳини акс эттирган Раҳмат Файзийнинг «Улғайиш», Зулфиянинг «Ақл ёшда эмас, бошда», Ойдиннинг «Қўш қанот», Н. Сафаровнинг «Султон бўзчининг набиралари», Парда Турсуннинг «Чевар қиз», Туроб Тўланинг «Доно билан Яхши гул», «Зулфия Умидова», F. Ғуломнинг «Эр билан бас бойлашган хотин», «Чўтири хотиннинг толеи» каби очерк ва ҳикояларига қизғин муносабат билдиради, янги тенденцияларни қўллаб-қувватлайди.

<sup>43</sup> Коммунизм сари//Альманах. Нашрга тайёрловчи Зулфия. Ред-коллегия Раҳимбобоева, Ойдин, Зулфия, Светлана Сомова. Тошкент. 1949.

«Бу альманахни ўқиган китобхон озод хотин-қизлардаги улуғ мақсад ва муқаддас туйғуларни очиқ кўра олади»<sup>44</sup>, — деб деб ёзади танқидчи.

Танқидчи А. Олимжон ўзининг «Социалистик саноат темасида бадиий очерклар яратайлик» мақоласида ўзбек совет адабиётида «ишчи-қаҳрамон образларини яратиш учун бўлган» ижодий интилишни қўллаб-куватлаш зарурлигини қайд этади. Мунаққид Раҳмат Файзийнинг «Улғайиш», «Тўёна» тўпламларини, улардаги «Юз миллион», «Камолот», «Бир процентнинг қиммати», Ёқубжон Шукуронинг «Шонли йўл» очеркларини тематик планда таҳлил қилади, айни вақтда, «Улғайиш»да ёзувчи «қаҳрамоннинг ишларини бадиий равишда кўрсатишга кам аҳамият бергани», натижада баёнчилик кучайиб кетгани, бу «бадиий нуқсон», «Юз миллион», «Камолот» очеркларида янада кучли эканлигини қайд қилади. «Шонли йўл» очеркида, танқидчининг фикрича, партияниң ташкилотчи, уюштирувчи, тарбияловчи роли кўрсатилмаган<sup>45</sup>. С. Раҳим ҳам ўз такризида кўпроқ ёзувчи С. Абдуқаҳорнинг очерклиридаги камчиликларни кўрсатишга ҳаракат қилади. Тақризчи фикрча, «Республика юраги» тўпламидаги «Назокат», «Қитоб қаҳрамони», «Республика юраги» очерклари қуруқ баёнчилик, рўйхат ва рақамлар уюмидан иборат. Ёзувчи «Комсомоллар тузган колхозда» очеркида «Партиямизнинг колективлаштириш давридаги сиёсати нотўғри кўрсатилган», «Баҳор нафаси кезганд» очеркида эса автор «ўз истагини амалга оширишда хато йўлга кириб қолган». Тақризчи шундай хуносага келади: «С. Абдуқаҳор ҳозирги кунимизнинг актуал масалаларини ёритишда шошмашошарлик қилган, ижодий меҳнатга масъулиятсизлик билан қараган, натижада мазмунан саёз, бадиий жиҳатдан хом асарлар яратган. Тўплам совет китобхонларининг талабига жавоб берга олмайди»<sup>46</sup>.

Танқидчиликнинг энг қийин вазифаларидан бири — танқиднинг асосли бўлишидир. Ўқувчилар орасида «Асоссиз мақтovдан асосли танқид яхши» деган гап юради. Баъзи бир танқидчилар ўзининг «ожизлигини» яшириш ёки «кучли» қилиб кўрсатиш учун бадиий асарларга ялпи ҳужум қиладилар, баландпарвоз сўзлар билан қатор асарларни асоссиз танқид қилавера-

<sup>44</sup> Шарқ юлдози. 1950. № 3. 128-бет.

<sup>45</sup> Шарқ юлдози. 1950. № 11. 156—163-бетлар.

<sup>46</sup> Шарқ юлдози. 1951. № 7. 169-бет.

дилар. Юқорида эслатилган Темир Фаттоҳнинг тақризida очерклар жиддий таҳлил қилинмайди. Қўпроқ асоссиз мақтади. С. Раҳим тақризи эса унинг акси, яъни очерклар баландпарвоз сўзлар билан ишонарсиз тарзда қуруқ танқид қилинаверади.

Бу хилдаги танқидий чиқишилар ўша йилларда яратилган ҳикояларга муносабатда ҳам кўзга ташланади. Раҳим Муқимов ёзувчи Саид Назарнинг «Забардаст кишилар» (1949) ҳикоялар тўпламига ёзган тақризида «Утанбой ҳосилот комиссия» номли ҳикояни таҳлил қила туриб, «колхозда партия ва комсомол ташкилотларининг раҳбарлик роли сира кўринмайди», дея танқид қиласди. С. Назарнинг «Мерган» ҳикояси ҳақида мунаққид шундай дейди: «Балиқчи совхозининг аъзоси Ниёзмат бобо якка хўжалик балиқчидай ёлғиз қилиб кўрсатилади. Унинг меҳнатида на колектив, на техника ёрдами кўринади»<sup>47</sup>.

Ўша йиллардаги адабий танқидчиликда бу хилдаги талаб ва танқидий гапларга кўп дуч келамиз, мунаққидлар тақриз ва мақолаларда ёзувчилар олдига шу хилдаги «мажбурий талаблар» қўяр эди. Биринчидан, бутун совет адабиёти олдига қўйиладиган вазифаларни, яъни партия ташкилотининг раҳбарлик ролини, шахс ва колективнинг ўзаро муносабатини кенг миқёсда кўрсатишдан иборат талабларни механик тарзда ҳар бир очерк ва ҳикоядан талаб этиш мумкин эмас, қолаверса, бу ҳол ҳайётни маълум бир схема асосида кўрсатишга даъват қилишдан иборат эди. Адабиётда уни кўрсатиш «зарур», буни кўрсатиш «мумкин эмас» деган сохта қарашларнинг таъсири айниқса ёш ёзувчиларни қуролсизлантириб, уларнинг биринчи асарида эришган ютуқларини ривожлантиришга халақит беради, кейинроқ ҳатто уни тўғри йўлдан бутунлай чалғитиб юбориши ҳам мумкин.

С. Анорбоев ўзининг П. Қодировнинг «Шарқ юлдузи» (1950, № 4, 7, 10)да босилган «Яхшилик», «Икки учрашув», «Эркин» ҳикоялари ҳақида «Ёш ёзувчининг умидли овози» («Ёш ленинчи». 1951. 30 июнь) номли мақоласида ижодкорнинг энг аввало эришаётган ютуқларини кўришга, уни қўллаб-қувватлашга интилади. Ёш ёзувчининг келажагига умид қиласди. Бу қуруқ сафсата, расмий тарзда айтилган гап эмас, балки комил ишончга тўла қалб даъвати. Айни вақтда, С. Анорбоев ёш ижодкорнинг ҳикояларидаги нуқсонларга

<sup>47</sup> Шарқ юлдузи. 1950. № 4. 121, 123-бетлар.

безфарқ қараган эмас, улардаги мұайян камчиликларни хийла түғри күрсатған. Аммо С. Анорбоевнинг бу мақоласида ўша давр танқидчилегида бўлганидек, адабий ҳодисаларни қўпроқ ғоявий-тематик планда таҳлил қилишга интилиш кучли.

Бу йиллар танқидчилегида «турмушни бузиб кўрсатган», «воқелигимизни сохталаشتирган асар» деган қатъий, аммо асоссиз ҳукмлар анча учрайди. «Шарқ юлдузи» журналининг 1951 йил 5-сонида бу хилдаги танқидий мақолалардан иккитаси босилган. Улардан бири — Ўтқир Рашиднинг «Йиллар ва одамлар» китоби ҳақида С. Анорбоевнинг «Брак маҳсулот» номли мақоласи, иккинчиси — Р. Аҳмадийнинг «Қамолот» ҳикояси ҳақида Карим Йўлдошнинг «Воқелигимизни сохталаشتирган ҳикоя» деган танқидий мақоласи.

Бундай асоссиз танқид ҳақида гапириб, К. Симонов Совет ёзувчиларининг Бутуниттифоқ II съездиде қилган докладида шундай деган эди: «Танқидчилик соҳасида: «бу — туҳмат», «турмушни бузиб кўрсатган» деган сўзларни кўпинча ҳеч бир суриштиромай айтавериш ҳоллари ҳам бор. Бу асарларнинг авторлари совет воқелигига туҳмат қилиш ёки совет воқелигини бузиш ниятида бўлмаганликлари ва уларда бундай субъектив ниятнинг бўлиши мумкин эмаслигини ўзимиз ҳам сезиб турмиз ва тушунамиз. Бундай ҳолларда танқидчилар... ўзлари бу асарни ёзган киши онгли туҳматчи эканлигига ишонмас эканлар, уни онгли туҳматчи деб ёзмасликлари керак»<sup>48</sup>. Ўша йиллардаёқ А. Сурков ҳам: «Хатолари бўлган асарларни... танқид қилган вақтимизда танқидни шовқин-суронли «пўстак қоқиши» кампаниясига айлантириб юбормаслигимиз лозим... Танқидчиларимиз адабиёт манфаатлари учун лозим бўлган услуб ва йўлни ҳар вақт ҳам ўз ўрнида ишлата олмадилар. Буни эсда тутиш керак ва бу тўғрида гапириш керак»<sup>49</sup>, деб таъкидлаган эди.

Давр илмий адабиёти яна шуни ҳам кўрсатадики, бу йилларда ўзбек адабий танқидчилегининг тараққиёт тенденцияларини кўрсатадиган ижобий ҳодисалар унинг асосий йўналишини белгилар эди.

Бу давр ўзбек адабиётшунослари ва танқидчилари ҳикоянависликни янада ривожлантиришга жиҳдий аҳамият бердилар. Масалан, Ҳ. Ёқубовнинг «Абдулла Қаҳ-

<sup>48</sup> Шарқ юлдузи. 1955. № 2. 111-бет,

<sup>49</sup> Шарқ юлдузи. 1955. № 1. 33-бет.

ҳор новеллалари»<sup>50</sup> мақоласи журналинг қатор сонларида босилиб чиққандан сўнг танқидчи А. Алимұхамедовнинг «А. Қаҳҳор ҳикояларида психологик тасвир»<sup>51</sup> номли катта мақоласи чоп этилди. С. Лиходзиневский «А. Қаҳҳор ҳикоялари» (1947), И. Боролина-нинг «Абдулла Қаҳҳор ҳикоялари» номли тадқиқоти «Звезда Востока» журналинг икки сонида босилиб чиқди<sup>52</sup>. Айни вақтда, А. Алимұхамедовнинг «Абдулла Қаҳҳор ҳикояларида одам образи» (1948), И. Боролина-нинг «Абдулла Қаҳҳор ҳикоялари» (1953) ва П. Қодировнинг «А. Қаҳҳорнинг урушдан кейинги ижоди» (1954) номли диссертациялари вужудга келди.

Ҳ. Ёқубов, А. Алимұхамедов, И. Боролина ва П. Қодировнинг мақола ва тадқиқотлари ўзбек совет адабиётида ҳикоя жанрини, бу жанрнинг асосчиларидан бўлган А. Қаҳҳор ижодини ўрганишга қизиқишнинг, уни атрофлича кенг ва чуқур таҳлил қилишга интилишнинг кучайиб бораётганлигини кўрсатади. Бу даврага қадар А. Қаҳҳор реалист санъаткор, талантли ижодкор, моҳир ҳикоянавис сифатида маҳсус ўрганилмаган эди.

Ҳомил Ёқубов «Абдулла Қаҳҳор новеллалари» мақоласида А. Қаҳҳор асарларини конкрет ва жиддий таҳлил қилди. Мунаққид ёзувчи ҳикояларининг тарихий илдизларига назар ташлайди, унинг классик адабиётимиз ва ҳалқ оғзаки ижодидан, айни вақтда, рус ва Европа адабиётининг реалистик традицияларидан баҳраманд бўлганига алоҳида эътибор беради, типик шароит ва типик характерлар яратиш ҳақида фикрмuloҳазалар юритади. Булар фақат А. Қаҳҳорнинг реалистик ижодигина эмас, айни вақтда, бутун ўзбек совет адабиёти шаклланиши ва ривожининг тарихий манбалари ҳақида яхлит тасаввур этишга имкон беради. Тадқиқотчи биринчи ва иккинчи мақолаларида ёзувчининг Улуғ Ватан урушига қадар яратган ҳикояларида ўтмиш ҳаётини акс эттириш принциплари, воқеаларни лўнда ва сиқиқ ифодалashi, ортиқча деталларга берилиб кетмаслигини, реалистик характерлар яратиш маҳоратини кўрсатади. Айни вақтда, ёзувчанинг ижобий типларни тасвирлашдаги ўзига хос индивидуал хусусиятларига ҳам эътибор қиласи. А. П. Чеховдан ҳикоя техникасини, бадиий тип яратиш усулла-

<sup>50</sup> Шарқ ўлдузи. 1946. № 1—2, 3, 4—5.

<sup>51</sup> Шарқ ўлдузи. 1947. № 2—3.

<sup>52</sup> Звезда Востока. 1953. № 10—11.

ри ва воситаларини, кичик воқеа ҳамда деталлардан катта бадий умумлашмалар чиқара олиш санъатини ўрганиш ҳақида фикр-мулоҳазалар юритганда, танқидчи А. Қаҳҳорнинг миллий колоритни, яъни «халқ турмушининг тарихий-маҳаллий хусусиятларини, урфодати, характеристи, хулқи ва майший хислатлари» тўғри ва равshan кўрсатганлигини маҳсус таъкидлаб боради. А. Қаҳҳор ижодий услуби ҳақида гапириб, танқидчи «у ўз фикрини фақат образлар билан ифодалайди. Ҳикояларининг «объективлиги кишини ҳайратда қолдиради» дейди. Танқидчи таъкидлашича, ёзувчининг қарashi, «ташвиқоти», нияти ҳикояларининг бадий тўқимасидан туртиб, қалқиб, тошиб чиқиб турмайди ёки алоҳида ҳолида муаллақ бўлиб қолмайди.

Ҳомил Ёқубов ёзувчи А. Қаҳҳорнинг ўз асарларида ўзбек тилининг ғоят бой имкониятларидан моҳирлик билан фойдаланганига, сўзларни сиқиқ, фикрни кенг қилиб ифодалаш санъатини ўзлаштирганига, ҳар бир шахсни фақат ўз тили билан гапиртиришга ва шу сўзлари орқали характеристерини очишдаги истеъдодига айрича аҳамият беради.

Абдулла Қаҳҳор новеллалари ҳақидаги танқидчи-нинг учинчи мақоласида ёзувчининг уруш давридаги ҳикоялари анча кенг таҳлил қилинади. Бу мақола ҳам ибратли, чуқур фикр-мулоҳазаларга бой. Қези келганда шуни ҳам алоҳида таъкидлаш керакки, Ҳомил Ёқубов тадқиқотчи А. Алимұҳамедовнинг «Абдулла Қаҳҳор ҳикояларида психологик тасвир» номли мақоласига бир томонлама ёндашган. Унинг айrim мақолаларида ўша йилларнинг дағдағали муҳри хийла кучли. Ҳ. Ёқубов А. Алимұҳамедовнинг текшириш методини инкор этган. Уни формализмда айблаб, ҳатто «ашаддий эстет-космополит»<sup>53</sup> дея қоралаб чиққан эди. А. Сурков ибораси билан айтганда, бу хилдаги шовқин-суронли «пўстак қоқишлиар», «фош қилишлиар» баъзи бир ёзувчи ва танқидчиларни жонли адабий жараёндан четлашишга олиб келди. Тўғри, адабиётшунослик ва танқидчиларни ривожини бундай дағдағали субъективизм эмас, балки адабий жараёнга позитив муносабат, ўзбек классик ва совет адабиёти намояндалари ижодини атрофлича кенг ва чуқур тадқиқ қилишлиар

<sup>53</sup> Адабиётимизда эстет-космополитларни охиригача фош қилайлик//Қизил Ўзбекистон. 1949. 16 март; Адабиёт ва санъатда беватан космополитларни охиригача фош қилайлик//Қизил Ўзбекистон. 1949. 19 март.

белгилайди. Мунаққидларимиз шу йўл билан бориб, адабиёт илмини янада ривожлантирилар.

\* \* \*

Бу даврда ҳикоячиликни таҳлил қилишдаги турли-туманликлар, баҳслардаги бир-бирларига зид фикр-мулоҳазалар повесть ва роман жанрларига муносабатда ҳам кўзга ташланади.

Парда Турсуннинг «Ҳақ йўл» повести (1947) атрофида бўлган фикр олишув бу жиҳатдан характерли-дир. «Ёш ленинчи» газетасида бу повесть ҳақида қиз-гин мунозара бошланди. Шу муносабат билан С. Қосимов, Ҳ. Убайдуллаев, С. Азимовлар<sup>54</sup>, Султон Акба-рий<sup>55</sup>, И. Расулов ва Т. Фозибоев<sup>56</sup>, Шоҳид Тоҳир<sup>57</sup>, Султон Муҳаммаджонов<sup>58</sup>, Рўзи Юнусов<sup>59</sup> ва бошқа-ларнинг қатор мақолалари эълон қилинди.

Мунаққидлардан баъзилари повестнинг мавзуи ак-туаллигига ва ёзувчининг муҳим масалани дадил кў-тариб чиққанига эътибор бердилар, бошқа бирлари асардаги образларнинг мукаммал эмаслигини исбот-лашга ҳаракат қилдилар. Ёзувчининг биринчи ийрик асари «Ҳақ йўл»да эришган ютуқлари ва ундаги кам-чиликлар фақат «Ёш ленинчи» газетасидаги мунозара материалларидағина эмас, айни замонда, бошқа мақо-ла ва тақризларда ҳам маҳсус таъкидланди. Дм. Виф-леемский ёзади: «Парда Турсуннинг асар қаҳрамонла-ри кечинмаларини пейзаж билан боғлай олиши, персо-нажлар тилидаги индивидуал хусусиятларни таъкид-лаб кўрсатиши, портрет тасвиридаги усталиги, асосан, ҳаёт ҳодисалари ва конфликтларини тасвирлаш маҳо-рати навқирон ёзувчининг тугалланган повести жуда кенг китобхонлар оммаси учун илмий ва тарбиявий аҳамият касб этади, деб умид билдиришга асос бера-ди»<sup>60</sup>. Бу хилдаги мисолларни яна келтириш мумкин.

Ўша йиллардаги адабий танқидчиликда айrim по-вестларнинг ютуқ ва камчиликларини кўрсатишда са-ёзлик, юзакичилик ҳам рўй берди. Асқад Мухторнинг «Дарёлар тулашган жойда» повести ҳақида Т. Соби-ровнинг «Илҳомбахш ҳаёт ҳақида қисса»<sup>61</sup>, О. Соби-

<sup>54</sup> «Ҳақ йўл» повести ҳақида//Ёш ленинчи. 1948. 29 февраль.

<sup>55</sup> Бизнинг мулоҳазаларимиз//Ёш ленинчи. 1948. 7 март.

<sup>56</sup> Етилмаган образлар//Ёш ленинчи. 1948. 11 март.

<sup>57</sup> «Ҳақ йўл» — кураш йўли//Ёш ленинчи. 1948. 14 март.

<sup>58</sup> «Ҳақ йўл» тўғрисида//Ёш ленинчи. 1948. 21 март.

<sup>59</sup> Турмушдан лавҳалар//Ёш ленинчи. 1948. 25 март.

<sup>60</sup> Звезда Востока. 1948. № 11. С. 108.

<sup>61</sup> Қизил Ўзбекистон. 1950. 30 август.

ровнинг «Ўзбек металлурглари ҳақида повесть»<sup>62</sup>, С. Лиходзиевскийнинг «Повесть о металлургах»<sup>63</sup>, Б. Брайнинанинг «Там, где сливаются реки»<sup>64</sup> номли тақризлари босилиб чиқди. Ниҳоят, А. Пантелеевнинг «Материал ва бўёклар»<sup>65</sup> номли мақола ва очиқ хатлари эълон қилинди. Парда Турсуннинг «Ҳақ йўл» повести тўғрисида бўлганидек, бу асар ҳақида танқидчилар ҳар хил фикр-мулоҳазаларни билдирилар. Кўплар уни ортиқ даражада мақтаб чиқдилар. Назаримизда жиддий нуқсон шундаки, мақташ ҳам, баъзи бир танқидий гаплар ҳам етарли даражада асосли, ишонтирати бўлмади. Бизнинг бу ўринда А. Пантелеевнинг ёзувчига ёзган очиқ хатини алоҳида эслатиб ўтишимиз бежиз эмас. Юқорида номи тилга олинган танқидчиларга нисбатан Пантелеев бу повестга принципиал ёндашди ва ёзувчига муносабатини самимий, дўстона танқид йўли билан билдириди. Шу туфайли бўлса керак, А. Пантелеевнинг «Материал ва бўёклар» номли очиқ хати Ўзбекистон Ёзувчилари союзининг очиқ партия мажлисида атрофлича кенг муҳокама қилинди ва барча ижодкорлар шундай хулосага келдилар: «А. Пантелеевнинг хати фақат ёзувчи Асқад Мухторгагина эмас, балки Ўзбекистоннинг барча ёзувчилари, танқидчиларига катта сабоқ бўлди. Хат катта меҳр ва самимият билан ёзилган. А. Пантелеевнинг бу хати дўстона танқиднинг намунасиdir. Шунинг учун ҳам Ўзбекистон ёзувчиларининг барчаси бунга алоҳида диққат билан қарашлари керак». Дарҳақиқат, бу бирдан-бир тўғри хулоса эди. Ҳозирга қадар ўша давр ўзбек адабиёти, прозаси, жумладан А. Мухтор ижоди ҳақида гап борганда мутахассислар А. Пантелеевнинг бу мақоласини тилга оладилар. Асқад Мухтор ўз мақолаларининг бирида ўша даврдаги ижодий изланишларидаги қийинчиликларни эслаб шундай деган эди: «Ёзган асарларимда ҳали жуда кўп камчиликлар бор, профессионал маҳорат етишмайди, образларни тип даражасига кўтаришга оқизлик қилаётиман. Бу қийинчиликларни енгиб ўтиш учун тинмай ўқиш-ўрганиш, халқ турмушини чуқур билиш, санъаткорлар маҳоратини эгаллаш зарур»<sup>66</sup>.

Бу ҳақ гапни Асқад Мухторга тенгдош авлодлар-

<sup>62</sup> Шарқ юлдузи. 1951. № 12.

<sup>63</sup> Правда Востока. 1950. 8 октября.

<sup>64</sup> Правда Востока. 1951. 12 август.

<sup>65</sup> Дружба народов. 1952. № 1; Шарқ юлдузи. 1952. № 8.

<sup>66</sup> Ўзбекистон хотин-қизлари. 1954. № 8. 15-бет.

нинг ҳаммаси, шу жумладан, ўша йилларда повесть жанрида қалам тебратаетган Парда Турсун, Ҳамид Ғулом, Раҳмат Файзий, Ҳаким Назир, Саид Аҳмад каби ижодкорлар ҳам такрорлашлари, шундай дейишлари мумкин эди. Парда Турсуннинг «Ҳақ ўйл», «Ўқитувчининг ўйли» повестлари қайта-қайта ишланиши, яъни «Ўқитувчи» романининг вужудга келиши тарихи ҳам, Ҳаким Назир «Қўкорол чироқлари» повестини, Раҳмат Файзий «Чўлга баҳор келди» асарини қайта-қайта ишлаши ҳам бу фикрнинг тўғрилигини кўрсатади. Масалан, Ҳаким Назирнинг «Қўкорол чироқлари» повести (1954) сюжет ва композицион қурилишида, образлар талқинида жиддий нуқсонлар мавжуд эди. Адабий танқидчилик бу асардаги бир қатор камчиликларни очиб ташлади. Ёзувчи адабий жамоатчиликнинг тўғри фикрларини эътиборга олди ва бу асарини қайта-қайта ишлади, ниҳоят, у «Сўнмас чақмоқлар» (1958) номи билан босилиб чиқди. Натижада ғоявийбадий жиҳатдан анча бақувват асар вужудга келди.

Раҳмат Файзийнинг «Чўлга баҳор келди» (1951) асари ҳақида ҳам шундай дейиш мумкин. Бу асар ҳақида ҳам ўзбек ва рус тилларида қатор тақриз ва мақолалар босилди<sup>67</sup>. Бу асар ҳақида танқидчилик шундай ёзган эди: «Меҳнат кишининг кўпқиррали ҳаётидан ажралмасдир. Бироқ кўпгина асарларда қаҳрамон фақат жисмоний меҳнат процессидагина тасвирланади. Қаҳрамоннинг ўйлари, интилишлари, маънавий дунёси, психологияси, унинг ҳаёти, муҳаббати, қизиқиш доираси ёзувчилар томонидан четлаб ўтилади. Натижада туссиз, нурсиз персонажлар адабиёт сахифаларидан кўпроқ ўрин эгалламоқда.

Ёш ёзувчи Раҳмат Файзийнинг «Чўлга баҳор келди» повестида худди шундай камчиликлар бор. Повесть Мирзачўлни ўзлаштириш темаси — актуал темага бағишлиланган. Автор чўлни гуллаб-яшнаётган пахта плантациясига айлантириш учун Фарфона водийсидан келган ёш ватанпарварлар образини тасвирлашга интилган, лекин ёшлар меҳнатини уларнинг кўпқиррали ҳаётидан ажралган ҳолда берган. Повесть қаҳрамонла-

<sup>67</sup> Мұхаммаджонов С. Чўлга баҳор келди//Қизил Ўзбекистон. 1952. 1 июль; Крылов В. В пустыню пришла весна//Комсомолец Узбекистана. 1951. 25 октября; Дроzdov A. Победы и поражения молодого писателя//Новый мир. 1951. № 12; Брайнина Б. Творцы «второй природы»//Правда Востока. 1951. 4 августа; Батъ Л. Новое в узбекской прозе//Октябрь. 1952. № 1.

рининг образлари бой кечинмалардан маҳрум этилган, улар схематик ва кишини зериктирадилар»<sup>68</sup>.

Жамоатчилик фикридан, танқидидан тўғри хулоса чиқарган талабчан ёзувчи Раҳмат Файзий ўз повести устида қунт ва чидам билан ишлади. Бу ҳақда гапириб О. Шарафиддинов шуларни алоҳида қайд этади: «Маълумки, бу повесть... ҳали том маъноли реалистик асар даражасига кўтарила олмаган эди. Жамоатчилик ўша пайтларда асарнинг муҳим ва актуал темада ёзилганини қайд қилиш билан бирга, унинг камчиликларини ҳам кўрсатиб берди. Китобхонларнинг танқидий мулоҳазаларига эътибор билан қараган автор ўз асарини қайтадан ишлашга киришида ва ундан уч йил ўтгач, повестнинг янги вариантини ўқувчиларга тақдим этди... Бадиий асар авторнинг фарзандидай гап. Майиб гўдакни тузатиб, одам қилиш она учун бениҳоя машақкат бўлгани каби майиб асарни қайтадан яратиш, ҳалқа манзур бўладиган даражада кўтариш ҳам ёзувчидан жуда катта ижодий жасоратни, сабот ва иродани, чексиз меҳнатсеварликни талаб қиласди. Шунинг учун ҳам иккинчи марта туғилган «Чўлга баҳор келди» повестини ижодий мардликнинг жонли намунаси деб айтиш мумкин»<sup>69</sup>.

Демак, бу давр ўзбек прозаси, хусусан, унинг йирик жанрлари — повесть ва романлар тўғрисида гап борар экан, яна шуни маҳсус таъкидлаб ўтиш лозимки, бу даврда жамоатчиликнинг бадиий асарларга талабчанилиги ошди, ёзувчилар китобхонлар олдидаги масъулиятини янада чуқурроқ ҳис қила бошлади ва ўз-ўзига талабчанлик кучайди. Айни шу йилларда ўзбек повестларида «қайта туғилиш» содир бўлди. «Чўлга баҳор келди», «Қадрдон далалар», «Қўкорол чироқлари» каби повестларнинг янги вариантлари вужудга келди.

Худди шу хилдаги манзарани романчиликда ҳам куатиш мумкин. А. Қаҳҳорнинг янги асари «Қўшчинор» (1947) ва «Қўшчинор чироқлари» (1951) номлари билан, яъни бир романнинг икки варианти вужудга келди. Парда Турсуннинг «Ўқитувчининг йўли» (1949) романи иккинчи туғилди ва «Ўқитувчи» (1953) номи билан босилиб чиқди. А. Қаҳҳорнинг «Қўшчинор» романи даставвал 1946—1947 йилларда «Шарқ юлдузи»да, сўнгра 1948 йили «Звезда Востока» журналида бо-

<sup>68</sup> Правда. 1953. З июня. (Қизил Ўзбекистон. 1953. 14 июнь).

<sup>69</sup> Шарафиддинов Озод. Ижодий меҳнат самараси// Шарқ юлдузи. 1956. № 6. 109-бет.

силиб чиқди. Романин адабий жамоатчилик самимий ва қизғин кутиб олди. «Бу йилнинг энг йирик прозаик асарларидан бири, шак-шубҳасиз, ўзбек прозаиги Абдулла Қаҳҳорнинг «Қўшчинор» романи бўлди,— деган эди Ойбек.— Бу — колхоз қурилиши ҳақидаги, янги социалистик қишлоқ ҳақидаги йирик полотнодир. Роман сюжети хийла мураккаб. Романинг бош қаҳрамони Сиддиқжоннинг ҳаёт йўли ҳам мураккаб. Қаҳҳор ўз романида бир қатор совет қишилари образини маҳорат билан яратиб берди»<sup>70</sup>. Ф. Каримов ўзининг «XXX йил ичидаги ўзбек совет прозаси» номли мақоласида «Қўшчинор» фақат А. Қаҳҳор ижодида эмас, айни замонда, умуман ўзбек совет прозасининг йирик ютуғи»<sup>71</sup>дир, деб баҳо берди. Роман рус тилида босилиб чиққач, Юрий Лебединскийнинг тақризи «Литературная газета»да эълон қилинди. У ёзувчи эришган ютуқларни алоҳида таъкидлайди ва бош қаҳрамон Сиддиқжоннинг мураккаб ҳаёт йўли ҳақида шундай дейди: «Бу одамнинг қайта туғилишига оид чуқур ички кечинмалари, руҳий ўзгаришлари ёзувчи томонидан жуда ҳаққоний, жуда ифодали қилиб кўрсатилган. А. Қаҳҳор янги одамнинг шаклланишидаги бутун мураккаблик ва теранликни очиб берган. Сиддиқжон образи авторнинг муваффақияти ва романнинг бош фазилатидир»<sup>72</sup>.

Адабий баҳслардаги ўта хилма-хиллик, жумладан, муайян бир асарни ортиқча мақташ ёки бутунлай салбий баҳолаш ҳоллари «Қўшчинор» романига муносабатда ҳам ёрқин кўринади. Н. Тихонов бу роман ҳақида шундай деган эди: «А. Қаҳҳорнинг «Қўшчинор» романни ҳақида маҳсус мунозара бўлди. Бу роман аввал машҳур асарлар қаторига қўшилган эди»<sup>73</sup>. Сўнгра романда жиддий камчиликлар борлигига эътиборнинг кучайганлигини маҳсус таъкидлайди. Бу хилдаги танқидий фикр-мулоҳазаларни кўплаб келтириш мумкин. Биз бу ўринда А. Қаҳҳор ижодининг тадқиқотчиларидан П. Қодировнинг қўйидаги фикрини келтириш билан чекланамиз. У ёзади: «Ижобий баҳоларда ҳали тамомланмаган романнинг ютуқлари бир оз ошириб айтилган бўлса, кейинчалик, романга берилган салбий баҳоларда унинг камчиликлари жуда ҳам ошириб кўр-

<sup>70</sup> Айбек М. Узбекская литература на подъеме//Звезда Востока. 1947. № 8. С. 71.

<sup>71</sup> Шарқ ўлдузи. 1947. № 11. 171-бет.

<sup>72</sup> Литературная газета, 1948. 14 августа.

<sup>73</sup> Шарқ ўлдузи. 1950. № 2. 9-бет.

сатилади. Сўнгги ҳол ўша даврда адабиёт ва санъатга бўлган дорматик муносабатлар билан боғлиқ эди. Жумладан, шундай асоссиз, салбий баҳолар менинг 1952—1954 йилларда ёзилган кандидатлик диссертациямда ҳам бор»<sup>74</sup>. Бу ўз камчиликларини тўғри эътироф этишдир.

Бу давр ўзбек адабиётшунослиги ва танқидчилигига Ойбек ижоди ҳақида қатор мақолалар босилиб чиқди. Баъзи асарлари тўғрисида мунозаралар бўлди, кескин танқид қилинди. Ҳомил Ёқубовнинг «Ойбек»<sup>75</sup>, «Ёзувчи Ойбек»<sup>76</sup>, «Ойбек прозасида бадиий тасвир»<sup>77</sup>, «Ойбек романлари»<sup>78</sup>, «Ҳаёт прозаси»<sup>79</sup>, «Романы Айбека»<sup>80</sup> каби қатор мақолалари вужудга келди. 1955 йилда олимнинг «Ойбек. Танқидий-биографик очерк» китоби чоп этилди. Бу китоб ўзбек адабиётшунослиги ва танқидчилигига муҳим воқеа бўлди. Озод Шарафиддинов бу асарга ёзган тақризида<sup>81</sup> танқидчининг ишини юксак баҳолади, айниқса фикрнинг илмий қуввати — кучига, бу борада олиб борган мунозаранинг изчиллиги ва мантикий асосланиши, ишонарли йўналиш касб этишига махсус эътибор қилди ҳамда танқидчининг бундай нодир хусусиятини рўй-рост кўрсатиб берди. Тўғри, бу йилларда Ҳ. Ёқубовнинг ишларидан ташқари,Faфур Гуломнинг «Айбек — литературовед»<sup>82</sup>, А. Абборов ва А. Ҳайитметовнинг «Ойбек поэзияси»<sup>83</sup>, Ш. Шоабдураҳмоновнинг «Ойбек романларининг тили»<sup>84</sup> каби бир қатор мақолалар босилиб чиқди.

Юқорида махсус таъқидлаганимиздек, «Қўшчинор» каби «Олтин водийдан шабадалар» романига ҳам адабий танқидчилик турли хил муносабатда бўлди. Буни маълум даражада тасаввур этиш учун И. Султоновнинг «Ҳаётбахш шабадалар»<sup>85</sup>, В. Зоҳидовнинг «Ойбекнинг янги романни ҳақида»<sup>86</sup>, «Адабиётнинг партия-

<sup>74</sup> Узбек совет адабиёти тарихи. III том. I-китоб. Тошкент. 1972. 75-бет.

<sup>75</sup> Шарқ юлдузи. 1949. № 11.

<sup>76</sup> Үқитувчилар газетаси. 1949. 7 декабрь.

<sup>77</sup> Ёш ленинчи. 1955. 19 май.

<sup>78</sup> Шарқ юлдузи. 1955. № 5.

<sup>79</sup> Қизил Узбекистон. 1955. 24 янв.

<sup>80</sup> Звезда Востока. 1955. № 5.

<sup>81</sup> Совет Узбекистони маданияти. 1956. 19 январь.

<sup>82</sup> Звезда Востока. 1955. № 8.

<sup>83</sup> Шарқ юлдузи. 1955. № 5.

<sup>84</sup> Шарқ юлдузи. 1955. № 10.

<sup>85</sup> Қизил Узбекистон. 1950. 7 апрель.

<sup>86</sup> Шарқ юлдузи. 1950. № 10.

вийлиги учун»<sup>87</sup>, «Ҳозирги ўзбек совет адабиётидаги баъзи камчиликлар ҳақида»<sup>88</sup>, З. Кедринанинг «Фрагменты большого полотна»<sup>89</sup>, Е. Михайловнинг «Нерешенная тема» («Ветер золотой долины»)<sup>90</sup> каби тақриз ва мақолаларини эслашнинг ўзи кифоя. «Қўшчинор» сингари бу роман ҳам босилиб чиққандан кейин 1950 йил апрель ойида махсус муҳокама қилинди. Сўнгра романга, унинг марказий қаҳрамонига бутунлай бир-бирига зид нуқтаи назарлар пайдо бўлди. Н. Тихонов ёзади: «Ойбек ўзбек пахтакорларининг фидокорона иши ҳақида «Олтин водийдан шабадалар» номли янги роман ёзди. Романда янгилик белгилари равшан ва тўғри равишда кўзга ташланади. Бу асарда биз ёш колхозчиларни, кекса пахтакорларни, Совет Армиясининг урушдан қайтиб келиб, колхоз партия ташкилотининг секретари бўлган офицерларини кўрамиз. Кўп асарларда партия раҳбарининг роли фақат шартли кўрсатилар эди, бу асарда омманинг раҳбари, етакчиси бўлган партия ташкилотининг секретари яхши кўрсатилган»<sup>91</sup>. М. Шевердин эса романга бошқачароқ ёндашди: «Ўқтамда илғор идеал учун курашда коммунистларга хос бўлган мақсадга интилиш йўқ... авторнинг хатоси шундан иборатки, у кўп жиҳатдан қаттиқ қаҳр билан қоралашга лойиқ бўлган образни ижобий қаҳрамон... намуна қилиб кўрсатишга уринади»<sup>92</sup>. М. Щевердиннинг мақоласи ҳам романнинг марказида турган Ўқтамни бошдан-оёқ «индивидуалист, қаттиқ қаҳр билан қоралашга лойиқ бўлган образ» деб, ундаги мавжуд муҳим фазилатларни йўққа чиқаради. «Қизил Ўзбекистон» газетаси (1954. 15 декабрь)да Ўқтамномига синъязянлик Худойберди Элохуновдан келган хат эълон қилинди. У ёзади: «Эҳтимол, нотаниш кишидан бу хатни олиб ҳайрон бўласиз. Улуф меҳнатсеварлигинги, талантингиз, революцион foянигиз ва коммунизм ишига қўшаётган хизматингиз мени ва дўстларими ни ҳозир хитой халқи амалга ошира бошлаган беш йиллик планни муваффақият билан бажариш учун курашимизда меҳнат зафарлари сари унданмоқда. Сизнинг ватанпарварлик ҳаракатингиздан руҳланиб, ўз кучимиз-

<sup>87</sup> Ўзбекистон коммунисти. 1950. № 9.

<sup>88</sup> Қизил Ўзбекистон. 1950. 10 ва 15 декабрь.

<sup>89</sup> Литературная газета. 1951. 15 ноября.

<sup>90</sup> Звезда Востока. 1952. № 6.

<sup>91</sup> Тихонов Н. Узбекистон совет адабиётининг муваффақиятлари ва камчиликлари//Шарҳ юлдузи. 1950. № 2. 10-бет.

<sup>92</sup> Звезда Востока. 1954. № 8. С. 115—116.

ни аямасдан сиздек бўлишга тиришамиз. Бугун сиз борайтган йўлдан эртага биз ҳам борамиз». Бу факт ҳам М. Шевердиннинг ноҳақлигини ва Ўкта образининг ҳаётийлигини, ижобий қаҳрамонлигини исбот этади.

Бу даврда «Қўшчинор чироқлари», «Олтин водийдан шабадалар» билан бир қаторда «Ўқитувчи» ва «Опа-сингиллар» вужудга келди. Адабий танқидчилик кейинги икки романга асосан ижобий муносабатда бўлди. П. Турсуннинг «Ўқитувчи» романи ўзбек адабиёти ва санъатининг Москвада бўладиган декадаси муносабати билан аввал рус тилида (1951), кейинчалик ўзбек тилида (1953) босилиб чиқди. Рус адабий жамоатчилиги бу асарга юқори баҳо берди. Б. Брайнининг «Я советский учитель»<sup>93</sup>, Л. Батьнинг «Верный путь»<sup>94</sup>, А. Дроздовнинг «Учитель из народа»<sup>95</sup>, Т. Зиненкованинг «Пример замечательной жизни»<sup>96</sup>, Марьинованинг «Читая роман...», Олшанскаянинг «Книга о народном учителе» каби тақриз ва мақолаларида, шунингдек, З. Кедрина, Лев Никулин, Корнелий Зелинский, Виктор Шкловский, Константин Федин каби санъаткор ва танқидчиларнинг чиқишиларида «Ўқитувчи» романи ўзбек адабиётида муҳим воқеа бўлганлиги махсус таъкидланди. Л. Бать шундай дейди: «Парда Турсуннинг бу реалистик асари ўзбек совет зиёлилари-нинг шаклланишини, коммунистик жамият қуриш йўли — ҳақ йўлга тушиб олган ўзбек халқи социалистик онгиннинг ўсишини чуқур ҳаққоний кўрсатган... биринчи асар»<sup>97</sup> дир. З. Кедрина: «Бутун бошли бир халқнинг социалистик миллат сифатида ташкил топишининг ҳал қиливчи пайтида ўша халқнинг тақдирини бир киши тақдира ида акс эттира олган. «Ўқитувчи» қаҳрамонларнинг ҳаёти ленинизмнинг нурафшон зиёси билан ёритилган»<sup>98</sup>, — деб ёзди.

А. Ашрапов ва Х. Дониёровнинг «Ўқитувчи» романи ҳақида» («Шарқ ўлдузи». 1954. № 3), А. Ашраповнинг «Ўзбек прозасида интеллигенция образи» (Совет Ўзбекистони маданияти. 1956. 10 октябрь)) мақолаларида ҳам ёзувчи эришган ютуқларга жиддий эътибор берилиди. Авваллари бўлганидек, бу романлар ҳақида эълон қилинган қатор тақриз ва мақолаларнинг баъзи

<sup>93</sup> Правда Востока. 1951. 5 июля.

<sup>94</sup> Огонек. 1951. № 4.

<sup>95</sup> Литературная газета. 1951. 17 ноября.

<sup>96</sup> Звезда Востока. 1952. № 4.

<sup>97</sup> Октябрь. 1952. № 1. С. 185.

<sup>98</sup> Новый мир. 1951. № 12. С. 172—173.

ўринларида схематик тасаввурлар, демагогик қарашлар учраб туради. Биргина мисол. Романда Жўра «Қизларни юргурган қолиб, буюрган илиб кета беради» ва «Хўп» деса ишинг битиб, эшагинг лойдан ўтгани, «йўқ» деса, сен ҳам «зорим бору зўрим йўқ» дейсану, кўнгилни узиб, қўлни ювиб қўлтиққа артиб кетаверсан» дейди. Танқидчи романдан шу парчани мисол қилиб келтиради ва уни қуйидагича талқин қиласди: «Қизларни юргурган қолиб, буюрган илиб кетаверади» деган мақол... совет тарбиясини олган кишиларга ва совет замонасига бутунлай ётдир. Шунинг учун бу мисолнинг совет студенти Жўра тилидан айтилиши бутунлай нотўғри бўлиб, асарнинг ғоясига путур етказади. «Ишинг битиб, эшагинг лойдан ўтгани» жумласидан Жўранинг севги масаласига жуда ҳам паст назар билан... қарashi кўрсатилганки, бу ҳам асар ғоясига зарар келтиради»<sup>99</sup>. Бу хилдати «қарашлар» жонли, ҳаётий, реалистик образлар яратишга ҳеч қачон фойда келтирган эмас.

«Опа-сингиллар» романини ҳам адабий танқидчилик яхши кутиб олди. М. Султонова ва А. Аброровнинг «Ўзбек аёллари ҳақида йирик асар»<sup>100</sup>, М. Султонова ва Н. Владимированинг «Роман Аскада Мухтара «Сёстры»<sup>101</sup>, М. Қўшжоновнинг «Опа-сингиллар» романи»<sup>102</sup>, М. Шайхзоданинг «Оғир йилларнинг тўғри қиссаси»<sup>103</sup> каби тақриз ва мақолаларида «Опа-сингиллар»нинг ютуқ ва камчиликлари рўйи рост кўрсатилди. 1959 йили Москвада бўлган ўзбек адабиёти ва санъати декадасида Мухтор Аvezov ва Иван Лелар ҳам «Опа-сингиллар»ни юксак баҳолашди.

Тўғри, «Опа-сингиллар» романни хусусидаги тақриз ва мақолаларнинг ҳам савиаси бир хил эмас. Энг муҳими шундаки, улар орасида бадиий асарни ғоявий-эстетик планда хийла кенг, теран ва изчил таҳлил қилган мақолалар ҳам бор эди. Бундай мақолалар адабий танқидчилигимизнинг кейинги ривожига самарали таъсир этди.

Юқоридаги адабий фактлар Улуф Ватан урушидан кейинги биринчи ўн йилликда ўзбек совет поэзияси ва прозасига адабиётшунослик ва адабий танқидчиликнинг муносабати жуда ҳам хилма-хил кечганини, са-

<sup>99</sup> Шарқ юлдузи. 1954. № 3. 117-бет.

<sup>100</sup> Тошкент ҳақиқати. 1956. 7 август.

<sup>101</sup> Ташкентская правда. 1955. 17 август.

<sup>102</sup> Шарқ юлдузи. 1956. № 5.

<sup>103</sup> Қизил Ўзбекистон. 1958. 20 апрель.

виянинг турлича бўлганини, қисқаси, асосий илфор тенденциялар билан бирга асоссиз мақташ ёки камситиш, бадиий асарнинг ўзига хос хусусиятларини ҳисобга олмаслик аломатлари учраб турганини кўрсатади. Бундай мураккаблик ва ўта зиддиятли фактларни ўша йиллар ўзбек драматургияси ва болалар адабиётига танқидчиликнинг муносабатида ҳам кузатиш мумкин эди.

### СОЦИАЛИСТИК РЕАЛИЗМ ЭСТЕТИКАСИ МАСАЛАЛАРИ ВА ТАНҚИД

Даврнинг муҳим хусусияти танқидчилик ва адабиёт-шуносликда назарий масалаларнинг катта ўрин тутишидир. Танқидчилик социалистик реализм методининг айрим проблемаларини кўтарди ва ҳал этишга ҳарақат қилди. Бунга «Шарқ юлдузи» журналида босилган «Ўзбек поэзияси ва прозасида социалистик реализм масаласига доир баъзи мулоҳазалар»<sup>104</sup> ва «Социалистик реализм байроби остида»<sup>105</sup> номли мақолаларни мисол тарзида кўрсатиш мумкин. Бундай мақолаларнинг социалистик реализм назариясининг ривожи йўлидаги аҳамияти катта бўлди.

Шунингдек, социалистик реализм методи масалаларига бағишиланган Ўрта Осиё республикалари регионал кенгашларида қилинган докладлар, жумладан, И. Султоннинг «20-йиллардаги ўзбек совет адабиётининг ижодий методи масаласига доир» ва «Ўзбек адабиётida социалистик реализмнинг шаклланишида Ҳамза ижодининг аҳамияти тўғрисида», «Ўрта Осиё республикаларида тарихий-адабий процесснинг спецификаси ҳақида» номли мақолаларининг роли катта бўлган.

Биринчи мақолада 20-йиллардаги ўзбек совет адабиёти тараққиёт йўлларининг характеристини аниқлашга алоҳида эътибор беради. Ижодий методнинг совет воқеилиги, коммунистик партиявийлик, миллий традицияларга боғлиқ эканлигини махсус таъкидлайди. «Адабиётнинг методи тўғрисидаги масала бу, дастлаб адабиётнинг foявий мазмуни, эстетик идеали ва ижобий қаҳрамони, ... воқеликка муносабати тўғрисидаги масаладир, унинг синфий курашдаги роли тўғрисидаги масаладир»<sup>106</sup>.

<sup>104</sup> Шарқ юлдузи. 1949. № 2.

<sup>105</sup> Шарқ юлдузи. 1954. № 12.

<sup>106</sup> Султонов И. Пъесалар. Мақолалар. Тошкент. 1959. 188-бет.

Иккинчи мақолада ўзбек адабиётида социалистик реализм методининг шаклланишида Ҳамза ижодининг аҳамияти ўртага қўйилади. Бу даврда меҳнаткаш халқ адабиётимизнинг марказий қаҳрамони бўлиб қолди. Езувчилар асарларида халқ турмушини ва халқдан чиққан кишиларни кўрсатиш асосий ўринни эгаллади. Ўзбек адабиётида социалистик реализм методи қарор топишида бундай ижодий изланишлар беҳуда кетмади.

Бу давр ўзбек адабий танқидчилиги ҳақида гап боргандা Ойбекнинг «Ўзбек совет адабиёти юксалишда»<sup>107</sup>, С. Азимовнинг «Ўзбекистонда адабий танқидчиликни ривожлантиришга доир баъзи масалалар»<sup>108</sup>, Абдулла Олимжон ва П. Турсуннинг «Адабий танқидчиликни юксак даражага кўтарайлик»<sup>109</sup>, Ҳ. Ёкубовнинг «Лирикада конфликт»<sup>110</sup>, В. Зоҳидовнинг «Ёш танқидчилар ҳақида»<sup>111</sup>, О. Шарафиддиновнинг «Лирика ҳақида мулоҳазалар»<sup>112</sup> каби қатор мақолаларини эсламаслик мумкин эмас.

Тўғри, бу даврда вужудга келган мақолалар фақат шулардангина иборат эмас. Улар кўп. Ҳозирги замон ўзбек поэзияси, драматургияси, болалар адабиёти, муайян санъаткорлар ҳаёти ва ижоди, адабий алоқалар ва ўзаро таъсир, таржимачилик санъати ҳақида қатор мақолалар вужудга келди. Адабий танқидчилик ўзбек совет адабиёти эришाटган принципиал ютуқларнинг теран илдизларини топишга, рус совет адабиёти, айниқса улуғ санъаткорлар М. Горький ва В. Маяковский ижодий меросидан баҳраманд бўлишларига айрича эътибор бердилар. А. Ульрих<sup>113</sup>, С. Қосимов<sup>114</sup>, Б. Брайнина<sup>115</sup>нинг ўзбек совет прозасида М. Горький традицияси ўзига хос йўсинда давом этайдигига; С. Долимов<sup>116</sup>, А. Сайдов<sup>117</sup>, С. Анорбоев<sup>118</sup>, Б. Имо-

<sup>107</sup> Қизил Ўзбекистон. 1947. 29 октябрь.

<sup>108</sup> Шарқ юлдузи. № 3. 1954.

<sup>109</sup> Қизил Ўзбекистон. 1950. 15 март.

<sup>110</sup> Совет Ўзбекистони маданияти. 1956. 21 ноябрь.

<sup>111</sup> Шарқ юлдузи. № 8. 1951.

<sup>112</sup> Совет Ўзбекистони маданияти. 1956. 17, 21 март.

<sup>113</sup> Ульрих А. Горький и Ўзбекистан//Звезда Востока. 1948. № 1.

<sup>114</sup> Қосимов С. Горький и узбекская литература//Звезда Востока. 1951. № 6.

<sup>115</sup> Брайнина Б. Ёш ўзбек прозасида Горький традициялари//Шарқ юлдузи. 1951. № 8.

<sup>116</sup> Долимов С. Маяковский ва ўзбек совет поэзияси//Шарқ юлдузи. 1950. № 4.

<sup>117</sup> Сайдов А. Маяковский и узбекская советская поэзия//Звезда Востока. 1952. № 9.

мов<sup>119</sup>лар эса ўзбек шоирларининг Маяковский ижоди чашмаларидан баҳраманд бўлганига жиддий аҳамият бердилар. А. Бобохонов<sup>120</sup> рус ва ўзбек адабиёти алоқалари тарихи билан қизиқди.

Эллигинчи йиллар ўзбек танқидчилиги ва адабиётшунослиги рус ва ўзбек адабиётларининг ўзаро алоқасини, биринчисининг иккинчисига фаол таъсир этиб боришини тадқиқ этишга жиддий эътибор берди. Буни маҳсус таъкидлаш зарур. Тўғри, юқорида номи тилга олинган авторларнинг ишларида ҳар хил характердаги этишмовчиликлар, нуқсонлар мавжуд эди. Ўша йиллардаёқ бу ишлардаги камчиликлар маълум даражада кўрсатилди ва танқид қилинди. Шу йўналишдаги ишларда рўй берган мавжуд нуқсоилар, мураккаб проблемани бир томонлама, юзаки талқин этишлар аста-секин тузатиб борилди.

Бу йилларда, совет адабиётшунослиги ва танқидчилигига бўлганидек, ўзбек адабиётшунослиги ва адабий танқидчилиги ривожи хийла мураккаб кечди. Классик меросга нигилистик муносабатларга, тарихий адабий фактларни сохталаштиришларга, «ягона оқим» назариясига, «конфликтсизликка» қарши кескин кураш олиб боришига тўғри келди. Бу кураш моҳият-эътибори билан тўғри бўлишига қарамай, бу борада баъзан жиддий хатоларга ҳам йўл қўйилди, вульгар социологик қараашлар такрорланди. Бундай зарарли оқимларга алоқаси бўймаган асарлар ноҳақ танқидга учради. «Шуни ҳам айтиш керакки, Арманистонда, Грузияда ва бошқа баъзи республикаларда айрим элементлар ягона оқим тўғрисидаги буржуа назариясига қарши кураш ниқобистида бутун миллий маданиятни, санъат ва адабиётнинг бутун бойликларини извогарлик мақсадида қайтадан кўриб чиқмоқчи бўлдилар. Партия ташкилотлари раҳбарлиги остида бу нигилистик хуружлар фош қилиб ташланди»<sup>121</sup>.

Қадимги ўзбек халқ достони «Алпомиш» А. Абдунашибев ва А. Степановининг «Алпомиш» эпоси ҳақида»<sup>122</sup>,

<sup>118</sup> А норбоев С. Узбек совет поэзиясида Маяковский традицияларига доир/ Шарқ юлдози. 1953. № 12.

<sup>119</sup> И момов Б. О традициях Маяковского в творчестве Гафура Гуляма//Звезда Востока. 1953. № 5.

<sup>120</sup> Бабаханов А. Звезда Востока. 1953. № 4.

<sup>121</sup> Рюриков Б. С. Совет адабий танқидчилигининг асосий проблемалари. Шарқ юлдози. 1955. № 7. 84-бет.

<sup>122</sup> Правда Востока. 1952. 29 января.

«Халқчиллик байроби остида»<sup>123</sup> мақолаларида халққа ёт реакцион асар сифатида қораланди.

1952 йилнинг март ойида Ўзбекистон ССР Фанлар академияси Тил ва адабиёт институти ҳамда Ўзбекистон Совет Ёзувчилари союзи уюштирган «Алпомишиш» достони муҳокамасида бундай ноҳақ фикрлар янада чуқурлаштирилди. «Алпомишиш» достонини пропаганда қилиб келган, уни кўп марта нашр қилдирган, бу нашрларга кириш сўзи ёзганлар, жумладан В. Жирмунский ва Ҳ. Зариповнинг «Ўзбек халқ қаҳрамонлик эпоси» китобини, Ойбекнинг «Ўзбек поэзияси антологияси»га, М. Шайхзоданинг «Алпомишиш» достонининг (1949) рус тилидаги нашрига ёзган мақолалари қораланди. Ағусски, ўзбек халқ ижодига бундай нотўғри муносабат матбуотда анча вақт давом этди. Аммо партия матбуотдаги бундай нигилизмга кескин зарба берди.

1956 йилда «Қизил Ўзбекистон» газетасида босилган «Халқ ижодининг ўлмас ёдгори» мақоласи «Алпомишиш» достонининг халқчиллигини исбот этди<sup>124</sup> — ўзбек халқининг буюк достони ҳаққоний ва одил баҳосини олди.Faafur Fулом Ўзбекистон Коммунистик партиясининг XIII съездиде сўзлаган нутқида: «Маълумки, эпос ўзида маълум даврнинг маълум тарихий табақанинг руҳини сақлайди. Шунинг учун биз «Алпомишиш» эпосини унинг асосий мотивлари яралган тарихий вазиятни ҳисобга өлган ҳолда ўрганишимиз керак»<sup>125</sup>, — деган эди.

Хуллас, «Алпомишиш» эпоси жиддий ўрганила бошланди. Бу ўринда ССР Фанлар академиясининг М. Горький номидаги Жаҳон адабиёти институти ва Ўзбекистон ССР Фанлар академияси А. С. Пушкин номидаги Тил ва адабиёт институти ташаббуси билан Тошкентда (1956, 20—25 сентябрда) «Алпомишиш» достонининг муҳокамасига бағишлиланган регионал кенгашни эслаш кифоя. Кенгашда Ўзбекистон ССР Фанлар академиясининг муҳбир аъзоси А. К. Боровков, СССР Фанлар академиясининг муҳбир аъзолари В. М. Жирмунский ва Е. Э. Бертельс, Л. И. Климович, В. И. Чечеров, Москва Давлат университети СССР халқлари адабиёти кафедрасининг мудири М. И. Богданова, адабиётшунос А. Валирова, таржимон шонр Л. М. Пеньковский, Қозогистон ССР

<sup>123</sup> Звезда Востока. 1952. № 2.

<sup>124</sup> Бу мақола С. Азимов, Ҳ. Зарифов, В. Зоҳидов, С. Қосимов ва И. Султон томонидан ёзилган (Қаранг: И. Султон. Асарлар. Иккинчи том. Тошкент. 1972. 109—113-бетлар).

<sup>125</sup> Совет Ўзбекистони маданияти. 1956. 1 февраль.

Фанлар академиясининг мухбир аъзоси Н. С. Смирнова ва илмий ходими Т. Содиқов, Татаристон АССР вакили Х. Ёрмуҳамедов, Бошқирдистон АССР вакили А. Кираев, грузиялик М. Я. Чиковани, осетиялик В. С. Тотоев, Мордва АССР вакили А. И. Маскаев, Қорақалпоғистон вакиллари И. Сагитов ва Қ. Айимбетов, ўзбек олимларидан Ҳ. Зариф, М. Шайхзода, Ҳ. Сулаймон, М. Афзалов, И. Жабборовлар фаол иштирок этди, бу достон ва унинг вариантлари кенг муҳокама қилинди, уларни баҳолашдаги нотўғри тенденцияларга барҳам берилди. Қисқаси, бу кенгаш миллий республикаларда фольклористикани ривожлантиришда муҳим роль ўйнади.

Адабий танқидчиликда бу хилдаги зиддиятли муносабатлар, адабий фактларга нообъектив қарашлар тарихий мавзуда яратилган асарларга нисбатан ҳам рўй берди. Баъзи бир адабиётшунос ва танқидчилар замонавийлик масаласини жуда тор, юзаки талқин қилдилар. Натижада замонавийлик ўтмиш тематикасига қарама-қарши қўйилди. Шу асосда тарихий ўтмиш акс этган ғоявий бадиий бақувват асарлар ҳуда-беҳудага камситилди. Уша пайтда «Правда» газетаси ҳам бундай «тошбўрон» қилишларни кескин қоралаган эди. Масалан, В. Витковичнинг «Совет Ўзбекистонига саёҳат» китобини Т. Ефимов билан Б. Ковалъчук «Правда Востока» газетасида заарли асар деб чиқди. «Правда» газетасида бунга қарши шундай дейилади: «Умуман фойдали бўлган «Совет Ўзбекистонига саёҳат» китоби қайта нашр этилган вақтда анча яхшиланиши мумкин. «Правда Востока» газетасининг тақризчилари Т. Ефимов ва Б. Ковалъчук томонидан қилинган «тошбўрон» га сира ҳам қўшилиб бўлмайди. Бу тақризчилар умуман асарнинг мазмунини очиб бермай, фақат унинг камчилклари хақидагина тўхталиб, бу китобга «Совет Ўзбекистонининг қиёфасини бузиб кўрсатувчи «хато» асар деб баҳо бердилар. Бундай ғаразли танқид ёзувчини йўлдан адаштиради ва жамоатчиликни чалғитади»<sup>126</sup>.

«Правда» нинг бундай ҳаққоний кўрсатмаси адабий танқидчиларимиз учун ҳам сабоқ бўлиши лозим эди. Лекин айрим мұнаққидларимиз «танқид» ниқоби остида адабиётимизнинг етук асарларига ҳужум қилдилар. Баъзи адабиётчилар Ойбекнинг «Навоий» романини қаттиқ танқид қилишга киришдилар. Маълумки, бу асар

<sup>126</sup> Правда. 1952. 1 апреля.

ўша пайтда партия ва давлатнинг энг юксак мукофотига сазовор бўлган эди. Бундан ташқари, роман яратилган йиллари қатор йирик олимлар ўз мақолаларида бу асарга фақат ўзбек адабиётининггина эмас, айни вақтда, кўп миллатли совет адабиётининг ҳам улкан ютуғи сифатида юксак баҳо берган эдилар<sup>127</sup>. Н. Тихонов шундай деган эди: «Биз... ўзбек тилида яратилган биринчи тарихий романни кўриб турибмиз. Буни Ойбек яратди. Ойбек, бизга, китобхонларга XV аср буюк одамнинг фожиасини кўрсатди. Кенг китобхонлар оммаси Ўрта Осиёning ўша даври ҳақида ёзилган ўнлаб илмий ишлардан ҳам ололмаган маълумотларини бу романдан оладилар...»<sup>128</sup>. Мана, Е. Э. Бертельснинг фикри: «Роман Навоий даврини ажойиб акс эттирган ва Навоий образини ҳаққоний тасвирлаган. Романнинг катта мувваффақияти шундаки, унга киритилган барча воқеалар бизгача етиб келган тарихий ҳужжатлар билан тасдиқланди. Роман катта бадиий қиммати билан ажралиб туради»<sup>129</sup>.

### АДАБИЁТНИНГ ЗАМОНАВИЙЛИГИ УЧУН ҚУРАШ

Замонавийлик ва замонавий мавзу ўша давр танқидчилигининг долзарб проблемаларидан бири эди. Уруш йилларида адабиёт давр тақозоси билан халқнинг ўтмишига кенг мурожаат қилган, натижада тарихий, ҳарбий ватанпарварлик тематикаси асосий ўринни эгаллаган, бинобарин, ажнабий босқинчиларга қарши курашни тасвирлаш, яъни халқнинг жанговар ўтмишини бадиий гавдалантириш орқали фашист босқинчиларини ватанимиз тупроғидан ҳайдаб чиқаришга сафарбар этиш зарурияти туғилган эди.

Урушдан кейинги даврда вайрон бўлган шаҳар ва қишлоқларни тиклаш, ишдан чиққан саноат корхоналарини қайта ишга тушириш, халқ хўжалигини ривожлантириш билан боғлиқ ҳолда ижод аҳллари олдига

<sup>127</sup> Звезда Востока. 1946. № 7—8; Правда Востока. 1946. 30 июнь; Правда Востока. 1946. 30 июня; Қизил Ўзбекистон. 1944. 10 декабрь; Скосиров П. Академик Айбек//Литературная газета. 1946. 2 февраля; Павлов Л. Навоий ҳақида роман//Литературная газета. 1946. 29 июнь; Лиходзиневский С. Ўзбек тарихий романы//Звезда Востока. 1947. № 1; Кирпоткин В. Навои//Советская книга. 1946. № 10—11.

<sup>128</sup> Литературная газета, 1946, 29 июня.

<sup>129</sup> Правда Востока. 1945. 18 февраля.

замонавий мавзуларда бадиий юксак асарлар яратиш вазифаси фавқулодда жиддий қўйилди.

ВҚП(б) Марказий Комитетининг «Драматик театрларнинг репертуари ва уни яхшилаш тадбирлари ҳақида»ги қарорида кўрсатилганидек «драматик театрлар репертуарларининг ҳозирги аҳволидаги асосий камчилик щуки, совет авторларининг ҳозирги замон темалари-даги пьесалари мамлакатнинг энг йирик драматик театрлари репертуаридан амалда сиқиб чиқарилган...

Репертуар соҳасида очиқдан-очиқ кўриниб турган ёмон аҳвол яна шу билан оғирлашадики, театрларда ҳозирга замон темаларида қўйилиб келган озгина пьесалар орасида ҳам заиф, гоясиз пьесалар бор»<sup>130</sup>. Коммунистик партиянинг тарихий қарорлари совет адабиётининг кейинги ривожи учун муҳим аҳамият касб этди, санъаткорларимизни янги-янги асарлар яратишга даъват қилди. Бундай даъватга муносиб жавоб беришга интилиш кучайиб кетди. Натижада бу даврда қардош халқлар адабиётида бўлгани сингари бизнинг адабиёти-мизда ҳам замонавий мавзуларда жуда кўплаб асар юзага кела бошлади. Замонавий ҳаёт материаллари ва янги давр қаҳрамонлари адабиётимизнинг асосий тас-вири объекти бўлиб қолди. Адабий танқидчилик ҳам бу масалага катта эътибор бера бошлади.

Танқидчи М. Верхацкий Туйғуннинг «Муҳаббат» пьесаси ҳақида ёзган тақризини «Замонавий мавзуга бурилиш» деб атади: «Шоир Туйғун ёзган «Муҳаббат» пьесаси 1946 йилда ўзбек саҳнасига қўйилган замонавий мавзудаги ягона пьесадир»<sup>131</sup>. Худди шу йўсинда адабий танқидчилик замонавий мавзуда ёзилган асарларни қўллаб-қувватлаб боришга ҳаракат қилди.

Шоир Мирмуҳсиннинг «Уста Фиёс» поэмаси («Шарқ юлдузи». 1947. № 1—3) эълон қилиниши билан тез орада «Янги ижодий интилишнинг тўниғич меваси» номли тақриз босилди: «Шуни эътироф қилиш керакки, колхоз темаси адабиётимизда ҳал қилувчи темадир. Аммо ўзбек адабиётида колхоз тузуми етишириб берган ажойиб меҳнат қаҳрамонлари ҳақида бадиий ва гоявий жиҳатдан юксак асарлар жуда оз даражададир. Бу жиҳатдан қараганда шоир Мирмуҳсин катта хизмат қилган ва анча муваффақиятга эришган»<sup>132</sup>. Танқидчи

<sup>130</sup> КПСС съездлар, конференциялар ва Марказий Комитет Пленумларининг резолюция ва қарорларида. III қисм. 554-бет.

<sup>131</sup> Шарқ юлдузи. 1946. № 12. 99-бет.

<sup>132</sup> Шарқ юлдузи. 1947. № 8. 90-бет.

А. Алимұхамедов ўзининг «Уста Фиёс» ҳақида баъзи мулоҳазалар» мақоласида бу масалага алоҳида эътибор беради ва шундай дейди:

«Асарнинг энг катта фазилати ва ўқувчини қувонтирадиган томони, унинг замона мавзуида ёзилишидир»<sup>133</sup>. Бундай фактларни кўплаб келтириш мумкин.

Масаланинг шу хилда қўйилиши тўғри эди, албатта. Замонавий мавзуда кўплаб асарлар яратила бошлади, лекин уларнинг савияси бир хил эмас эди. Замонавий ҳаётни юзаки, бир томонлама тушунишлар натижасида замонавий мавзудаги асарларда турли хил нуқсонлар, ҳатто муайян схемалар вужудга кела бошлади.

Танқидчиликда бу борадаги кўпчилик асарларга хос бир камчилик тўғри кўрсатилди. «Бу схема, тахминан шундан иборат: қишлоққа армиядан бўшатилган жангчи йигит қайтади. Шуниси характерлики, у инвалид—ногирон бўлади. Колхоз орқада қолиб, план бажарилмайди. Жангчи йигит колхоз юксалиши учун тўсиқ бўлиб ётганларга қарши ўт очади. Колхоз қаддини кўтаради ва, ниҳоят, у йигит раис ёки партия ташкилотининг секретари қилиб сайланади. Бундай сюжет схемасига, моҳият-эътибори билан эътироуз бўлиши мумкинми? Йўқ, албатта. Чунки, у, урушдан кейинги ҳаётнинг характерли бўлган конфликтларидан биридир. Лекин хадеб бу сюжет атрофида айланана беришлик ҳаётни чуқур бўлмасликдан дарак беради, схематизм хавфини туғдиради»<sup>134</sup>.

«Ишлаб чиқариш темаси» замонавий мавзунинг бир кўриниши эди. Адабиётда ишлаб чиқариш проблемалари ва улар билан боғлиқ конфликтлар асосида қурилган асарлар кўплаб пайдо бўлди. Бу ҳам яхши эди, албатта. Бироқ шаблон ҳолига келиб қолган илфор механизатор билан консерватор раҳбар ўртасидаги конфликт кўплаб асарларнинг асосини ташкил этадиган бўлиб қолди.

«Ишлаб чиқариш темаси»да ёзилган асарларнинг энг ожиз томони тоявий мазмунни бадиий ифодалаб бера олмасликда кўринади. Уларнинг аксарияти ҳаётийликдан маҳрум бўлиб, бадиий характерлар ўрнини ишлаб чиқариш проблемалари эгаллади. Асар қаҳрамонлари эса йирик проблемалар орасида кўмилиб қолди. Кўпгина танқидий мақолаларда муайян асар тасвир объективининг янгилигига эътиборни кучайтириб, энг му-

<sup>133</sup> Шарқ юлдози. 1948. № 1. 111-бет,

<sup>134</sup> А. Мухторнинг «Катта йўлда» поэмаси ҳақида//Қизил Ўзбекистон. 1950. 4 январь.  
316

ҳими — замонавий воқеликни бадиий ўзлаштириш ва янгича акс эттириш масалаларига, яъни бадиий новаторликка етарли эътибор берилмади. Эътибор қилган ўринларда эса янги воқеликнинг кўпроқ ташқи белгиларини акс эттирган бир қатор бўш, юзаки, жўн асарларни ҳам мақташга берилиб кетди. Воқеликнинг янгилиги ва шу асосда «актуал» фикрни айтишга интилиш — бу ҳали асарнинг юксак бадиийлиги дегани эмас, албатта. Санъат асари ўзининг чуқур ғоявийлиги ва бадиийлиги уйғунлиги билан тирик. Ғоявийлик бадиийликдан ташқарида бўлган эмас. Йўналишнинг худди ана шу нуқтаси ниҳоятда муҳим. Адабиётда чинакам замонавийликни бадиий новаторликсиз тўла тасаввур қилиб бўлмайди. Воқеликнинг энг муҳим, характерли жиҳатларини бадиий кашф этиш бадиий асарнинг замонавийлиги ва новаторлигини тўғри англашга имкон беради. Демак, замонавийлик — янги ҳаётий мазмун ва, айни вақтда, уни юксак маҳорат билан акс эттириш масаласидир.

Замонавий тематикага эътибор беришнинг фавқулодда кучайиши билан баъзи бир нохуш тенденциялар ҳам пайдо бўлди.Faқат айрим адабиётшунос, танқидчи ёки ёзувчиларгина эмас, ҳатто йирик журналинг бош мақолаларида ҳам замонавий тематика ўтмиш тематикасига кескин қарама-қарши қўйилди, ўтмишни тасвирловчи санъаткорлар «курашчи бўлолмайди» дейишгача борилди. Биргина мисол. Ўзбекистон Ёзувчилар союзининг органи бўлган «Шарқ юлдузи» журналининг «Замонавийлик — адабиётимизнинг қалбидир» дегани бош мақоласида очиқ-ойдин шундай дейилади: «Узоқ тарих воқеаларини тасвир этишга берилиб кетган ёзувчи курашчи бўлолмайди»<sup>135</sup>.

Замонавийликни фақат замонавий тематикадан, замонавий ҳаётни тасвирлашдан иборатdir дейиш — масалани худди шундай тушуниш, талқин этиш «примитив фикрловчи танқидчиларнинг иши»<sup>136</sup>dir, холос. А. Толстойнинг узоқ тарихий ўтмишни тасвирлаган «Петр I» романи ҳам, И. Ефремовнинг «Андромеда тумани» фантастик романи ҳам ўз моҳиятига кўра замонавий асарлардир. «Сюжет ва формал жиҳатдан эмас, балки ғоявий-психологик томондан бадиий ижоднинг ўз даври билан алоқаси — санъатда эстетик кате-

<sup>135</sup> Шарқ юлдузи. 1959. № 7. 5-бет.

<sup>136</sup> Қаган М. Г. Лекции по марксистко-ленинской эстетике. Часть. III. Л., 1966. С. 36.

гория бўлган замонавийликнинг моҳиятини белгилаб келади»<sup>137</sup>.

Е. Лизунова ўз монографиясида М. Авезовнинг фақат «Тарихий теманинг куйчиси сифатида тасаввур этган дорматик танқидчилар»га қарши Горькийнинг атоқли адаби А. Чапигинга айтган сўзларини келтириб ўтади. «Сўз санъаткори томонидан тасвиirlанган ҳар қандай тарихий сюжет замонавийлик билан баравардир»<sup>138</sup>. Хуллас, бу йиллар адабий танқидчилиги ва адабиётшунослигида, А. Мухтор айтганидек, «тарихий ва тарихий-революцион мавзуларнинг моҳиятини ерга уриш, ёзувчининг маълум тарихий масофага бўлган ҳуқуқини қўпoldаn-қўпол қоралаш, замонавийликка вульгар социологизм нуқтаи назардан қараш ва мавхум волюнтаристик схемалар»<sup>139</sup> хийла кучли эди. Демак, бу йиллар танқидчилигида «замонавийлик» ва «замонавий тематика» тушунчалари айнан бир хил, тенг тушунча эмаслигини фарқлаш тақозо қилинарди. Биринчидан, замонавийлик фақат замонавий тематикадангина иборат эмас. Иккинчидан, замонавийлик узоқ ёки яқин ўтмишга ёндашиш ва уни қандай акс эттириш масалаларини ҳам ўз ичига олади. Бу ўринда санъаткорнинг тарихий ўтмишга замонавий қарashi ва ижодий-гоявий позицияси фавқулодда муҳим. Замонавийлик кенг маънода санъаткорнинг ҳаётга эстетик муносабати билан характерланади. Замонавийликни тарихий ва революцион мавзуларга қарама-қарши қўйиш эмас, балки тарихий мавзудаги асарларда замонавийлик проблемасининг қандай ҳал этилиши ва намоён бўлиши, муайян давр билан гоявий-психологик ички алоқасини тадқиқ этиш зарур эди. Ниҳоят, замонавийлик проблемасини бадиий новаторлик ва муттасил ижодий изланишлардан сунъий равишда ажратиб эмас, балки уларни ўзаро алоқада текшириш зарурияти муҳим бўлиб қолди. Чунки, бу проблема санъаткорнинг ҳалқ ва давр олдидағи масъуляти, воқеликка эстетик муносабати, унинг фалсафий-ахлоқий концепцияси, дунёқараши ва ижодий индивидуаллиги, идеали ва позицияси, ҳалқчиллик ва партияийлик, ҳаққонийлик принциплари, воқеликни объектив тасвиirlаш асосида бадиий ҳақиқати ва чинакам новаторлиги, маҳорати каби қатор жиддий масалалар билан узвий боғлиқ эди. Шунинг учун ҳам замонавий-

<sup>137</sup> Уша ерда.

<sup>138</sup> Лизунова С. Мастерство Аузэрова. Алма-Ата. 1968. С. 17.

<sup>139</sup> Совет Узбекистони. 1965. 7 февраль.

лик бадиий асарларнинг муайян ўринларида, бошида ё охирида, ёки бир-биридан ажралиб турдиган компонентларида эмас, балки бутун вужудини, руҳини ташкил этади, бошидан охиригача ичдан нурлантириб туради. Қисқаси, ижоднинг замонавий табиати, замонавий ҳётни бадиий ўзлаштириш ва акс эттириш проблемаси доимо умумназарий, идеологик, бадииятнинг бирламчи шартлари, маҳорат «сирлари» — барча аспектларини яхлит ва бир-бирига боғлаб ўрганишни тақозо этади. Хўш, замонавийлик проблемасини жуда тор тушуниш ва унинг эстетик жиҳатига деярли эътибор бермаслик, яъни бадиийликдан ажратиб олиб қараш фақат бу давр ўзбек адабиётшунослиги ва танқидчилигига рўй берган камчиликми?

Бу кўпгина қардош адабиётларда ҳам рўй берган жиддий нуқсонлардан бири эди, албатта. «Бизнинг адабиётшунослигимизда, — деб ёзади В. Р. Шчербина, — замонавийликка фақат ҳозирги кунларимизнинг ташқи, юзада турган белгиларига асосланган примитив, чекланган нуқтаи назарлар ҳамма вақт картани чигаллаштириб келмоқда. Бизнинг барча бадиий принципларимизни асослаш учун эса замонавийликни доимо ленинча тушунишга суюнмоқ эҳтиёжи янада қатъий сезилмоқда. Замонавийлик тушунчаси эса ўзига даврнинг барча серқиррали маънавий ва бадиий ҳётини ҳамда авлодлар онгига жаҳон санъатининг фаол тарихий тажрибасини мустаҳкам сақлашни қамраб олади. Ҳодисаларни худди ана шундай қамраб олиш асосида, чуқур тарихий истиқбол нури билангина чинакам замонавийликни юзаки замонавийликдан, новаторликни сохта новаторликдан асосли равишда тўла ажратиш ва... социалистик санъатнинг «реализм», «гоявийлик», «ҳёт билан алоқаси», «идеали», «тасдиқловчи асос»идек асосий принципларининг мазмунини ҳам ҳар томонлама очиб бериш мумкин. Ҳозирга пайтда бу адабиёт масалаларини тадқиқ этишнинг энг асосий вазифаларидан биридир»<sup>140</sup>.

### ТАНҚИДЧИЛИКДА ФОЯВИЙЛИК ВА БАДИИЙЛИК МАСАЛАЛАРИ

Бу давр танқидчилигига бадиий асарларга талабчан муносабатда бўлиш тобора кучайди, натижада, тан-

<sup>140</sup> Шчербина В. Р. Ленин и вопросы литературы. М., 1967. С. 528.

қидчилик асарларни фақат замонавий темада ёзилгани учун мақташ тенденциясидан қутула борди. Бу ҳолатни шоир М. Бобоев шундай ифодалаган эди: «Асарнинг қиммати фақат мавзунинг актуал бўлиши билангина эмас, унинг бадиий томондан пухта ишланиши билан ҳам ўлчанади. Фикрларни қўйма мисралар билан ифода қилиш, оригинал ўхшатиш, конкрет ва бадиий содда иборалар асарнинг фазилатини оширади. Баландпарвоз қуруқ ва жимжимадор мисралар ёки қофия ва вазн билан «шеър» ҳисобланган «байтлар» савияси ўсан совет ўқувчиларини қаноатлантирумайди»<sup>141</sup>. Масаланинг худди шу тарзда қўйилиши табиий эди. Танқидчикининг ривожи бадиий асарларга сифат нуқтаи назаридан, яъни ғоявийлик ва бадиийлик талаблари нуқтаи назаридан ёндашишнинг кучайиб бориши билан боғлиқ. Чунки, ҳар қандай етук асар ғоявийлик ва бадиийликнинг диалектик бирлигидан таркиб топади. Файриинсоний ғояни тарғиб қилувчи асар бадиий юксак бўла олмаганидек, бадиий жиҳатдан бўш асарда олға сурилган ғоя том маънода юксак ғоя ёки пафос даражасига қўтарила олмайди. Ф. Энгельс М. Каутскаяга ёзган мактубларидан бирида: «Менинг фикримча, тенденция асарда тасвирланаётган вазиятдан ва воқеадан ўзўзидан келиб чиқиши лозим, асарда буни алоҳида уқтириш шарт эмас...»,<sup>142</sup> — дейди.

Ҳ. Ёқубов ўзининг «Абдулла Қаҳҳор новеллалари» туркум мақолаларида ғоявийлик ва бадиийлик масаласига жиддий эътибор беради. У ёзади: «А. Қаҳҳорнинг дастлабки ҳикояларидаги камчиликлар — сиёсий ваъзхонлик, публицистик нутқ тез барҳам топади. У ҳикоя санъатини яхши эгаллаб олади. У энди ўз фикрини фақат образлар билан ифодалайди... У китобхонга насиҳат қилиш, уқтириш йўли билан эмас, бадиий образ билан таъсир этишни аъло кўради... Ҳар бир ҳикояда ёзувчининг муайян фикри, ўз қараши бор, унинг воқеаларга бўлган муносабати аниқ. **Фақат мораль, ният ҳикоянинг бадиий тўқимасидан туртиб, қалқиб чиқиб турмайди...** А. Қаҳҳор ҳикояларининг бадиийлигига далолат қиласиган иккинчи бир хусусияти уларнинг одатдан ташқари ихчам, лўнда тузилишидадир»<sup>143</sup>. Танқид-

<sup>141</sup> Шарқ юлдузи. 1950. № 4. 126-бет.

<sup>142</sup> К. Маркс ва Ф. Энгельс санъат тўғрисида. II томлик. II том. Тошкент. 1975. 5-бет.

<sup>143</sup> Шарқ юлдузи. 1946. № 3. 75—76-бетлар. (Таъкидлар — Ҳ. Ёқубовники).

чи X. Ёқубов ёзувчининг қатор ҳикояларини таҳлил қиласиди ва шундай ишонарли хулосаларга келади. Танқидчи А. Алимухамедовнинг «А. Қаҳҳор ҳикояларида психологик тасвир» мақоласида ҳам ёзувчи асарларининг бадиийлик хусусиятлари анча кенг очиб берилади.

Тўғри, бу давр ўзбек адабиётшунослиги ва танқидчилигига бадиий ижоднинг сиёсатдан четда туришига қарши, санъат ва адабиётнинг ленинча партиявийлик ва ғоявийлик принципларидан чекиниш унсурларига қарши шиддатли кураш олиб борилди. Лекин бу курашда баъзан ижоднинг бадиийлик спецификасига етарли даражада эътибор берилмади, мазмун шаклдан, шакл мазмундан сунъий равишда ажратиб олиниб талқин қилинадиган бўлди. Формализмда айлашлар рўй берди. Натижада бадиий шакл проблемаларини ўрганиш маълум даражада иккинчи планга сурib қўйилди.

Масала шу даражага бориб етдики, бу ҳол каттакатта ижодкорларни ҳам ташвишга солди. А. Фадеев СССР Ёзувчилари союзи правлениясининг XIII Пленумида «Адабий танқид вазифалари ҳақида» қилган докладида шундай деди: «Ғоявийлик ва бадиийлик, мазмун ва шакл масалаларини чукур ишлаб чиқмай туриб олдинга силжишимиз жуда қийин. Эндилилда, формалистик оқимга шундай қақшатқич зарба берган пайтимизда, биз марксистлар шакл масалаларини ечолмасмиз деб, ёки бу соҳада ишлайдиган танқидчи ни формализмда айлашади деб қўрқишимиз керак эмас»<sup>144</sup>.

Марксистик адабиёт илми шуни яхши биладики, шакл мазмун билан шу қадар узвий боғланганки, уни мазмундан ажратиш мазмуннинг ўзини рад этишга олиб боради ёки, аксинча, мазмунни шаклдан ажратиш шаклни инкор қилишга олиб келади.

Бундай нуқсонларга «Ўзбекистон коммунисти» журнали алоҳида эътибор берди. «Шарқ юлдузи» журналида босилаётган мақола ва рецензияларда ҳам хатолик ва камчиликларга йўл қўйилмоқда, — деб ёзди у. — Бу нарса бадиий асарнинг ғоявий мазмунини унинг бадиий формасидан ажратган ҳолда текшириш ва анализ қилишда очиқ қўринади... Мазмун билан форма бирлиги бадиий адабиётнинг ҳам асосий қонунидир. Чунки ҳар бир бадиий асарнинг ғоявий мазмунини унинг бадиий формасисиз тасаввур қилиш мумкин эмас. Юксак ғоя-

<sup>144</sup> Шарқ юлдузи. 1950. № 3. 24-бет.

вийлик юксак бадиийликни талаб қилади. Журналда босилган кўп мақола ва рецензияларда бадиий асарларнинг ғоявий мазмуни ҳақида фикр юритилади. Аммо мана шу ғоявий мазмун қандай бадиий маҳорат билан берилганини ҳақида ҳеч нарса дейилмайди, дейилганда ҳам умумий тартибда, жуда юзаки дейилади. Бу ҳол адабиётшунослик ва танқидчиликдаги энг қўйол хатодир»<sup>145</sup>. Ойбек: «Бизга асарнинг ғоявий мазмунини очиб бериш билан бир қаторда асарнинг бадиий тўқимасини ҳам конкрет анализ қилувчи танқид керак, токи ёзувчи ўз асарининг мусбат жиҳатлари билан бирга жамики камчиликларини ҳам яққол кўра олсин»<sup>146</sup>, — деган эди 1947 йил 14 августда ёш ёзувчилар кенгашида қилган докладида. Худди шу тарзда бу давр адабиёт танқидчилигида баъзан схематизмга, вульгар социологизмга берилиш унсурлари ҳукм сурган бўлса ҳам шакл ва мазмун бирлиги ҳақидаги принципни ҳимоя қилиш, шу йўл билан адабиёт илмини тўғри йўлдан боришини таъминлаш учун кураш тўхтаган эмас эди.

Ўрни-ўрни билан мазмуннинг шаклдан ажralиб қолиш ҳолларига эътибор жалб қилиб турилди. «Шарқ юлдузи» ёэди: «...Баъзи танқидчилар асарнинг ғоявий мазмунини чуқур текширмасдан, унинг бадиий формасига тегишли баҳо бермасдан, фақат унинг мазмунни яхши бўлганлиги учун мақтайдилар, асарнинг мундарижасини айтиб бериш билан кифояланадилар»<sup>147</sup>. Уша вақтларда республика газеталари ҳам бу ҳақда баъзан-баъзан бонг урар ва адабий жараёнга кириб келган бир ёқламаликларга жиддий муносабат билдиради. Масалан, «Қизил Ўзбекистон» газетаси: «Социалистик реализм принциплари учун курашув фақат ғоявийлик билан чекланмайди. Бу кураш бадиийликка ҳам боғлиқ. Илфор ғоявийлик, юксак бадиийлик уйғун бўлганидагина тегишли натижаларга эришиш мумкин. Акс ҳолда асарнинг қиммати йўқолади»<sup>148</sup>, — деб тушунтирди.

Адабиётимизнинг замонавийлигига унинг бадиийлиги билан боғлаб туриб баҳо беришга интилиш — давр танқидчилигининг етуклик аломати эди.

---

<sup>145</sup> Ўзбекистон коммунисти. 1953. № 12. 42-бет.

<sup>146</sup> Ойбек. Муқаммал асарлар тўплами. XIV том. Тошкент. 1979. 240-бет.

<sup>147</sup> Шарқ юлдузи. 1950. № 5. 105-бет.

<sup>148</sup> Қизил Ўзбекистон. 1950. 4 январь.

## ИЖОБИЙ ҚАҲРАМОН ПРОБЛЕМАСИ – ДИҚҚАТ МАРКАЗИДА

Ижобий қаҳрамон ҳақида гап кетар экан, бадиий ижоддаги бу тушунччанинг анча кенглиги ва хилма-хиллигини ҳисобга олиш керак бўлади. Маълумки, ҳақиқий санъат ва адабиётда маълум бир типдаги образларни яратишнинг тайёр қолили йўқ, бўлиши ҳам мумкин эмас. Ҳар бир ижодкор ўз истеъдод йўналиши, борлик дунёни идрок этишдаги индивидуал қаравшлари асосида ижобий қаҳрамон образини яратади ва фақат ўзига хос хусусиятлари билан бошқалардан фарқ қиласи.

Ўзбек совет адабиётининг турли тараққиёт босқичларида ижобий қаҳрамон образини яратиш ҳар хил йўналишга эга бўлиб келди. Улуф Ватан урушидан кейинги даврда адабиётда яратилган ижобий образлар ўзининг қатор хусусиятларига эга эди.

Замонавий темада ёзилган асарларнинг ўзида жамиятнинг илфор тенденцияларини мужассамлаштирган тўлақонли, реалистик ижобий қаҳрамон характеристикини яратишга уринишлар бўлди, бунинг самараси ўлароқ Үктаим (Ойбек), Элмурод (П. Турсун), Жўрахон ва Онахон (А. Мухтор), Сиддиқжон (А. Қаҳҳор) каби қатор образлар яратилди. Булардан ташқари, Ойбекнинг «Қизлар», Мирмуҳсиннинг «Уста Фиёс», А. Мухторнинг «Пўлат қуювчи» ва бошقا бир қатор поэмаларда ижобий қаҳрамонлар образини яратишда жиддий ютуқларга эришилди. Бу асарлардаги образлар таҳлилига бағишиланган кўпдан-кўп мақола ва тақризлар эълон қилинди. Уларда эса бу асарларнинг айримларида ва бошқа қатор роман, повесть ва поэмаларда ижобий қаҳрамон образини, жўн, юзаки ва бир томонлама талқин қилишлар; баъзилари жонсиз, схематик бўлиб чиқиши; характерларини ёритишда сюжет ва композициянинг пухта эмаслиги; характерларни очишида конфликтнинг кескин ва шиддатли бўлмаслиги; кучли тўсиқларни осонгина енгиб ўтиши, хатти-ҳаракатлари ишонарли эмаслиги қайта-қайта қайд қилиб борилди. Айни вақтда, танқидчилик ижобий қаҳрамон характеристини яратишдаги қатор қийинчиликларни ҳам ҳисобга олиши ва уларнинг сабаблари ҳақида бош қотириши фойдадан холи эмас эди.

Озарбайжон шоири Самад Вурғун совет ёзувчилари нинг Бутуниттифоқ съездидаги «Совет поэзияси» ҳақида ги қўшимча докладида ижобий қаҳрамон образини яратишдаги қийинчиликлар ҳақида тўхталиб шундай

дэйди: «Шоирларимиз замондошларимизнинг намуна бўлиб хизмат қиласиган ва тақлид қилишга арзийдиган оддий кишиларнинг образларини яратишга ҳали ҳам камдан-кам муваффақ бўлмоқдалар.

Тарихий тема ва тарихий образлар соҳасида жаҳон поэзияси кўп асрлардан бўён давом этиб келаётган традицияларга эга бўлган бир вақтда, замонавий темалар ва характерларни поэтик ишлаш соҳасида тажриба тўпламаганлиги, менингча, бундай образларнинг кучсиз бўлиб чиқишининг сабабларидан биридир»<sup>149</sup>.

Бу ерда ижод психологиясига тегишли яна бир нуқтани ҳам ҳисобга олиш керак. Ёмонлик ўз моҳиятига кўра социалистик жамият принципларига зид ҳодиса. У дарҳол кўзга ташланади, шунинг учун ҳам ёзувчи онгида нисбатан осонроқ образ тусига киради. Ижобий образларга келганда эса жамиятимизнинг, кишиларимизнинг одатдаги нормал ҳолатидан, ҳаётидан қаҳрамонликни, жасоратни, қисқача айтганда, ижобий образни қабартириб кўрсатиш учун янада кўпроқ меҳнат, юксак маҳорат талаб қилинарди. Масаланинг бошқа томонлари ҳам мавжуд. Санъаткор ўз таланти йўналишига кўра воқеликни ижобий образ орқали ҳам, салбий образларни яратиш орқали ҳам тасдиқлаши мумкин. А. Қаҳҳор «Сароб» ва қатор ҳикояларида салбий типлар характерини яратиш билан ҳам янги воқеликни тасдиқлади ва ўз идеалини поэтик ифода этди. Масаланинг бу томонларига зътибор бермаслик ҳоллари рўй берди: «Аммо у ижобий типларни тасвирлашда салбий типларда кўрсатган маҳоратини кўрсата олмайди. Социализм учун курушувчи кишиларнинг ижобий хислатларини бўрттирганда, уларнинг индивидуал чизгиларини етарли ёритиб бермайди. Мураккаб ҳаёт ичида тарбияланган ижобий қаҳрамонларга ҳам илакишган камчиликлар А. Қаҳҳорнинг айрим ҳикояларида ўқувчи кўзидан четда қолади. Улар бирмунча идеаллаштириладилар ва бир ёқлама бўлиб қоладилар»<sup>150</sup>, — деб ёзади Ҳ. Ёқубов.

Тўғри, бу жумланинг иккинчи қисмида билдирилган фикр-мулоҳазалар замерида танқидчининг ҳаётий образ, ўзининг кучли ва кучсиз томонлари билан жонли инсонга яқин ижобий образлар яратиш ҳақидаги ҳақли талаби сезилади. Танқидчи А. Алимуҳамедов эса «Уста Фиёс» ҳақида баъзи мулоҳазалар» мақоласида қаҳрамонларда тирик одамга хос «яхшилиқ» ва «ёмон-

<sup>149</sup> Шарқ юлдузи. 1955. № 4. 92-бет.

<sup>150</sup> Шарқ юлдузи. 1946. № 3. 68-бет.

лик»ларни топа билиш Мирмуҳсиннинг асосий ютуғидир»<sup>151</sup>, — дейди. Худди шу йўсинда ижобий қаҳрамонларни мураккаблиги билан кўрсатиш масаласига эътибор бериш бошланди.

Бу давр адабий танқидчилигига ижобий қаҳрамон ҳақидаги баҳсларда «идеал қаҳрамон» масаласи кўтарилиди. «Ойда ҳам доғ бор» деганларидек, ҳар бир энг ижобий, энг идеал бўлиб кўзга ташланадиган одамда ҳам қандайдир жузъий камчиликлар учраши мумкин. Демак, камчиликсиз одам йўқ. Гап ўша камчиликларни кўрсатиш зарур ёки нозарурлигига. Баъзан ижодкор жамият ҳаётида ўзининг асосий хусусиятлари билан ижобий планда ажralиб турадиган шахс образларини яратар экан, одатда унинг характеристидаги майда-чўйда, икир-чикирлар, жузъий камчиликларни бўрттиришга катта эътибор бермайди. Санъаткорлар бундай шахсларнинг жамият ҳаёти нуқтаи назаридан муҳим бўлган, ижтимоий тараққиётнинг илфор тенденцияларини ифодалайдиган, жамият аъзоларига таъсир ўтказиш жиҳатдан кўзга яққол ташланадиган бош хусусиятларига асосий эътиборни берадилар-да, шу орқали ўз идеалини бундай шахсларда мужассамластириладар. Шу йўл билан адабиёт ва санъат асарларида «идеал қаҳрамон» (яна ҳам аниқроғи — ёзувчининг идеалини ташувчи қаҳрамон) образи яратилади. Шу даврда майдонга келган Ойбекнинг «Олтин водийдан шабадалар» романидаги Ўқтам ва Комила маълум даражада шу типдаги ижобий қаҳрамонлар образини яратиш йўлидаги уринишларнинг самараси эди.

Адабий танқидчиликда совет адабиётида яратилган ижобий қаҳрамон образининг ўзига хослигини бўрттириб кўрсатишга интилиш натижасида классик адабиётдаги ижобий қаҳрамонларни камситиш кайфияти ҳам йўқ эмас эди. Бу тенденция бир гуруҳ танқидчиларнинг, шу жумладан, А. Гурвичнинг «Ижобий намуна-нинг кучи» («Новый мир». 1951. № 9) мақоласида янада бўртиб кўринди. Шу боисдан «Правда» газетасининг редакцион мақоласида бундай заарарли тенденция кескин фош қилинди: «Танқидчи ўз мақоласида шу нарсанни таъкидлаб кўрсатдики, буюк рус ёзувчилари ижобий намуна бўладиган кучга эга тўлақонли қаҳрамонлар образини яратадилар. Мабодо «шубҳасиз ижобий образлар» яратилган бўлса ҳам, улар «деярли фақат хотин-қизлардан» иборат эди... Рус воқелиги ўз замона-

<sup>151</sup> Шарқ юлдузи. 1948. № 1. 116-бет.

сининг энг илғор кишилари образларини яратиш учун ёзувчиларга етарли материал бермаган»<sup>152</sup>. Буни келтиришимиз бежиз эмас. Совет ёзувчиларининг Бутуниттифоқ II съезди арафасида ижобий қаҳрамон ҳақида баҳс бошланди. «Комсомольская правда» (1954. 13 июль) газетасида А. Протопопованинг «Ижобий қаҳрамоннинг кучи» мақоласи босилди ва А. Гурвичдан фарқ қиласидиган бошқа бир тенденцияга берилиди, яъни у «бизнинг воқелигимиз ёзувчига идеал шахс образини яратиш учун битмас-туганмас имкониятлар беради» дей идеал шахс образини яратишни шарт қилиб қўйди. У идеал, фавқулодда, ҳар қандай камчиликдан холи образлар яратиш зарурлиги ҳақида фикр юритиб, «идеал қаҳрамон» бўлиш учун зарур хислатларни белгилаб беришга ҳаракат қилди. Бу нуқтаи назарга баъзи ёзувчи ва танқидчилар (В. Кетлинская, Г. Мединский, Г. Николаева, Б. Рюриков ва бошқалар) қарши бўлиб, ижобий образлар яратиш совет адабиётининг асосий вазифаларидан бири эканлигини махсус таъкидлаган ҳолда, «идеал» қаҳрамон ҳақидаги схематик тасаввурлар ўринсиз эканини билдирилар. Баҳс СССР ёзувчилари съездидан ҳам давом этди. А. Сурков «Совет адабиётининг аҳволи ва вазифалари тўғрисида» қилган докладида шундай деди: «Мунозара қатнашчиларидан бири: «Бизнинг воқелигимиз ёзувчига шахс образини яратиш учун битмас-туганмас имкониятлар беради»,—деб ёзди ва адабиётдан «идеал қаҳрамонлар» яратиб беришни жуда қаттиқ туриб талаб қилди»... Мунозара қатнашчилари адабиётимиз тўплаган бой материални асос қилиб олиб, шу материал устида баҳслашмадилар»<sup>153</sup>. Съезд қатнашчилари «идеал қаҳрамон» яратиш талабига салбий муносабатда бўладилар. Чунки бу талаб ҳаёт ҳақиқатини олдиндан белгилаб берилган схемалар бўйича акс этиришга даъват этар эди.

Съезд қатнашчилари қаҳрамонларга гўё улар «ҳаётӣ» ва «кўламли» бўлиши учун, албатта, атайлаб қусурларни кўрсатиш, ортиқ даражада жўнлаштиришга, пастлаштиришга ҳам кескин қарши чиқдилар<sup>154</sup>.

Бадиий ижод тажрибасида биронта ижобий қаҳрамон иштирок этмайдиган асарлар ҳам учрайди. Бу хил-

<sup>152</sup> Адабий танқидчиликда ватанпарварликка қарши қарашларининг такрорланишларига йўл қўймайлик//Қизил Ўзбекистон. 1951. 31 октябрь.

<sup>153</sup> Шарқ ўлдузи. 1955. № 1. 27—28-бетлар.

<sup>154</sup> Қаранг: История русской советской литературы. В 4-х томах. Т. IV. М., 1971. С. 12—15.

даги асарлар кўпинча турли эътиrozларга, тортишувларга сабаб бўлади. Гоголнинг «Ревизор» комедияси шундай асарлардан бири эди. Асарда ижобий қаҳрамон йўқ, демак, ёзувчи идеалини ким ўзида ташийди, деган саволларга Гоголь: «Асарда олижаноб бир қаҳрамон бор, бу — кулгидир», деб жавоб берган, яъни кулги асарда ёзувчи позициясини аниқ белгилаб турадиган ижобий қаҳрамон вазифасини адо этади.

А. Қаҳҳорнинг «Сароб» романида ижобий образлар бор, лекин улар иккинчи даражали образлар. Романинг бош қаҳрамони Саидий — салбий образ. Демак, шу хилда ҳам асарлар бўлиши мумкин. Афсуски, бу ҳол баъзи таңқидчиларга ёзувчини буржуа объективизмида айблашга сабаб бўлди. Ҳ. Ёкубов, «А. Қаҳҳор «Сароб» романида буржуа объективизми методини давом эттириди. Романда салбий образлар орқали миллатчиларнинг аксилинқилобий ҳаракатларини фош қилишга, уларнинг ғоявий инқирозини кўрсатишга интилиш тамомила муваффақиятсизликка учради»<sup>155</sup>, — деб ёзди. Қейинчалик бу фикрнинг асоссизлигини адабий жамоатчилик англади.

Урушдан кейинги давр ўзбек адабиётшунослиги ва таңқидчилигига ҳар бир асарнинг марказида ижобий қаҳрамон бўлишини шарт қилиб қўйишдан иборат талаб хийла кучли эди. Биз Турсун Собировнинг «Совет адабиётшунослигида ижобий қаҳрамон проблемаси» мақоласида шуларни ўқиймиз: «... ижобий қаҳрамон — бадиий асарнинг асоси, қон томирларини ўзида бирлаштирувчи юраги... У бадиий асар ўз ичига қамраб олган барча воқеаларнинг марказида туради»<sup>156</sup>. Бу хилдаги фикрларни янада кўплаб келтириш мумкин.

Умумиттироқ совет таңқидчилигига ижобий қаҳрамонсиз асар бўлиши мумкинми ёки бизнинг ҳаётимиз ҳақидаги асарларда бош қаҳрамон салбий бўлиши ва санъаткорнинг асосий диққати шу салбий типга қаратилган бўлиши мумкинми? деган масалаларда қатор баҳслар кечди. Бу ўринда шуни ҳам эсда тутиш керакки, совет адабиёти олдига қўйиладиган талабларнинг ҳаммасини бутунicha механик равишда бир асар олдига, бир ижодкор олдига қўя бериш фойда бермайди. К. Симонов СССР Ёзувчилари союзи правлениесининг

<sup>155</sup> Ёкубов Ҳ. Ўзбек поэзияси ва прозасида социалистик реализм масаласига доир баъзи мулоҳазалар//Шарқ юлдузи. 1949. № 2. 114-бет.

<sup>156</sup> Совет мактаби. 1952. № 6. 41-бет.

XIV Пленумида қилган докладида махсус таъкидлаганидек, «ҳар бир асарнинг марказида ижобий қаҳрамон бўлсин ва асосий диққат ўшанга берилсин, деган талабни қўйиб бўлмайди»<sup>157</sup>.

Бу давр таңқидчилигида ижобий қаҳрамон масаласининг талқини билан танишар эканмиз, унинг лирик қаҳрамонга, яъни шеъриятда ҳаракат қиласидиган ва кўпинча жуда кўп ҳолларда шоир айтмоқчи бўлган фикрни ўзида ташийдиган образларга муносабатини эслатиб ўтишга тўғри келади.

Ҳ. Ёқубов «Ўзбек поэзияси ва прозасида социалистик реализм масаласига доир баъзи мулоҳазалар» мақоласида Улуғ Ватан урушидан кейинги ўзбек поэматарида социалистик жамият, коммунизм ғалабаси учун курашаётган дунёни қайта қураётган, меҳнатда фидойилик кўрсатаётган, кишилар асосий қаҳрамон бўлганигини махсус таъкидлайди ва шундай дейди: «бу достонлар авторлари... ҳаётнинг, социалистик қурилишнинг ривожланувчи тенденциясини топишга интилади... турмуш воқеаларига актив аралашади. Уларнинг қаҳрамонлари (беш қиз, Уста Ғиёс, Аҳмаджон, Асқар ота, Умрзоқ ва бошқалар) ўз шахсий манфаатлари эмас, балки давлат, Ватан манфаатлари билан яшайдилар, жамиятнинг иши билан куюнадилар, улуғ «дард» билан ёнадилар. Улар дадил, жасоратли совет кишиларидай тасвирланадилар, улар мақсадларига эришиш йўлида турган қийинчиликлардан қўрқмайдилар, қийинчиликларга рўпара келиб, уларни енга оладилар»<sup>158</sup>. Шу билан бирга, таңқидчи бу достонларда тасвирланган ижобий қаҳрамонлар кўпроқ ташқи тўсиқларни енгишига интилишларини, бу борадаги улар қалбиди, руҳий оламидаги мураккаб психологик кечинмалар деярли ифода этилмаганини, М. Бобоевнинг «Боғбон», Р. Бобоҷоннинг «Қадрдон дўстлар», Шукруллонинг «Чоллар» поэмасида композиция ва сюжетнинг пухта эмаслигини, воқеаларни кўрсатиш ўрнига нақлчилик устун келишини ҳам алоҳида қайд этади.

Қатор тақриз ва мақолаларда лирик асарлар, шеърий тўпламлар у ёки бу даражада таҳлил қилинди, шу муносабат билан ижобий лирик қаҳрамон хусусида гап очилди, турли-туман мулоҳазалар баён этилди. Бу борада ланжлик, руҳий бўшанглик, фикрий саёзлик ва мавҳумлик, қуруқ риторика ва мадҳиябозлик каби нуқ-

<sup>157</sup> Шарқ юлдузи. 1953. № 11. 12-бет.

<sup>158</sup> Шарқ юлдузи. 1949. № 2. 120-бет.

сонларни кескин, шафқатсиз танқид қилиш кучайиб борди. Бу ҳол лирик қаҳрамон яратишнинг объектив ва субъектив жиҳатларига назар ташлашга олиб келди. Ижтимоий турмушнинг илғор тенденцияларини, ҳаёт учун зарур бўлган томонларни ўзида акс эттирган, келажак учун тўсиқ Сўладиган иллатларга қарши шафқатсиз курашувчи қаҳрамонлар образини яратиш — бу масаланинг объектив жиҳати. Унинг субъектив жиҳати эса шоирнинг ўзи, яъни унинг қаҳрамон ҳақидаги нуқтаи назари, яратган образи. Демак, лирик образ мөҳият-эътибори билан шоир илмий ва бадний тафаккурининг кенг ва теранлигини, қалбининг, руҳий оламининг бойлигини кўрсатувчи гўё бир кўзгудир. Проза асарларида бўлганидек, танқидчиликда поэзия асарлари қаҳрамонларига муносабатда ҳам идеал, нуқсонсиз қаҳрамон образини яратишни шарт қилиб қўйиш ҳоллари учради. Бугина эмас, худди шу нуқтаи назардан адабиётимизда эътироф этилган, давр синовларидан ўтган баъзи бир асарларни «тафтиш» этишга уринишлар ҳам бўлди. Биргина мисол. Танқидчи Т. Жалолов «Ўйғун лирикаси ҳақида мулоҳазалар» мақоласида шундай деб чиқди: «Назир отанинг ғазаби» шеъри, бизнингча, ғайритабиний бўлиб чиққан. Мўйсафид бир чолдан бундай енгилтаклиknи кутиш мумкин эмас. Тажрибадан маълумки, чоллар салобатли, оғир ва донишманд бўладилар. Шунинг учун ёмғир томчилаши каби табиий бир ҳодиса чолларнигина эмас, ёшларни ҳам ортиқча ташвишга солмайди. Ўйғуннинг «Назир ота»си эса, бир томчи ёмғирдан шу қадар ғазабланиб кетадики, гўё олам тўфон остида қолаётгандек. Ғазабнинг зўридан ақли қочиб, девонавор вайсайди, Дон Кихотдан ўзиб, булутни «бўғмоқчи», уни «тилка-тилка» қилмоқчи бўлади, лекин булутлар Ўйғуннинг Дон Кихотидан тап тортмай, уни масхаралагандай ёмғирга айланиб томчилай бошлайди. Назир ота эса кўкка ўдағайлаб, «пахтазор сари» кетади.

Агар шоир Назир отасининг ёшига номуносиб бу енгилтаклик, тажангликни ватанпарварликнинг бир кўриниши дейдиган бўлса, шубҳасиз, янглишади. Бу совет кишисиндаги ватанпарварликнинг чуқур томирларини англамаслик, уни бачканалашибирини бўлиб чиқади. Ватанпарварлик ҳисси киши қалбida ҳаёт мантиқидан бунёдга келади-да, ақл-идрокнинг парвариши билан камол топади, шунинг учун унинг ҳар бир кўриниши мутлақо онгли бўлажак.

Назир отанинг ёмғир остида жиғибийрони чиқиб пахта териши эса, зилзила ҷоғида қулаётган томни елкамда тутиб қоламан, деб уринган телбанинг ҳаракатидек, ҳар қандай маънодан маҳрумдир»<sup>159</sup>.

Ахир, шеърда Назир отанинг табиат қийинчиликларидан қўрқмаслиги, халқ манфаати учун қайғуриши ифодалангани ҳақида жуда кўп фикрлар айтилган-ку? Унинг интилишлари ва ҳис-тўйғулари китобхонларни кучли ҳаяжонлантиради, шунинг учун танқидчи кўрган «нотабийлик» сезилмайди, аксинча, табиийдек идрок этилади. Демак, А. Сурков айтганидек, «ҳар қандай қонун ва қоида образни ва китобни жонсизлантиради, ҳаётий воқеликни кўрсатиш ўрнига ахлоқ тўғрисида дидактик ўғитхонликка олиб боради»<sup>160</sup>.

Шундай қилиб, ижобий қаҳрамон масаласи бу давр танқид ва адабиётшунослиги диққат марказида турди, бу соҳада қатор фикр-мулоҳазалар айтилди. Асл эътибори билан бу мунозаралар адабиёт илмининг ривожига хизмат қилди.

## ТАНҚИДДА БАДИИ ҚОНФЛИКТ ПРОБЛЕМАСИ

«Правда» газетасининг «Драматургиядаги қолоқликка барҳам берайлик» (7 апрель 1952 йил) сарлавҳали редакцион мақоласида «конфликтсизлик назарияси» нинг моҳияти очиб ташланди, замонамиз қаҳрамонларини бир ўтомонлама ва руҳи оламини қашшоқ қилиб кўрсатиш тенденциялари кескин танқид қилинди. Бундай камчиликлар бошқа қардош республикалар адабиётида бўлгани сингари ўзбек адабиётида ҳам мавжуд эди. К. Яшин бу ҳақда шундай дейди: «Ҳақиқатан, совет кишилари образини сунъий йўл билан қашшоқ қилиб кўрсатишга олиб борадиган «конфликтсизлик назарияси» кўпчилик ўзбек драматурглари пьесаларида ўз изини қолдирган. Буни эътироф этмай илож йўқ. Гапни ўзимдан бошлайман.

Халқ қурилишига, халқимизнинг мислсиз қаҳрамонлигини кўрсатишга бағишлиган «Улуғ канал» операси либреттосида халқ турмушини курашсиз, зиддиятларсиз кўрсатиб, мен жиддий ғоявий-бадиий хатоликка йўл қўйганман. Мен социалистик қурилиш ҳеч қандай қаршиликсиз, қийинчиликсиз, муттасил хурсандчилик, тантана, ўйин-кулги билан ўтади, деган тушунчани ис-

<sup>159</sup> Совет Узбекистони маданияти. 1956. 7 март.

<sup>160</sup> Шарқ юлдузи. 1955. № 1. 29-бет.

ботлаш учун интилганман. Либреттонинг иккинчи таҳрири («Бахтлар водийси»)да битта ҳам салбий персонаж йўқ эди. Кураш «энг яхши» нарса билан «яхши нарса» асосига қурилган... Бу, албатта, ҳаёт ҳақиқатини бузиб кўрсатишга олиб борганлиги ўз-ўзидан аён. Натижада опера томошабинлар ўртасида муваффақият қозонмади ва тез орада театр репертуаридан тушиб қолди.

Нега шундай бўлган эди. Яқинда «Литературная газета»да А. Софроновнинг драматургия масалаларига бағишлиланган мақоласини ўқиб, ундаги бир жумла устида ўйланиб қолдим. Мазкур жумлада гап худди менинг «Улуғ канал» операм устида бораётгандай эди. Шу жумлани келтираман:

«Ёзувчилар союзидаги мунозаралардан бирида, коммунизмнинг улуғ қурилишларида умуман салбий кишилар бўлмайди ва бўлиши ҳам мумкин эмас, деган фикр айтилган эди. Бу хато нуқтаи назардир. Коммунизмнинг улуғ қурилишлари... мамлакатнинг ҳар еридан келган минглаб одамлар тўплangan жой... Улар орасида ўзининг ҳалол меҳнати билан коммунизм қурилишига ҳисса қўшаётган чинакам қаҳрамонлар бор... Шу билан бирга, шу қурилишларга ўз манфаатини, кўпроқ пул орттиришни кўзлаб келганлар, кейинги йилларда бир неча бор иш жойини ўзгартириб, ҳамён дардига мубтало бўлган қанотсиз читтаклар, ниҳоят катта коллектив орасида жамиятдан бекинадиган товламачи, юлғичлар ҳам бор».

Мен ўзимнинг либреттомда ана шу ҳаёт ҳақиқатини деярли четлаб ўтганман, илгор совет кишиларининг ўтмиш сарқитлари билан заҳарланган одамларга қарши олиб борган курашларини кўрсатмаганман»<sup>161</sup>.

«Янгиликнинг эскиликка қарши кураши ғоят турлиatuman ҳаётий конфликтларни келтириб чиқаради, бу конфликтлар бўлмаса ҳаёт ҳам бўлмайди, демак, санъат ҳам бўлмайди... Конфликтсиз драматургия ҳақидаги хато «назария» воқеликнинг антиреалистик, бир ёқлама, нотўғри кўрсатилишига олиб келади. Ҳаётий конфликтларни бадиий жиҳатдан ифодалаб бермасдан туриб, одамнинг характеристерини чуқур ва ҳар томонлама кўрсатиш мумкин эмас»<sup>162</sup>, — дейилади «Правда»нинг ўша редакцион мақоласида.

<sup>161</sup> Комил Яшин. Асарлар. Учинчи том. Тошкент. 1972. 117—118-бетлар.

<sup>162</sup> Шарқ юлдузи. 1952. № 5. 94, 98-бетлар.

Бу даврда ёзилган мақола ва монографияларда конфликтсизлик «назария»си кескин танқид қилинди. Бу табиий ҳол эди. Шу руҳда ёзилган ишлардан бирій Ҳ. Абдусаматовнинг «Улуғ Ватан урушидан кейинги ўзбек совет драматургиясида конфликт масаласига доир» (1954) китобидир.

Китобда урушдан кейин яратилган драмалар конфликт нұқтаи назаридан таҳлил қилинади ва конкрет мисоллар асосида «конфликтсизлик назария»сининг зарарлы оқибатлари хусусида фикр ва мулоҳазалар юритилади.

С. Азимов шоир Асқад Мухторнинг «Катта йўлда» поэмасига ёзган тақризида конфликтнинг ҳаётийлиги масаласига тўхтади; «Шоир ўз қаҳрамонидаги ижобий хусусиятларни қуруқ тавсиф ёки баъзи драматик асарларимизда авж олган (қизни отага, отани ўғилга, хотинни эрга қарши қўйиш каби) шартли «оилавий» конфликтлар доирасида эмас, балки чуқур ҳаётий зиддиятлардан фойдаланиб, жонли образларда талқин эта билган. Зотан, бадиий асарнинг кучи ҳам мана шунда»<sup>163</sup>.

Конфликтсизлик «назария»си таъсири турли асарларда турлича намоён бўлди. Баъзилар ўз асарларида яхлит, тўлақонли йирик конфликт яратишдан чўчиб майда конфликтлар излашга интиладилар. Ойбекнинг «Олтін водийдан шабадалар» романида асосий қаҳрамон Ўқтамга қарши қўйилган кучлар — ҳосилот советининг раиси Каримқул, колхоз комсомол ташкилоти секретари Насимжон рақиб олдида ожиз. Бу курашувчи томонлар ўртасида номутаносиблик туғдиради.

Асар тўғрисида тақриз ёзган И. Султонов романда район партия комитетидаги ишлар ёзувчи диққатидан четда қолганлиги ҳақида гапириб: «Район партия комитети бюросининг бир мажлисиёқ ёзувчига қанчадан-қанча ижобий материал беради», — деган эди. Дарҳақиқат, ёзувчида шундай имконият бор эди. Ҳеч бўлмаса шу ердан яхлит конфликт топиши, уни роман марказига олиб чиқиши мумкин эди. Қулай имконият воқееликка айлантирилмайди.

Афсуски, танқидчилик ҳам бу борада ёзувчига етарли ёрдам бермади, романнинг асл камчиликларини кўрсатиш ўрнига, унинг ожиз томонларини кўз-кўз қилишга уринди. Ҳ. Ёқубов сўзлари билан айтганда, «конфликтсизлик назария»сини илгари сурган айрим

<sup>163</sup> Қизил Ўзбекистон. 1950. 4 январь.

танқидчилар ёзувчининг камчилигини чуқурлаштиришга интилдилар, турмуш ҳақиқатини бўяб, силлиқлаб кўрсатишга даъват қилдилар.

В. Й. Зоҳидов ўзининг «Ойбекнинг янги романи ҳақида»<sup>164</sup>, «Ҳозирги ўзбек совет адабиётида бъзи камчиликлар ҳақида»<sup>165</sup>, «Адабиётнинг партиявийлиги учун»<sup>166</sup> деган мақолаларида худди шу «конфликтсизлик назария»сини ҳимоя қилди ва совет воқелигидаги типиклик ҳодисасини нотўғри тушунтириди»<sup>167</sup>.

«Конфликтсизлик»нинг яна бир кўриниши қандайдир «юзаки зиддиятлар»ни тўқиб чиқаришда сезилади. Н. Тихонов СССР Ёзувчилари союзи правлениесининг ўзбек адабиётига бағишлиланган XIII Пленумида шундай деган эди: «Бир неча йиллардан бери кўп асарларда кибрланиб кетган колхоз раиси ёки бригада бошлиғининг образи такрорланиб келмоқда, конфликт эса буларнинг бошқа колхозчилар билан тўқнашувла-рига асосланиб қурилмоқда. Прозада ҳам, драматургияда ҳам содда, эскирган конфликтлар тез-тез учраб туради. Авторлар эскилик билан янгилик ўртасидаги курашни воқеликнинг ўзидан излаш ўрнига, ҳаммани қониқтириш учун муваффақиятли якунланадиган жуда жўн воқеалар ўйлаб чиқарадилар»<sup>168</sup>.

«Ўзбекистон коммунисти» журнали И. Раҳимнинг «Ҳаёт булоқлари» романида конфликтни бўшаштириш оқибатида схематизм келиб чиққанини маҳсус таъкидлаган эди. «Романда мавжуд бўлган конфликтни бўшаштириб юбориш, бъзи воқеаларни тасвирлашда, образларни яратишда схематикликка йўл қўйиш ҳоллари ҳам мавжуддир»<sup>169</sup>.

Бадий конфликт асарнинг ўзагини ташкил этар экан, у ғоявийликка чамбарчас боғлиқ ва кўпинча улар бир-бирларини белгилайдилар. Зотан, «ҳаётни зиддиятсиз, курашсиз акс эттириш — ҳақиқатдан кўз юмиш, санъат асарини ҳақиқий ғоявийликдан маҳрум этиш демакдир. Фақат ҳақгўй санъатгина чинакам ғоявий бўлади»<sup>170</sup>.

<sup>164</sup> Шарқ юлдузи. 1950. № 10. 148—167-бетлар.

<sup>165</sup> Қизил Ўзбекистон. 1950. 10, 15 декабрь.

<sup>166</sup> Ўзбекистон коммунисти. 1950. № 9. 30—33-бетлар.

<sup>167</sup> Ёкубов Х. Ойбек. Танқидий-биографик очерк. 102-бет.

<sup>168</sup> Тихонов Н. Ўзбек совет адабиётнинг муваффақиятлари ва камчиликлари//Шарқ юлдузи. 1950. № 2. 11-бет.

<sup>169</sup> Ўзбекистон коммунисти. 1953. № 12. 39-бет.

<sup>170</sup> Яшин К. Асарлар. Тўрт томлик. 3-том. Тошкент. 1972. 120—121-бетлар.

К. Яшин Туйғуннинг «Ҳикмат» пьесаси мисолида «конфликтсизлик назарияси»нинг қаҳрамон характеристики очишдаги зарарини кўрсатади. «Асада иштирок этувчи шахслар шундай тасвирланганки, бундан турмушдаги зиддият «яхшилик» ва «жуда яхшилик» ўртасидаги курашдан иборатдай бўлиб кўринади. Ҳикматга операция қилишни ман этган бош врач — Бузрук салбий персонаж эмас, у «яхши» одам. Ҳикмат эса «ундан ҳам яхши». Шунинг учун ҳам Ҳикмат пьесада жуда илфор. Бузрук эса сал қолоқ киши ҳисобланади»<sup>171</sup>.

Конфликтсизлик авж олган вақтларда тақлидчилик элементлари ҳам тез-тез кўрина бошлади. К. Яшин маҳсус таъкидлаганидек, «Ҳикмат» асари А. Корнейчукнинг машҳур пьесаси — «Платон Кречет»нинг ўзбекча варианти бўлиб қолган... Янги, чинакам пьеса яратиш — бу инсон туйғулари, руҳий дунёси ва ижтимоий муносабатларида ҳамма вақт кашфиётдир. Конфликтсизлик «назарияси» туфайли... бундай кашфиётлар яратишдан ҳадиксираш драматургларни тақрорларга йўл қўйишига, тайёр ва мавжуд нарсаларни чайнашга олиб келди...»<sup>172</sup>. Юқорида биз С. Лиходзиевскийнинг Рамз Бобоҷон «Қадрдон дўстлар» поэмасида А. Твардовскийнинг «Василий Тёркин» асарига тақлид қилгани хусусидаги мулоҳазасини келтирган эдик. К. Яшин ўзининг «Генерал Раҳимов» асарида бу «назария» таъсирига берилганлигини эътироф этди ва Ўйғуннинг «Ҳаёт қўшиғи», «Навбаҳор» асарларида «конфликтсизлик» аломатларини кўрсатиб берди.

Урушдан кейинги адабиётда яна бир заарли тенденция пайдо бўлди. Буни қисқа қилиб, «конфликт — конфликт учун» деб аташ мумкин. Бундай кайфиятга берилган ёзувчи асада муайян конфликт бўлиши керак экан, деб ҳисблайди-да, ҳар хил сохта, майда-чуйда, кўпинча англашимовчилик асосига қурилган конфликтларни ўйлаб чиқара бошлайди.

Конфликтсизлик «назарияси» фақат ёки драматик асарлардагина эмас, бу «назария»га асосланган сохта кўтаринкилик, маъносиз оптимизм, бинобарин, воқеаларни юзаки тасвирлаш, ҳодиса ва фактларни қуруқ баён қилиш билан чекланиш поэзияда ҳам кўзга ташланар эди.

<sup>171</sup> Уша жойда.

<sup>172</sup> Уша жойда.

М. Юнусов «Самарқандлик ижодкор ёшлар» мақоласида ёш шоирларнинг шеърлари ҳақида ёзади: «Шоирлар гўё «конфликтсиз» дунёда бетараддуд, беташвиш, эътиборсиз, сокин ҳаёт кечираётганга ўхшайдилар. Лирик қаҳрамон олдида унинг шахсий иштирокини талаб этадиган вазифалар йўқдек, уни ҳеч нарса тараддудга солмаётгандек, ҳамма нарса тайёрдек кўринади»<sup>173</sup>. Бу фикр фақат ёшлар шеърияти ҳақида эмас, балки танқидчи сўзлари билан айтганда, «кўпгина тажрибали шоирларимизда учрайдиган» нуқсон эди.

Кўринадики, конфликтсизлик «назарияси»га муносабат билдириш, аввало драматургия соҳасида, сўнгра проза соҳасида олиб борилди. Маълум вақтгача лирика бу умумий ҳаракатдан четда қолди. Бунинг сабаби лирикада конфликтнинг ўзига хослиги, ҳатто лирикада конфликт бўлиши, бўлмаслиги ҳақидаги масалалар кўпчилик мунаққидларни иккилантириб турар эди.

Эллигинчى йилларнинг иккинчи ярмига келиб худди шу масалалар хусусида, яъни лирикада конфликт, унда конфликтнинг ўзига хос хусусиятлари ҳақида мақолалар яратилди. Бу ўринда Ҳ. Ёқубовнинг «Лирикада конфликт» ва О. Шарафиддиновнинг «Лирика ҳақида мулоҳазалар» (1956) мақолаларини эслаш киғоя.

«Ҳатто айрим шоирлар,— деб ёзади О. Шарафиддинов,— адабиётнинг конфликтли бўлиши ҳақидаги талаб фақат драма ёки эпик асарларгагина тааллуқлидир, «лирикада конфликтнинг бўлиши шарт эмас», деб ишондилар. Бундай қарашлар адабий ижодга ҳам таъсир кўрсатмоқда ва натижада лирикада воқеликни бўяб, ялтиратиб тасвирловчи кўпгина шеърлар вужудга келмоқда»<sup>174</sup>.

Лирикада конфликт ўзига хос кўринишда зоҳир бўлади. «Лириканинг специфик хусусиятларига кўра унда конфликт характерларнинг тўқнашуви ва кураши формасида эмас, балки асарнинг реал воқеликка муносабатида, шу муносабатни ифодаловчи ва шу муносабат натижасида туғилган фикрлар, кечинмалар формасида намоён бўлади»<sup>175</sup>.

1956 йили «Совет Ўзбекистони маданияти» газетасида лирика ҳақида бўлган жиддий ва қизғин муноза-

<sup>173</sup> Шарқ юлдузи. 1955. № 12. 116-бет.

<sup>174</sup> Шарафиддинов О. Замон, қалб, поэзия. Тошкент. 1962. 63-бет.

<sup>175</sup> Уша жойда. 66-бет.

рада Ҳ. Ёқубов «Лирикада конфликт» мақоласи билан майдонга чиқди: «Социалистик лириканинг совет воқеалиги билан узвий боғланиши, партиявийлик, ҳаққонийлик, типиклик принциплари унинг конфликтли бўлишини тақозо қилади»<sup>176</sup>.

Тўғри, лирикада янгилик билан эскилик орасидаги кураш ҳам, турмушдаги хилма-хил зиддиятли воқеа-ҳодисалар ҳам, кишилар характеристидаги манфий ва мусбат томонлар ҳам лирикада ўзига хос равишда акс эта-ди. Конфликтсизлик лирикада қаҳрамон руҳий дунёсини юзаки талқин қилишга, турмушни бўяб-безаб кўрсатишга, қуруқ ваъз-насиҳатларга берилиб кетиши-га, майда ҳиссиётлар оғушига тушиб қолишга, мадҳия-бозлиқ ва саноқсиз хитобларга, риторикага кенг йўл очади. Конфликтлилик лириканинг қалби, юксак пар-вози учун эъзозли қанотидир. Чинакам лирика аслида конфликтлиликдан, шоирнинг руҳий дардидан бошли-нади. Поэзияда фикрий теранликнинг замирида шоир-нинг ҳаётни зиддиятли идрок қилиши туради. Шеърдаги конфликт шоирнинг юксак идеали билан ташқи муҳит ўртасидаги зиддият сифатида ҳам воқе бўлиши мумкин. Демак, шеъриятимиз қиёфасини ҳаётга актив муносабат, шиддатли руҳ белгилайди. Шу маънода Абдулла Ориповнинг «Авлодларга мактуб» шеъридан баъзи мисраларни эслаш фойдадан холи эмас:

Азиз набиралар, унутманг фақат,  
Ҳар бир фожианинг бордир чораси.  
Тупроқ қўзголмасдан ўрнидан баттар,  
Солмасидан аввал даҳшат, қатағон,—  
Ер ости тинч турсин десангиз агар,  
Сизлар, ер устида сўйламанг ёлғон!<sup>177</sup>

Ҳар бир ижодкор минг йиллик мозийга мурожаат қиласими, набиралар тимсолида истиқболга назар ташлайдими, доим китобхонлар олдидағи катта масъулиятини чуқур ҳис қилиши, гражданлик эътиқодига содиқ бўлиши тақозо этилади. Шеърдаги конфликт эса шоирнинг идеали билан ташқи муҳит ўртасидаги зиддият сифатида намоён бўлади.

Шундай қилиб, бу давр танқидчилиги конфликтсизлик «назарияси», бинобарин, юзакиликка, ҳаёт воқелигини бекорга безаб кўрсатиш тенденцияларига қарши курашлар даври бўлди.

<sup>176</sup> Ёқубов Ҳ. Адабий мақолалар. Тошкент. 1970. 231-бет.

<sup>177</sup> Орипов Абдулла. Йиллар армони. Тошкент. 1984. 138-бет.

## АДАБИЙ ТАНҚИДДА ТИПИКЛИК ПРОБЛЕМАСИ

Бу давр ўзбек адабиётшунослиги ва танқидчилигига ижобий қаҳрамон, конфликт каби, типиклик масаласига ҳам эътибор кучли бўлди, бу борадаги баҳсларда турли-туман фикрлар айтилди, ҳар хил нуқтаи назар байён қилинди.

Бу давр ўзбек адабиётшунослиги ва танқидчилигига типиклик проблемаси ҳақида гап борганида биринчилар қаторида Лазиз Қаюмовнинг урушдан кейинги давр колхоз ҳаётини акс эттирган ўзбек романларида типиклик проблемаси хусусидаги ишини эслаб ўтиш керак бўлади. Тадқиқотчи Ойбекнинг «Олтин водийдан шабадалар», А. Қаҳҳорнинг «Қўшчинор чироқлари», И. Раҳимнинг «Ҳаёт булоқлари» каби романларини типиклик проблемаси нуқтаи назаридан анча кенг таҳлил қилди<sup>178</sup>. Тадқиқотчи ўз ишида Сайрамов ва Ўқтам образларини урушдан кейинги колхоз ҳаётини акс эттирувчи типик ва бош фигуralар деб атайди. У асардаги Ўқтам, Сайрамовга ўхшаган образларнинг характерли хусусиятларини қўйидагича санайди: «...Партия ишига чексиз фидокорлик, юқори гоявийлик, меҳнаткашларнинг мағфаатларига қарши бўлган кучлар билан муроса қилмаслик, олға қараб интилишга халақит берадиган камчиликларга қарши аёвсиз курашиш, тинчлик ва социализм ишининг енгилмас эканлиги, ҳалқ оммасининг кучига тўла ишониш, янгиликларни сеза билиш ва қўллаб-қувватлаш, ташаббускорлик ва демократизм». Бир жиҳатдан булар тўғри. Булар партия уставида кўрсатилган, ҳар бир коммунистга хос бўлган умумий хусусиятлар. Образ бадиий деталлар билан индивидуал, жонли, ёрқин характер сифатида ажралиб туриши керак. Сайрамов ва Ўқтам образлари бу жиҳатдан етарли даражада ажралиб турмайди. Шу маънода мунаққид типиклик билан индивидуаллик орасидаги боғланишга кўп эътибор бермагани сезилиб турди.

«Олтин водийдан шабадалар» романи ҳақида гап борганида, ўша йилларда танқидчилик Мирҳайдар образига ҳам ҳар хил муносабатда бўлганини айтиб ўтиш керак. В. Зоҳидов фикрича, Мирҳайдар характеридаги баъзи хусусиятлар типик эмас. Ҳ. Ёқубов эса Ўқтам би-

<sup>178</sup> Қаюмов Л. Бадиий адабиётда типиклик проблемаси//Шарқ юлдузи. 1956. № 9; Типиклик ва бадиий маҳорат//В. И. Ленинномидаги Ўрта Осиё Давлат университетининг илмий асарлари. Тошкент. 1957.

лан Мирҳайдар орасидаги тўқнашувларнинг моҳиятига асослашиб, юқоридаги фикрнинг аксини айтади. В. Зоҳидов ёзади: «Қитобхон ёқимли, доно ва илғор Мирҳайдар ота образида бирорта ҳам дөф бўлмаслигини истайди, шундай олижаноб ва ақлли отанинг колхозда электростанция қуришга ва олимлардан фойдаланишга, яъни колхоз ҳам колхозчилар учун жуда фойдали бўлган бу масалаларга қарши чиқа олишига ишонгиси келмайди. Шунинг учун ҳам юқоридаги конфликт муайян даражада сунъий тус олиб қолади. Ўша икки масаладаги қолоқликни, чунончи, ҳосилот раисининг ўзиға берилганда ва Мирҳайдар отани доғсиз қолдирилганида, яъни бу образни ёрқинлигича қолдирилганида ва Мирҳайдар отадек колхоз раиси билан партия ташкилотининг жонкуяр Ўқтамдек секретари ҳамиша бир-бирини тушунадиган ва хурмат қиласидиган, бир ёқадан бош чиқариб ишлайдиган, бир-бирининг хатосини ўз вақтида кўрсатиб тузатиб, танқидни «гапнинг қаймоғи» деб самимий англайдиган ота-боладек қилиб берилганда, асар, хусусан Мирҳайдар ва Ўқтам образлари анча ютган бўлар эди»<sup>179</sup>.

В. Зоҳидов характерни «тоза» — аъло даражада ижобийларга ва «нотоза» — салбийларга қатъян бўлишнинг тарафдори. Шунинг учун ҳам у ёзувчига тезлик билан Мирҳайдар характеридаги бу қарама-қаршиликларни силлиқлаб юборишни маслаҳат беради. Ҳ. Ёқубов бу масалага бирмунча тўғри ёндашади. Лекин у В. Зоҳидовни танқид қиласар экан, ўзи ҳам маълум даражада бир ёқламаликка ва анализлар юзакилигига йўл қўяди.

В. Зоҳидов романда Мирҳайдардек ақлли отанинг колхозда электростанция қуришда олимлардан фойдаланишга қарши чиқишига ишонгиси келмайди. Шунинг учун ҳам юқоридаги конфликт муайян даражада сунъий тус олиб қолади, деганида маълум даражада ҳақ. Қолаверса, В. Зоҳидов Мирҳайдар характери тасвирида нималардир етишмаслигини сезади. Лекин нима етишмаслигини топишга ҳаракат қиласидаги эса тўғридан-тўғри конфликтсизлик «назарияси» позициясига ўтиб кетади. Ҳ. Ёқубов ҳам В. Зоҳидовни Мирҳайдар характерини тасвирлашга нимадир етишмаслигини то-па олмагани учун эмас, фақат уни роман таҳлилига «конфликтсизлик» нуқтаи назаридан ёндашгани, типик ҳодисани нотўғри тушунтиргани учун танқид қиласади.

<sup>179</sup> Шарқ юлдузи. 1950. № 10. 159-бет.

Воҳид Зоҳидов романдаги Комила образини «энг мукаммал образ» деб айтади. «...Ҳозирга қадар ўзбек совет адабиётида,— деб ёзди танқидчи,— ўзбек совет колхоз аёлининг бу даражада мукаммал ва ёқимли образи яратилмаган эди»<sup>180</sup>.

Комила образининг ёқимлилиги, жозибадорлиги ҳақида айтилган фикрга эътиroz билдириш қийин. Романда бу образни таҳлил қиласар экан, Ҳ. Ёқубов: «...Комила образини «энг мукаммал образ» деб бўлмайди»<sup>181</sup>, деган хulosага келади. Танқидчи бир ўринда романда «Комила характерини шакллантира борган типик шароит равшан кўрсатилмайди», дейди. Маълумки, Ф. Энгельс адига Маргарет Гаркнессининг «Шаҳар қизи» повести ҳақида гапириб, «характерлар ўз ҳаракат доирасида етарли даражада типик, лекин уларни қуршаб турган ва ҳаракат қилдираётган шароитлар етарли даражада типик эмас»<sup>182</sup>,— деган эди. Демак, ижодкор асарлар типик характер яратиш учун, энг аввало, уни ҳаракатга келтирган типик шароит ҳақида жиддий бош қотириши foятда муҳим. Типик характерни типик шароитда кўра олмаслик эса бу даврда яратилган айрим роман, драма ва поэмаларда ҳам мавжуд эди.

Ойбек романда персонажлар тилини индивидуаллаштириш жараёнида уларнинг ҳар бирига хос сўзлар, иборалар топишга алоҳида эътибор беради, кўпинча бунга эришади. Лекин баъзи бир танқидчилар кексаларга одат бўлиб қолган оддий сўзларни, ибораларни ишлатишга қарши чиқдилар. «Романдаги колхозчилар тилидан хурофий сўзлар ишлатилади. Саксон ота армияга кетган уч ўғли ҳақида шундай дейди: «Бири «қора хат» бўлди. Ўртанча ўғлим эди. Тақдирга бўйсундик, худога шукур, катта билан кичиги сиҳат ва саломат».

Ўқтамнинг онаси ўз ўғлига айтади: «Худога шукур, бу йил пахтанинг кўриниши яхши». Ўқтам фронтдан қайтиб келганда унинг онаси яна: «Худога минг қатла шукур, дийдор кўришдик», дейди.

Тўғри, автор баъзи одамларга эскидан одат бўлиб қолган иборани ўз қаҳрамони сўзларига қистиради. Лекин бу ортиқчадир, кераксиздир, айниқса, Саксон

<sup>180</sup> Шарқ ўлдузи. 1950. № 10. 115-бетлар.

<sup>181</sup> Ёқубов Ҳ. Ойбек. Танқидий-биографик очерк. 104—105-бетлар.

<sup>182</sup> Шарқ ўлдузи. 1950. № 10. 164-бет.

оталарни шундай сўзлатиш тамомила ножўя ва ҳақиқатга сира тўғри келмайди»<sup>183</sup>.

Кўриниб турибиди, В. Зоҳидов Ойбек тасвирилаган қаҳрамонларни типиклик нуқтаи назардан таҳлил этишга асосий эътиборни қаратади-да, уларни индивидуал қиёфага эга бўлган муайян инсон эканлигини баъзан эътиборга олмайди.

Юқоридагидек, типикликни нотўғри талқин қилишлар С. Анорбоевнинг «Давримизнинг ҳақиқий қаҳрамони образини яратиш йўлида» мақоласида ҳам кўзга ташланади. Мақола автори драматург Уйғуннинг «Навбаҳор» ва «Олтин кўл» пьесаларини асосан социологик планда таҳлил этади ва баъзан бадиий ижоднинг, адабий ҳодисаларнинг специфик хусусиятларини эътиборга олмайди.

Типиклик — кенг ва кўп қиррали проблема. Бу борада адабиётшунослик ва танқидчиликда кўп баҳслар бўлди. Баъзи бирорлар уни нотўғри талқин этди, айримлари юзаки тушунди, бошқа бирлари эса унинг баъзи томонларига кучли ургу бериб, бошқа жиҳатларини эътиборда тутмади.

Бундай хилдаги турли-туманлиқ бадиий ижодкорларнинг мақолаларида ҳам кўринди. Бу ўринда биргина мисол келтириш билан чекланамиз. «Юрак сирлари» — Баҳром Раҳмоновнинг биринчи йирик асари. У анча шов-шувга сабаб бўлди. Сурмахон ўша пайтдаги типик мешчанка. Эри Йлҳом эса пок инсон ва ҳақиқий олим. Бир оиласида иккى хил шахс, яъни орзуумидлари бир бўлмаган эр-хотин. Шундай экан, улар орасида чинакам оила бўлиши мумкинми? Муҳаббатчи? Бу ҳаётий саволларга танқидчилар хилма-хил жавоб беришди. Ҳамид Ғуломнинг «Юрак сирлари»нинг хатоси нимада?» деган тақризида: «Комедиянинг асосий персонажи қилиб кўрсатилган Сурмахон образи, ҳақиқатда салбий образ эмас, уйдирма образ... Саттор, албатта совет педагоги ёки ёзувчининг типик образи эмас. Унинг қилиқларини — хотинини қўноп равишда ҳайдашини, орадан ҳеч вақт ўтмай, бошқа бир қизга гулдаста кўтариб, муҳаббат изҳор қилишини, боласининг ҳолидан бир йил давомида хабар олмаслигини сира ҳам типик ҳодиса деб бўлмайди... Комедиянинг бутун конфлиktи, тематик «ўткирлиги» ва кульминацион чўққиси ана шу нотўғри муносабат асосига қурилган»<sup>184</sup>.

<sup>183</sup> Шарқ ўлдузи. 1950. № 10. 164-бет.

<sup>184</sup> Қизил Узбекистон. 1954. 23 январь.

М. Мұхамедов ҳам бу асарга худди шу принципда ёндашади: «Драматург ҳаётда учрайдиган баъзи бир салбий ҳолларни нотўғри тушунган ва натижада айрим кишилардаги бузуқ ахлоқ, калтабинлик сингари ҳолларни умумлаштириб, бўрттириб юборган»<sup>185</sup>.

Адабий танқидчилик «Юрак сирлари»га муносабатдаги бундай нуқтаи назарларнинг хатолигини кўрсатиб берди. С. Азимов шундай дейди: «Шу кунларда боси-либ чиққан «Юрак сирлари» пьесасининг хатоси нима?» сарлавҳали Ҳ. Гуломнинг мақоласи типикликка, ўткир ҳаётий конфликт масалаларига нотўғри нуқтаи назардан қарап кайфиятларининг қанчалик яшовчан эканлигидан далолат беради. Мақола автори пьеса қаҳрамонининг ўз хотинини уйдан ҳайдаб юборишини, ёш қизга севги изҳор қилганини, ўз болаларига нисбатан оталарча муносабатда бўлмаганлигини типик ҳодиса эмас деб ҳисоблади. Бу билан автор конфликтсизлик «назарияси»ни тиклашга уринади, типикликни қандайдир статик ўртача нарса сифатида нотўғри тушунтироқчи бўлади. Ҳ. Гуломнинг бу позицияси типикликни марксча-ленинча тушунишга зиддир, унинг бу фикридан объектив тарзда бизнинг турмушимиз тўғрисида сатирик образлар — типлар яратиш мумкин эмас, деган фикр келиб чиқади»<sup>186</sup>.

Сўнгра С. Азимов ўз мақоласида А. Фадеевнинг «Совет ёзувчиларини тарбиялаш характерига эга бўлган ва камчилик, хатоларни тузатишга қаратилган танқид билан совет жамиятига ёт ва душманлик идеологиясини онгли равишда ташувчи адабиётдаги душман элементларнинг танқидини аралаштириш ярамайди» деган фикрини келтиради ва давом этиб ёзади: «Шу нуқтаи назардан қараганда Б. Файзиевнинг «Навоий» романи ҳақида», Ҳ. Саидовнинг «Олтинқўл» пьесаси ҳақида», А. Валидовнинг «Бўри изидан» романи тўғрисида» ва Ш. Тоҳировнинг «Болалар учун юксак ғояли асарлар яратайлик» (Ш. Саъдулланинг шеърлар тўплами тўғрисида) сарлавҳали мақолалари кескин қораланиши керак.

Бу мақолаларда совет ёзувчисини танқид қилиш билан бизга ёт ва душманлик идеологиясини онгли равишда ташувчи адабиётдаги душман элементларни танқид қилиш ўртасида чегара йўқ; айрим совет ёзувчилари салкам миллатчи деб эълон қилинади. Танқид-

<sup>185</sup> Қизил Узбекистон. 1954. 30 июль.

<sup>186</sup> Шарқ юлдузи. 1954. № 3. 105-бет.

чи шуни ёддан чиқармаслиги керакки, ёзувчини ортиқ-ча мақтаб юбориш ҳам, уни ер билан яксон қилиб юбориш ҳам ёзувчини хафа қилади. Фақат асосли мақтов ва асосли танқидгина совет ёзувчисига фойда келтириши мумкин.

Ўзбекистон Коммунистик партияси Марказий Комитети ўзбек ёзувчиларининг айрим асарларидағи ғоявий-бадиий хатоларни очиб ташлади ва қоралади, бу хатоларнинг тезда йўқолишини талаб қилди, шу билан бирга, Марказий Комитет ёзувчи кадрларга нисбатан эҳтиёткорлик ва диққат билан қарашда намуна кўрсатди. Юқоридаги мақолаларнинг авторлари Марказий Комитет қарори билан никобланган ҳолда, «адабиётнинг тозалиги учун курашайлик» деган байроқ остида айрим камчиликлари бўлса ҳам, халқ турмушини асан тўғри акс эттирувчи асарларга нисбатан ишончсизлик билдириллар»<sup>187</sup>.

1955 йили «Қизил Ўзбекистон» газетасида «Замондошларимизнинг ёрқин образларини яратайлик» номли бош мақола босилиб чиқди. Үнда шундай дейилади: «А. Қаҳҳорнинг «Шоҳи сўзана», «Оғриқ тишлар», Б. Раҳмоновнинг «Юрак сирлари» ва бошқа асарларнинг саҳнага қўйилиши ҳам ўзбек совет драматургиясининг, ҳам театр санъатимизнинг муваффақияти бўлди»<sup>188</sup>. «Юрак сирлари» хусусидаги баҳс шундай якунланди.

Поэзияда конфликт каби типиклик ҳам ўзига хос равишда намоён бўлади. Лириканинг проза ва драматургия асарларига нисбатан типик шароитни кўрсатиш имкониятлари хийла чекланган. Шу боисдан лирик қаҳрамон типик шароитни ўзида бўрттириб мужассам этган ҳолда воқе бўлади, у орқали биз конкрет тарихий воқелик ва ҳодисанинг қонуний моҳиятини тасаввур этамиз. С. Азимов ўзининг «Ҳамид Олимжон» мақоласида шоирнинг «Бахтлар водийси» шеърини таҳлил қиласа экан, шуларни таъкидлайди: «Бу шеър меҳнат соҳасида ўз ижодий имкониятларини намойиш қилаётган совет кишиларини четдан кузатиб, бетараф туриб ёзилган асар эмас... «Бахтлар водийси» социалистик жамият қураётган халқ билан бирга тер тўкиб яратилган меҳнат гимнидир. Ижодий, озод меҳнат кишисининг типи — «Бахтлар водийси»нинг асосий лирик қаҳрамонидир.

<sup>187</sup> Ўзбекистонда адабий танқидчиликнинг ривожланишига доир баъзи масалалар//Шарқ юлдузи. 1954. № 3. 105—106-бетлар.

<sup>188</sup> Қизил Ўзбекистон. 1955. 23 сентябрь.

Лирик қаҳрамоннинг кечирмаларини... кўрсатища, шоир конкрет тарихий воқеадан фойдаланади. У ҳам бўлса, тарихий беш йилликлар даврининг асосий вазифаларидан бири бўлган Иттифоқимизнинг пахта мустақиллиги учун кураш воқеасидир. Бу кураш натижасида Ўзбекистон Иттифоқимизнинг асосий пахта базаси бўлиб қолди, ўзбек халқининг иқтисодий-маданий аҳволи мислсиз яхшиланди, ўлкамиз баҳтлар водийсига айланди, шонли Коммунистик партия ва Совет ҳукумати бу курашга раҳбарлик қилди. Шеърнинг ғоявий йўналиши халқ ҳаётидаги ана шу типик ҳодисанинг поэтик картинасини яратишдан иборатдир<sup>189</sup>. Тарихан конкрет типик шароит лирик қаҳрамонда, унинг қалб қуёшида намоён бўлади ва бизга эмоционал таъсири қиласи.

Ўша йилларда конфликт каби типикликни нотўғри талқин этишнинг кучайиши қатор лирик асарларга муносабатда ҳам кўринди. «Конфликтсизлик назарияси» таъсирида ҳаётий зиддиятлардан ҳоли «безакли қаҳрамонлар» пайдо бўлди. Типикликни бир томонлама, юзаки тушунишлар натижасида ҳам шунга ўхшаш ҳолат рўй берди. Бу ҳол «лирик қаҳрамон» ҳамиша баҳтли, саодатли, унинг учун «мураккаблик», «мусибат», «оғир психологик ҳолат» — булар «типик эмас» деб чиқишлиларда кўринди. Оқибатда «дардсиз», қалб ҳароратисиз, кучли эҳтирослардан ҳоли бўлган сийқа, ялтироқ, сохта кўтаринки шеърларнинг кўпайишига хийла кенг йўл очиб берилди.

«Правда»нинг «В. Маяковскийнинг ижодиётини марксистик ёритиш учун» (1953, 2 март) деган редакцион мақоласида шуларни ўқиймиз: «Шеърий ижодиётнинг ҳозирги аҳволи совет кишиларининг қалбида жиддий ташвиш туғдирмоқда. Кейинги вақтда катта, ҳаяжонлантирувчи поэтик асарлар деярли яратилмади, кенг эпик планда ёзилган асарлар йўқ. Лириканинг кичик темаларда ёзилиши, арзимас темалар доирасида айланиши ва лирик бадиий умумлашмалар даражасига кўтарили маслиги одат тусига кириб қолди. Туссиз, бўш, юзаки ва ҳиссиз шеърлар кўп ёзилмоқда, буларни ўқиган киши сира ҳам қаноатланмайди»<sup>190</sup>. Бу йиллардаги ўзбек поэзиясида ҳам шундай ҳодисалар учарар эди. Танқидчиллик эса унга ҳар хил муносабатда бўлди. Биргина мисол. Ҳамид Гуломнинг «Янги боғ»

<sup>189</sup> Шарқ юлдузи. 1954. № 8. 106-бет.

<sup>190</sup> Шарқ юлдузи. 1953. № 4. 104-бет,

шеърлар тўплами (1951) чоп этилиши билан қатор тақриз-мақолалар босилди. Т. Собиров ўзининг «Бахтли ҳаётнинг илҳоми»<sup>191</sup> мақоласида бу асарни мақтаб чиқди, унга қарши В. Мирзаев шундай дейди: «Т. Собиров бу мақоласида Ҳамид Ғулом асарларига объектив ёндашиб унинг ютуқлари билан бир қаторда хато ва камчиликларини ҳам кўрсатиш, беғараз танқид қилиш орқали ёрдам бериш ўрнига, ҳаддан ташқари мақтовга берилиб кетган. Ҳамид Ғуломнинг хато ва камчиликларидан кўз юмиб ўтган. Бундай танқид шоир учун ҳеч қандай фойда келтирмайди, аксинча, унинг ўз ижодига нисбатан талабчанлигини заифлатади, бегам қилиб қўяди»<sup>192</sup>. Танқидчи Ҳ. Ғулом лирик қаҳрамонининг қалби «тушунчаси жуда тор» дейди ва «Олмос» шеъридан шундай парча келтиради:

Сизни кўрдим, кўксим тўлди севинчга,  
Теракзор шовқини кўнглимни олди.  
Айрилиқ қайфуси қалбимдан худди,  
Соҳил туманидай энди тарқалди.

«Ўзбекистон коммунисти» журналида «Шарқ юлдузи» журналининг юксак ғоявий-баднийлиги учун курашайлик» номли мақола босилди ва унда бир қатор шоирларнинг асарлари танқид қилинди: «Журналда босилиб чиққан қатор шеърлар, айниқса, М. Бобоевнинг «Нок», «Севги қўшиқлари», Э. Раҳимовнинг «Янги қадам», Ж. Жабборовнинг «Москва шеърлари», Мирмуҳсиннинг «Шоирга», А. Мухторнинг «Истак», А. Раҳматнинг «Қизил майдон», Х. Расулнинг «Ёш» каби шеърлари поэтик ҳис ва туйғудан анча йироқ ва паст савияда ёзилган». Сўнгра «Шарқ юлдузи» журналида «типиклик», конфликт, ижобий қаҳромон проблемалари ҳақида диққатга сазовор бўлган бирорта мақола берилмади»<sup>193</sup>, деб алоҳида таъкидланади.

## ҚИСҚАЧА ХУЛОСАЛАР

Ўзбек адабиётшунослиги ва танқидчилиги Улуғ Ватан урушидан кейинги даврда ўз тарихий тараққиётининг янги босқичига кўтарилди. Унинг тадқиқот обьекти анча кенгайди ва чуқурлашди. Минг йилдан ортиқ ўзбек адабиёти тарихини тадқиқ этишга эътибор кучайди. Айниқса, буюк шоир Навоий ва ундан

<sup>191</sup> Ёш ленинчи. 1951. 13 октябрь.

<sup>192</sup> Шарқ юлдузи. 1952. № 6. 124-бет.

<sup>193</sup> Ўзбекистон коммунисти. 1953. № 12. 40, 43-бетлар.

кейинги даврлардаги адабиётимизнинг атоқли санъаткорлари ижодини монографик планда тадқиқ қилишда жиддий ютуқларга эришди. Ўзбек совет адабиёти ва унинг машҳур, таниқли намояндалари ҳаёти ва ижодини монографик планда ўрганиш ва тадқиқ этиш биринчи планга чиқа бошлади. Бу борада ўндан ортиқ танқидий-биографик очерклар вужудга келди. Бадиий ижоднинг фундаментал проблемалари — социалистик реализм масалалари ҳақида дастлабки йирик ишлар пайдо бўлди.

Адабиётшуносларимиз ва адабий танқидчилигимиз сафи талантли янги кучлар билан кенгайди, улар хийла фаоллашди. Коммунистик партия Марказий Комитетининг қатор қарорлари муносабати билан адабий танқиднинг адабий ҳаёт билан ва коммунистик қурилиш билан алоқаси янада кучайди. Адабий жараён проблемалари танқидчилик ва адабиётшуносликнинг диққат марказига кўтарила борди. Танқид поэзия, проза ва драматургия соҳасида яратилган деярли ҳар бир мұҳим асарга муносабат билдиришга интилди. Шеърий тўпламлар, поэмалар, очерк ва ҳикоялар, повесть ва романлар, драма ва комедиялар ҳақида жуда кўп тақриз ва мақолалар босилиб чиқди, танқидчилик тарозисига тушди. Танқидчиликнинг адабий-тарихий процесстаги роли кўп даража ортди.

Адабиётшунослик ва танқидчилик савияси ҳийла кўтарилилди. Замонавийлик, гоявийлик ва бадиийлик, ижобий қаҳрамон, конфликт, типиклик ва бошқа қатор проблемаларни тушуниш ва талқин қилишда муайян ютуқларга эришди.

Давр, ижтимоий ҳаётдаги мураккабликлар адабиётшунослик ва танқидчиликда ҳам намоён бўлди. Танқидчилик вулыгар социологизм, догматизм, нигилизм ва ўта субъективизмдан иборат заарли тенденциялар мешаққатларини бошидан кечирди ва улардан қутилишда жиддий ютуқларга эришди.

## МУНДАРИЖА

ИНСТИТУТДАН	5
КИРИШ	9
Адабий танқид тарихини ўрганишнинг методологияси ва методикаси масалалари	9

## БИРИНЧИ БОБ

Ўзбек совет адабий танқидининг вужудга келиши ва илк қадамлари (1917—1932)	32
Революцион воқелик ва адабиёт	32
Янги адабий танқиднинг илк қадамлари	48
Социалистик воқелик, янги инсон ва адабий танқид	77
Жанрий изланишлар ва адабий танқид	93
Адабий танқид ва классик мерос проблемаси	124
Қисқача хуросалар	147

## ИККИНЧИ БОБ

Ўзбек совет адабий танқиди социалистик реализм эстетикаси билан қуролланиш йўлида (1932—1941)	152
Адабий танқидда ижодий активлик	155
Адабиётда янги инсон тасвири учун кураш	170
Социалистик реализм эстетикасини эгаллаш йўлида изланишлар	182
Марксча-ленинча адабиётшуносликнинг илк қадамлари.	198
Қисқача хуросалар	203

## УЧИНЧИ БОБ

Улуғ Ватан уруши даври ўзбек адабий танқиди (1941—1945)	205
Ватан мудофааси ва адабиёт	205
Адабий танқидда давр ва янги қаҳрамон образи	208
Адабий танқидда замонавийлик ва жанговарлик	226
Ўзбекистондаги рус танқидчилиги	252
Қисқача хуросалар	270

## ТУРТИНЧИ БОБ

Улуғ Ватан урушидан кейинги давр ўзбек танқидчилиги (1945—1956)	272
Йирик тадқиқотлар йўлидаги илк қадамлар	280
Диққат марказида — адабиётшунослик ва танқидчилик	

Ривожи	285
Тақриз адабиётнинг ойнаси	291
Социалистик реализм эстетикаси масалалари ва танқид	309
Адабиётнинг замонавийлиги учун кураш	314
Танқидчиликда ғоявийлик ва бадиийлик масалалари	319
Ижобий қаҳрамон проблемаси — диққат марказида	323
Танқидда бадиий конфликт проблемаси	330
Адабий танқидда типиклик проблемаси	337
Қисқача хулосалар	344

}

# ИСТОРИЯ УЗБЕКСКОЙ СОВЕТСКОЙ ЛИТЕРАТУРНОЙ КРИТИКИ

В 2-х томах

ТОМ I

*На узбекском языке*

Ташкент, «Фан»

Ўзбекистон ССР ФА А. С. Пушкин номидаги  
Тил ва адабиёт институти илмий Совети, Ўз-  
бекистон ССР ФА Тарих, тилишунослик ва  
адабиётшунослик бўлими томонидан нашрга  
тасдиқланган

Муҳаррир *М. Алиева*  
Рассом *В. Зиновьев*  
Техмуҳаррир *О. Мосина*  
Корректор *М. Сайдова*

ИБ № 3801

Теришга берилди 14.04.87. Босишга рухсат этилди  
26.06.87. Р03097. Формати 84×108<sup>1/32</sup>. Босмахона қо-  
ғози № 1. Адабий гарнитура. Юқори босма. Шартли  
босма л. 18,27. Ҳисоб-нашириёт л. 17,8. Тиражи 1488.  
Заказ 106. Баҳоси 3 с.

ЎзССР «Фан» нашриёти: 700047, Тошкент, Гоголь  
кўчаси, 70.

ЎзССР «Фан» нашриётининг босмахонаси: Тошкент,  
М. Горький проспекти, 79.